

本國學基
叢書

湖海詩傳

三



由國家圖書館數位化、典藏

書叢本基學國

湖海詩傳

(三)

輯昶王



商務印書館發行



湖海詩傳卷二十六

趙文哲

字升之。號璞函。上海人。乾隆二十七年召試。賜內閣中書。殉金川難。卹贈光祿寺少卿。有媿雅堂姬

隅等集

蒲褐山房詩話。升之賦才英敏。少在申江書院。得凌少司馬指授。論詩以新城為主。既而與張策時。凌祖錫。汪韓懷。吳企晉。同學。至蘇州。又與予及鳳階。來殷。互相砥礪。於唐宋元明本朝大家名家。無所不效。亦無所不工。自入內閣。直機地。益為于文襄公所賞。暨借予入滇。蜀得江山之助。所作尤變化新奇。至其外佳句。可摘者。如藕花香。遠隨蘭棹。桐樹陰。清滿葛衫。層層露。檻全臨水。葉葉風。帆直到門。迹異。騷人吟。楚些。趣同。傲吏託。齊諧。中年。絲竹。愁兒。少日。楂梨。憶弟。兄。白髮。已虛。鉛鼎。術。青山。空憶。草堂。賞。率得。碧蘿。能補。屋穿。來黃。竹解。擎箱。秋風。遠度。關門。樹曉。日晴。開嶽。井蓮。老去。評量。絲竹。肉客。來贈。苔影。形神。夕陽。沾酒。柴桑。路。夜雨。題詩。苦竹。州。出。世。尚。仍。居。士。服。浮。家。擬。署。散。人。銜。矢。石。餘。生。嗟。已。老。詞。章。小。技。愧。非。尊。晚。歲。蟲。魚。空。著。述。故。山。猿。鶴。漫。移。文。羽。林。卒。勁。排。鷓。鴒。上。苑。書。稀。斷。雁。鴻。亦。炎。洲。之。翡翠。渤。海。之。珊瑚。採。擷。不。能。窮。也。

鄭學齋詩為王德甫作

秦灰漢始噓。孔壁魯乃壞。五經日再中。萬古破昏靄。都講滿石渠。同源異流派。精壘推小毛。曲臺屬大戴。田因高弟傳。伏藉嬌女對。胥靡申所羞。巫蠱孔猶晦。式悲歌驪駒。固困刺猥殺。餘子列儒林。無譏比自郇。

東京稍凌遲。顰視競雕繪。圓橋聽已非。倚席講斯懈。板蕩及董逃。兵甲日犇駭。黷宮逢採薪。射圃見鋤菜。零縑製勝囊。大帛作帷蓋。天未喪斯文。川岳秀靈在。偉哉後鄭公。通德卜門大。髫年恥就吏。耕養甘負耒。游學走四方。竟豫更燕代。於時馬扶風。皋比意頗快。絲竹列絳紗。三年不迴睞。目送吾道東。贈言發深喟。六藝論既通。七緯學豈外。九章窮纖毫。三統究元會。遂鍼左邱盲。復起穀梁廢。文成百萬言。決若江河沛。傳家按禮經。趨庭著明誠。自言苦萍浮。典籍率腐敗。寫定藏名山。日暮遠靡屆。妖夢驚龍蛇。仰止失衡岱。景侯實幹材。駁難逞狂喙。如何宋諸儒。高談氣矜邁。占易先後殊。陳書古今悖。春秋惟刻深。鄭衛盡淫穢。訓詁束高閣。膽決吁可怪。篁墩劇披猖。栗主竟裁汰。撼樹同蚍蜉。亂苗等秕稗。一髮懸千鈞。後死心孔痲。王郎大雅材。風華被江介。餘事稱詩人。咸韶掩離韎。逢時每途窮。汲古獨津逮。青箱抱遺經。力欲掃榛薈。沈酣笑積蟬。慎重疑觸蠱。妙或能解頤。快真過爬背。時見抗手來。伉伉壓流輩。圓泖水迴羅。橫雲山點黛。中有一畝宮。差勝三間廡。高懸禁扁書。體勢重金薤。平生北學心。昌言震聾聵。子亦鄙章句。結習久未瘥。志寧逐鷓翔。謗可任蟬喝。敢慚莛叩鐘。竊喜針引芥。君能張吾軍。鼓衰期可再。頗聞澱湖陰。孔林接香界。故物留壁環。勝地絕塵塏。心非戀蒹鱸。謀已叶蓍蔡。問奇來叩門。春風長書帶。

京江曉發

夢醒江月斜。隱隱數柔艣。舟人覺潮生。掛帆逐前侶。霏霏水氣滋。靄靄露華聚。偶因白鷺飛。烟中辨洲渚。

須臾散初陽。已見瓜州樹。汀花何溟濛。隔江夜來雨。山迴露確牀。岸迴隱漁鼓。微風來炊烟。人家渺無所。羈心信多感。景物矧如許。三嘆卽長途。勞生念終古。

江上復遇金棕亭同人永濟寺登觀音巖眺望作時金將赴廣陵

微雨青楓寒。羈禽去遙裔。悠悠渡江船。日暮更愁繫。別君水上樓。逢君山間寺。意外得攜手。塵蹤暫同憩。入門杪攏陰。風葉時一墜。商飈從西來。傾聽浩無際。理策肆遐矚。荆豫宛相次。崖傾隱頽陽。谷邃振涼吹。樹杪榜歌喧。烟中樵響逝。離合洵不常。身世矢相棄。何處廣陵思。殘鐘隔江至。

烏石灘

灘行日百憂。駭此水底石。烏石獨人立。門水出奇力。一撇修蛇赴。千盤怒馬勒。旋渦倒來深。陷作飢蛟宅。往往月黑時。磨牙伺羈魄。長年亦飽經。既至色如墨。入險萬夫譟。險絕聲轉寂。百丈細於絲。性命輕一擲。我生抱區區。踐此世路窄。太行偶然移。銜木竟無益。齋心報則殊。元天自幽默。毋恃呂梁游。風波浩無極。

過桃源初上一灘名毛甕子

灘流清可憐。阻石形勢變。一望江空濛。如雨復如霰。槎牙數峯峙。中各通一線。石立水亦立。飛浪搏人面。水中八尺筥。水際百丈繚。遙遙相叫呼。有若赴急難。當其入險時。出死力與戰。昔稱倒水巖。靈秀桃川冠。龍溪碧玉流。茂竹紛可玩。灘上爲甕子峯。峯與倒水巖相望。卽水經注所云沅水東歷三石澗。幽景不我秀若削成。茂竹便娟。致可愛玩者也。龍家溪亦經此。南注于沅水。

娛。徒令飽憂患。何處漁仙菴。聞鐘起三歎。

大風過芝草白榕諸灘

夜雨聲蕭疎。晝雨勢稠密。山川水雲中。凝望渺如一。今日灘稍平。得雨翻蕩瀟。小舟駕長風。輕矯故無匹。水石自毫縱。狃勝犯倉卒。中流一洄漩。長年爲股栗。豈知十幅帆。空際破狂橘。篙櫓未及施。州里速傳驛。竟以不戰勝。此理陰符述。貪天亦何功。靜念爽若失。行人幸無恙。何啻破冢出。

日暮風更橫。去橫空與水搏。水亦飛怒濤。直向柁樓落。風水自相鬪。吾命果安託。瓶盎鏗有聲。衣履濕難著。低蒲二三葉。一走不可縛。緣溪石嶠嶢。未敢著吾脚。進止兩無計。指顧徒駭愕。天憐我淹滯。亦增灘勢惡。送以飽帆風。使知壯遊樂。惜無萬斛舟。橫海截蛟鱓。小舫薄於紙。豈足試盤錯。繫纜餘驚魂。言就荒戍柝。一望波連山。徒侶何處泊。是夕與僕人舟相失

鷓鴣灘

遠聞水鳴灘。近望雲點墨。真如千鷓鴣。出沒浪花白。立如怒將飛。拳如倦且息。踏沙去遲遲。嬉雨來拍拍。散布整復斜。羣居雙或隻。一片清瑤流。蹴踏成碎碧。因之生鷺濤。橫空大於席。扁舟簸其間。一波更三磔。大灘苦浩淼。小灘苦偪仄。有大鷓鴣小鷓鴣茲鳥又何知。矧乃水中石。安得并州翦。翦此蔽江翼。

牟珠洞

黔之洞最奇。我所游未快。羈蹤歲將徂。勝踐日斯邁。名徵牟尼珠。地納須彌芥。款戶朝烟霏。穿穴午曦曬。
一柱聳琳宮。四隅圍石砦。像設因自然。跌居城不壞。初入洞有石柱中懸柱上環刻佛像乳泉薦晨供。籟韻傳夕唄。惜無宗
雷緣。永謝向禽債。尋幽利在需。鼓勇受以夬。乍窺窈兮深。稍進迫且隘。冲融冬氣藏。闔慘夜分屆。攜策替
桃筇。呼炬投菅蒯。層級雲作梯。重關水爲界。滑屨仰難留。頽冠俯欲罣。先行試一童。後至挈兩价。由竇意
未慙。自崖興寧敗。回旋任屢探。要害輒交搯。憑虛馭神尻。歷險破天械。苔衣青可裊。草帶碧堪髻。碎硿轉
元飈。沆瀣流素瀆。犖确邊之詩。模糊巨然畫。物態信瑰奇。山心轉清灑。窮搜足開輶。樂事爪爬疥。逝將挾
靈扁。詎俟揲吉卦。潛窟何窅冥。驚濤忽澎湃。虺虺春奮霆。嚶嚶秋起噫。象罔珠自沈。支祈鎖誰解。洞中石
者凡三十一人呼爲天門第一門高二尺許第二門僅尺餘匍匐乃入流泉漫溢幸不深至第三門則高
及一丈中懸石柱宛如棖闔號曰玉龍其下水聲如雷云有神物潛焉卽之深墨無階梯可下游者皆自
厓而返矣凜乎客不從。甚矣吾旣憊。途窮去還遲。徑捷出翻註。興盡懸後期。觀止發長喟。闕略經遺桑。荒唐史
徵稗。撫景縈征魂。揣稱資旅話。其穹疊岑樓。其廣敞官廡。狹者封丸泥。低者覆土簣。砥平或無頗。縫裂或
有殺。每每錯原田。泱泱繞溝澮。虛中鳴鐘鏞。剡上列珪玠。清癯儒摳衣。嚴毅士擐介。陰嶠伏於菟。邃室居
大蔡。晉爨搏而躅。邱鷄鬪已鍛。躅躅涉波豕。淋漓渡水轄。位置無定姿。皴抹亦殊派。衛公失品題。米老徒
起拜。曷爲落鬼區。竟使近蠻寨。旣阻問津懷。枉負垂堂誠。浮生小淹泊。造物大狡獪。屬思窮千形。落筆凌
百怪。如見天門開。天矯玉龍挂。

己丑元日同德甫至螺峯圓通寺禮佛用東坡同遊羅浮道院及栖禪精舍詩韻

白髮又一年。風波幸初揭。曉齋足音絕。靜玩爐煙細。昨夢了無痕。非來亦非逝。相攜訪名藍。因巒疊雲砌。入門向圓蒲。悲涕滴征袂。病葉依孤根。傷禽護餘毳。亦知天地間。金石尙同弊。倘乞去一袈裟。聊與娛晚歲。蓋頭把香茅。被體拏芳荔。南中春早融。帶雪秀蘭蕙。不待桃花紅。已覺隔塵世。嗟此叢垢軀。佛香爲除禊。天親與無著。豈必皆兄弟。再拜叩導師。吾駕何時稅。

冒雨行老秧田道中啼猿滿山率爾成咏

一峯十萬樹。一樹四五猿。一猿千百聲。雜以風雨喧。一日十二時。一程三十里。一軍六千人。盡在猿聲裏。爾猿有何悲。子啼續母啼。爾本斷腸物。不關生別離。三朝復三暮。一鳴更一躍。好似征夫苦。翻唱從軍樂。

客夜同德甫碧夢重訪魯梅作

古梅如枯僧。一蒲伏清衆。又如清都仙。紛紜翳白鳳。脫身兵燹外。孤逸天所縱。憶昨吾獨游。歲寒盟許共。幽娛澹忘言。未敢恣吟諷。相思忽經年。重來挾二仲。匹諸訪古歡。有介禮斯重。脫我黃皮袴。卸君紫絲鞵。入門意翛然。何處著廉從。撫柯互盤桓。自倒粉盜甕。石骨青有稜。苔膚碧無縫。天根茁冰雪。鋤月孰能種。疎花僅數點。已有幽禽哢。想見爛漫時。一片白雲凍。詩慚水部何。心比廣平宋。遲遲喚歸鞭。愛忍薄寒中。空齋酒忽醒。永夕竟何夢。

庚寅除夕碧夢和東坡粲字韻詩見示賦此答之

一燈花忽圓。雙鬢雪將半。誦君守歲詩。動我臨觴歎。愁隨老俱至。人與世相玩。閨楊已頻厄。社櫟原自散。同臨戎馬場。似遇漁樵伴。使令互僮奴。招尋雜昏旦。苦語口銜碑。歡笑頭沒案。驚看桃符新。倦聽爆竹亂。國門隔朝謁。家廟廢薦盥。去日何忽忽。歸期反緩緩。病驥詎受銜。窮魚猶在貫。餘生吾就衰。斯志孰起懦。成虧任鼓琴。輕重付懸炭。勞歌有促節。羈迹無定館。昨惠越酒醇。大勝燕玉暖。近連致紹興酒甚佳醉中泣最多。試驗枕非粲。

檢家書感懷寄內再次前韻

我家五畝宅。水竹居其半。就荒今幾年。空抱歸與嘆。昨開君素書。淚浣不忍玩。上言勉加餐。下言勤服散。懷哉卜刀環。老作春耘伴。憶昔入館初。息壤傳戒旦。鮎魚一上竿。幾至充食案。可憐篁篻曲。力挽中流亂。君實我諍友。何止奉匱盥。自從謫天涯。思君帶趨緩。況聞懸磬室。一錢辭朽貫。平生飛揚念。到此坐頽懦。今夕復何夕。誰餉紅羅炭。徒吟北門詩。尙守西河館。終期攜手去。言就茆簷暖。若準二歲刑。明日免輸粲。予以戊子小除日抵濱

東充齋德甫三次前韻

桐音曷以哀。其尾焦已半。亦如傷心人。未語先愴歎。三年走關塞。戈甲若服玩。引領望休兵。春田快牛散。

逐臣果安求。庶趁歌衢伴。譬諸無目者。永夜亦思旦。錢王我石交。旅食每同案。為民呼號亟。謂充為母方寸亂。謂述餘事但指口。涕淚日忘盥。深知時命窮。反苦歲月緩。炯然壯士肝。金石尚堪貫。此身戰場餘。敢遂懦夫懦。柳子說捕蛇。白傳紀賣炭。感事良區區。尚欲陳史館。今時泰階平。願布春臺暖。書生輒大言。一任三軍粲。

寄懷習菴白華耳山四次前韻

昔人貴讀書。僅求袁豹半。同岑得三友。乃有望洋歎。我老學殖荒。空對日景玩。槁瘁似左徒。疎懶此中散。豈能挾鉛槧。來與老兵伴。自顧本薄植。斧斤復旦旦。公等大雅材。作吏傍香案。同聲奏朱弦。洋洋曲將亂。神聽和且平。庸以侑清盥。三年吾不見。如病失和緩。古歡復有幾。夷險心一貫。苦憶臨歧言。誦之激頑懦。天涯一寸腸。日夜攪冰炭。定知柏葉尊。時過藤花館。予京寓有古藤一株勉旃問字人。豈特借餘暖。兒子秉淵近受業習庵白華之緘詩致綢繆。何夕見此粲。

永昌得錢辛楣學士書卻寄八次前韻

易羅水一勺。鯉魚無尺半。素書從何來。釋我當食歎。讀罷置懷袖。分作三歲玩。學士今儒宗。品地壓黃散。憶昔春明門。蕭然素心伴。著述樵馬班。寤歌接伊旦。矢之蒼松枝。貽以青玉案。敬奉穆如篇。每許起為亂。自從歸子舍。眷戀雞鳴盥。頗聞庭誥勤。趨朝戒毋緩。去住迹未歧。出處道本貫。吾衰果何為。自以憤勵慳。

杜牧有罪言。近已學吞炭。空留喻蜀文。曷足付芸館。思歸亦良苦。尙念挾纊暖。君如終惠存。勗彼門子粲。
來書過誇兒子
乘淵近狀故云

感遇九次前韻

子美吏隱兼。長康癡黠半。今吾定何如。自笑還自歎。遇事論短長。久欲愧陸玩。又愧殷伯道。避賢趁行散。
咄咄坐書空。獨與形影伴。已爲斷尾雞。何苦強知旦。覆鹿試追求。盜羊可并案。睡訝歸夢濃。無奈啼鴉亂。
平生一片心。不用洗玉盥。誰令州閭會。雅琴彈擘緩。薰蕕強從同。涇渭反相貫。可憐臣精銷。曷敢諱衰悞。
微命輕鴻毛。日試陰陽炭。此身果安歸。故園亦假館。壺水自知寒。熨火自知暖。孰通繫表言。千載望荀粲。

乞畫一百二十四韻寄贈王隄爲明府

鳳儀

昨開君素書。如共翳燈語。磊磊見意氣。綿綿感心腑。斐然情文兼。風格近典午。手熏蘅荃蓀。步節珩璜瑀。
恍披光明錦。必出天孫杼。所悲生同岑。廿載晤言阻。自我從軍行。幸近花封古。君亦奉符檄。橐管趨幕府。
謂言握手易。互作窮塞主。懸匏繫何爲。漂萍泊無所。合并尙愆期。張角逢六五。知君意鄭重。不在加餐努。
平生抱區區。思爲知己吐。岷川浪奔雷。昔嶺雪飛暑。中隔一千里。日夕枉延佇。況我飽憂患。偶幸脫網罟。
三寸舌猶在。敢使禍重賈。鬱茲塊壘胸。五岳莽撐拄。今吾竊有請。能事君儻許。清門擅丹青。幾輩入堂廡。
兩髯尤絕倫。謂君與難兄
蓬心舍人久重懷瓘估。昔聞唐退傅。屏風競毫楮。東坡笠屐圖。逸韻播蠻土。願學誠太妄。

匪徒異出處。為君述舊遊。歲月駭飛弩。頭顱愧人看。脾肉嗟自拊。惟餘好奇懷。頰毫或有取。浣花牋十樣。

君畫準此數。一圖虎山橋。探梅倚柔艣。帽簷壓風雪。指點問邨酤。鄧尉探梅圖第一一圖雲林寺。冷泉濺衣苧。畫

夢隨輕颺。引入萬松去。雲林銷夏圖第二更憶幸已秋。卸帆自孤嶼。遂登雁宕山。瑰恠圖經著。天台雄瀾東。持比

乃邾莒。宴坐臨靈湫。百面震雷鼓。璇扃宵沈沈。白氣裊一縷。我向諾巨那。乞石平似礎。入山兩汗脚。快洗

碧玉乳。癡龍且安眠。亦莫敢爾侮。此圖重于鼎。君以弱腕舉。筆勢挾瀑勢。紙外拗餘怒。龍湫濯足圖第三是皆少

賤日。吳越視庭戶。水餐就漁磯。岩宿寄樵隲。相於結汐社。還往足鷄黍。詩多正始音。淳悶同祝歎。一從落

人海。此樂不我與。繡衣被廟儀。瓊粒竊倉鼠。抗塵復走俗。顧影中自憮。維時關西館。著作盛鷄序。史鑑評

千秋。方輿考三輔。予在館承修通鑑輯覽及一統志。蓋纂輯直隸省甫竣而罷。我實預編輯。燒盡如椽炬。修書圖第四其年帝秋獮。清蹕忝

陪扈。于田馬蕭蕭。在囿鹿夔夔。對仗揮制草。動色飲飛伍。塞垣管筆圖第五校書天祿劉。賦射華林庾。二事試入

畫。差足洗寒窶。噫嘻遇何常。升沈難逆覩。芳蘭曷為鋤。叢桂奚以斧。獻玉詎招刑。投珠胡見拒。得馬焉足

憑。亡羊寧尙補。一跌六七年。荷戈走邊圉。敢辭辱泥塗。聊比越草莽。單車乍離燕。短櫂旋過楚。曉臨弄珠

臯。暮托捐佩浦。驟聞隣船笛。嘹唳出汀渚。湖天月忽落。楓林颯寒雨。衝烟哀狻鳴。跋水瘦蛟舞。未出玉門

關。已使感羈旅。何如青衫人。送客江之滸。夜船聞笛圖第六泊入征南軍。王事念靡盬。病來全似疴。食至半疑蠱。

嗟哉筋力衰。魍魅恐難禦。行行大金江。毒漲沸如煮。助以擲鶴風。萬室失保聚。我駕獨木舟。簸蕩身偃偻。

刀箭紛滿眼。浮髀礙洲渚。一葦犯黑來。勢已等騎虎。藐焉六尺軀。輕抵窮蟬羽。金江兩渡圖第七生還真偶然。仍

逐防秋侶。瘴鄉居何陋。敦樸擬鄒魯。借箸幸多暇。雅歌從去征虜。謂大宗伯雲岩先生城南湧珠泉。日涉比園墅。泉在

永昌城外古易羅池也。纍纍蛻地穴。若可穿以組。孰云泡易滅。宛在玉盤貯。庶幾濠上觀。藉遣謫居緒。翫泉圖第八蜀孽

兩金川。僻處越塗禹。山名怨則鬪蠻觸。昵則倚蛩駘。誰築籌邊樓。而不備桑杜。王赫斯有征。重臣寄心膂。我

亦承賜環。星言赴益部。昨冬掃一窟。檻車繫其父。圖籍無可收。安問故鐘簋。降人接踵至。哀涕被奎踣。一

刀尺有咫。擎獻自蠻豎。其詞劇嘍麗。略不辨儂汝。譯者以臆對。匪云實筐筥。紈牛與露犬。件繫在軍簿。感

此不殺恩。願供香一炷。報之雙錦段。燭下數摩撫。霜華何稜稜。冷氣逼眉宇。十步五步間。鬼物近斯沮。誓

將兩脅血。爲刀旌厥武。蠻人獻刀圖第九君圖此四者。所遭果孰愈。荼蓼將同根。非辛亦卽苦。行年四十九。志已

絕華靡。生還豈不懷。海畔有環堵。我家非素封。義方秉遺矩。泉明勤責子。康樂善述祖。誓墓右軍文。思歸

季倫敍。東臯卜丙舍。前場後爲圃。春及童抱耒。秋至婢舂杵。白頭好兄弟。佳日速肥羜。淵也稍嗜學。不競

紫囊賭。一經授先生。津逮在訓詁。毛鄭如可作。中流藉砥柱。沒齒迺無憾。願宏責良鉅。圖成當息壤。不死

天所予。丙舍授詩圖第十君畫過王宰。我詩慚杜甫。發函定絕倒。筆墨代縞紵。蒙莊說畫師。盤礴動當宁。問君一

揮洒。呼醉盡幾甌。經營極意匠。擺脫宣和譜。他時眎哲彙。難着顛崖樹。

灘石多怪偉。近所見則嵌空秀削。大類吾鄉太湖石。特林立溪岸間。不以少見珍耳。得詩一首。

楚南謂多石。斯語殊憤詫。灘行始信然。怪很亦可怕。自過雄谿路。瓏玲見頻咤。十里更五里。目賞苦無暇。峨峨冠劍偉。冉冉笑顰姹。梯雲疊三成。夾水垂兩架。俯峙如鼎鼐。仰承若爨爨。古苔繡一片。必裂四五罅。玉樹灣之東。晴江見虹跨。仙人橋。土人呼爲。低懸半月彎。橫鎖兩溪汶。千峯雪消時。玉龍走其下。何殊藍橋瀑。跳盪各雄霸。旁有峯數朵。未肯出彼勝。顛米透縐瘦。三品總無價。我鄉笠澤湖。水石互冲瀉。鼉渚龍渚間。蚌蚌誇入化。方此真小巫。甲乙非旅亞。惜哉落炎荒。僅當障水壩。浮泥擺枯蘆。野火延老柘。棲烟烏斯巢。避雨牛所舍。往往放逐人。於此發悲訝。我獨賀石遭。幸不置臺榭。神物本難馴。寧堪入罟獲。未聞壺公壺。可以籠岱華。大小豈殊觀。盛衰常代謝。平泉無百年。秋風遍耕稼。土花何斑斑。當日覆歌帕。石丈苦無言。輒遭腐儒罵。不如好江山。蒼蒼閱冬夏。五溪況無瘴。風景比杜瀨。此中豈少人。筆力柳州駕。爲石發奇偉。光怪斗南射。終當一訪之。息壤歸帆卸。

大池灘

小池連大池。蛟龍有重坎。騎虎勢難下。決進豈吾膽。日落風蕭蕭。四顧墨雲靄。濤頭倒如山。相戒勿輕撼。四舟一心力。循環互牽攬。爭此命一絲。諄誦聲慘慘。我舟最後發。忽遇石角岼。百丈罌急流。舟如斷蘆颯。一夫出應募。懸絳踏幽窞。翻身雪浪中。微見一燈閃。抉石負而趨。一步猶一險。前舟見相賀。到岸鼓音統。急傾斗酒勞。驚定生百感。安得百萬夫。習流號勇敢。

宿汝川縣作

朝發尤溪驛。夕宿汝川縣。山城小於斗。紛沓市廛變。赳赳羽林軍。顧盼炫乘傳。圍人牽馬來。一躍走如電。回首呵下駟。槽櫪差旣遍。徵求到芻菱。鞭撻及丞掾。誠哉好身手。我欲觀一戰。憐余館未定。躑躅日已晏。幸逢查使君。謂儉堂故人真戀戀。殷勤掃塵榻。咄嗟辦廚膳。燈前兩白頭。絕塞得重見。妻孥何足問。身在尙疑幻。軍行事一槩。欲言自傷賤。鬱然壯士肝。聞雞感明旦。

有買得古碧玉小印者文曰文雲孫余謂此信國公舊署名也爲作長歌以諗好古者

正氣迴薄化紫雲。夢蘭吐瑞嘉名分。燕臺血埋千載碧。誰斲琬琰遺雕文。猩紅欲滴古翠剝。嫩于苔色圓于簣。蕭然眉宇撲蒼潤。令我懷古心拳勲。文山白哲美如玉。妙年銳意窮皇墳。玉帶生研最奇古。應有小印留書芸。集英射策炳龜鑑。御筆第一書劉蕡。天門榜開非肇錫。比諸正則稱靈均。一從麗江領戎幕。飛書草檄馳千軍。押成鳳尾自鈐記。懸知血淚縈朱紋。黃冠歸鄉苦未得。衣帶銘語空斷斷。晞髮客去碎如意。織綾婢老霑羅裙。巾箱舊玩散榛莽。時見寶氣騰烟蜃。井中心史亦已出。此印足直金盈斤。流傳估客辨真贋。異名小字疑紛紜。君不見六陵雙匣厄羊馬。玉瓶銅鬲隨妖氛。區區片石以人重。不與璽角同漂焚。段司農笏屬國節。今無其物猶餘芬。摩挲三嘆叫朱鳥。天龍天矯捎蒼雲。

蘇武牧羝圖

白日欲沒黃雲徂。海氣直撼豎巫閭。烏頭不白馬角無。牧羝求乳何爲乎。咄咄子卿意良瘖。湯蘗甘之非
堇荼。手持秃節六載餘。上林雁斷無來書。傳聞故園久荒蕪。保宮老母愁桑榆。爭船觸柱兄弟誅。飄零何
處求妻孥。同來吏士各羈孤。相逢不敢鼓嚨胡。丁年匆匆雪髯須。兜離窈停難久居。人生到此誰不渝。君
獨奚爲抱區區。陰山八月雪載途。朔風如刃摧肌膚。野鼠掘盡百草枯。羊飢人飢聲淚俱。仰天一慟雲模
糊。羈禽離獸爲叫呼。隴西將種亦丈夫。曹柯之盟豈盡誣。哀哉椎髻穹廬趨。草間苟活羣羊如。河梁置酒
空爾娛。刀環餘語何其愚。不有子卿全厥軀。將使夷狄輕中都。嗚呼自昔保秦資廟謨。四夷爲守言非虛。
漢家邊患惟匈奴。奔狼突豕兼封狐。犂庭絕幕計已疏。和親況復金繒輸。譬諸朽索御渥駒。安能俯首馴
薪芻。嗟彼使者亦何辜。雲中區脫經崎嶇。驕虜睢睢更盱盱。片言立使肝腦塗。宛王懸頭南越屠。窮荒難
拯冤魂蘇。生綃慘淡誰所摹。決皆恍惚馳伊吾。題詩勿用相嘆吁。君不見麒麟閣上懸新圖。

凌祖錫招同諸子集沉香禪院卽席述舊爲長歌

客居近市塵土欺。況逢三伏炎官威。手搖紈扇臥冰簟。猶似深甌遭蒸炊。板扉剝啄來舊雨。雙眼一豁開
金篋。時張策時過訪西園公子雅愛客。青猿折簡旋招攜。摒擋琴尊過蕭寺。不用飛蓋相追隨。幾年不到舊遊地。
僧雛據座稱傳衣。須臾列席向小閣。依然四面松風吹。浮瓜沉李破甘碧。勅斷葱蒜兼羊豕。狂歌起舞樂
復樂。半酣話舊生酒悲。憶與諸君共盤礴。意氣倣儻誰能羈。封侯似可談笑得。便思決起排天達。十擲輒

韃豈關拙。一錢不直安足嗤。就中吳郎晉盛文藻。蠻牋醉墨何淋漓。尋芳一曲交唱和。井華汲處能歌之。自從人事變桑海。相去咫尺同天涯。餘生憂患百無用。曳尾久已甘塗泥。少年綺語亦懺盡。鑪香經卷差相宜。人生離多會苦少。好夢一斷無由追。相逢有酒不盡醉。明朝歧路徒相思。感余區區呼更酌。不知主客當爲誰。起行松陰看月出。清影照鬢涼絲絲。

憂旱

重光之春苦雨恆。三農無麥愁薪蒸。五月六月復癩旱。火雲終日峯崢嶸。婆娑女媛自拜舞。勃谿鳩婦空飛鳴。高田盡成龜兆坼。深溝或作釜氣蒸。諸司皇皇休百務。郊宮索祭嗟難憑。三吳賦稅稱重地。漕船百萬輸神京。承平日久患人滿。斗米二百錢有贏。春葦作飯不得飽。須臾毋死祈西成。驕陽何意更肆虐。坐見無路呼癸庚。洪範五行昔曾考。雨暘休咎皆有徵。我皇御宇重邦本。豳風無逸陳丹青。屬車今年指吳會。比於先王春省耕。賜租賜爵恩屢沛。至今閭井猶歡聲。一隅告災詎爲害。天地覆載無殊情。流民定許監門繪。盛世寧有宏羊烹。天心人事一訴感。佇見甘雨隨風零。溟溟汎汎徧千里。共卜高廩多藏秬。窮儒此意幾悵望。步檐愁見昏中星。

題蕭尺木畫關山行旅圖

有山漸漸水迢迢。有車班班馬蕭蕭。行人攜持雜負戴。十里五里相周遭。蜿蜒或如蟻緣垤。翩翻或作鳥

赴巢帽影遙看出復沒。郵程那計昏連朝。關山突兀入眼底。秦城蜀棧窮峒嶺。誰披絹素寫絕景。蕭梁王孫能事饒。王孫奇跡留采石。長江東逝魂難招。斯卷傳是盛年筆。金碧界畫分秋毫。蘭亭本在特自喜。自用記中斜行細字親題標。十縑購得置小閣。日日坐對形神超。男兒墮地射弧矢。帷房妻子非吾曹。況復時艱苦謀食。那得閉戶歌逍遙。年來多病畏行旅。生涯落拓棲衡茅。飛禽兩翼雖暫踢。終思決起衝風颺。曳裾彈鋏詎忍此。藥囊卜肆從所操。名山大川徧游覽。歸事著述亦足豪。因觀妙蹟發遐想。一笑吾豈風中匏。

沈衡山進獅圖歌

腥風怒生沙石走。日落荒林動雷吼。老熊野兕無處逃。短後蠻奴揮赤手。佩刀出鞘山爲開。白超蹴踏飛塵埃。馴習控御別有道。長鞭短箠何有哉。疏勒康居萬萬里。方物由來載青史。良工粉本何代傳。咫尺風雲驅筆底。得非鏖戰林邑軍。羣飛星瓦百獸奔。又疑狼山遇神物。一擊金精空咆哮。人強獸強差足當。坐使重鎚入宮闕。嗚呼柔遠古有經。不享其贄臣其戩。聖朝冠帶被海外。雕題鑿齒肯來庭。前年泰西重譯貢。趨朝稽首詞屏營。白牛香象誰比數。珍怪往往難爲名。至尊儉德豈寶此。卻之無以慰厥誠。天馬歌應陋漢代。旅獒書直宏周京。惜哉衡山身已殞。職貢未圖輸立本。文采風流空爾思。白頭愁賦丹青引。

錢王射潮圖歌

前水後水勢莫當。突如萬馬勝軍裝。江斐倚笑鮫妾舞。作氣八九吞錢塘。天目異人經百戰。閉門天子那堪羨。錦袍玉帶歸去來。父老椎牛縱高宴。樟亭酒罷意氣雄。歌詩慷慨驚龍宮。勁弓毒矢屹相向。海若股栗迴長風。是時臨江萬木亞。雪嶺銀城蔽空下。白日欲墮蒼天高。大旗不翻鞞鼓啞。疾雷一聲齊發機。修羅刀箭紛而馳。金湯永鎮蛟蜃窟。真勝十萬熊羆師。潮生潮落悲人代。壯觀丹青動深慨。金券已消陵谷遷。鐵幢猶峙江山在。今古興亡同一漚。江南白雁恨悠悠。千載曲江傳弭節。梁園枚叔擅風流。

繡谷送春歌爲蔣紹初升枚作

我來闔閩城。春水桃花生。蘇臺萬楊柳。聽盡流鶯聲。江樓十日吹細雨。流光堂堂背人去。蔣侯跌宕多好懷。不惜張筵送芳序。華堂沈沈簾幙開。葡萄香滿黃金壘。崇蘭汎午竹交蔭。鳴鳩乳燕參差來。興酣促坐銀塘曲。前歌聲長後歌續。清淺蓬萊又一時。尊前長願顏如玉。前已卯繡谷送春詩。尤侍講西堂首倡。而歸愚師以諸生與焉。今師年八十有七。白首健在。復爲斯集主盟。洵佳話也。東風作顛花亂飛。白日欲斜客告歸。天涯作達且爲樂。回首鄉園櫻筍稀。

樂戶行

明末流賊張獻忠入荊州。自稱西王。時惠邸樂戶有瓊枝曼僊者。以色藝擅名。獻忠召以侑酒。瓊枝罵賊不屈。賊脅以刃。瓊枝罵愈厲曰。汝技止此耳。吾何畏。羣賊嚙之以飼犬。而曼僊則極其技能。爲獻忠所寵。遂乘間置毒於酒以進。獻忠昵之。令先飲。曼僊色變不得辭。飲之立斃。獻忠覺其

毒亦磔其屍。

獻賊來。城門開。王早遁。官乞哀。西王府中晝宴啓。侑觴才人自朱邸。獻賊喜。瓊枝怒。樂戶雖賤非賊伍。玉肌白刃兩如雪。一笑相從飛碧血。獻賊怒。曼仙喜。樂戶誠賤堪賊餌。醜賊不飲令先飲。恨不宵來殺諸枕。噫吁嘻。罵賊賊怒一死輕。古有之雷海青。呢賊賊喜一死遲。古有之高漸離。堂堂兩樂工。千載耀青史。不謂江陵城。更有弱女子。

宿南堤河卽事

白沙碧波抱幽渚。天與征人養疴處。時于病初差。故行獨後。緣坡障以老楓樹。萬馬中宵自西去。無燭無月微有星。秋深露濃隔帳零。溪禽不知有客宿。時傍巾履行伶俜。坐久漸復見諸景。對岸雲林致幽迴。葦華無風忽動搖。知是賣鹽夜歸艇。夷人多持鹽。來出售軍營。炎飈瘴雨十日淹。一夕清境清如恬。且支水枕百憂外。萬一夢到江之南。

猛拱土司進四象詩

王師征緬次猛拱。誕告諸夷爾毋恐。誅無赦者篡逆種。緬逆憎駁之父。獲藉牙。本以篡弒得踞其地。爾克共將受天寵。夷官感泣手雙收。攜厥配來錦帕攏。琥珀作瑱貫耳孔。蠻布花裙名曰桶。厥音嘍麗性愚侗。苦言隣寇肆牢籠。索米求金日苛冗。大旱望雲愁蟠蝥。公今來及秋瓜啖。無數啼嬰飢得漣。氓安田廬魄安冢。欲報之德乏球

琪有馴象四放秋瓏。兩牙彎環形擁腫。願進闕下誠忭悚。重鉤不繫繩五總。以肱麾之行接踵。弓刀如山屹不動。曰跪則跪立則疎。賜以釁沐江濤洶。警與降臣勉萋葦。伏流不見背峯聳。一躍風雷四蹄湧。步伐儼然承誠董。非鞭箠之駕無惡。九閭仙仗環陛拱。列象巍峨寶瓶捧。諸邦任土歲有奉。四象寧增玉塔重。鑒爾效順志頗勇。封章上聞不汝壅。錫以佩囊刀琕琫。過望之喜逾得隴。聖清醲化極鴻濛。元甲瑠戈革包鞬。朱波彈丸甕中蠓。厥考盜兵始作俑。子弗幹蠱轉詢詢。獸之不如頑且懵。縛以尺組拔以拳。萬里頭顛象肩擁。象也聞之起而踴。

和雲巖先生雨後書懷見示之作卽次原韻

唾壺談麈被阿錫。幕府清嚴亞夫壁。偶盤駿馬挽雕弓。一手能生雙霹靂。軍中好整復好暇。不覺流光箭同激。瘴鄉入夏每愁霖。天漏沈沈幾重幕。今年旣雨晴更佳。露井風檐氣清寂。虛窻倚幌見螢流。暗牖藏燈任蛾覓。依然在受降城。一曲梅花聽吹笛。先生籌筆向戌夜。對景無端予心戚。昨聞京圻頗顛旱。壁牲禮徧山川滌。麥秋已過黍方華。麤飯殘年須飽喫。北門吾尙不憂貧。王事知公甘我適。防秋正調八關兵。屈指師期火朝覲。尊前偶乏刺閨書。閑數銅籤傍階滴。南樓涼月興何如。清嘯一聲曾卻敵。

放言一篇再疊前韻呈雲巖先生

蟻封何物膺九錦。蝸角有時破十壁。浮盃水欲傲滄溟。敗鼓音思掩霹靂。土龍行雨鞭安施。木雁凌風機

所激羣游擾攘蝨在禪。宴處啁啾燕依幕。鏡懸暗室混妍媸。鐘設聾鄉泯誼寂。醉裏驚蛇影易留。夢中藏鹿蹤難覓。邪蒿未必盡勝梁。麤竹何曾皆中笛。早聞抨雀走珠丸。頻訝割雞揮玉戚。鶴頸雖長豈用裁。鷺毛自潔寧煩滌。丹霞曳佩手誰縫。白石療飢煮孰喫。絲纏蠶老究何爲。紙破蠅飛亦焉適。肺肝吳越詎相知。眉睫邱山莫予覲。不求道術證九還。不向禪宗分一滴。放筆聊成天問篇。知公轉語鋒無敵。

充齋以和章東示四疊前韻

吟筒入手百朋錫。快似旗亭爭畫壁。賞花在昔笑徘徊。擊鉢吾今窮霹靂。公然樓伐勢不支。猝爾窮追變反激。枯腸隱隱轉車輪。駭汗徐徐拭巾幕。是時殘蠟對飄搖。此地酸醬伴岑寂。思當將斷逕忽通。句到初圓力難覓。遂令疏越清廟絃。却儷蕭寥釣船笛。年來蹤跡判升沈。老去情懷共欣戚。鄉關何事苦思量。兵甲幾時真洗滌。余髮種種愁頻搔。臣口期期恨如喫。用鄂艾口吃。事借作喫。但求飲酒千日醉。誰遣春糧萬里適。路雙歧處我未迴。垣一方間人莫覲。罪言不緣鞞鐸發。血淚寧爲琵琶滴。小詩角鬪何足道。毒手老拳詫相敵。

擬宮怨五疊前韻

芳名憶自茗華錫。朵殿春風扇椒壁。門前不灑竹枝鹽。日日宮車馳霹靂。爲誦周南第一篇。據魯詩說。脫簪待罪詞偏激。君王不念有齋女。入廟曾尸六尊幕。紈扇先秋忍棄捐。銀壺永夜聽悽寂。可憐庭樹影朦朧。夕

陽惟有寒雅覓。却望昭陽火照筵。有人醉弄寧王笛。瓊枝璧月奉宸歡。粉確脂田覃外戚。自搜藎篋賜衣存。零落蛛埃難澣滌。閑愛鸚哥解誦經。朝朝紅豆親調喫。深知永巷亦君恩。敢向僊家怨淪適。餘生輸與帳中人。珊珊猶望翩來覲。長門買賦少黃金。親拂瑤牋注銅滴。他時一鑑倘重陳。曾料莫敖必輕敵。

充齋枉顧復出一章見贈六疊前韻奉酬兼謝其頻致佳酒

飛將軍號君執錫。一幟翩然馳趙壁。我時堅臥若弗聞。大似嬰兒對霹靂。平生萬事甘讓人。詩句新來洗豪激。聲如土鼓不成摻。質比匏樽豈須羈。偶然拈韻佇興成。時鳥候蟲共喧寂。無人愛處君獨賞。纔放晨衙走相覓。瘴鄉流宕兩人慣。揮淚非因轅寄笛。上冬憶我戰場回。虞陛初傳舞干戚。蠻邦筐篚何足陳。蔀屋瘡痍要親滌。逢君把酒語慨慷。未藉此官一生喫。一篇臣結春陵行。俗吏聞之驚適適。文章風義君能兼。寢饋應知古人覲。獨慙我與世相遺。日向牀頭丐餘滴。肺腑連宵芒角生。乘醉衝愁無堅敵。

寓齋卽事柬述菴七疊前韻

圓跣無蒲手無錫。結夏何如僧面壁。平生但蓄無絃琴。不愛奇聲傳霹靂。官齋清絕清似水。一刺不通非有激。林颺吹鬢涼絲絲。花霧侵衣陰冪冪。檐端雙鵲曉聲乾。簾外一鳩午語寂。蒼苔雨後三逕封。除却羊求蹤孰覓。人到中年感易生。酒壚豈爲隣家笛。故園昨寄萬里書。情話依然共親戚。青衫只道淚痕多。戰血那知今未滌。多謝加餐勸我勤。惠州飯許東坡喫。華胥聞說勝鈞天。假道應從醉鄉適。九衢處處有堯

樽酒德誰能使民觀。莊子民可使觀德不可使觀形比來曹事都不知。拄頰西山秋欲滴。相將料理苦吟身。縛袴橫刀再臨敵。

寄博晰齋八疊前韻

英蕩函從香案錫。誰遣衝炎走銅壁。瘴雲如墨雨如漿。夜夜馬蹄生霹靂。歸來遇我騰衝城。卻怪北山詩太激。人將白髮自蕭散。雨過黃梅轉蒙幕。不辭著屐來取別。書借一瓿供破寂。予在騰越值晰齋自塞上回。瀕行贈我書數十冊。去歲征南幕府開。參軍在座君能覓。玉門生入事如夢。軟脚筵開鬪箏笛。聽到陽關第四聲。年少何戡也悽戚。晰齋有歌者朱琇。色藝冠一時。予于永昌屢見之。近已攜歸大理矣。天涯去住總難料。未許征衣塵土滌。杜陵依舊客諸侯。對酒真憐不能喫。杜詩對酒不能喫。君今且看點蒼山。試茗分香興清適。畫欄桂樹又秋風。花下何人展嘉覲。玲瓏休唱樂天詩。燭淚還愁替人滴。借問維摩病若何。定知談笑熊羆敵。晰齋薄病初起。

同年朱子穎太守遠訪軍中行帳話舊有感作

陣雲頽空溪水吼。礮火橫飛大于斗。白頭自甘枕戈甲。寧料此間握君手。憶君召對在御苑。詢及先臣霽顏久。奉詔作畫羣公驚。盤礴一揮筆如帚。聞君昨歲游峨眉。伏虎岩前掉臂走。佛燈懸處照無寐。欲借禪床穴雙肘。君今蹤跡更奇絕。閑作寓公謝官守。夕烽連山箭滿眼。君不來觀亦无咎。君言壯志雖漸衰。未肯帷車學新婦。蜀中邊患我頗悉。如掣鯨鯢歸敝笱。十年養癰不一決。愈扁之工亦何有。軍興百事如蠅

毛又苦咄嗟思辦取。可憐轉粟十萬夫。盡是春田把鋤耩。臣甫北征憤最切。臣結春陵意偏厚。南臺名寺病起匹馬行。不獨軍容觀細柳。借籌應作李左車。劇孟何堪掛君口。相逢剪燭話未已。卻恨郛筒難致酒。與君論交在夙昔。風節相期頗不苟。戰場兩處所見同。瘴海三年得生偶。軍旅之事雖未學。出入兵間得八九。惟聖有訓戰必慎。行兵所戒勝毋徂。參軍長揖敢自傲。萬感橫胸鬱堆阜。夜來偏師肆賊壘。裹血人歸認誰某。終生長纓今在否。上陣何時縛小醜。氈廬風雪對嘆息。錯比剡谿來訪友。

十二月十三日斑斕山紀事

連峯若環斷若玦。羊腸一絲天際豁。賊礪屹然不可拔。如獠之狂鼠之黠。一軍拒左遏賊衝。及山之半布成列。一軍右上盪其腦。俯瞰礪樓蟻在垓。朔風獵獵翻大旗。指點元戎中秉鉞。是時窮冬天苦寒。堅冰欲鼓山石裂。萬人裹甲如裹鐵。噤不成聲喉捲舌。豈知挾纊在一言。始信俯循勝鞭撻。鎗丸似雨烟似墨。一卒飛騰刀滾雪。上礪無梯下無穴。以肉鬪石怒衝髮。何來援賊氣甚囂。短兵一接魂魄奪。殺人無聲亦無形。人在陣雲自出沒。生擒一賊挾兩頭。歸謁和門略陳說。生囚死馘互拴縛。一片模糊刃餘血。惜汝小醜恃在險。問天此險爲誰設。負嵎之獸且莫撓。游釜之魚寧久活。詰朝再戰竊有請。若徇三軍須此卒。

秋日過水竹居

松竹日蕭瑟。重來徑不分。林霏寒作雨。池水靜生雲。地下悲知己。天涯惜離羣。臨風清淚迸。落葉暮紛紛。

宋玉宅

哀怨靈均弟。風流子美師。江山留舊宅。雲雨托微辭。過楚吾何適。經秋客更悲。蘭成今白髮。腸斷結茅期。

春感

江樓一望草芊芊。寒食東風欲禁烟。柳外誰家閒試馬。花前有客倦聞鶻。春愁似水當三月。好夢如雲已十年。贏得鬢絲今漸改。生涯禪榻自蕭然。

送德甫入都

幾載昌亭載酒從。過江才地孰齊蹤。凌雲新賦推司馬。對日雄談屬士龍。斜月宮花迴夕佩。輕烟禁柳逐晨鐘。金臺舊侶知無恙。爲道蒹鱸興轉濃。

酬王德甫見贈次韻

廿年香火感深盟。萬里猶爲並轡行。尙憶牽衣同拜母。真從戴笠早稱兄。驚看蹤跡如逃劫。忽對詩篇似隔生。爲話故園心轉壯。要令絕域遍春耕。

渡漳水同德甫

風煙極目浩縱橫。晚渡牽船客共爭。流急勢先吞滏衛。地雄氣尙帶幽并。一宵候館知安託。十月輿梁苦未成。僅葺其半。云須十一月始成。每到印須動遙感。清漳夾宅負平生。

泊襄陽同德甫

岸樹川花望不分。煙波如畫碧紛紛。渡江帆帶樊城雨。倚堞樓含峴首雲。漢上題思追勝事。襄陽傳欲續遺聞。魚梁洲畔饒雞黍。衡宇他時好共君。

自漢水放舟南下卽事二首

襆被同登漢上槎。六年不聽榜嘔鴉。容身已喜如居室。入夢渾疑是到家。斜日趁墟宵喚酒。輕烟壓水午鳴茶。南遷我久忘官樣。慙見船頭候吏譁。

碧波翠巘一程程。細雨斜風撲面迎。沙步閑容村牓臥。烟帆低傍渚禽行。潤留硯墨吟初罷。寒勒篝香夢未成。忽憶吳中十年事。夜船燈火按銀箏。

夜渡毛口河趨阿都田作

夜航無槳趁懸繩。一縷溪烟漾水澄。村曲尙聞關市柝。峯坳先見驛樓燈。宵晴平野星光散。候暖空山石氣蒸。料得天涯掩閨者。夢魂隨我度峻嶒。

宿亦資孔驛

過此卽雲南境

踏盡黔山碧萬層。荒郵還作借單僧。生花燭短渾無燄。刺水衾寒忽有梭。永夜夢多情恹恍。殘年詩少意蒼騰。偶然折得苔枝在。伴我吟窻瘦不勝。

次猛拱即事

江煙江雨捲雙旂。蠻塞居然汜小休。林下偶逢歸塞馬。軍中失馬者往往於林箐中得之行間爭飽犒師牛。諸夷頭目迎

入虎踞關

近關僕馬盡歡聲。戶杼場春寫太平。賣劍便思為佃客。棄繻何用識書生。誰封抔土無留碣。近關新冢壘

荷葉

幾日田田碧一窪。空亭倚遍石欄斜。池塘人靜影臨水。風露曉涼香勝花。未許衝波依舫屋。最宜聽雨隔窗紗。分明載酒曾遊處。兩板紅橋綠半遮。

苔

一重門掩一重簾。逕草堦莎一色添。軟碧圓時裊可藉。蔦紅碎處屐同黏。端居盡日芳塵斷。逆旅先秋舊雨淹。逋客新來行迹絕。翠痕不掃倍纖纖。

茶烟

庭院沈沈午悄然。風爐帖妥屋西偏。更無人影惟簾影。纔和香煙又藥煙。偶著瓶花縈未定。忽吹鬢髮暈

初圓心知不自勞薪出絕愛低回病榻邊

禽語

芳林入夏碧如雲格磔鈎轉總不分醉倚短筇閑獨聽夢迴單枕遠初聞偶然斷續隨朝雨幾處高低度夕曛知我機心忘已盡一枝借得兩欣欣

遷寓

白頭瘴海已三年傳舍無端竟五遷真遣卜居依鶴觀寓對白鶴觀怡合東坡惠州故事故云差欣汲飲近龍泉寓在龍泉門內去湧

珠泉數補茅屋老秋風勁得樹庭空午日圓衰病不堪重借箸枕戈時復枕書眠

復遷居舊寓感懷四首

一雨新苔上戟門重來蕭寂似山邨磨牛踏處依陳迹巢燕栖時掃舊痕悞喜南樓聞躡屐忍忘東閣對開尊秋風起後庭花盡惟有親栽菊尚存

防秋羽檄自紛紛拄頰看山到夕曛拂策已知居莫定迴車誰料路還分季鷹漫決歸吳計司馬空傳難蜀文尚擬短衣從夜獵灞陵爭識故將軍

羅雀門庭刺孰通一樽孤酌雨聲中心依短燭灰將盡身對殘碁劫未終獨向風颺悲邊鷓偶從泥雪認羈鴻單衾無限春明夢夜夜常隨馬首東

斗大山城殷鼓笳。中宵人倚步欄斜。敢因去國忘傾蓋。不為懷鄉計及瓜。幕府正聞籌筆數。征途深愧贈鞭賒。時巴韞輝員外將隨副將軍巡邊故云殘書襖被安排了。自對寒燈拭劍花。

孱陵呂侯祠

地控荆湘此最雄。英名猶在霸圖空。生能開卷分陰業。死得封侯尺土功。竟遣白衣來北岸。渾忘赤壁縱東風。油江遙接蠟磯水。嗚咽還應怨阿蒙。

澧州道中寄程荆南衡州

澧水東流下洞庭。蒸湘亦抱合江亭。如何遠浦捐芳佩。不共佳人醉綠醺。難後夢魂頻錯迕。病餘書問費丁寧。篷牕獨聽蕭蕭雨。官燭無花也淚零。

行帳病中補山同年枉顧夜話有詩見示次韻酬之

身似殘弓不上檠。黃楊暮節鷓初程。尊前語咽胸埋壘。帳外人歸血洗兵。病枕自營求艾計。戰場頻作贈鞭行。時員外郎薩□□太守王衣聞先後入關笑談忽聽穿林礮。驚閃秋燈一穗橫。行帳距賊寨一里許賊人礮丸時從帳上過

夜雨再次前韻索補山和之

昌黎詩裏一燈檠。未了江湖聽雨程。萬里重為衝瘴客。五更來共臥瘡兵。蕭條沙壠邨雞斷。颯沓風林陣馬行。料得子荆感秋草。軍籌傳處句縱橫。

至隴川宿錢充齋觀察寓舍連得王述菴比部惠書並用槃字倡和詩韻賦詩見懷四疊前韻卻寄兼邀充齋和之

入關初翦故人槃互誦君書筭驛程身病獨成歧路客語長半爲夾江兵昨宵聞礮知猶戰虎踞關距老里昨宿此猶聞軍營大礮之聲明日扶輿悵獨行馬革平生心未已得歸翻苦涕縱橫

槃字韻詩倡於補山予凡五疊頃述菴復郵寄五章索和督促甚力意在迫我於險無言不讎賦此卻寄餘四篇皆即景成題總不越一夕中事並挑補山和之

天上彤弓已在槃日方南至客東程時緬甸具箋乞降大兵已撤至虎踞關仲宣賦尙嗟懷土子美詩應快洗兵老去忽驚殘歲改生還准約故人行昨聞鐵索橋邊路處處梅花馬首橫

聞補山將至詩以迎之

雄劍藏械弩弛槃梅花篋裏一程程揚鞭已歷三千里出萬仞關由猛拱猛養歷新街老官屯入虎踞關約三千餘里磨盾真過十萬兵話到蘓翦祛薄病來書言有腹疾歸逢楊柳送遄行最愁後夜西牕燭未是離筵淚欲橫

和述菴五詩未竟而燭忽燼枕上占此

閃碧燿紅怪出槃用趙當遇燈槃怪事忿忿詩債誤嚴程遷延已自迴三舍悉索猶堪備五兵隔屋荒雞還冷伏綠牀黠鼠早微行思君坐待殘宵月又到梅窗弄影橫

辛卯十月二十日蒙恩復官參佐蜀中軍事感遇攄忱得詩四首寄京師及故鄉知舊

刺閨書裏八行馳。戊幄來宣感涕滋。再入中書嗟我老。三登啓事愧人知。予自從軍入滇前相國春和傳公前將軍雲岩阿公及今將軍

溫公前後凡三經補贖矣。素心正集蓮花幕。清夢先依藥樹枝。對仗哦詩磨盾檄。一官前後總恩私。

身在軍中被詔溫。除官免謁選曹尊。凡奉特旨遷除者例免謁選。夜舂米更喧麤婢。月給錢還乞穉孫。十載踏迴牛磨

跡。予自壬午服官至今辛卯恰十年。九重掃牘鳳巢痕。中書舍人有兼司經局正字者一人予前適除此職。近見邸抄已議裁矣。似與坡公詩意適相比附也。他時曝背茅

檐底。半話金鑾半玉門。

借箸頻頻對夜分。居然長揖作參軍。橫戈雜虜忘蒙澤。調鼎元臣念策勳。未遣邊城休宿甲。猶聞閭井望

春耘。近從父老聽明詔。揮涕爭傳肝食勤。近屢降明詔諭以厯念戎行不得已用兵之故讀者無不感奮泣下。

獨上高城攬夕暉。霞旌霜戟自成圍。長纓肯讓終生請。神筆思憑葛相揮。玉壘陣雲初壓帳。金江戰血尙

霑衣。此南大金江在緬甸境。予已丑隨征屢經度此。誰知矢石林中客。已許餘生對紫薇。

暮至尤溪

兩崖一綫走陰森。班馬凌兢有戒心。雪似凍鴉翻絕壁。石如飢虎攫空林。橫橋入市人聲雜。候館懸燈夜

色深。不用繼庖煩長吏。龍溪茗椀豁愁襟。尤溪一名龍溪產茶最佳。

雲巖先生兵抵美諾追陪夜話有感而作次家雲松韻

笳鼓聲沈劍氣寒。依然奉席接衿鞶。喜心倒極驚三捷。歧路依違愧一官。主簿參軍從位置。兒童走卒問平安。細論兩戰場中事。白髮門生感萬端。

永昌寓舍卽事書懷一百韻寄京師及吳中故人

萬里程初屆。三年跡乍淹。力猶衝瘴癘。身已混閭閻。相愧逢梁舉。居思卜楚詹。坐愁書咄咄。臥病夢譚譚。蓋達風何陋。哀牢地最炎。迅湍飛弩駭。亂石淬刀銛。霧煖紅浮箬。煙昏綠繞柵。漂搖蕙掛蛭。擁腫樹藏蚘。廢堡墻攢刺。荒衢屋覆苫。冬畚雷虩虩。夏岫雪蠹蠹。林密稀窺景。嵐濃屢送飜。四時涼燠互。一日雨陽兼。況值軍興久。頻聞戍守添。傳符荆屬粵。馳檄蜀通黠。黠陽廣韻作黠陽市價騰芻秣。邊儲雜菽糠。轉輸連下邑。勦勉徧窮簷。路險舟轅絕。城巖節鉞嚴。材官紛檠戟。文士競韜鈴。僧舍除庖福。氓廬借釜鬻。授餐真雜沓。供帳極叢纖。量侷沽邨釀。論銖鬻井鹽。寸牋逾重錦。尺布抵輕縑。照壁松枝炬。傾甌麥顆飴。不緣勤撫恤。何以免危阨。地主誰承乏。天涯且屬鑿。豬肝人肯累。蝸殼我寧嫌。頽翮嗟棲幕。驚鱗幸脫羶。迂疎招詬厲。放浪付矜娑。食至疑逢蠱。悲來似發疔。鄉心彌恟恍。旅話自喁險。耆舊吳中盛。風華海內霑。承家餘研削。求友得針砭。于野才偏聚。斯文任敢謙。知名緣鯉素。寄興托貂襜。學必崇純樸。言還絕僞諛。正聲刪促節。法服破輕襪。貞梓原從繆。文瑤亦受礪。刈蕭蘭郁郁。芟稗稻稽稽。砥柱瀾須障。傳薪火未燿。鐘暗桐使應。磁熱芥能黏。矻矻忘餐寢。依依共苦甜。開園偕躡履。閉閣對施幘。茗淪明瓷椀。香分斷漆奩。靜看春盎盎。閒

覺晝厭厭。汲古情斯縱。探幽意詎廉。靈崖青婀娜。震澤碧瀟灑。大小尋雙渚。東西訪二崦。軟輿穿曉竹。短艇繫秋兼。蕙怨連波貯。菘筐帶露劉。廚珍多水族。饌法半湯爛。跌宕燈重翦。勾留鼓再敲。翻杯容汚袖。捧硯試題翰。辯逞雕龍口。談掀磔蝟髯。世人應共嫉。吾道豈終潛。梧藹初停鳳。竿修遂上鮎。田間先釋屣。日下各乘幘。鎖闥鏘垂珮。玫瑰滴漏籤。丹泥封尚濕。紫穎削頻尖。周雅歌差馬。秦風咏載獫。每秋陪扈蹕。趁曉許提槩。斷澗圍犇鹿。平原逐突獫。衝飈駕落殼。赴響雉投籤。列幄榮頌齒。歸裝詫積臙。班仍趨鷓鷯。歲忽換烏蟾。勝侶多多善。清游處處次。銷寒移密室。追暑就長欄。唐寺評花擔。燕臺問酒帘。壯懷從濩落。素抱忍掩儉。聚鐵翻成錯。銘金竟失箱。戎行承譴薄。參佐藉謀僉。尤悔人難寡。疵瑕俗競擗。由來稱俊達。所往被汗濶。放逐愁形槁。譏讒痛骨鉞。書騰梁苑獄。章飲朔方鉗。辱及中山贖。哀深大史闕。索琴詞款款。憶鶴淚濺濺。廢棄予猶幸。栖遲趣轉恬。茲行殊汗漫。回想尙甜澹。遷客如蛩駘。謂述菴同心比鵲鷦。三楹纔賃屋。一桁旋鈎簾。垣矮峯爲障。階虛水出濂。當關無小鵲。支榻有枯口。病久知宵永。眠遲愛日暹。團蓐惟上黨。芳尤少於簪。從廣韻薏粥僮能糝。芹菹僕解醃。勤常調藥餌。懶更疊芸幘。落滑宜高屐。梅橫碍側幣。偶然行得得。聊爾喜沾沾。獨有孤衷鬱。終期醜類殲。笳音晨自聽。星象夜頻覘。推轂元臣出。揚旌屬國瞻。先聲驅纍燹。宏願靖黎黔。盪決去予錚。飄揚貝胃綬。溟濤沈斷梗。崑燄燎荒葢。寶井亡殘幕。金樓失破闕。夾砧啼偃僂。繫組狀髻鬢。蛇豕稜威掃。梯航化澤漸。風駿歸壠輓。霜劍冶耕鎌。抱牘籌空借。磨崖筆試拈。腐儒

搔白髮。幾欲訊筵占。

楊枝十二韻

本是銷魂種。年年綰別離。一株當二月。萬縷復千絲。栽處應天上。攀來每路歧。未歸陶令宅。頻夢謝家池。態倚疎簾勝。陰籠曲檻宜。濃疑掃眉黛。弱欲鬪腰支。著雨憐初起。臨風愛小垂。金城悲此地。玉殿憶當時。細馬看還繫。流鶯聽乍移。尊前人不見。笛裏客相思。我往成搖落。誰來屬護持。香山戀樊素。只為是楊枝。

副將軍阿公振旅回永昌時屆歲除官齋尊酒追溯用兵顛末述事抒情輒成聯句八十韻亦勞者思歌之義也

詔撤三年戍。之升人依萬里城。受降唐節度。甫德振旅漢營平。尙藉邊籌遠。之升旋逢歲籥更。星霜回暮節。甫德烽

火息嚴程。蓮幕叨陪侍。之升椒盤快合并。紀勳詞磊落。甫德感事意迴縈。在昔承恩命。之升於茲習義征。重邀王

母福。甫德益勵丈人貞。公初受命督師啓行時詣皇太后宮請安賞穴竄將窮鼠。之升波翻未翦鯨。先聞傾鼎

餽。甫德繼悍結冠纓。倉猝殲于遂。之升消搖散在彭。以上叙楊制府應琚貽誤軍事及將軍明改弦軍政肅。甫德

挾纊士心傾。戎略書詩裕。之升儲胥竹木贏。習勞曾運甓。甫德肄武亦開棚。分埒騰駟駱。之升排困積稔秬。威真

敷絕檄。甫德念愈軫疲氓。勢可乘因壘。之升功偏待秉衡。以下叙經略赴滇統師進討各取儀容諸將攝。甫德號

令一軍驚。借箸師中協。之升飛符闔外行。周咨常旁午。甫德祕算必先庚。吉日應徐卜。之升凶門詎急爭。深燈輸

惘惘甫德側席費論評。薪恐難移突。升棋虞易下枰。終朝惟仰屋。甫德前路遽揚旌。萬仞嚴關峙。時公由銅壁

壩督造戰艦而經略由萬仞關渡大金江收撫猛拱以通西路升之千重駭浪橫。蠻雲凝作嶂。甫德淫雨積為阮。振策經途速。升浮查問渡

輕。幸牽巾櫛戀。甫德得使櫬輿迎。猛拱士司渾覺先已逃匿因勇決空羣醜。升平安屬使伴。遠期姬旦鳥。甫德

來就亞夫營。時公已進駐新街屢遣夷人間此地雙江扼。蠻暮江自東來匯于大金江斜對哈維公隻手

撐。夾鈇親戮叛。時隴川人蘇明燦段世瑞來往賊插羽亟徵兵。削柿高檣矗。升鎔金巨礮轟。何須然斷鎖。

甫德絕勝渡浮罌。乘扁馳温嶠。遣伊將軍勒圖揚麾挈顧榮。謂制府東西連玉帳。甫德水陸應銅鉦。會合歡初

沸。升飛騰氣已盈。非緣欺小敵。甫德直與奪先聲。姑蔑收空壁。升餘皇徒斷浜。猿窮斯就縛。甫德禽逸乃遭抨。

此叙十月十日新街水戰擊敗賊兵獲其舟風陣催帆飽。升霜稜淬劍瑩。官屯趨浩蕩。甫德賊柵列崢嶸。以下

並旗蠶器械無算頭目資雅得諾被創而死叙進駐老官屯。當轍螭宜捕。升藏嶠虎莫櫻。越蛙徒自式。甫德衛鶴那堪令。忠蓋通神鬼。升思勤邁父兄。有

言皆激奮。甫德無物不輸誠。瘡癘寒猶熾。升瘡痍力轉勅。鎗烟摧拉雜。甫德機石擊鏗訇。執銳兼持燧。升臨衝

競挽輶。梯危懸碧漢。甫德隧曲穴青坪。俘卒聯徽纆。升逋夷驗刺黥。時舟師生獲十餘賊并有自寨逸出來

下游援漸絕。甫德中夜謀頻偵。裹血方酣戰。升炊骸遂乞盟。老官屯被圍既久舟師又斷其南來救援賊寨

卑辭函鏤貝。甫德吉語應占蒼。公赴滇時途中遇善筮者筮得時值文淵病。升羣欽諸葛名。時經略抱病緬

論遣至誠孚裸虜。甫德大義洽豪英。表餌幾全握。升韜鈴術盡屏。盤根衷獨苦。甫德省括計彌精。待振虞階舞。

之升徵調傅相羹。旋師符勅諭。甫德請令為娶。惇。軍中方受降。中旨。納款求陳幣。甫德之升。攄忱謝宰牲。懽呼喧爨。

甫德感泣遍柴荆。臘後蛩催織。甫德不絕。中冬。候蟲聲。春前犢試耕。稜看消枉矢。甫德瑞定表華萃。遠譯風諧律。甫德

甫德使將至。故新郊雪散。雲。彌望。兵後豐年。於茲可卜。朝天歸上輔。甫德計日近元正。九日。起程赴闕。班管停。

甫德磨盾。之升。珣弓罷繫。檠薦辛挑。細菜。甫德透甲劈香橙。泥飲蛆浮瓮。甫德之升。徵歌雁語。箏燕私。蒙款款。甫德鴻論劇。

甫德觥烏本期頭白。之升。魚還念尾頰。仲宣仍逆旅。甫德元叔剩餘生。夢寐嗟相對。甫德之升。然疑忍共明。追思從袴褶。甫德

甫德誓欲掃機槍。匪尙犁庭績。甫德之升。終酬攬轡情。居恆時若厲。甫德履險道能亨。偉節強哉矯。甫德之升。嘉謨展也成。畫圖。

甫德垂紫閣。甫德譽望溢丹瀛。猷壯推方叔。甫德之升。知深荷晏嬰。願從元白後。甫德驃樂載同賡。甫德為節度時。進其樂部。元。

甫德微之白樂天皆有詩紀事。升之。

湖海詩傳卷二十七

張熙純

字策時號少華上海人乾隆二十七年舉人三十年召試賜內閣中書有華海堂集

蒲褐山房詩話策時英姿壯氣與升之同學齊名而胸襟軒爽照人若雪兩人成名後臭味稍有差池策時中年歿於京邸未歷江山兵燹之奇故所作未免稍遜一籌五言如人家藏遠樹漁火入寒流澄澗分岩翠虛亭受月明洗鉢承花雨翻經和海潮竹陰連別院花雨靜禪局香臺孤磬發碧殿一燈深七言如邱中久已馴龍性隴上何須赴鶴書連江暮雨孤帆卸萬樹秋聲一雁飛笛牀風細催三弄酒座香濃試一浮疎雨一旗山店酒春風雙響馬陸花詩就涪翁分一瓣酒同坡老鬪三蕉紅牙曲罷千花嗅青翰舟迴一水香亦數十年來吾鄉握槩懷鉛之士所當膾炙

古怨詩

合如金在冶。決如箭去弦。東風一以逝。桃李為誰妍。櫪中千里駿。奮起忽長嘶。馬嘶驚妾淚。問君何所之。出門向西笑。入門獨悲嘯。男兒喜快遊。室家焉得保。見君空復情。啼鵲如有意。繞樹徘徊鳴。裁羅思作裳。不信反成裘。汲井愛清漣。到底不能流。君恩如曉漏。夢闌聲漸歇。妾恨如宵燭。淚乾心尚熱。漏亦有時續。燭亦還復燃。君心如可轉。白日俟再中。叶

戰城南

戰城南。戰益力。一當匈奴死不惜。為我謂敵。爾安得驕。振臂一長呼。陣雲中決如崩濤。馬騰疾雷。刃飛急

雪長圍若連山。獨騎焉得拔。壯士舞不聞金。但聞鼓刺劍入喉。僵不倒。董古切生願封侯。封侯安可得。死爲鬼雄。鬼雄當廟食。焉能效主將。疾馳入堅壁。

君馬黃

君馬黃。臣馬白。金爲羈。玉爲勒。人馬一心出塞北。君登燕然。氣如虎若熊。風雲溼湧入四蹄。寒陰照我影。野空秋草腓。雪沒馬背不得馳。人馬更相顧。錯莫無晶輝。汝雖驍騰柰汝飢。托非其所累。汝爲太行未云險。平地卒發機。顛踣窮野我焉悲。嗟哉汝馬。忍死草間活。千金無人市汝骨。

飲馬長城窟行

飲馬長城窟。天寒水生骨。從軍萬里取封侯。何言卻作長城卒。城頭鼓瑟瑟。城下鳴雕弓。健兒騎馬如騎龍。飛鴻何翩翩。翩翩入雲漢。健兒塞下泣。少婦閨中歎。長安十萬戶。秋來何地無砧杵。白月蒼茫來照之。聲聲似言築城苦。作書附飛鴻。慎莫輕撩長官怒。長官怒汝。汝不得訴。嗟汝力盡孰知撫。安得飛身化作長城土。化作長城土。長城屹然起。健兒不死。歸問鄉里。

落木庵

數里入雲松。招提依絕壁。青林被微霜。落葉斷行蹟。停策叩禪扉。翠陰拂巾幘。幽花綴晚紅。芳沼湛深碧。仙梵靜蓮龕。佛香散瑤席。捲幔睇遙山。連峰漾秋色。澗空萬象澄。地迴諸天寂。勝遊方羨今。孤蹟猶緬昔。

曾聞開士居。舊是遺民宅。遙知蜚遁情。詎爲煙霞癖。水石留餘清。風流想高格。疎磬鳴上方。煙壑澹將夕。枯禪縛未能。悵望冥飛翼。

寒山別館對雨同來殷作

際曉元蟬吟。涼雲蔭喬木。玉琴泛商聲。寥寥感幽獨。故人軫離居。暇日惠高躅。煙蘿結清歡。嵐影散遐矚。飛雨忽來過。筠翠藹新沐。稍迷雲外峰。復亂林中瀑。頗滌塵慮煩。焉念流景速。嘉藻時見遺。瑤尊更相屬。松陰澹欲暝。殘鐘度空谷。

剡溪用康樂赤石泛海韻

楊舲溯翠微。秋蟬吟未歇。崖窮澗道開。煙深林影沒。哀淙漱雲根。明瀾鑑秋髮。沙嶼恣沿洄。溪山自映發。嶺表送斜暉。巖端吐纖月。時聞石瀨喧。遙見樵蹤越。芳樽還共持。高詠詎能闕。遠情寄空濛。乘運任淹忽。眷茲曠世懷。雲蹤繼前伐。

踰金地嶺渡幽溪至高明寺

金地逾百盤。褰裳及初旭。細路緣秋毫。層巔造雲族。淺溜汨近踵。游氛晃遠目。鈴鐸忽清揚。泠泠出深谷。方從木杪行。焉辨巖下屋。參差楓樹林。一折入山腹。遙疑磴道窮。屢訝巖勢複。怪石生角牙。暗泉韻琴筑。短狖亘僊源。名藍藏澗曲。入寺怖鴿翻。倚樹馴猿伏。霜柯雜青紅。煙壑淨蒼綠。菌閣面飛崖。山廚抱叢竹。

宵澄林響交。梵靜秋襟肅。喟彼塵鞅勞。眷此懸燈宿。

瓊臺

玉霄峰下森天仗。瓊臺高削擎僊掌。一線丹梯不可攀。危崖直下三千丈。我從越嶠訪靈奇。秀甲寰中心獨賞。青笠紅衫試一登。天風縹緲凌虛上。層巔積翠鬱蒼寒。石骨峻嶒無寸壤。列障紛看玉笥圍。天中獨有金盤仰。下臨絕溟浸山根。天影倒垂雲氣盪。波沈蒼壁鎖蛟螭。日冷青蘿淒魍魎。峭壁中開更杳冥。玲瓏雙闕凌蒼莽。急湍出峽走雷霆。迸落千巖散靈響。化工狡獪渺難名。頃刻晦明移萬象。嶺表初逢陽景回。林端復見陰霞晃。洵知絕境接清都。時有僊靈此還往。夜靜龍吟大壑寒。秋高鶴唳瑤壇爽。化人彷彿計追尋。灑氣橫空絕塵想。冲舉還期羽翼生。采真擬待琅玕長。撫松吟嘯澹忘歸。夕照銜山增悵惘。回首雲關白月來。神霄一片金波朗。

石梁瀑布

龍門突兀風雷作。洶洶崩濤天半落。冰簾萬丈捲晴霄。轉轂盤渦般大壑。青鑱玉峽高入雲。飛梁橫亘中穹若。疊嶂還疑神斧開。半規更類天弧拓。紆迴三折透砢砢。偪側重關豁齷齪。遠從華頂沛僊源。地肺玲瓏互穿絡。萬派爭趨赴一門。摩崖鬪險誰能縛。奔騰突騎鼓嚙胡。誼扣奇兵振鐔鐸。捫蘿穿竹俯蒼冥。亭午迷濛日色薄。破空炯炯劃琉璃。濺壁霏霏散纓絡。瀉入寒潭勢轉雄。衝飈捲沫還相搏。聞道靈湫深莫

窺中多神物。蟠蛟鱗。緣溪一縷水。煙生往往浮。金耀鱗角。天際常飄法。雨迴林端自有慈。雲幕是時秋盡。海風寒。殘潦無聲羣澗涸。誰從碧落挽銀河。元氣淋漓恣盤礴。人間真見玉龍飛。杖底深愁坤軸弱。曇華亭上撫危闌。極目蒼茫興遠託。應真奇蹟閱靈墟。終古潮音蕩寥廓。比似恆河久閤人。芒鞋幾輩登名嶽。夜涼白月照跣趺。一片秋聲撼虛閣。搖搖神觀不成眠。手攬長虹夢猶噩。

題徐昭發畫馬

南州高士如冥鴻。偶然畫馬非畫工。矯矯卻得雙真龍。流雲飛雪花浮動。疾馳下阪長風送。紫髯奚官不敢控。春塘水暖芳草齊。方瞳紫燄臨清谿。跳珠散迸碧玉蹄。前馬吸流微濺沫。後馬涉波氣咆勃。弄影嘶縱超忽。嗚呼神駿愛者誰。在廐萬駒非權奇。空被錦韉牽珠鞵。蘭筋蕙腕時遭叱。千金不得增高價。縱有健步誰當駕。落日蕭條鳴向天。跡雖在野神則全。逸氣不受俗士鞭。我欲穿雲踏龍脊。安得借汝追風力。山南更訪高士宅。

楞嚴壇詩百韻

高明古寺佛隴西。桑門安隱臨幽溪。苔龕藻井環忍殿。象豸馴伏龍躡跏。廣場選佛妙相具。諸天森聳形模奇。法雲深護戒壇靜。走避魍魎潛委蛇。伊昔智者度台嶠。定光招手當神遠。東逾金地西銀地。林壑邃美卓錫宜。遂穿霞心割地肺。圓通洞口開仁祠。澄神入定拜靈鷲。周覽大壯規鴻規。聖因應會萬靈翼。檀

波歎捨千輪齋。化城恍惚落人世。法器疑向鷄園棲。就中宣說灌頂戒。珠網高揭開重境。斬新日月照禪窟。寶塹閱世無遷移。我聞佛降維衛國。成道乃在摩竭提。蜂臺誦經法輪轉。明星慧日相昭回。祇洹精舍休夏日。大苾芻衆如雲隨。伽藍五重各殊狀。一一欄檻金銀爲。安庠結跏獅子座。玉毫珠火容熙怡。螺旋肉髻瑞光湧。映蔽世界懸重離。閣雲樓雲互糾縵。衣樹鬣樹交芳菲。六種震動歎希有。爭詣佛所同焮馳。曼陀種種雜瓔珞。旋轉上踊成花臺。十方徧聞迦陵語。六虛暗觸天琴諧。誰從座起偏袒拜。阿難小弟蒙佛慈。一朝回向清淨戒。頂光聚咒熏心持。親因攝受老魔伏。密音覲縷標筌蹄。塗場結界軌則備。哀祐末世傳塔梯。零陵甘松及薰陸。雪山牛糞和成泥。白膠青水糝黃土。辟除淨域纍崇基。方圓丈六爲八角。香爐華鉢紛周圍。隨安圓鏡爛如月。間華鋪設光參差。應器十六作清供。密薑蘇合兼乳麩。更煎沈水浴獸炭。然令猛熾投銅匱。純酥三合蜜半升。六時拉雜摧燒之。溫馨氤氳滃壇室。但有香氣無煙霏。當陽左右敷寶象。盧舍下至毗俱胝。剗心初七閱三七。抑揚持咒還思惟。鏡交光處佛摩頂。視身頓淨如琉璃。乘此咒心證無學。揚塵順風疾可知。自從貝文祕龍藏。窮子極夜將安歸。迦葉初傳正眼藏。四高臺迴疇能躋。道場三會紀周穆。化人蹤蹟今猶疑。漢庭皎夢感靈貺。乾坤震旦排荒迷。王尊重繭叩西域。摩騰飛策來東陲。雖分滿字演三獸。正趣未晰阿遮梨。碧眼胡僧一隻履。始挈心印推宗支。一花芬敷生五葉。二百年後無禪枝。佛若多羅精戒品。十部律誦稱辯才。同時上首得羅什。臺建般若宗門開。元奘復造結集墟。三

乘大意明西來。遷儀晦影海田易。梵花零落餘劫灰。智者獨受龍樹鉢。楞嚴戒體無磷緇。閻浮百億四日照。出世正應靈劫期。貂蟬簪笏棄如上。離垢遂作人天師。密諦總持戒定慧。大力蹴踏龍象獅。當其登壇戒三輩。典座嚴整諸律儀。法鼓琅琅九乳吼。清信士女環層塔。初說覺支不二法。微參念住第一機。上者證明斷諸漏。其下方便承三皈。或時散花下天女。或時獻花來山祗。或時帖耳大空侍。或時應手破竈飛。野狐聽講大慚媿。老魅聞道紛漣洏。正如昏波漸沈墜。忽現寶筏尋津涯。梵童禪伯各翹仰。歸真願得骨若皮。一燈傳照嗣白業。紫金鈿鉢千春垂。寺有智者大師鉢因芽心樹逾小劫。無盡特起興閻黎。無盡禪師中剎興天臺教剎若剔蘚露角節。昌黎句鬱金雞舌重磨治。四簷香樹大張拓。此壇復見騰金輝。我乘勝緣訪初地。忍花靈草羅軒墀。旁行細譯貝葉字。側理自揚螭頭碑。塔鈴語風仙梵放。彷彿古德開堂時。自敷坐具邀白足。拂拭毳衲談毗尼。塵根一切本非有。無無無盡空何依。牟尼不染四無礙。雖有戒律安所施。聲聞辟支由戒入。似調慧馬方拘縻。觀心自在忽解脫。神通遊戲超藩籬。但云持咒習堅忍。欲語究竟差毫釐。獨憐下劣落魔境。諸愛流結夢如絲。故令初禪息衆妄。第一增進當如斯。漸從無生證無滅。助因生慧窮希微。始知末法大饒益。圓滿無上皆自茲。爾來幻師擁高座。炷香豎拂同兒嬉。有時木強伸一指。忽效獅吼拈雙椎。亂華捏目迷頂相。業雲結影埋珠暉。香城陽燄了不悟。高自憍舉愚凡兒。其根鈍昧復狂瞽。纏縛無量貪嗔癡。公然召徒受記勃。飯孟香杖相珍貽。藥叉羅刹踞蓮界。刹竿岌岌經壇摧。安得神王震金杵。盡驅素洛

投泥犁。曰余多生本乞士。記憶宿住還依稀。革囊誤落文字海。受諸劇苦心骨悲。未知世事可忍否。攢眉但覺津梁疲。擬逃火宅入定室。誓願高與須彌齊。欲同慧可斷肢臂。擬仿劉勰燔鬚髭。捨棄重擔塞閻井。世臘雖逝猶可追。圓明妙性無退失。蒙佛憶念或庶幾。惜無師利共提獎。醍醐甘露療渴飢。繞壇三匝頓我顙。是身斷不爲行屍。天悠海永信根在。結習未盡爲此詩。千戶尙難圖作佛。發言恐受俗士譏。回看金粟現微笑。白月炯炯橫禪扉。

李鶴峰先生聽雪圖

吳山平遠環如帶。泉導雲根獨瀟灑。一峰中豁割僊源。天半銀瀧起靈籟。蓬蓬卻怪颺聲裂。練影翻騰破寥泬。奔雷走電無時休。噴作晴空千尺雪。玉龍鱗甲何蜿蜒。冷光四射交雲煙。磨崖作氣奮一擲。餘勢散入千林間。初聞琤琮振巖麓。復聽玲瓏間林竹。大鳴鏘鏘駭蛟虬。細響泠泠亂琴筑。白日不動高雲凝。六月凜冽驅炎蒸。岩壑入谷變光景。對此頓覺心魂清。我聞石鐘之奇在石骨。南音函胡北清越。那知絕巘落明瑤。水石鏗鏘更清發。玉堂僊客天上來。星軺暫駐雲關開。陰崖陽谷蕩精氣。吐納沆瀣生風雷。此時暖翠搖晴色。巖草淒淒澗花碧。虹梁左折出危亭。懸溜跳珠濺飛白。悠然臨眺披素襟。恍惚密霰飄青岑。非宮非徵激天賞。獨領太始揚清音。勝遊回首饒佳興。妙手可憐圖一幀。清商更乞拂龍唇。會見飛流四山應。

升枚桃花溪水圖

我從蔣生游。屢喚桃溪渡。溪上繽紛萬樹桃。綠波漾漾流紅去。林光交翠花燭天。下上啼鶯勸人住。不辭短艇數經過。重是相逢心迹素。高齋上日恣讌娛。耳目清迥畫不如。忽然寫作三丈圖。又疑此景人間無。我兄平生雅徹骨。邱壑胸中無宿物。畫師得此景趣融。一水一石精神出。魚鳥靜心機。琴書澹相守。冰雪爭世榮。性命悅蘭臭。未知王裴一輩人。風流得似此君否。今年繡谷賦餞春。僕也磊落知衆賓。比聞維摩臥丈室。苦索新句何拳勤。萬事過眼同煙雲。何如頤志且益神。答詩聊代枚生啓。他日花時重問津。

萬峰院對月

藉草舒幽賞。雙林月皎然。平湖環下界。僊梵靜諸天。松澗滴清露。花谿含夕煙。萬峰負絕處。一宿信前緣。登穹窿山上真觀

三峰高削倚層雲。傑觀清霄隔紫雲。迢遞丹梯凌倒景。飄緲絳節散靈氛。石潭雨暗聞龍氣。銅嶺煙消見鶴羣。羽化至今虛想像。擬將真訣問茅君。

桐柏宮

傑觀平臨日月標。華琳拱翠鬱嵒嶠。金庭古洞黃雲護。玉陛高真絳節朝。下界風雷鳴絕壑。上清鸞鶴降重霄。何緣抗手招仙伯。碧月瓊臺奏鳳簫。

蔣蟠漪尋春遊藝圖

春衫初製越羅輕。芳草晴皋緩轡行。山店桃花分馬色。溪橋楊葉試弓聲。擊鮮膾切紅絲細。命酒觴傳翠液清。料得興闌歸繡谷。翳然水木更移情。

禮堂祖錫企晉德甫來殷遠書通問賦此卻寄

霜鴻千里達瑤華。昔款重尋自嘆嗟。太白蒼寒當曉月。孤蓬愁悴托叢麻。生涯竟似迎風鷁。逝景真如赴壑蛇。見說海波遙接漢。幾時相訪一乘槎。

嚴長明

字道甫。號東有。江寧人。乾隆二十七年召試。賜內閣中書。官至侍讀。有歸求草堂集。

蒲褐山房詩話。東有生長秦淮。性情韶令。六代風華。資其芳潤。幼與俞滿塘鮑雅堂輩。絃匏倡和。麗藻流傳。表聖所云。采采流水。蓬蓬遠春者也。旋為夢文子司農所知。延譽於雅雨運使。寓官梅亭。最久。益借四方名士論交。而與余及惠定宇徵君。王受銘主事。沈學子貢生。共數晨夕。於是上探經訓。下攬叢書。發為詞章。備形鴻博。尋以獻賦入中祕。繼直軍機。鳴鞭珥筆。時扈屬車。然荷衣蕙帶。輒志江湖。晉侍讀後。遂以病歸。會畢君秋帆巡撫西安。招在幕府者。十有餘年。尋歸白下。復主廬江書院。以歿。其子觀能讀父書。所補元和郡縣志。亦為詳確。

宿文木山房待涂長卿陶蘅川不至

夕陽度西村。煙際數峰暝。返景入蒼潭。深沉颯餘暝。竹露隱清光。松風答佳聽。虛室臥脩寥。吟牀拂深淨。卻憶蘇門生。張琴散高詠。感此候中宵。孤筇佇蘿逕。

泰州西溪懷王述庵

晚雨池上晴。披襟豁塵步。華月生前溪。流雲在高樹。水木交澄鮮。煙芳對容與。人靜景亦閑。心清境彌悟。卻憶同門友。褰裳共遊寓。佳期不可敦。芳訊終難遇。支頤蓮葉東。煙際香微度。

乘月過中峰晤月江上人遂宿白雲庵

山月晚招人。冷挂松際屋。徘徊光欲低。復與上人宿。單扉開南榮。小像綴橫幅。圓蒲結跏趺。靜對石燈綠。東風意何爲。吹雨斷而續。蕭蕭復蕭蕭。一夜在深竹。

由光孝朝適青山

夢覺聞清鐘。僧寮見天曙。理策步松門。林光導微路。宿露晨未晞。荒煙憺容與。高下隨坡陀。沙洲信回互。前山紛已重。環谿緬非故。空聞澗草芳。時聽巖泉注。幽悰何處尋。清梵中峰度。

雅堂欲返南徐書此志別

一雁度淮水。天涯今已秋。青楓正搖落。況君動行舟。行舟去安適。東望滄波流。秋聲亂江樹。海色連沙洲。他鄉此爲別。一笑何時酬。嗟余寡兄弟。同氣惟君求。自從閒芳躡。半載心幽悠。淮南幸相見。桂樹欣攀留。寧知歲方晏。孤影終難儔。舊家秦淮水。遙對臨江樓。臨江夜潮落。直到南徐州。願君日垂釣。恐有魚書投。

古北口以外居民率因山爲田中秋後正直刈穫任負塞途延矚所及賦詩志之

塞山皆積石。間有戴土區。草人物其地。厥色黃而虛。刀耕復火種。糞以蕢與榆。時哉值枯旱。嵐氣能烝濡。亦有淫澇候。疏洩多滄沮。所爲計田功。屢祀恆豐腴。初聞僅土著。十五五俱漸。乃迄齊晉。負戴妻及孥。如梯百常地。似殼三尺廬。子焉長子孫。兼以逃庸租。我來值秋穫。攬轡爲遲蹢。齊民無異術。道在先勤劬。一夫旣其力。可食八口餘。彊藥尙如此。況彼沮澤洳。舊家東南州。厥土惟泥塗。其畜宜鳥獸。其穀宜稻稌。曠土旣頗衆。餘夫良不無。胡爲置本計。僕僕將車徒。于世旣無補。于身竟何需。公然效鼠雀。日盜官倉儲。

賦羅浮蝴蝶繭

麻姑生齊陽。散髮事王遠。一朝得仙去。譬若蛹脫繭。靈裙颺清風。翾忽莫可挽。化爲栩栩蝶。游戲洞天晚。余家近良常。羣真夙所館。潛通朱明天。幽約時復踐。嘉雀質五色。皓雀聲百轉。桂蠹金花蟲。種種各心繾。鳳子尤所珍。惜爲列仙遣。入夢偶飛來。作伴時苦短。耳山行自南。方物此其選。依持若同功。未忍遽分散。密須絳葉黏。輕藉游絲卷。綴如九子鈴。比若兩角銑。貯以越紗籠。寘之湘竹篔。見乞剛一枚。珍重抵玉碗。爲言清夏交。溫風綠窗滿。定有神娥來。妖嬈莫窮眄。兩兩條乘風。翾飛冷然善。小猶鏡屏張。大者陶輪展。扇面七華開。帔心九霞翦。彼哉葛稚川。抱樸寓遙巘。莎裳木葉衣。相視應有覩。而我貴沈冥。顧此情獨輾。爾本冷霞姿。仙都恣游衍。偶因文采彰。終被世塵浣。唐花飼豈堪。蠟樹棲難穩。且隨燕蟄冬。莫效蛭逐暖。好讓墨蛾飛。悠揚向秋阪。作貢華林園。描摹付斑管。

秋過熱河東砂石阪地產黑蝶大者五六寸土人呼爲墨蛾蒙古人呼爲額爾伯克伊秋中例以百枚進

御云如意館中
需作粉本也

書宋張舜民撰游師雄墓志後

唐室重辟召。從事多豪英。溫造佐河陽。崔翰居汴京。昌黎及樊川。所在尤著名。下汜趙宋初。沿此尙作程。

卓哉游夫子。夙秉河岳靈。弱冠從橫渠。章句非所營。農桑學校外。尤熟刑與兵。初膺范公忠宣忠薦。繼乃呂大防。

趙高并。中間韓絳琦琦蔡挺劉瑄。一一稱國楨。機宜掌文字。戰守司權衡。周知七曜歷。洞徹三軍情。岸幘古戰

場。精神貫長庚。一上分疆錄。四塞期永貞。再上安邊策。三蘖幾消萌。謂西夏吐番鬼章奈彼秉鉞者。大半皆書生。

但知投鼠忌。敢作橫鯨振。請看韓范儔。廿載相代更。坐鎮籌邊樓。雪鬢秋泠泠。聞負不聞勝。議守不議爭。

乘常亦黠虜。心膽何曾傾。史家例無識。所讐徒虛聲。其事出大儒。焉敢輕譏評。往讀西夏傳。太息真填膺。

斯誌今始覩。適愜心所盟。願誦百千遍。達此精與誠。願書千百本。勵彼頑與冥。聞公有荒阡。僻在關西坳。

公墓在武功西原鳳凰岡行將一再拜。親擷溪毛馨。兼書第二碑。刊置當元扃。高並武功山。終古摩天青。

秋帆中丞約遊秦中正月望日渡江由浦子口入關途中雜興

是身如浮雲。出岫隨所遇。況復平生親。招邀見情愫。匆匆飾行裝。一一別親故。向午至江干。雙楫亦已具。

長老爲余言。今夕易爲渡。風送隔林帆。雲低過江樹。回首國西門。蒼茫已如霧。始識身在途。船頭獨延佇。

暇日去不惜。出門程可稽。登車無幾日。已落淮水西。時方霽春雪。四望交流澌。淝河旣東會。渦口仍南躋。

奔騰狀匪一。到處相防隄。憶昔曾渡此。兩岸如町畦。

余於庚辰七月由鳳陽赴淮安經此。

今茲易瀾漫。更值落照低。人家間

浦激。處處煙迷離。舟人亟行邁。向夕靡安棲。食宿有定候。媿彼沙上鷺。

中原地將盡。氣勢漸不平。高低曲折內。所見都未經。雙輪蝨其際。終日敲復傾。益以塵土石。擁塞殊不情。有時白日開。瞥見成皋橫。云此赴伊雒。不及兩日程。側想古今來。蠻觸幾戰爭。英雄與豎子。各各成其名。空令千載下。絕倒阮步兵。

未到函谷關。先聞硤石阻。輿夫各矜莊。若有大敵禦。今朝果來茲。氣象實莽魯。山分青萬重。天豁白一縷。西邊飄秦風。東邊灑晉雨。五帥復三臣。茫茫去無所。況訪南北陵。遠作夏周語。平生事通脫。到此意慘沮。前挽後復推。惟恐失銖黍。安得向蒼鷹。參覃借雙羽。快意在一朝。詩成車出土。

嶠陵。

亂山缺左角。獻出城樓牙。雙旗颺清風。蕭瑟不滿笳。程途已牢落。況乃雪片加。篋空著人面。雜以塵與沙。行行欲投止。土室不數家。居人面黧黑。見客如驚鰲。此間詎堪宿。奈彼前途賒。因思采薇歌。霏霏怨行車。我今豈無感。辛苦將誰誇。

潼關遇雪。

眼花

夙憶宋金華。文采燭宇宙。惟視不及尋。時作目童詢。余時當盛年。神明方在囿。內景既充腴。外象盡通透。洞垣雖未能。觀理頗不謬。一目竟十行。半面不重覆。暗中摸曹劉。空際測廣袤。時笑休復眇。每訝仲賓陋。

江鄰幾近視見宛陵集歐陽觀不能遠視見江南野史豈意閱歲時半百甫接構老態如有約一一來輻輳耳輪已樹塞牙關倏開
寶幸茲雙琉璃沉瀦盛未漏誰知復有鬼悄焉夢中妬醒來覓舊觀種種異狀候喜時淚翻垂暗裏光忽
逗遠者徑欲前近反莫敢就疎迺或褻狎親則轉悖繆守墨苦未能視內反多咎無計施斧斤曷由假詛
祝爰效子羽責歷歷與之响曾聞古人言養虎自詒寇計汝附我身相待亦云厚江山恣偉觀英髦快遐
觀悅汝置圖書逸汝屏篆籀或恐昏汝神中年戒淳酎或恐搖汝精外室卻艾幼汝惡我即防汝好我必
副似我作居停庶可誇邂逅緣何中路間如羿卸其殼頓使大光明一蝕不可救年非卯酉克癸辛雜識凡人損目者命多是卯酉克占豈六三遘有道或可原無說頗難宥雙瞳顧而語忽作反唇詬格物子夙稱兩端諒已扣失
養則銷亡得養則老壽自我附汝身合契等先後見子目一編若鳥哺其殼卷閱三萬餘歲歷五十右精
爽已亡羊樊籬更焉守君看滿月光終古眎若晝所以葆貞明不照句與讀感茲意良殷甘言姑弗誘人
匪形之妍道在德之茂有光而常韜何異盲與瞽況目于我身如賓筵一豆雖眊卻非瞽萬物尙可觀縱
瞽亦何尤有用我輒售古詩三百篇中聲夢曾究有召須瞽矇大樂當入奏外傳二十卷韋注師所授如
欲繼左邱長箋復堪就余幼時著詩樂中聲表並期疏韋昭國語形質有成虧神理自通復語罷視空庭桑榆晚芳秀中有殘
陽光斜穿讀書牖

題鈕昭服牧村圖

小塘十畝烟水閒。青村窈窕當其間。板橋流水絕行迹。菰蘆深隱何蕭然。先生逸才世不數。清標令譽殊高寒。興酣落筆笑無價。會須揚藻翔天垣。胡爲幽棲類窮士。漁莊蟹舍相沿緣。君言牧村有佳趣。大湖五瀉當門前。曲梁遠隔蝦菜市。連汀近接鳧鷖川。烟林一徑入蒙密。絲楊踈地花連天。三株兩株屋頭樹。十稜五稜溪南田。樵兄漁弟便遊逸。往來西陌連東阡。此間笑傲樂莫樂。武陵何必尋桃源。茲圖張示亦何意。俾我昔夢難安便。我家舊住淮水曲。西溪點綴誇幽妍。自從放蹟入塵世。揚州一夢留三年。佳山美水坐孤負。漸看青鬢成華顛。名園自古難獨樂。寒夜況爾宜對眠。我當踐子息壤約。子當酬我招隱篇。

徐友竹入關同寓節署出所作秋山雨霽長卷索賦因書長句以贈

君家住近重湖灣。放筆卽似湖中山。湖中山好畫不盡。翦來一角如輕烟。烟中峰巒覆如甑。墨氣作雲雲不定。浮空積翠浩冥冥。知是昨宵雨初竟。雨止不歸壑。散作奔川流。飛灑百重樹。四山同一秋。秋聲蕭蕭雜鳴雁。中有人家似堪辨。沿緣騁望渺無津。祇有漁舟自成伴。此中可耕亦可漁。不然買屋還讀書。閉門卻掃動經月。日飲山淥忘飢飭。胡爲塵土蔽雙膝。回首鄉關空歷歷。蕭條粉墨獨留連。浩蕩年光復安及。澣溪山清以真。誰其友之荆蠻民。具區水寒且泚。誰其似之洪谷子。我今題詩非漫與。白頭結交定相許。他時買權來過從。莫遣空山隔秋雨。

由對松山北飛龍翔鳳二嶺登十八盤遇大風雨至三天門有作

左壁如屏右如障。爭長東西不相讓。就中一線露青冥。天路云從此間上。昂藏七尺付輿丁。曳以長繩挾以纜。如蟻旋磨螻循條。頂踵挨排成一行。前瞻淡日方平肩。後顧狂飈頓扼吭。雲來便作水烟歛。雨急還資電雷壯。洪鐘萬斛四山縱。強弩千枝一林放。盤中倏變海茫茫。盤頂空餘天泱泱。去此時黍粒渺單身。耳目精神交滉漾。妄思捧土塞天河。不使飛流下千丈。更愁山去化方蓬。高掌還應巨靈仗。陳祈聊解暫時嘲。詎識山靈已陰相。分風特爲掃霧蒙。豈出天門高有閼。南天門在十盤盡處同遊才子幾人來。引手相看幸無恙。遙看傑閣上摩空。閣舊在天門內三靈侯祠會借僊翁赤藤杖。拄來長嘯倚危闌。一覽斜陽下空曠。

唐登封臺在日觀峯西薄暮投宿夜登峯頂觀日出歸後題詩伏虎門壁

清晨盼天門。得上已昏黑。古殿閉虛皇。神燈黯無色。齋心丙夜目不窺。倏驚窗紙紅離離。空中似聞海波溢。耳畔如有天鷄啼。矚然走向幡竿石。石舊名瞻魯臺東望立同櫛木直。不知咸池去此路幾千。但覺海水羣飛入胸臆。初時色漭泆。有若新磨銅。須臾勢隆起。一線緣長虹。咄哉長虹曷由起。復止南亘魚頭北魚尾。拂天誰會羲和鞭。敲折玻璃萬條紫。散成朶朶金芙蓉。貼向滄波吹不起。少焉風動蓬山根。播蕩溟渤如翻盆。就中團出火一輪。計里遠以三千論。據徐整長歷說左歆南離。右欲北戒。大象焉藏。太空焉繫。何龍燭而明。何麟鬪而晦。胡棄策而莫追。胡揮戈而遽退。安能御六辨。指陽門。邛緜蓋。曳緋帟。足踏紺鴉背。飛上搏桑顛。遠引木公袂。高拍青童肩。親從黃道訴真宰。一證古今扣槃捫籥之譚言。狂歌未了衝飈起。倏見雲來若

鵬徒兩翼飛遮萬里光。一時賁育咸披靡。東牟道士劉孟容。自言卅載居山中。曾經五度見暈采。皆與此夕神光同。道上言泰山近海。長有蒙氣。空涌似此。瞻矚親切。三十一年中。記曾六度而已。皆有歲月。書東天門壁。鼉磯忽報更籌淺。觀壯如斯志應滿。歸來奮筆寫龍蛇。惟見兩眠金光不停閃。

初四日下山祇謁岱廟。僅和文子司空乙亥歲殿壁勒石元韻並效其體

太微執斗臨紫宮。元精合撰呈卑崇。靈威仰尤愛所鍾。職諸岱使專厥雄。維帝出震開東封。垂旒仿佛君雲中。日章月采昌以丰。外表嚴毅中抱盅。金輿山立壁兩轡。蒼麟夾侍搖青鬣。先以大角倉精龍。眈天察地橫復縱。歎海欲漠如長洪。莫原厥始要厥終。周三千里境未窮。高四千丈廓有容。天關上下開梯衝。左日右月驚發矇。太清宮碧屏則彤。云亭社首衛若墉。玉符琨瑞埴附崧。配以太華恆衡嵩。豐聞精氣相周通。象若侯甸男衛從。扶輿匪特以自豐。德之博者功亦隆。稽古顛頊居空峒。奉火爲祖金爲宗。禹彊佐之殫靖共。導率元武行躡躡。窮蛇冠珥追厥蹤。倚燭龍燭山曰鐘。陰火灼冰冰弗融。鳥獸希革草失芄。維靈頰眈憂心忡。少皞于召來東蒙。唐臣陸吾若不逢。明威聖者天所工。負甲背虎持六犇。陽門倒挂搏桑弓。竅鑿大塊噓協風。生氣涌出如奔虹。吹萬無復天札凶。谷氣不瘳林不癢。時叶光紀心維惱。斥棄輿馬兼僕僮。上之帝所陳鞠誦。天庭忽荒神罔恫。縮身潛喘夔魑同。下奔委羽棲其躬。因是六幕交和沖。靈迺訢合孚若顛。塵箕舒姦畢降凍。凝膏液若乳酪醞。以昌萬彙綏九農。奔走唱于復唱喁。天子時邁嘉迺庸。高

居被飾金碧重。五禮六樂罔不供。奠以蒼璧妃青琮。天酒地汁湧溶溶。奎章下賁光維熊。輝增羣岳麗爛空。詎等封禪夸成功。七十二代交洶洶。滕書堙玉欺瞽懵。豈惟麟鳳來竟慵。黍禾茅亦生不叢。嗟余八翼慚瓊璫。茲何意向天門狎。挈才自媿成牛螾。含辭欲吐道弗充。迴矚驚見貞石礪。重若球貝陳三雍。披吟未已淚落胸。公如天柱頽中峯。元神陟降應在穹。帝晨左右鳴珩璫。曷歸乎來牖我衷。闔闔東望雲瞳矐。

蘇文忠公壽讌詩

蘭陵夢裏吟聲絕。

夢中寄朱行中詩爲公絕筆

精爽飛空作明月。清光下照七百年。令我轉溯哉生前。丙子之冬月建

丑。奎宿垂芒亘天久。降神應會蓋有由。磨蝸胡爲命宮守。豈知謫墮天所令。厄公遇正成公名。三言奏御見忠愛。卅載外出空怍營。徐黃猶是中原地。更遣流離到荒裔。去國難爲譽謬心。投荒豈是朝廷意。儋廉九死始一回。買田陽羨空徘徊。迄今祠宇半天下。瓣香致敬知誰哉。河間中丞今玉局。政事文章兩無匹。傳神阿堵得章侯。特補龍眠舊時筆。像有李公麟畫石在眉州祠內今已剝落佛說真應去。有二身。思公嗜好如公存。芋羹臠飯豈堪飫。花豬竹鯽須重陳。中山松醪近希有三爵。但傾真一酒。門牆欲附悵生遲。再拜陳詞公鑒否。聞公押衙紫府忙。幾時人世來翱翔。御風騎氣倘過此。應喜再見秦張黃。

存雪亭晏坐有寄

林臥逢秋盡。亭皋此暫過。天寒聞雁少。本落見山多。忽憶元棲者。離居思若何。西風不可越。渺渺洞庭波。

山齋琴夕示吳瑞宜

閒塔疎雨過。桐葉有清陰。掩袂惜微月。當窗橫素琴。泉流時近席。風細不歸林。幽賞知誰是。寥寥空外心。

輓錢思贊同年

閒歲良書闕。侵晨惡耗新。招魂迷遠道。臥病憶兼旬。薄宦憐遲日。高情見古人。青門乖別處。草草記霑巾。老覺身為患。貧原俗所輕。馳驅銷壯志。憂患急餘生。元草憑誰付。晨星次已更。空留遺墨在。藏棄志交情。

思贊以書法名吳下。

中秋日同人夜宴西齋有作

長空無翳樹無烟。為惜良辰減宴眠。遙夜天分秋一半。中庭人與月俱圓。香浮河漢微茫外。坐近江花綽約邊。他日料應懷此夕。好將嘉會記尊前。

金川凱旋王蘭泉前輩于四月望後三日道出秦中別後有書見及賦寄四章

誰參神策定維州。節鼓西迴暫駐郵。岳色橫雲隨候騎。河流噴雪浣征裘。鬢絲涼帶金天雪。詞筆清含白

帝秋。公于座間賦霜天曉角詞一闕以志會合。多少枕戈磨盾事。臨歧無術問從頭。

占象師中擬范韓。幾曾盤錯見艱難。六軍帳外朝聽策。上將韉邊夕問安。心惻國殤同日殉。謂損之吳鑑南請君同殉

木果木之難。手書露布萬人看。凌烟會見新圖畫。誰道書生骨相寒。

詔策籌邊第一功。恩光稠疊動昭融。翔鸞音湛三槐露。孔雀翎翻九棘風。邦典坐愁心鄭重。王綸手捧地
尊崇。公入都後晉秩大理寺卿仍直機庭臨風莫道臺光迴。仰首卿雲即見公。

茂陵秋雨住經霜。消息天邊訊一行。猿鶴餘生依子舍。風雲神筆付詩章。信知前輩才無敵。可識蒼生望
正長。休以故人歸計得。使思華袞換蓉裳。公來書有欲賦遂初之語

九月望日錢竹初同年來自富平出鳴秋合籟吟卷示閱漫書

十年招悵冷鷗盟。丙戌歲與竹初別于都門何意天涯兩合并。爲我聯牀話疇昔。一枝紅燭雨三更。

芝秀蘭芳滿謝庭。拈來字字感湘靈。秋聲一部愁無着。合付江南宋玉聽。

集陸耳山新居聯句

崢嶸歲光闌。嚴長明局促吟思懈。偶傳卜居篇。吳省欽遂破止酒戒。同人无悔占。曹仁虎適我有美避。迹慚陶廬

偏。陸錫熊塵謝晏宅隘。北市袁粉坊。趙文哲西鄰蠹香界。枝穩鶯遷巢。吳省欽逕僻鶴守柴。門前閭可羅。程晉芳庭

內淨弗灑。井眉鹿轡牽。阮葵生簾額鴉叉挂。盆松脩而臞。長明几石貞以介。榻標甲乙籤。省欽鼎畫方圓卦。膽瓶

凍中堅。仁虎腳鐺炎上煖。賜扇珍裁筠。錫熊傳書寶垂薤。僵臥人推袁。文哲排入客等噲。輭埃漬帽裙。省欽餘霰點

衣袂。矮屏窺瓏璫。晉芳方褥踞緯繡。寒避莊噫衝。葵生暖迎趙日曬。謀十榼千鍾。長明去三揖百拜。泊無饜人更

欲。省把自園官賣。中膳烹小鮮。仁虎末俸鑿疏脾。腹肆溢膏腴。錫熊言泉瀉清快。超超妙談元。文哲咄咄詫語怪。出

腑森槎枒省吞胸掃蒂芥支枕吟堂花芳秉燭讀壁畫賞心癖嗜痴癸得意癢爬疥鼓嚴初三交長律短

下九屈撥籠檀炷沈省打牕榭葉敗眷茲尊蟻乾仁慨彼隙駒邁臣飢空解嘲錫僕病倏起憊身遊雉川

圖文僮守子淵誠篋牖封紙弼省蘇垣覆泥簣爭耽秃管緣芳莫顧癡錢債團頭香火盟癸抵掌水天話

覘度山公閨長愛才穎士价莞爾開令顏省竟然接芳欵歸馬路雙歧仁過雁聲一派終署散人銜錫言

傍參佐廡文

鄭澧

字晴波號楓人儀徵人乾隆二十七年舉人三十年召試賜內閣中書官至浙江糧儲道有玉鉤草

堂詩集

和同年施鐵如侍御過訪寓齋夜話並送別之作

楚客垂垂老燕臺草草過秋聲連日夜鄉夢落關河暖眼逢人少離憂自古多非君今夕話誰與慰蹉跎

雨中有述

露下涼生大火流三旬水宿感淹留河聲送雨過沙市山翠橫烟入柁樓遠客懷歸終戀闕美人經別易

傷秋紅塵自有棲閒地誰遣行藏愧白鷗

錢維喬

字竹初。武進人。乾隆二十七年舉人。官鄞縣知縣。有竹初未定稿。

自碧霄步至真濟寺

沿溪竟忘遠。山氣忽成雨。遙望千仞峯。身入得淨土。虛樓障雲岫。日影未辨午。出戶聞潺湲。涉足石可數。雙崖勢疑合。稍轉遠山吐。復坐梵舍深。白足偶共語。屋頂森萬竹。空翠墮眉宇。披襟滿涼籟。六月定忘暑。嗤彼塵中人。幽棲境終阻。

遊石門觀瀑

夙吟太白詩。遂理謝公屐。遠上窮秋巖。雙崖忽中闕。雲泉竇天半。飄灑萬丈壁。仰見銀虹飛。到地素影激。四山黯欲雨。一綫垂日色。坐久寒生衣。石氣森漸逼。雁山兩龍湫。攬勝快乍歷。復此續幽興。欲去意屢惜。解纜寒灘鳴。清響倘未隔。

雨夜與夢鈿坐話

幾日西窗雨。天涯尙許同。關河雙淚外。骨肉一燈中。短髮難消酒。哀音易墮鴻。明年見春草。好與數飄蓬。

殘荷

相逢淺水舊依痕。退盡紅妝葉半存。到眼已隨霜氣老。亂愁猶帶雨聲喧。涼生楚佩空餘影。香憶吳船枉斷魂。我亦無心任舒卷。製衣何處覓秋根。

五更渡洛水

翠羽明璫夢未真。寒泉空有水潏潏。馬頭一片將殘月。曾照黃初作賦人。

朱孝純

字子穎。漢軍正紅旗人。乾隆二十七年舉人。官至兩淮鹽運使。有海愚詩鈔。

蒲褐山房詩話。子穎為都統龍翰之子。承其家學。能畫。尤長于孤松怪石。擅逸氣。鬚髯不多。有兩莖緣脣而下。長二尺許。風吹飄然。撚之頗自憇也。作令四川。獨游峩眉。經旬乃返。後以迴避。當量移他省。時大兵方討金川。子穎單騎赴營觀戰鬥。久之而去。其葛儻奇偉如此。愛友朋。凡知名士如姚郎中。姬傳。王太守。夢樓。皆所最契者。晚為揚州鹽運使。方欲招致大江南北諸賢。為文酒之會。而遽以風痺解職。姬傳謂其不可一世之氣。勃然動于紙上。夢樓謂其豪宕感激之意。屢見於詩者。信也。

題橫幅大松

雲綃誰寫橫江梅。回頭已失濠梁崔。東絹破裂真榦摧。畢宏韋偃安在哉。嶽樓晨起滌水硯。琥珀十笏磨煙煤。一株兩株不容擬。四株五株羌能排。飢蹇頗疑筋化鳳。僵立亦作皮生鮐。上者天矯破元氣。下枝磊砢交根埋。豈惟齊劉視螻蟻。撫摩秦漢如嬰孩。人言放筆有奇膽。斯意莫作凡情猜。前年飛鞚大峨頂。落日踏蒼雲堆。偶乞尊師壽者相。坐騎龍象雄瑤瑤。千萬億身得化理。乃敢縱墨由靈臺。象形象意兩無着。青天赤手搏風雷。驚濤忽忽四壁響。片月下照生蒼苔。張髯大笑支方頰。我欲言之言難該。虛亭坐觀六合妙。更請義旨參如來。

送二亭從姪還邗上

處士江干宅。蕭條今幾春。漁竿鳧共老。菰米雁同貧。子亦工文字。妻能共隱淪。可能期結社。安頓苦吟身。
汝南閒守在。白髮近何如。友義平生重。詩名海內孤。經時聞臥病。隔歲少來書。風雨江關外。憑君問起居。

謂王夢樓先生

此別何匆遽。當年亦渺茫。天心關聚散。士氣屬文章。願卒名山業。休隨涉世方。宣城今老去。淒絕鬢毛霜。

洪椿坪二首

金碧垂空亂夕陽。天池雲表望星房。無邊雪嶺千層白。不盡霜楓萬樹黃。飛鳥與人爭道路。啼猿知我憶家鄉。煙叢雨霧迷歸夢。那得羈人不斷腸。

僵臥冰蓮第幾層。精靈入夜此依憑。溪聲冷逼松牕雨。山氣昏圍旅舍燈。世外浮沉驚幻妄。眼中慧悟得頻仍。神盂寶掌匆匆住。布地黃金苦未能。

羅兩峯爲余寫真

勳名無復上麒麟。剩有丹青托故人。萬里來歸逢汝老。一官落拓遂吾真。籌邊經野功何補。殺粉調鉛技更神。橫掃琳瑯三百個。滿添風露到閒身。
橫幅中萬竿修竹。絕無他物。故云。

題江帆風柳圖

睡足青山媚曉姿。煙篷縹緲柳參差。煮魚記坐蜻蜓尾。消受江天飯熟時。

望泉圖

楓葉飄紅點石苔。隔林煙靄隱崔嵬。山泉雨歇不知處。吹作白雲天上來。

金學詩

字韻絃。號二雅。吳江人。乾隆二十七年舉人。官主事。有播琴堂集。

月夜同人集青瑤池館分賦

碧沼生夕涼。萍香微雨歇。篔簹漾纖影。微露林端月。開酌娛清暉。披襟坐超忽。隱隱遠鐘聲。宵分出疎樾。

永濟寺曉起步尋江滸諸蘭若

松顛鮮旭升。一鳥鳴晝寂。攬衣起前軒。凭几展幽覲。微風娑羅香。宿靄蔭深碧。老僧啓禪扃。導我入修陌。煙巒秀可餐。雲樹濃欲滴。崖峭形嵒巖。徑深路紆窄。枯枝嵌簷凹。危樓壓山脊。憑高瞰江濤。訪古剔苔壁。不見六朝人。空留三界宅。林端梵音來。含悽感陳蹟。

登君山望大江作

乍離江上城。遂陟烟中嶠。野逕希行蹤。寒巖斂羣妙。探幽著屐登。選勝支筇造。半空水氣浮。絕頂日光耀。林壑謝近窺。雲帆延遠眺。扣舷揚吳歌。鳴榔發楚櫂。三山樹蒼蒼。萬里潮浩浩。祠宇凌崔巍。亭臺峙巉峭。

澄觀符夙懷。寂契舒朗嘯。將棲蒲葦叢。散髮狎漁釣。

句曲道中望三茅山

野店荒鷄鳴。犯曉促征騎。初陽呈衆妍。平楚豁新霽。迢迢三峯高。半空落紫翠。杳靄峻林深。紆迴修壑媚。蟠龍神物潛。駕鶴仙蹤寄。隱約五雲中。遙天度鸞吹。羽帳散金花。靈崖啓玉笥。愧非松喬儔。彌結烟霞契。何當飛步登。揮手謝塵累。

食江瑤柱

河豚擅吳產。江瑤登閩市。水族有萬殊。我獨取二美。鱠魚差比肩。餘者卑卑耳。晴窗午夢回。忽忽動食指。有客餉羹材。來自溟海涘。光堪辨綿紋。質未脫泥滓。雙甲一罈開。肉柱勢隆起。孤莖矗明瑤。迴腸纏文綺。色味各殊尤。對之一笑喜。急呼庖丁前。應手劈肌理。割腴熊掌同。選勝鼈裙似。惜哉龐然軀。所得僅有此。藏腹異蚌珠。然身類象齒。老饕久慕名。乍熟口已哆。飽啖兼拾瀝。未許丐奴子。雖爲哺啜徒。猶笑肉食鄙。回思赤鮭肝。或以毒致死。隴蜀不可兼。吾寧姑舍是。

食鮮荔枝

有美十八孃。質秉南方火。薄醉暈輕紅。化身爲此果。平生爲口腹。不惜鼓遠柁。屆時乞新苞。天公應報可。守官例餽貽。輿僮紛擔荷。週圍黃篋盛。旁襯綠葉裹。乍見亟開緘。入手柔枝彈。紅卸羅纖纖。白映玉瑳瑳。

當筵薌澤聞。此際情無那。所惜幕中居。有類樊籠鎖。動不踰闕行。忙卽掩關坐。豈能入園林。按譜窮渺麼。傳聞洪塘外。朱樹盈道左。繁星列焜煌。初旭照嫵媠。佳必厚且圓。餘多尖而橢。酸澁大無當。清甘小亦頗。適口非好名。耳食寧唾我。楓亭宋家香。尙望郵致夥。楓亭距會城三百餘里。出荔支其名宋公香者最甘美。 閩山千里程。藉以償勞瘁。快哉坡翁言。日啖三百顆。

白鶴嶺望海歌

有力不敢役五丁。有斧不敢用巨靈。層峯環海作屏障。兀立地柱撐青冥。我來欲窮日出處。東行笑指扶桑程。攀梯拾級幾千丈。石路一線披榛荆。書生雖無濟勝具。盤迴幸藉篋輿輕。蛙聲閣閣山雨晴。飛瀑瀉入寒潭清。花香繞衣翠侵屐。不知身在雲中行。三層古嶺倏到頂。上有矗起縹緲之孤亭。險絕不虞虎豹窟。高處徧覺魚龍腥。海濤汨汨風泠泠。仙人跨鶴吹鸞笙。一笑向我松間迎。水晶宮闕琉璃屏。奏鈞天樂酌醪醑。大千世界落杯底。島嶼隱現如浮萍。艚舫乘流頗自在。此間有路通蓬瀛。吁嗟乎。吾生萬事勞其形。繭絲纏裹不得寧。神仙可學丹可成。悔不早侍安期生。

周別駕模春驛曉裝圖

欲落未落澹月橫。柝聲乍歇車聲鳴。旂亭古柳得春早。綠烟深處聞啼鶯。馬上曹騰續殘夢。風前緩引青絲鞵。使君行部歷郊原。往往輕裝屏驕從。盧溝橋西月一痕。淀南淀北沙田勻。漁莊隱隱接野戍。風景宛

似江南村。是時繁花放晴朶。碧衫紗帽吟情頗。竹馬無煩叩角迎。書囊自遣平頭荷。宦遊風物洽清襟。紅樹青蕪一逕深。還將走馬芳堤路。併入凝香畫閣心。披圖我愛郊行樂。酒旗山店東風郭。幾樹棠陰萬戶垂。期君行遍陽春腳。

爲蟠游蔣丈題春郊遊藝圖

我生不到紫塞遊。黃雲白草馳驂驄。萬里功名紆夢想。十年投筆輕封侯。高齋快展遊藝圖。圖中花柳交紛敷。澄波灩灩素練鋪。碧山浮靄連平蕪。平蕪三月江南路。絕勝榆關風雪暮。千步毬場林際開。五花驄影煙中度。晴郊攬轡行步工。青絲紅鬣嘶春風。深林窈窕狐兔匿。忽驚霹靂鳴琯弓。先生少負青雲器。談笑論兵縱輕騎。小技還誇貫蝨心。長材未許舒猿臂。掉頭獨賦歸去來。蕭然三逕臨風開。書裙一字抵寸璧。飽霜秋兔相緣迴。壯遊回首浮雲改。步履林邱致瀟灑。北海開尊舊雨多。南山射虎雄心在。曼胡之纓短後服。單急裝成攜羽鏃。興酣貫酒秦孃家。半醉歸來倚繡谷。城西獵罷日斜初。書劍生涯興有餘。最羨少游騎款段。絕勝新婦閉帷車。

桐廬

此地真瀟灑。楓林竹樹邊。依山無雉堞。近水有人煙。樵逕夜鳴柝。漁家曉扣舷。前途指巖瀨。望古思悠然。

石湖秋泛同褚舍人

延璋

高明經

景光

張

玉穀

劉

漢

顧

宗

三茂才

一髮青山夾鏡明。西風雙櫓劃波輕。沙棠載酒春橋路。半卷湘簾按玉笙。
鷗波千頃越城西。烏桕丹楓兩岸齊。一抹菰烟漁唱遠。布帆阿那入雲溪。
石湖別墅長青莎。白石風流嘆逝波。惟有團欒湖上月。夜涼曾照小紅歌。
沙禽點點背人飛。紅樹寒塘夕照微。十里薺花香不斷。鯉魚風裏櫂船歸。

馮兆觀

字鑑塘。山陰人。乾隆二十七年舉人。

童二樹畫梅寄懷次韻

四海誰識霜鬢鬚。一壑僵臥如寒株。已看枝葉並禿落。那得雨露相滋濡。山人向我寫肝肺。真相乃似遺
皮膚。我非君平竟棄世。夢中常想蒼生蘇。馬雖有蹄出無地。玉京空望神仙居。往者友朋盡雲散。慷慨獨
與長劍俱。憂人之憂樂人樂。極目寧敢登高呼。渭濱回首白鷗沒。烟波萬里歸元都。況有老梅可作伴。讀
書飲水誠良圖。生當太平靡所補。一衣一食皆爲虛。念此局促夜不寐。仰屋撰述心神枯。料無移文仍嘲
及。猿驚鶴怨今知誣。何時賀公湖畔路。烏蓬同坐三山區。

再和前韻

逍遙公子今白鬚。時憶繞澗梅百株。鶴歸應帶片雲至。蒼蘚荒苔雲氣濡。忽來洛下住二載。每苦塵土侵

肌膚作書作畫自遣興。更爲疊韻追髯蘇。盤空硬語卻妥帖。似在松風亭下居。紛紛玉蘂欲墮砌。縞衣月下踟躕俱。二十四篇再三讀。鄰人怪我中夜呼。豈知意愜便高唱。卽今所得猶大都。兼有寄我斐然作。題在巨幅梅花圖。老梅作伴意良厚。相勸泛宅浮空虛。此詩此畫在世間。應令來者銀海枯。因君欲作買山計。山靈歎息言非誣。歸歟杖策梅花屋。嘯歌會在雲水區。

蔣雲師

字瑞應。青浦人。乾隆二十七年舉人。官至順天府西路同知。

夜坐

山行苦奔馳。寧無幾日暇。官牘稍料理。如馬銜乍卸。蕭然對中庭。最喜在涼夜。微風吹空林。纖月映幽榭。魯酒且淺斟。雜飮及冷炙。雖乏故人偕。勿令歡意謝。人生樂有幾。流光不少借。卽此閒適餘。枉用獨悲咤。坐久濕我衣。已忘秋露下。

陪蘭泉舅氏遊細林諸山泛泖而歸

雨歇春陰薄。移舟泝碧溪。殘梅香更遠。細草綠初齊。潮漲烟村外。日斜古刹西。小窗同把酒。諸嶺望中低。早寒生遠霧。殘月墮微茫。忽覩朝暉上。悠然山色蒼。松門開石鏡。竹屋覆琴床。眼底五茸勝。連巖引興長。

泊京口

北固片帆落。濤聲岸欲吞。雲低孤岫迴。日暮大江奔。風雨迷瓜步。魚龍起海門。蕭然京口客。相對只清樽。

密雲道中

驅馬檀州道。沙堤取次行。亂峯環逕起。小邑枕山平。晚望村烟影。時聞澗水聲。雲根何細碎。從此出邊城。

對酒

對酒消愁愁更深。念誰清夜伴長吟。葭蒼露白渺千里。不是伊人無處尋。

湖海詩傳卷二十八

沈初

字景初。號雲椒。平湖人。乾隆二十七年召試。賜內閣中書。二十八年殿試第二人及第。官至戶部尙書。諡文恪。有蘭韻堂集。

龍巖州金牧邀遊龍洞作

清風一路引遊騎。坡陀岡脊森長松。石磴盤折入幽壑。峭崖斜立堆巖嵒。厓屨屨中拓數弓地。土花浸綠紛茸茸。仰視石罅滴鍾乳。橫裂積鐵藤蘿封。其時秋暑正炎熱。到此陰冷如殘冬。溼霧滲漬古壁暗。疑是深夜潛蛟龍。一痕洞口養沈碧。卻照午日光溶溶。

法螺寺

竹籬依樹插。一路翠微中。落葉有人掃。秋花無際紅。山門開遠色。亭檻架虛空。遙指湖光好。雲烟接梵宮。

通天臺

漢武仙壇顯氣清。通天繹繹峙神京。三辰旗繞甘泉出。六甲書從閶苑迎。幽恨千秋憐沈炯。雄心一代誤文成。玉牀翠被風流歇。落日長安望故城。文選註臺高三十丈。望見長安城。

舟發吳門

短簿祠前三日留。東風吹我上蘭舟。弟兄情話判今夕。山水清緣感昔游。衣上殘梅和月落。窗邊新柳著烟浮。一年好景春將半。偏與行人起別愁。

舟發潞河次程叢園韻

忽斷車聲聽水聲。秋風人與雁同征。吟看遠樹迷歸櫂。夢逐疎鐘繞禁城。行住尙懸他日念。別離只讓少年輕。倚閭愁絕帆南去。不忍重添故土情。

游仙詩

湖上青山浸碧虛。鳳巖高處拓精廬。仙人最愛樓居好。蘸筆曾題閬苑書。玉七晨餐挹露華。下方城郭任喧譁。等閒遊戲拋瓊屑。散作人間六出花。木公金母記前盟。白鳳飛來路幾程。可得梅花消息否。雲窗霧閣不勝情。列岫窗中暮擁愁。宿雲檐下曉還留。吳山便是蓬山路。夜靜春寒十二樓。

集程魚門拜書亭觀藏墨聯句

葛囊乍啟霏古馨。沈初龍賓十二呈瓊形。程晉芳磊磊落落偶復零。吳省欽簾波四蕩烟華青。曹仁虎五色徘徊光不暝。嚴長明摩挲瑩質玉脫矼。趙文哲元氛上薄迴秋窠。陸錫熊笏圭丸鋌隨所型。初圓者重鉞方者瓦。晉芳倨旁

刻上鈞參停省諸品歷珠微圖經仁元珠赤手探窮溟明作鱗之而飛九竈文佛現太白毫熒熒錫咄哉

方寸隱岳靈墨中赤水珠九子白毫光初雲云雷回杳兮冥芳有山上峙淵下淳省有木翹幹草茁葶仁或

獸蹠足禽梳翎明攢樓架閣何岩亭文刻畫衣袂來媯姪錫模範一一超哇叮初識凹款凸審厥銘芳紀

年月日書甲丁省斷珪碎壁鏗玎玎仁粟紋斑剝餘晨星明半螺猶直千睽胸文吳墜羅小方于程君譜

夙訂錫鬪妍角祕尹與邢初維桑卜築黟南垌芳天都三十六翠屏省蒼虬千春孕茯苓仁肪肥液滿招

戕刑明縋繩入陰追駭挺文登登柯斧傳崆嶺錫斯之束之擔且拾初板扉燈閃瓦竈陁芳一絲裊碧烟

無燼省輕煤霏霏著甕瓶仁尖風不到文窻櫺明角麋之膠漉去腥文和以谷水寒清泠錫搗霜萬杵連

巷聽初明犀暗麝惟使令芳江南墨官徒耳聆省父子祕授煩丁寧仁我用我法心自惺明氈包錦襲馳

車舲文多君保此從鯉庭錫知白守黑區渭涇初道在用晦非癡論芳即今月給分槐廳省日就研此依

乾瑩仁客卿封號辭拘囹明古懽靜對鍵雙局文磨人任爾閱歲齡錫

韋謙恆

字慎占號約軒蕪湖人乾隆二十二年召試賜內閣中書二十八年殿試第三人及第官至貴州布

政使有傳經堂詩選

蒲褐山房詩話皖桐詩派前推聖俞後數愚山以擘緩和平為主約軒承其鄉先生之學故不以馳騁見長六一居士序宛陵集謂古雅純粹汪堯峯序愚山詩謂簡切淡遠舉似約軒可謂得其法乳

者約軒以翰林大考受知不數年直綸屏出為方伯緣事罷歸以四庫館編校加鴻臚少卿故吟興至老不衰令子協夢精于儀禮有齷測十七卷不喜為詩故無所採

自題秋林講易圖并序

濟南使院在大明湖東水石清幽致有佳趣新秋雨霽校士餘閒偕兒子協夢學易於坳芥亭因

為秋林講易圖并題五言二首

平生嗜墳典一編每獨把矧以退食餘坐我秋樹下清光盈胸懷水木自瀟灑蓬髮有二子詩書為陶冶

易學傳九世自先來亭公治詎敢頓喑啞程邵吾兼師焦京汝姑舍居則玩其辭鳴鶴象可假惟期樞機

慎庶幾悔吝寡安能病包犧效彼負苓者

善易不論易斯言古亦有吾惟未善易斷斷乃在口錫名憶先人俾我終身守拳拳五十年頃步無敢苟

小子躁未釋道蘊詎能剖卦以未濟終于義何所取三陽皆失位微言倡老叟小狐濡其尾戰兢斯无咎

以茲持爾身或可昌我後他時當致亨有孚于飲酒

謁陽明先生祠并序

祠在貴山書院左歲久不治余以奉錢新之廼帥諸生行灌獻禮兼紀以詩

天地苦榛狂無由開屯蒙往往賴賢喆聲教遂以通夜郎古絕域道學誰為宗豈知龍場丞廼暢鸞湖風

苗犴雖錯處性命理則同良知本孟氏諄諄提瞶聵石洞玩爻象草庵殊從容先生結草庵於龍場又有玩易窩在陽明小洞天

但借鹿豕游。寧許魍魎逢。一時講學者。泝源流未窮。如彼潮陽人。至今師韓公。頑廉懦夫立。冠服何雍雍。我來瞻祠宇。亟爲勤垣墉。落成薦俎豆。縫掖諸生從。升堂尋微言。吾道非虛空。致知與力行。相與爲始終。請看新建伯。磨厓紀豐功。徘徊竟日夕。皓月生前峯。

蕭尺木先生畫壁歌

壁畫秦岱華嶽峩峩峩峩匡廬四山漁洋先生誤華爲衡蓋踵曠園雜志之誤也

平生愛山水。思爲五嶽游。向平之願不得了。兀坐一室徒啁啾。去年挂席來采石。攝衣直登謫仙樓。謫仙樓下何所有。但見丹崖翠嶂空中浮。頓使白晝雲烟生滿屋。恐有長蛟出沒哀損愁。近看卻是壁上畫。蕭公秃筆幻出人閒秋。日觀縹緲插天際。秦松漢柏蛟龍虯。玉女洗頭盆宛在。巨靈仙掌痕猶留。匡廬奇秀甲天下。石門瀑布爭飛流。大峨小峨兩山峙。積雪倒映瞿唐舟。釘頭鼠尾皴法異。荆關巨手誰能儔。謫仙平生拄杖處。一一都向軒牕收。錦袍烏帽騎鯨客。夜深放悲來吟謳。若非畫師腕底有邱壑。青山白紵安足供優游。我來坐臥已一載。胸襟披豁開雙眸。東西二嶽在懷袖。暮臨彭蠡朝眉州。譬如列子御風去。一日能使萬里周。嗚呼人生游蹤不能遍江海。也須栖息數寒暑。胸中聊以消煩憂。

陸繹歌并序

黔山陡削。肩輿不能上。乃繫二繩於輿之左右。使人分曳之。以佐輿人。名曰繹夫。余憫其勞。因爲之歌。

犖犖确确穿山坳。居人騰越如飛猱。肩輿送我巖邊宿。若遵大路忘其勞。忽見懸崖插千仞。輿臺趨起不得進。短纜聊同上瀨船。長繩略似服箱紉。一夫邪許衆雷同。牽挽直到層霄中。蝸角雙雙向人面。鰕鬚裊裊當晴空。行步雖工力已竭。白汗翻漿僅免蹶。枉希代馬強追風。翻類吳牛驚見月。峰頭已過喘未停。息肩相與趨郵亭。得錢幸足供醉飽。小人勞苦古有經。棄馬用人我心忤。肯惜傾囊爲軟腳。安得更籌衣食源。俾爾長享田安樂。

丁丑江南召試。蒙特恩官中書者七人。吳二匏徐勇庭皆逝。唯余與王述庵副憲。褚筠心吳白華兩學士。曹習庵中允五人在耳。而述庵陳臬江右。白華督學楚中。秋燈獨坐。偶吟東坡歲寒猶喜五人同之句。不禁中夜搔首。因用蘇句發端。賦詩奉寄。并邀筠心習庵同作。

歲寒猶喜五人同。宦轍無端離別中。覽鏡自慚雙鬢白。倚樓唯對一燈紅。星河耿耿秋生袂。江漢茫茫水拍空。何日尊前懷抱盡。劇譚相與吐長虹。

黑神廟土人呼南將軍爲黑神。報賽者無虛日。

巫覡紛紛歌舞頻。剖羊醢酒爲何人。不知南八真男子。鼓簫叢祠賽黑神。

姚鼎

字姬傳。桐城人。乾隆二十八年進士。官至禮部郎中。有惜抱軒集。

蒲褐山房詩話。姬傳豈弟慈祥。而襟期瀟曠。有山澤閒儀。有松石閒意。簿書刀筆。雅非所好也。詩旨清雋。晚學玉局翁。尤多見道之語。望其眉宇。儵然已知在風塵之表矣。既歸。屢主安徽敬敷。江寧鍾山。揚州安定三書院。以讀書學道教多士。地方大吏。無不愛而重之。古文淳古簡淨。紆徐往復。亦多不盡之味。

山寺

四山動秋響。高林黯將夕。披雲度寒榛。暮陰下前壁。寺門風蕭蕭。飛葉滿巖積。箐嶼暗深溪。淙鳴出穹石。想見谷口外。落日遠峰碧。一磬流烟中。萬壑抱檐隙。豈無湛冥人。於茲衣蘿薜。初月輝易盡。悵望遂停策。

出獨山湖至北口作

初日澄前陂。餘陰澹巖曲。清流杳終古。宛此媚幽獨。烟消淨衰草。風來振疏木。移舟度雲影。停橈玩空淥。理昧後人蹤。興與前游屬。託世楚雲裏。孤懷亮自足。

連日清齋寫佛經偶作數句

結髮慕勝因。而復役人事。秋空泝江水。勝地雲帆至。烟際東林鐘。月出山谷寺。暖鳥諸天外。中宵倚寒被。劣觀清靜理。一寓情賞寄。造物非安排。取境即塵累。雲餘冬日美。門掩衰草翠。清夢觸舊想。即日遇新義。聊披貝葉書。終與忘文字。

嚴侍讀長明招集散木庵時嚴將南旋

風日一何佳。初冬殊未冷。高齋客來暮。檐陽露俄頃。小庭木盡脫。蕭蕭散空影。所貴人心閒。適與物候靜。

平生值數賢。驟見良已幸。招邀況一室。行不待造請。主人無俗懷。稍爲設蔬茗。旣脫形骸累。觀醉不妨醒。試思士多才。奚啻木有瘿。可得謝斧斤。何嫌寄幽屏。所惜送將離。屈指江路永。曷以盡餘情。宵深燭猶秉。

乙卯二月望後與胡豫生同住憨幢和尚慈濟寺觀月有詠

夕陰連遠麓。嵐翠斂高岑。新月吐巖缺。光照寺西林。籃輿轉重障。杳度碧谿深。春樹葉未多。疏影落衣襟。佛宮坐遙夜。妙義託幽尋。上眺層閣暉。下步重階陰。素魄行無極。光霽曠來臨。本非有擇照。安知愛者欽。文學俊才筆。禪悅亦所歆。余衰邈違世。慕道恐弗任。非徒遣煩慮。更當遺賞心。閤黎淨業就。結習猶謳吟。共會忘言契。何嫌金玉音。

關口阻風

一出金陵郭。兩日北河口。翻翻鍾阜雲。背我逝蒼狗。試曳市廛杖。迴飲王生酒。墨香發笈外。古色盈座右。吳畫奪造化。黃字耀星斗。上河王養中家。觀所藏書畫甚富。我尤愛山谷道人書。子建詩及吳仲圭夏邨圖。乃知此淹留。風伯意良厚。自是飽挂帆。卯行嘗及酉。離家百里外。故山當船首。正及湖水闊。忽起西風吼。停棹入菰蒲。繫纜向榆柳。蘧蘧清夢醒。試一憑船牖。遙山紛冶麗。下水亦清瀏。魚艇夕陽邊。楓葉零霜後。雖無古墨妙。景物亦希有。行止要不礙。慍喜兩無取。默坐獨成詩。橫肱進吾糗。

元人散牧晚歸圖

日落未落東皋黃。搖風欲盡千絲楊。榆莢雨後邨塢涼。澤中草長人微茫。牛從雜遝老特將。刺促或走或
伴望。或掉尾立銜藏。菘牛背短箠二尺強。握坐者牧舟樹檣。旁有吹笛聲琅琅。據牛橫坐如胡牀。後有蓬
髮趨踉蹌。前有招之右袂張。首伏牛後尻前昂。二人蓑薜行驅羊。掀笠偃背丫髻長。其一糾笠風中颺。林
木度盡橫陂塘。前邨暝色寒蒼蒼。一人先俟牛宮旁。遶宅榆柳青蒼蒼。老翁飽腹飯黃粱。出攜幼稚嬉倘
徉。少婦機杵鳴東廂。人生正可知農桑。春夏耕牧秋築場。不見臧穀羊皆亡。嗟哉此畫真吾鄉。

獲嘉渡河

河北山形壓天半。左挾軍都東海岸。雲騰風掣到河陽。二千里餘青一斷。我來經過衛州西。雲巘迴頭百
回看。竹林亭立明玕清。原泉飛下珍珠散。想見幽人尙考槃。安得同歸脫鞿絆。北風忽出白陘口。吹渡秋
河百川灌。山川聊供中流喜。舟車顧有知津歎。西南廣武數峯來。屈指英雄幾更換。

游攝山宿綠雲庵二首

不見深巖桂。微風谷口香。披雲過石徑。聽澗到僧房。穹壁天光窄。環林地籟長。欲求明處士。偃蹇待斜陽。
叢樹未搖落。寒山已改容。自攜孤竹杖。晚下最高峯。燭隱秋聲閣。詩成夜壑鐘。白頭餘健在。幽處欲潛蹤。

哭魚門

魚門素有同居之約。今春聞共引疾。方爲欣然。而魚門旋以訪畢中丞沒于秦。子才三歲耳。

遇君通籍已華顛。猶見雄才賦百篇。送別議聯元亮井。論文曾許伯牙絃。十年白虎成通論。幾日童烏與

太元。一入嶠函身不返。空聞解紱買江船。

毛俟園用僕看桂前字韻作詩見貽因復答之

萬里清江到坐前。又逢佳客九秋天。短筇共散幽憂疾。芳樹誰知擁腫年。君輩論文推馬齒。世間相士貴鵞肩。止宜不負看花約。自斷平生志已堅。

婺源胡奎若藏黃石齋先生自書五言詩蹟題後

直言瀕死荷戈餘。社稷猶思再掃除。指佞朝廷惟汲黯。存亡時勢異申胥。秋來草沒宮門路。石齋將死于江寧時過故宮門猶下車見榕邨記夜半鐙寒屋漏書。要識艱危成節概。不隨流俗在平居。

過江浦縣

江出天門雲水長。客心孤迥路蒼茫。寒山自遶涂中碧。不與斜暉過歷陽。

細雨

細雨餘春尚薄寒。綠窗風定蕙香殘。七年同種階前樹。獨坐花間掩淚看。

王嵩高

字少林。寶應人。乾隆二十八年進士。官平樂府知府。

蒲褐山房詩話。少林門第清華。如樓村殿撰。白田庶子。皆其大父行。文學之傳。師承有自。故發於詩者。或幽靜而閑止。或奔騰而排奐。皆音節自然。駸駸入前賢之室。吟編甚富。今所採摭者。止游梁一

集耳以郎中出守粵西未及歲以乞養歸後遂不復出一爲安定書院院長而卒聞其詩多散佚者

仰化鎮曉發

月落荒雞鳴披衣戒徒御烟靄蒼茫中征夫從此去曖曖出市墟微微辨村路野風吹席帽草露濕芒屨長途怯所經倦僕顧已屢積霧開前山初陽散高樹迴瞻昨宿時茅茨在何處

龍山寺別念昔二叔

犖确行陂陀蒼然四山暮澹月生前峯照見招提路遠水送孤舟長天隱春樹漁燈波外懸僧磬烟中度招悵竹林人明朝峭帆去

宿遷

莽莽英雄國千秋惜霸才風雲通井邑書劍隱蒿萊古木寒鴉噪空城曉角哀惟餘東逝水長遶楚王臺

戲馬臺

宋帝鳴鑾日茱萸宴席開河聲殷地轉秋色抱山來鼓角三軍壯風流二謝才雄圖今在否長嘯上高臺

晚行山間

迢遙楚山外杳靄疎林暉卻望下山路人家方掩扉日夕烟鳥散近邨樵牧歸誰念旅遊者行行歌式微月夜憶白門諸子

此夜秦淮客。疎燈水閣頭。隣船歌白紵。涼月下江樓。別恨同千里。歡期咏四愁。遙憐橋畔柳。還似昔年秋。

大梁懷古

搖落偏驚旅客魂。秋風回首眺中原。三花樹色開神岳。萬里河聲下孟門。形勝鬱蟠終古在。英雄忼慨幾人存。信陵策士俱黃土。獨有侯生解報恩。金明池水上河通。宋帝諸陵白露中。花石南來軍國病。翠華北狩寢園空。烟寒桑柘連秋社。雨後蘼蕪滿故宮。莫問樊樓舊燈火。東京遺事夢華同。

夏日憶縱櫂園木清閣

城東呖尺若耶溪。布鞵青鞵願久睽。烟水宛通山郭外。人家隔在板橋西。開簾風送香荷淨。當戶峰排石筍齊。小艇斜陽泛花影。桔槔聲裏亂蟬嘶。陰陰夏木遶吾廬。山下流泉過石渠。一詠一觴圍坐處。某邱某壑釣游初。牆東修竹千竿直。閣外高梧百尺疎。曾與謝公扶屐齒。淒涼別墅迴愁予。

太皞宓犧氏陵

邃古傳神母。流光感赤虹。龍書彰聖瑞。日角表皇躬。肇啓苞符祕。能侔造化功。紀元開運會。畫卦判鴻濛。理協陰陽始。幾參象數終。三才咸有統。六位嬪無窮。姬孔淵源在。炎黃謚號同。補天欽帝妹。叔字授臣工。

任宿沿風姓。庭巢列禪通。混茫都邑改。巍煥寢園崇。紺殿凌霄漢。朱陵接華嵩。握圖容自肅。衣卉道彌冲。萬古斯文祖。千年望秩隆。聖朝稽典禮。謨誥述龐鴻。日月觚棱外。乾坤法象中。白龜淪蔡水。蒼檜擁齋宮。幽贊成何極。靈著滿百叢。

雨夕

涼雨空塔暗。疎燈小閣明。啼螿兼落葉。一夜作秋聲。

蘇去疾

字獻之。常熟人。乾隆二十八年進士。官□□知州。有涉蓺園詩集。

蒲褐山房詩話。獻之樹節孤峭。天懷夷曠。鳳嗜常以張覆與殷伯巖為比。樂府最古質奇奧。然如河漢澹無影。滄江流有聲。獨夜久不寢。雨聲聞更涼。夜涼風遠起。明月滿前村。又極清遠蕭澹。由庶吉士改主事。出為知州。與世警牙。遂謝病歸。家居三十餘年。杖履逍遙。朱顏白髮。視聽不衰。虞山人指以為仙。

代飛來雙白鵠。為弟純之入燕作。

四鳥生商山。羽翼日已齊。銜羽復接翼。啾啾何悽悽。問鳥何所規。稱我黃口時。四體少羽毛。待哺常聲悲。中道痛失哺。八翼共因依。朝拾覆車粟。莫還空城棲。踰踰蓬蒿居。性命宜無違。子有山海志。安能久卑栖。風雨一交際。東西南北飛。我欲隨汝去。一身悲斧斯。勸汝依藩籬。憂汝寒與飢。交頸長太息。淚落空復為。迴顧世間人。和樂真不支。

古意

天路興浮雲。遠望心中悲。借問何所悲。君子久別離。結車繞天涯。會見知日稀。日色何碗碗。叢蘭滿邱畹。前綏今未來。三歎不能飯。參差盛年去。歲暮行當返。年盛一已頽。蘭草一已摧。日夕空閨中。涼風當告誰。望君如南山。思君如流水。南山終不移。流水何窮已。

行路難

君不見北地儒家子。碌碌刀筆無顏容。一朝投筆殺賊去。帝遣圖畫凌烟中。當時四海望英爽。令我坐嘯生雄風。上馬掣兩鞭。雙鳧躑躅長楸間。黃塵匝地秋塞淨。丹梁繡柱開雲烟。被褐之甫何處來。氣象衰颯非時賢。常先大鴻在帝座。龍鱗杳矯豈汝攀。行路難。男兒墮地不得命。氣象樛屈如死灰。牀頭令我惡顏色。蒸嘗不列晨無炊。骨肉分張八五郡。夙興寒起一望填膺悲。白日懸天亦周照。蓬藿杳杳無清輝。步出西郭門。木石摧拉埋精魂。悲風倏忽四面至。山精微嘯似在枯桑根。興亡歷歷山與河。不逢黃金買枯骨。但見郭隗墳墓高嵯峨。行路難。當奈何。

送八繡遊京師

君不能手彎兩石從兩肩。珠袍馳逐稱少年。又不能早營河車佩五岳。捷徑走上終南顛。浮沈里巷何所作。彈棋賦詩仍醉眠。高歌時時鬼神泣。小句往往兒童憐。前年飢軀過涪右。萬里瀕墮蛟龍涎。戎商未辨

客何苦。意望下洞開閒田。秋風三吹洞庭葉。始歸坐客仍無氈。朝來撫髀正愁思。大笑忽憶蓬萊仙。妻帑困人是何物。富貴待我今華顛。故人飛騰半霄漢。且向隗衍分糜饘。李白蓬蒿豈應久。陳登湖海誰能捐。黃河東來日往還。岔道北走居庸關。鉤陳遙環太乙座。溟渤曲抱崆峒山。三輔黃圖冠區夏。此行自勝游東川。憶昔東川下平虜。萬馬蹙踏巴渝閒。金甲盡銷若水北。玉函再入秦山編。西臨烏蒙南越雋。氣象雍穆開風烟。頌聲將興偉士奮。坐朝明堂張九筵。大音低昂詔牛鐸。古器黯淡求朱絃。是行正遇太平會。歌詠盛世公當前。僕夫在門驪在道。行矣贈子秦人鞭。

獨遊

獨遊泉上寺。篁翠雜衣涼。灌木吟山路。春禽向夕陽。禪房深晚秀。空谷靜天香。坐對雙溪水。濠梁辨未忘。秋盡懷八繡。丈客蜀中涼風在羣木。萬壑有哀音。天末應搔首。千山起暮吟。洞庭波始闊。峽水月常陰。魂夢猶難到。愁君白髮侵。

李集

字繹芻。秀水人。武曾之孫。乾隆二十八年進士。官鄖縣知縣。著願學齋詩鈔。

蒲褐山房詩話。繹芻早耽理學。晚爲循吏。詩非所好。而清深蒼老。實合於古人繩度。稱其家傳無媿。年七十九卒。臨終詩云。一曲蒹葭水繞門。歸田十載住荒邨。家藏止有圖書在。付與雲礪世守存。其標格可見。子旦華雋。才早卒。孫遇孫有名。庠序閒。俱見於後。

桐華館閱未孩詩即書其尾

羣芳歇春餘。鳴鳥亦斂息。拂拂刺桐華。當窗呈淺碧。高館晝長陰。苔徑少行跡。微雨從東來。洗此柯百尺。色香異衆妍。獨秉素心白。籠雲陰重階。隨風點瑤席。長離儻來翔。翩然戢其翼。我有同心人。采采蘭訊隔。試展短長謠。香馨滿衣幘。

贈許晦堂二首兼以送別

匹馬當年短後袍。長河落日指臨洮。孤臣舊壘迷沙雁。公子愁心慙寶刀。急雪三城獵騎入。暮笳千帳錦筵高。至今紅柳秋風曲。君以尊先公總戎事。畱邊數載。譜入佳人碧玉槽。著燉煌集。紅柳秋風集中句也。

番陽岑接楚山隈。杖底寒潮萬壑雷。九派雪深鄖子國。雙江春轉大孤臺。頻年蹤跡歸長缺。幾度風濤遣濁杯。卻憶滄洲坐吹笛。神魚驚起夜猿催。

祝德麟

字止堂。海寧人。乾隆二十八年進士。官監察御史。有悅親樓詩鈔。

寶雞初入棧

行行歷鳳翔。前歧分隴蜀。昨日望中山。今朝山下伏。掌管益北門。設險岐南服。壁立插天關。旁趨圻地軸。危梯窮一線。俯瞰無平陸。故術熟獼猴。新蹊用樵牧。陰崖生雨雲。陽嶺移晴旭。氣候變東西。往迴雜涼燠。

山中百泉水。轟作雷車逐。奔騰注一溪。偏與巨石觸。石攔水益怒。跋扈相凌蹴。何人架飛梁。窸窣度馬足。單車走仄徑。攀捫已局促。槎枒出雲根。故向人頭撲。崖欹路每掩。徑轉嶂仍復。鬱鬱萬樹林。中有盤古木。卻遭不死藤。牙鬚苦縛束。山果隨意紅。瑣碎失名目。時聞嘹唳聲。鳥啼隔幽谷。陂陀半峯罅。偶一著茆屋。蕎花糝微丹。瓜蔓延衆綠。指顧生而開。游衍幽賞獨。險惡十三程。發軔戒僂僕。巍巍煎茶坪。西接鳳州隩。傳云巖壑閒。頗聚仙靈族。方今聖德昌。會須鳴鸞鷲。莫向紫柏山。求仙問辟穀。

汴州懷古

品畫論書鑒別真。獨於理亂味經綸。樊樓燈火平時景。艮嶽鶯花夢裏春。地棄燕雲原失算。天生宗岳爲何人。始終太息金甌缺。誰贖黃龍塞外身。

山海關二首

表海依山氣象尊。堂堂巖邑鎮關門。戶庭直是同閨闈。水木能無溯本源。一代風雲開草昧。兩都形勝控雄藩。月明衰衰濤聲壯。想像當年士馬屯。

神武開天萬世功。真人駕馭必英雄。宗臣衰繡來姬旦。降表書辭得竇融。電掃黃巾滄海畔。星馳金甲玉關中。歸心豈假驅除力。雲氣飛揚滿沛豐。

寧羌州夜雨

夢繞巴山古驛亭。溼螢明滅一燈青。西風特作瀟瀟雨。併入秋聲此夜聽。

桐廬雨泊

雲壑沈沈作嫩涼。飄然一舸載輕裝。秋風秋雨桐江路。不待猿啼已斷腸。

董潮

字曉滄。海鹽人。乾隆二十八年進士。改庶吉士。有東亭詩選。

蒲謁山房詩話。東亭綺歲能詩。與沈文恪初有十子之刻。金春玉應。為世所稱。既而贅壻蘭陵。兼以
飢驅奔走。故其詞句。凄澀如感事云。已悲閱世同劉峻。莫更逢人說項斯。芙蓉池云。豆泣釜中知有
恨。蒲生塘下。更堪悲。姑蘇懷古云。歌殘白苧春方醉。探得黃絲夏已銷。料敵塔云。戍捲寒沙騰。樞馬
城荒晚角下。講鷹中山雜感云。郡控三關。雄巨鹿。峯連千里。走飛狐。劉去華詞云。青史幾人高。諫議
垣。即登鬼錄。玉樹生埋。殊堪。實涕。

雪後

暝色起亭皋。微陽上林薄。開門寒氣侵。凍雪松閒落。風竹搖簷楹。日暮聚飢雀。蕭然守一編。幽棲甘寂寞。
黃昏返空齋。挑燈坐高閣。硯寒冰屢凝。爐清香更爨。幸免塵鞅羈。得此卒歲樂。清境固愜心。所嗟在漂泊。

馬上望西山

谷口遠烟微。蒼然起寒色。不知塵土中。有此翠欲滴。迴峯斷歸雲。半嶺積餘日。鐘遙寺不分。雪淺徑微出。
望眼極空明。新妝殊婉孌。征途逼歲新。游子倦行役。對此融心神。庶幾慰躅躑。欲攜九節筇。線路通雙屐。

手攬碧芙蓉。凌虛送歸翼。悵望渺靈源。馬蹄去安極。

禽言

脫布袴。縣吏持牌促官賦。農人低頭向吏訴。農何哀。吏何怒。太息無錢供酒脯。脫布袴。布穀布穀。雨深泥濁。叱牛朝耕牛穀棘。日暮歸來倚門哭。春花無收食無粥。提胡盧。尾畢逋。蠶十筐。桑百株。婦子瘁。早起趨。新絲賣。完陳租。南邨酒。不得沽。空相喚。提胡盧。婆餅焦。小麥苗。官差築塘水沒腰。雖欲種麥那可逃。麥苗不得植。安得婆餅焦。

唐花詞

春明門外斜陽岸。穉綠雛紅春未半。冰痕纔泮鳳凰池。雪影乍消鸚鵡觀。何處芳菲爛若霞。試燈時候見唐花。柔葩凍合香初拆。嫩蕊寒侵色漸加。滴粉搓酥千萬樹。春光一夜來何遽。煖火頻將紙屋圍。微颺更著輕羅護。花市朝來賣幾枝。內家妝束弄妍姿。絕憐冀北韶華早。翻訝江南春訊遲。鳩啼小雨天將旦。隔牆暗送香零亂。芳逕難教蝶夢通。新妝不用鶯吭喚。十萬金錢買數叢。攜來深院對東風。嬌窺繡輓香韉裏。春在燈光帽影中。更有豪華推甲第。惜花似惜傳停麗。龜甲屏圍寶篆微。蝦鬚簾捲春陰膩。緩舞嬌歌醉復醒。曲欄低護小金鈴。但將早豔爭新樣。不管繁枝怨易零。露菊霜蘭誇不得。臙脂一種添顏色。爛熳偏矜元夜前。吹噓不杖東君力。幾日繁華座上珍。可憐轉眼已芳塵。桂叢擬待秋風拂。不把寒香鬪早春。

落梅

狼藉殘英遍水涯。東風何事洗鉛華。籬邊暮雨依修竹。郭外輕陰讓杏花。雪盡溪堂人臥病。寒生江店客思家。蹇驢更有行吟處。幾片低飛破帽斜。
亭亭疎影淡無痕。消盡風流楚客魂。半樹祗應畱別浦。一枝猶是記前邨。烟殘遠水初迴棹。月落寒山正掩門。只有蓬萊花鳥使。抱叢偏解惜空尊。

舟泊半山

去秋三度臨平路。今日重來值禁烟。寒食杏花山店酒。春風楊柳寺門船。田園歸計知何日。鷗鳥相思又隔年。壞壁閒尋舊題句。雨昏殘墨尙依然。

感事呈諸同人

臨風顧影歎蹉跎。話到驚心喚奈何。眼底浮名徒刻鵠。人間幻態盡籠鵝。畫眉不稱新妝好。長袖終輸善舞多。敝篋空餘孤劍在。夜闌斫地獨哀歌。
彈鋏高歌行路難。酒酣耳熱向燈殘。曾聞南國依劉表。誰過西州念謝安。每惜秋風紈扇棄。非關冬月練裙單。巘巖世路頻惆悵。細雨廉纖打面寒。

京口渡江

輕帆如葉下吳頭。晚景蒼茫動客愁。雲淨蕪城山過雨。江空瓜步鴈橫秋。鈴音幾處烟中寺。燈影誰家水上樓。最是二分明月好。玉簫聲裏宿揚州。

清明次梵珠韻

疎柳籠烟拂岸斜。禁城天近氣清華。半春孤客忘寒食。一夜東風又杏花。故國有書愁去鴈。空齋無夢惱啼鴉。石欄記得分新火。綠翦桐陰自煮茶。

吳森

字雲衣。南豐人。乾隆二十八年進士。官廣濟知縣。有筠瀾詩草。

江行望麻姑山

脈脈廣川流。蘭楫從此去。殘雪蘊叢薄。夕陽隱荒戍。麻姑朝未回。仙壇想如故。邨莊四五家。衰草門外路。飛瀑界青碧。稠杉縹烟霧。遙企山中人。頗愜山中趣。快然念吾儕。仙風幾時御。

玉河步月

愛此團欒夜。行行向碧灣。流光紅蓼岸。心事白雲閒。水落千門靜。天高一鶴還。年年桂花發。容易鬢毛斑。

淮堤晚步

舶趲風威緊。朦朧樹色微。扶筇當薄暮。零露滿征衣。地曠孤城在。天遙尺素稀。回頭望明月。烏鵲更休飛。

游麻源谷

問訊麻源谷。方平去未還。烟雲多變態。草木只空山。少歲長爲客。懸流不可攀。何當駐飛鳥。白首對孱顏。

書齋漫興寄大興張生

吳雲燕樹幾年心。太息蕭蕭白髮侵。古寺鐘殘收玉局。行廚酒盡典瑤琴。平生風味慙中隱。如此烟波只獨吟。料得閉門花落去。春來魚雁恁浮沈。

晴川樓

秋盡登高倦眼開。雲濤淼淼雁聲哀。湘中有淚溼斑竹。江上何人吹落梅。每聽橈歌引清興。欲同漁父賦歸來。可憐松柏爲薪後。虛費崔生十倍才。崔詩晴川歷歷漢陽樹。今竟絕無。

雨中貽清署小集呈古愚兼寄思郭

週遭四壁隱苔痕。雲闌松梢客到門。峽裏清猿三下淚。天涯孤劍一開樽。春風不醒棠梨夢。秋雨能銷燕子魂。遙想故人吟臥穩。蓬蒿今已滿中園。

再游伯牙臺遂登梅子山

每於憑眺起悲歌。翠館迢迢此重過。夢裏微聞沙雁落。樽前又見夕陽多。鸞鈴響轉遊人騎。楓葉飛看估容艤。莫爲閒愁減幽興。過江名士半蹉跎。王奉齋字水皆。罷官後僑寓漢陽。

吳霽

字倬雲。錢塘人。乾隆二十八年進士。有貯月山窗詩偶存。

黃龍洞是慧開卓錫處

浙瀝秋雨灑。森爽古木交。寺門石壁陡。篆路風篁捎。千年老藤枝。屈曲蟠潛蛟。人語響空谷。日輪掛危巢。當年卓錫人。何似水上泡。空餘面壁佛。寂寂昏復朝。

然犀亭

日落江逾白。山多不了青。濤聲與松籟。吹夢上孤亭。倦客猶高詠。空潭自蟄靈。蒼茫百戰地。誰擬孟陽銘。

重至青雲樓望敬亭山

不改青山影。依然遶郡城。春風一為別。秋月又懸清。舊夢空樓入。新愁白髮生。如何最良夜。祇有露蛩聲。

雪後放舟之鳳林寺小憩分得林字

舟乘殘雪放。雲展半湖陰。寺古晝長閉。人來鐘遞音。客至打鐘則門啓天花空綺語。佛火冷山心。多羨歸棲鵲。蒼

蒼松桂林。舊名喜鵲寺。為烏窠禪師道場。

游齊雲作

愛山空復譜圖經。使節欣依拜岳靈。飛瀑雨餘穿地白。亂松春老入天青。誰從劫火參金像。廟燬於火。新落成。自



有罡風闔石扃。彈指浮漚更何似。結茅巖下讀黃庭。

雨中赴黃山道中作

一重一掩杳難分。衣上寧知綠是雲。人似蟻穿珠九曲。橋如梭織錦回文。風輪有影泉鳴碓。菌閣無階鳥喚羣。雙嶺前山看漸近。又飛雨腳暗斜曛。

江城送別圖爲朱荆園作

山東進士前
余掌教勺庭

岱頂松標海鶴姿。相逢無那又臨岐。兩年山館追吟屐。一夕江城共酒卮。朗月照人秋練練。纖歌留客夜遲遲。明朝十幅乘風去。紅樹青山萬里思。

湖海詩傳卷二十九

褚廷璋

字左莪。號筠心。長洲人。乾隆二十二年召試。賜內閣中書。二十八年成進士。官至翰林院侍讀學士。降六品銜乞歸。

蒲褐山房詩話。筠心敏慧絕倫。風神諧暢。兼有荀令謝郎之目。直綸屏進詞館。充方略館纂修。于準夷回部山川風土。最為諳悉。奉勅纂西域圖志。又纂西域同文志。并通等音字母之學。雖法顯神珙無以踰也。詩初學青邱。既學元白。旨遠詞文。卓然大雅。

聞吳中歲飢

客從南方來。遺我一尺素。上言長相思。下言久不晤。中言歲艱辛。雨淫復蟲蠹。鴻雁謀稻梁。劬勞滿行路。中邦財賦雄。東南實府庫。長淮挽天漕。百萬歸天庾。時和屢豐年。民俗日庶富。閭閻歌舞地。喧闐集雲霧。古來哀樂理。循環豈無故。得無豪奢習。上干皇天怒。吾願三吳民。遇災發深悟。去華返其醇。勿為浮靡誤。庶幾感穹昊。排闥憂可訴。

鬻子行

百錢鬻一男。千錢鬻一女。十十與五五。道路自儔侶。牽衣或頓足。大者三尺許。其小尤伶仃。未斷懷中乳。

父母謂子女。鸞汝亦痛汝。割月與他人。豈不創深鉅。父母謂子女。鸞汝亦愛汝。鸞爲豪家奴。顧盼得所主。遠鸞去里閭。浩蕩脫拘圉。鸞汝以生離。不鸞以死聚。苟能全性命。恨不插毛羽。蕭條悲風寒。野曠日不煦。河橋永訣別。淚眼血如縷。寡婦與繆夫。飢寒獨延佇。

上楞伽山登浮圖絕頂

尋煙陟崔巍。風送塔鈴響。秋花隱叢木。淨石牽宿莽。樓觀何峇嶢。朝暎射金榜。山來莊嚴地。萬古鎮龍象。祀淫神不福。頽俗競誣罔。凜凜中丞公。破愚匪矯枉。至今絕本根。快事緬疇曩。浮圖倚層霄。放眼納莽蒼。橫接飛鳥翅。仰捫巨靈掌。俯瞰銀濤翻。青螺貯益盎。長謠激天風。飄忽絕塵鞅。夢遊疑玉京。不用九節杖。翻喚學仙人。蹤跡付恂悅。

朱文也招遊平山堂遂至觀音山歸過法海寺

秋光湖上來。明鏡淨寒淥。空洲擢蘭榭。驚起鷗鷺宿。芳堤十里餘。沿迴騁遙矚。霜林綴微丹。露草含舊綠。亭臺何宛轉。明瑟雜水木。前山接飛虹。萬翠森在目。撫松躡層厓。登頓恃腰足。吾友雲鶴儔。矯翅忘偪促。凌空得遐觀。鎖霧半山腹。指點白塔雲。晴絲漾輕縠。須臾下平岡。里許出溪谷。聞鐘賈餘勇。元關叩梵竺。修廊映檀欒。觸手若新沐。徘徊成小憩。亦足媚幽獨。紆行却前庭。斜陽下西麓。鱗而水面波。泝影沈碧玉。解纜載夕曛。村煙見歸牧。空囊貯嘉遊。一笑對童僕。

昭陵灘

未接奔流狀。先聽奔流響。如雷亦如車。水石自擾攘。迴漩衝激餘。一派界三兩。長年勇成癖。萬力合篙槳。讓石不讓水。穿空髮無爽。平生涉波濤。忠信非鹵莽。入險意自恬。就夷神轉悅。清湘本安瀾。綠淨平于掌。何爲墮磊砢。忽若瘦在盎。傳聞膠舟處。冷魄逐漭漭。至今鬱餘怒。馳戈日還往。雲根倘可移。安吉置原壤。猶夷權常閒。一鏡憑俯仰。

甕子洞灘

遙聞聲淙淙。下見水洄洑。高崖列層屏。彎環抱寒瀑。舟穿亂石間。左右濺珠玉。一篙力萬鈞。勇訝過賁育。一覽屏上行。蟻附不容足。鐵索半壁懸。歲久多斷續。請聽勞者歌。行路難於蜀。作詩諷後來。舊規庶云復。

清浪大灘

左顧峯攢攢。右盼石齒齒。中束一線江。清浪捷于駛。翻銀滾雪間。如案亦如几。又如列盤盎。瑣碎失料理。石扞水不讓。水嚙石不徙。一怒萬古喧。篙槳信所使。我來乘春流。入險自茲始。齋心禮伏波。前途佑安軌。迴船颯靈風。送帆一何美。恍忽雲旗翻。絳節導迤邐。武溪猶昔深。箴韻今已矣。

書吳世濟禦寇始末後

吳侯儒家子。經濟乃復爾。孤城累卵無聲援。百萬生靈一人恃。明季頽皇綱。羣盜日猖蹶。蔽遮淮潁趨毫

蒙妖氛。太白纏三月。吳侯手無尺寸兵。訓練義勇兼諸生。四門如山屹不動。突騎間出風雷轟。明朝烏啼蜂蟻淨。不遣刀塗血路畱。烟塵熙熙原野人。歸耕著書紀謀畫。傳鈔供展讀。虔心感神靈。大力冒蒼族。盈盈豪楮間。如珠淚盈掬。至今細陽民。私祭戶戶祝。不有當時禦寇功。安得鱗鱗萬家屋。何年名宦補斯人。專祠俎豆乘千春。靈旗森肅雲輶降。如見登陴百戰身。

陳蔭堂觀潮圖

驚霆颺。忽雷轟。闔空堂。瞥見銀濤翻。中流白馬恣馳突。東走不受羣靈鞭。正疑海若作狡獪。又似天潢奔瀉。一氣窮河源。雄風挾浪湧毫素。就中有客神飛蹇。杖頭直指觀峯日。袖底橫曳滄洲煙。忽憶客歲秋江邊。異事詫見須眉軒。翩然白鳥迎風搏。凌空突兀騰波瀾。前潮子胥鬱靈氣。後潮文種流煩冤。蛟涎濕卷雲練裂。龍角倒撞金戈喧。千騎萬騎如雲屯。江光冥合相吐吞。須臾勢落歸海門。羣山重吐修眉痕。歸來寢寐驚心魂。誰歟圖此臥遊足。奚啻八月之望。攬勝錢塘濱。翻恨昔遊等塵夢。不入繪本常鮮新。人生何時筇杖周五岳。復見靈源四瀆噓噏通無垠。山川奇麗供放眼。笑指兩大成溫塵。與君汗漫泛舟入。同作江頭踏浪人。

春雪遣懷簡韋約庵吳白華王述菴曹習菴諸子

昨宵紙帳寒威添。清響窸窣敲筠簾。曉來牕影開曙色。亂灑凍雨飛霹靂。空庭鬢影微霞接。撲面蕭颯驚

風兼天公知我愛修潔。游戲滕六驅飛廉。水晶宮闕銀世界。兩大一色藏烏蟾。去年三冬氣恆燠。少見六出飄廉纖。春歸節序未云過。震霖正應豐年占。而我荒齋託窮巷。如蠶眠起漁喁噉。迴光照屋不補漏。餘點入突適消黔。同人三五蹤跡絕。坐使寂寞奚童籤。忽思消寒出奇計。典裘沽酒貧不嫌。主人灑掃客雜坐。三間暖閣安深簷。地爐芋栗恣吞剝。家廚羊豕窮燔燖。臘醅清還入桂杞。海錯鮮更和薑鹽。藏鈎燭短愁屢跋。劈箋韻險欣同拈。酒酣高歌興轉劇。開戶一笑軒眉髯。此時蕭條邊月白。王師萬里馳戈鈴。旄頭夜臥鐵衣冷。刁斗列幕秋毫巖。安得倚天一雄劍。芙蓉淬水抽鋒銛。渠魁執馘獻諸廟。餘醜梟獍皆夷殲。不然探奇香雪海。衝泥不惜浣巾襜。故園寒玉三百樹。山光宜合湖波活。春風別我動盈歲。使我寤寐心神恬。何爲兀兀困几案。陳編故實煩撫搏。已經三月落塵海。依舊冷客慵趨炎。明朝晴曦暖冰簷。和風小草萌勾尖。山莊聲聲啼布穀。河橋處處懸青帘。相逢買醉百觚盡。準擬蠟屐蒼苔粘。我歌欲罷雪亦霽。起看明月磨新鎌。

題謝仲和竹石幃子

雨葉風枝縱橫起。瀟湘欲落簾波裏。誰拈秃管揮秋籥。咫尺蒼梧愁萬里。兩枝直上何龍莖。濛濛拂地晴煙濃。一叢嫩籜穿石隙。涼颼蕭瑟搖虛空。其下貓頭新筍看抽玉。苔花迸破幽闌東。此事風流蘇與文。房山松雪傳其真。息齋父子亦神到。後來作者徒紛紛。江南謝老映晴雪。數枝貌出凌秋旻。竟疑腕底金錯

誤橫剪一段秋江雲。主人愛客兼愛畫。招歡日在長林下。其言人海少檀欒。對此清標惜無價。安得更闌借展玉鴉叉。歸挂空齋坐消夏。

徐勇庭 日躔 到都晤贈

京華鬱熱驕赤烏。桃笙暖裂湘筠枯。晝眠散髮夜深坐。冠蓋寂寞司籤奴。朝來翻盆撒炎繖。颯如酷吏去邗都。清風況聞故人至。當階把臂軒眉須。投鞭拂衣淨塵浣。茶甌談塵安座隅。經年契闊暢情愫。諧笑最喜鄉音俱。語闌袖底出新製。吟秋點筆霜階梧。清驚鯤絃奏商角。涼疑雁渚搖菰蒲。把君瑤華堪玩娛。自笑廢學同饑癯。今春懶惰百不作文筆。那使波濤驅起盲矻疾。藉良友定許唱和同于喁。況逢舊雨會裙屐。帆山萊嬰述泖水菴蹤不孤。涼庭金井轉轆轤。流光瞥眼秋風蘇。餘杭老酒吳船到。提壺痛飲飛百觚。不然獵碣辨魚柳。摩挲金薤忘朝晡。金臺落日眺燕冀。遺蹟欲訪斯人徂。嗚呼遺跡欲訪斯人徂。荆高琴筑勿復道。千金駿骨無時無。

聽同舟李翠園鼓洋琴

秋陰沈沈動烟江。風沙颯沓敲篷牕。高歌發興扣舷罷。坐聽擊撥聲琮璫。如絲非絲竹非竹。宮商宛轉隨新腔。乍疑春禽弄俊舌。娓娓兒女愁銀缸。又訝飛泉落寒礪。松風瀉出流淙淙。將昂似抑復相逼。砉然奮出金戈撞。朝天紫塞去無極。聯翩飛落驚鴻雙。我聞此調增歎息。顧語四座言無厯。琵琶箏笛紛滿耳。清

音欲聽心先降。伊人控觸擅奇絕。如以荆筑驚愚恣。金絲根根切幽怨。使我旅魄搖旌幢。人生會合且痛飲。一杯一曲傾春缸。回首落日掛遙樹。愁心千里浮歸艤。臨風他日動瑤軫。爲君相憶貽蘭芷。

接葉亭圖爲祝芷塘賦

憶昨移家拂巾屨。剩石瓊瓏砌邊壓。春深隔院啼禽多。指點孤亭名接葉。余舊寓半載衢西。西厓不作南

華老。文幟詩壇過眉睫。空開竹徑墮流螢。閑鎖花房飄宿蝶。海寧太史今名流。冰雪肝腸玉顏頰。丹鉛信

手任遊戲。卷軸隨身恣漁獵。竭來此地作寓公。前輩風流儼相接。栽培草木理石泉。茶銚琴牀安妥貼。招

攜暇日盡豪雋。我亦聯翩附襟襟。興酣爲道相逢初。落筆風簷窺敏捷。冰壺鑑裏動光采。抗手蓬山其飛

躡。迴頭塵夢十二年。屈指分明時一霎。丁丑歲余初識芷塘于浙江學署。獲讀其試作。後同舉春官入翰林。迄今于紀一周矣。此圖點染結構工。髯

翁筆到天機浹。彈棋把酒人兩三。捲幔排窗景重疊。邇來京洛少名園。稍喜林亭供日涉。主人愛客能倒

屣。才華况擅雕龍勰。卷圖更乞致王宰。添我松陰坐鱗鬣。

寄懷虞諸舍弟卽用其去秋送別詩韻三首

匆匆官渡憶長征。折柳當筵愴別情。秋雨夢回梅福墅。江雲背指闔閭城。連天白日關前影。永夜黃河枕

上聲。不奈鴿原多悵望。燕臺落日暮愁生。

聞說鋤雲薜荔村。春來攜屐破苔痕。興乘西子湖邊棹。景對梁王閣夜尊。多病馬卿仍故國。著書荀令自

閒門江臯落魄遙憐汝。須信艱虞吾道存。

軟紅初試素衣難。人海俄驚逝跳丸。夜直銀虬依漏永。曉趨金馬戴星寒。東方索米憐朝餓。北郭吟詩憶舊歡。昨夜池塘勞遠夢。半闌春草帶愁看。

寄舍弟虞諧

三千里外苦吟身。聞說經年藥裏親。漸澹名心緣見道。未拋家累尙憂貧。香生別夢山中樹。寒入秋潮江上鱗。況是烏啼聽不得。墓田愁照月如銀。

西域詩 有序

璋備員史局。承修西域圖志同文志諸書。考索印證。七年於茲。紀聖朝之疆索。闡前代之見聞。編纂之餘。爰成斯什。用志天山南北都會城郭之大略。以補史乘所未備。且藉以咏歌盛烈。竊附于江漢常武之義云。

烏魯木齊

額魯公孫此建瓴。地為額魯特公族。噶爾丹多爾濟之昂吉。天戈萬里下風霆。山圍蒲類分西谷。漢蒲類國地。治天山西疏榆谷。雲護沙陀拱北庭。唐為北庭大都護府。北接沙陀突厥地。不斷角聲橫月白。無邊草色入天青。輯懷城新建城名。上舒雄眺。盡把耕疇換牧坳。

伊犁

人驅風雪獸驅烟。猶見烏孫立國年。為漢烏孫建廷處。烏孫為行國。逐水草。海氣萬重吞麗水。伊麗水。唐時名伊麗河。亦曰伊麗水。西北流入巴爾喀什。紀績穹碑銜落日。固爾札廟。東建有碑。前後勒銘。伊犁碑。英靈班鄂想迴旋。定北將軍班第議政大臣鄂容安盡節于此。散馬青原夜控弦。

雅爾

多邏川外夜吹蘆。雉堞新成接上腴。塞月已寒三葉護。唐三姓葉護地。在北庭西北金山之西。邊風猶動五單于。漢呼揭車閏郵支五單于地。名藩甲卷煙消漠。西北接左哈薩大界。大兵追阿木爾撒納。健將弓開血灑蕪。此于不是皇威宣北徼。春光誰遣遍墳墟。巴圖魯侍衛奇微布克敵制勝。

額爾齊斯

西州直北勢憑陵。瀚海迢遙過白登。鈴澤風高奔怒馬。今烘郭圖淖爾。譯言鈴澤。金山雪暗下饑鷹。今阿勒坦鄂拉。譯言金山。曾傳舊壤開都伯。舊為都爾伯特游牧處。四衛拉特。僅見降王保策凌。都爾伯特有三策凌者。首先歸附。封王爵。今存。四部蟲沙成底事。好將忠謹化驍騰。

吹

梯空勁旅倚孱顏。巴圖魯阿玉錫以二千餘衆于格登山。在吹東境。逕出盤鵬落雁間。波浪遠翻圖庫水。圖斯庫爾。唐碎葉水也。風雲高護格登山。千屯此日開榆塞。自開斯庫爾北岸。傍吹河西。行五十餘里。總名為吹。今為屯種之所。十箭當年阻玉關。唐沙鉢羅

汗分十部。部授一箭。曰碎葉長川流不極。吹河為唐猶懸邊月照潺湲。

哈喇沙爾

風雨猶疑鐵騎屯。至今沙戟有遺痕。焉耆鎮啓龍遊遠。唐設焉耆都督府為四鎮之一。都護城懸烏壘尊。西境為漢烏壘城。都護居此。于西域。弓掛輪臺飛皎月。西有地名玉古。爾漢輪臺地。劍磨蒲海射晴暉。南有羅卜淖爾。為古蒲昌海。河源至此。潛行。戍樓高處分襟帶。山水遺經費討論。

阿爾蘇

天邊冰雪鬱嵯峨。木素峰高朔氣多。城北有木素爾嶺。多冰雪。回語木素爾冰也。壕上射生城落雁。軍前饗士帳鳴鼉。東縈姑墨千年積。阿克蘇東塔里木河。南走于闐一綫河。此入塔里木河。待把方言垂竹筆。回人用竹筆。阿蘇溫宿漫承訛。阿克蘇為古溫宿地。

和闐

毗沙府號古于闐。和闐為古于闐。唐設毗沙都督府。西倚葱嶺。葱嶺千盤積翠連。大乘西來留法顯。水經注。釋法顯至于重源。其國有大乘學。

東下問張騫。漢書。河有兩源。一出于闐。一出于祁連山。出祁連山。出祁連山。出祁連山。漁人秋採河邊玉。于闐有綠玉河。黑玉河。即今戰馬春耕隴上田。今日六城歌

舞地。六城。曰額里齊。曰玉隴。哈什。曰哈喇。哈什。曰齊爾拉。曰塔克。曰克勒底雅。唐家風雨漢家烟。

自沅江四十里至增埠野宿

上瓊湖畔曉聞鶯。又放垂楊罨去旌。綠漲鴨頭雙槳滑。晴烘魚尾一帆明。殘春花木驚榮謝。遠徼雲山待送迎。今夜風燈何處宿。烟波不遣傍巖城。

鳳灘

擊汰辰陽湖北河。名灘萬斛舊驚波。風烟黔箐重源遠。雷雨蠻溪九派多。隘地濤聲馳白馬。連天山勢壓青螺。東坡奇絕南遊興。準擬憑舷發浩歌。

食菱聯句

江南果族滋。水蔭擷秋實。微涼過菱池。璋殘暑退蓮室。驚風綠蒲短。枚戰雨紅蓼密。濯濯修莖生。琛茸茸嫩苞茁。根浮淤泥新。璋葉漾碧流涵。其花始蕭疎。枚厥月晚填溢。叢刺角周四。琛纍顆望彌一。並蒂時低垂。璋孤條或昂出。稚疑瓜在包。枚堅訝繭成栗。中含圓芡淨。琛外附流苻滑。碩喜盈掬齊。璋尖懼傷手失。連沿沒鳧翁。枚交錯礙魚乙。圍瀨漲渺瀰。琛緣汀野蕭瑟。岸濡初冷露。璋塘映欲落日。沿洄紉纜紆。枚容與桂橈發。纖纖奉素腕。琛采采落時物。碧葢翻藻傍。璋紫莖斷蘋末。朝連浦烟收。枚晚帶渚雲割。水居隔東西。琛女伴問吳越。來遊陂面風。璋歸載水心月。與采蓮後先。枚較摘蓴彷彿。盈筐波乍揚。琛湘釜泥未掘。剝纔食指動。璋嚼豈屠門必。潤吻厭桃藕。枚朶頤賤葵鬱。來禽鮮宜配。琛蜜父熟堪匹。甘知山芋遜。璋肥豈籬豆奪。賓筵列無譏。枚野饌供難缺。人同影月三。琛候協流火七。調惟塤應篋。璋趣迺膠投漆。叩門

苔印齒枚近市宅容膝盤留嘉蔬陳琛尊滿舊醅潑嘗新欣屬歷璋知味縱譚悉搖珠幹方剪枚韞玉壳

初脫那須爛去毛琛未事食懷核紫錦句恆咏璋青水記堪述方言徵薜蔚枚爾雅辨櫟蕨漁莊待分租

琛吟舫想消暘作詩付奚奴清芬滿蓬華璋

吳省欽

字充之號白華南匯人乾隆二十二年召試賜內閣中書二十八年成進士官至左都御史有白華

詩鈔

蒲褐山房詩話白華著撰精心果力不屑蹈襲前人少日與趙損之張少華同學漁洋竹垞既而別開蹊徑句必堅凝意歸清峻入詞垣大考翰林第一繇是衡文荆楚以及四川遇山厲水刻處輒以五七字寫之或以東野長江為比未盡然也散體文于唐似孫樵劉崐于宋似穆修柳開亦復戛然自昇

鳳嶺

我辭豆積山言指廢邱驛徘徊三五里夷衍散人迹破荒入雄嶂石齒奮銜屐十步峰九迴籊籊面峰脊及脊峰更危意外豎絕壁朱藤萬年欹黃壤一撮瘠抵死撐九天欲下嘆安得縱無鳴鳥儀或有怪鴉翻東頭佛髻青西頭雷峰白高標納萬象神鬼出奇力蟻冢顧來程濃氛黯將夕

馬鞍嶺

輿轎平告險嶺累巖迭起伏馬鞍三十四礮礪側愁目甫登畫眉關蚓徑類蝸縮磨牙伺奇鬼猿獾伴宵

哭百上始絕。徑一下即墮谷。力持軒輊交。伎倆見差熟。誰還播大鼓。萬丈陷地軸。蛟鼉弄狡獪。河底挂飛瀑。緣河升降慳。賈勇奮投足。黃石爛不僵。青欄死未禿。居人斷樵徑。走險習麋鹿。顧影竝蒼然。策策響寒木。

五丁峽

王涯辨仙掌。近理挾堂奧。至神無迹象。跼蹐妄見告。昌意娶蜀山。人烟久通照。胚渾天地初。有空不容鑿。梁州錯雍州。自古禹力到。西東帶二漢。星精象維肖。漾源出嶓冢。乘載利親道。滑滑石罅穿。汨汨樹根冒。匯流茲峽閒。龍窟倚蹇冪。水立山轉孤。戰合昆陽譟。撼盪芥蕒鬆。崩駁性靈拗。一縱始潰奔。入褒理輕擢。下峽下南紀。上峽上西徼。褰裳赴懸流。顛頂壓危峭。決漭元氣蒸。摩豁真宰耗。方知涪洞年。早闢華陽道。五丁五石牛。鄂說適騰笑。馬老能識塗。崎嶇任孤造。

慰忠祠

祀戶部主事上海趙文哲刑部主事滿洲特音布無錫王日杏重慶府知府新建吳一嵩

德常紀漢陽徐諭南昌彭元璋知縣陽湖徐瓚渭南張世永嘉善許椿宛平孫維龍貴筑章世珍
仁和程陰桂及其子烈布政司照磨臨榆倪鴻縣丞仁和倪霖吏目宛平羅載堂巡檢臨桂郭良
相典史光州吳鉞東安許濟寧河周國衡其地在少陵草堂之西顧觀察光旭權視
臬篆倡議成之以七月十六日奉主入祠王吏部昶撰碑文顧觀察書之予為篆額

太歲在癸巳。六月初十。我軍軍昔嶺。滑澹朝徑濕。定邊印如斗。誠子預藏襲。獵獵移纛旗。未暇整伍什。將投木果旁。堅壘待重入。中道膏賊鋒。師潰咎誰執。一雙蘭署郎。趙農部機庭練批答。袴褶來從軍。併命

祇呼吸徐常瑣司度支吳嵩一羅備典給隨行即隨死僵臥委鞞以上殉先時番孽降野心欠馴習招搖

颺白旗還往悄游課聊以夾霸番誤強劫也嘗各各繕槍鋏將軍置罔聞餘黨孰竦讐驟窺美臥溝朔日晚告

急提臣防禦單倉猝斃羣嚼遂延喇嘛寺欲向別駕汪脅父子甘舍生褫剝逮纏繞角礪檄報同科多火

攻合鍾程暨仙尉許濟望救痛何及桓桓推郭吳錢半通寄冗關相持閱幾朝相格斬幾級郭守占固凡十

澤爾多殺賊數人始斃以上糧站各員自郭外皆以初二至初九勢去終莫支礮臺跡旋躡吏卒慘歎歔

等日被害其餘十三人皆初十後從督臣登春退師途次遇害商民駭駭駘號呼赴大營營門拒弗納侵晨教大開出走擁蹀胛將殞兵竄亡瓦解浩難戢登春驛重臣

枯朽被摧拉且戰且退奔矢石冒千疊取道爭兩厓厓上礮聲接從官十三人先後尸枕壓辟諸牽網時

豈復漏魚妾肉為饑鳥銜骨為訓狐攬豈無輸運賈折臂為升合豈無負戴夫斷頭為囊篋豈無屯戍士

決脰為垣堞國殤不勝書鬼錄不勝牒文臣不惜死公等更酸喏晴沙東林裔倡議議皆協度地依草堂

筍林斬叢解芝栢映藻井栗主替畫嬰禮陰映蕭蕭鸚語喚恰恰恹然魂氣來碧血洒丹闔能為張巡厲

如傍要離俠麻鞵杜陵叟慘切效長揖心肝奉至尊今古匪殊轍慰忠祀江城昭忠祀京邑姓名婦孺傳

事蹟史成輯所嗟擒蠻計葛亮竟帶汁風鶴警蒼黃沙蟲莽嘈雜本非幃帳參而歷疆場劫赫怒揚主威

義憤激兵法禁旅交龍驤隣師亦鱗集幕府稱定西賊庭竚犁插以慰存者心繫組任敲吸以慰亡者靈

傳芭永伏臘尚有楊艷都轟雷運歎欲給賊殲數人斯舉漏章摺身殉衆競憐廟食爾同愜鄧都令楊夢

檉管理礮局

昔嶺潰爲賊所得。脅令演戲。楊教不如法。殲賊十許人。羣賊嚮之。自軍中來者多傳其事。而請卹未及。是冬兩督臣查奏。夢槎以奉令撤局回營。于山溝被害。得贈道銜。而周國衡或經死難。或被沖失。另察報聞。掘拜修辦香。陰景耀靈煜。

夜度大侯埡

日落山鳥喧。征夫急投路。崇岡蟠蚓蛇。十駕九偏誤。積腥吹陰風。颯颯戰荒樹。左右苦覆翻。上下眩仰俯。列炬雖爛如。萬象自積暮。重關抗絕頂。寥落數家聚。人聲雜犬聲。側耳慰惶懼。來程一迴眺。尺寸入窘步。明知前去難。馬力且傾注。顧影短裘寒。東峰月微吐。

白巖壩

午發城北門。萬山擁圭撮。鼇背無片苔。荒磧莽鞦韆。青江如綫來。要解赤烏渴。白沙縈遠村。所向頓空闊。曖曖嵐霧橫。蓬蓬水雲活。好風湧綠疇。弄影上木末。迢遙香積場。幾輩託衣盃。巖下藝禾麻。巖前種杉栝。傍巖田父居。竹光護門闕。攬巾感黃塵。何時重披谿。

仙茅

范公志虞衡。有茅鬱苞孕。服食從旌陽。真氣佐長命。旌陽何所師。謚母養清淨。白日昇丹霄。遺把苗山稜。剪去春又生。披尋妙指證。遺蹟在豫章。朝真秋最盛。是皆非蜀產。棘道今轉勝。孤叢抽斷厓。數節蹙荒磴。不誇三脊豎。而訝獨根迸。拳刈精采宏。祓濯氣質定。錫名婆羅參。鍾乳莫能競。請誦曼碩文。六味養中正。

揚後斯有 仙茅述 有 鮒生愍蚤衰 岷絡枯緯經 失色包匭材 一二荷持贈 安得拔其茹 栽蒔布月令 與世躋太和 無藥亦無病

藏棗

覈物備五宜 來來著標格 藏產推果珍 桔皮番紙名 裹成腊 小者扶寸餘 黏膩不容擘 大者指數圍 恬澹不容辭 如瓜雖未能 入藥真足惜 大荒處極西 厥汗受符冊 覓種盈萬栽 有院挂林隙 暈紫攢鱗鱗 皺紅披的的 采經烏拉番語牲畜 馱 飽飼曩宋番語庶子出家者 喫 其核尤出奇 無復仁可獲 瓜離兩已背 渾沌一爻畫 齧之若檳榔 生澀介喉噎 以彼寒苦地 乃集甘溫益 句臚傳唱人 練氣祕服食 繫余孱病身 內景滯胸膈 筐傾坐難支 竿打路偏隔 想象西南番 萬里獻心赤 一笑檢農書 簾影棗花北

果狸

狸首歌斑然 而何白其面 面白尾則狐 瓜走疾追電 是名牛尾狸 釋獸闕經傳 故人笑我陋 購致充朝膳 法宜帶糟蒸 味勝凝酥薦 融結在脂膏 肌肉何由辨 以彼攀樹工 百果耀璀璨 橘柚為醴漿 棗栗作餼饌 橘柚為漿栗 為餼子由句 素無強食惡 反使殺機先 巧捷輸狙公 自肥適貽患 老饕嗜珍品 春梓佐諧讌 狸之言不來 斯言得毋謾

藏香

薰籠媚閨情。炷爐誦佛號。香市喧蜀都。却被海內笑。謂乏龍腦珍。兼遜鷓斑燿。下駟安可充。先韋幸無躁。尸陀林各天。西藏直西徼。唾棄南北宗。貼耳奉黃教。吹螺響鳴鳴。轉幡影浩浩。正法如日懸。一氣大感召。甘松及珠貝。百鍊入鐺銚。搗爲元霜精。搓作金管貌。星星微火來。煙篆四騰掉。其臭淡無言。其燼光有曜。重帷閉少時。融液透百竅。辟邪具神通。那必數醫療。方今威德宏。神僧契元照。重舌赴東土。焚頂祕虔告。區區登貢餘。惹衣記廊廟。使臣荷分致。羌情驗謹叫。束香同束芻。價壓萬躡繖。鄭重燒博山。心清遠聞妙。

藏毯毯

邊城出魚通。烏斯藏聯屬。水草健移帳。羊牛富量谷。豈惟馳騁便。寢食利皮肉。一毛積萬毛。毳毼細盈匊。漫撚體漸麤。交搓緒相續。數丈互一條。條條受機柚。詩注柚受經經之旋緯之。織作妙緣督。長鉤準高架。用手不用足。正成刮使光。束卷詫豐縟。彼中霜雪繁。適體耐寒燠。披同黑貂襜。藉勝紫熊褥。入市茶馬偕。任貢組纁慝。皇靈被戎夏。如布罔越幅。扈夷徠桐漿。準部資考牧。氍毹致新羅。毳毼獻身毒。弓衣繡詩句。卽事驗懷服。珠珍何自來。展對見羌俗。復陶製效秦。黃潤價壓蜀。賓廚番駝尼。攷校昧前錄。爲報割氍情。纏綿佐宵讀。

嘉州食荔支

少長東海隅。尤物自洋舶。漬以蜜與酒。色香味差得。雖非薦新采。猶道趁鮮喫。中年乘使軺。桂嶺有行迹。

小暑會告徂。輕紅負親擘。唐貢歲取涪。坡語苦未覈。南海片段筐。彼產實馳驛。詩人眩鄉土。可口哆津液。不見眉倅廳。子由詩注眉倅廳有荔支二株。伸手無可摘。朝來食指動。珍果枝的的。絳襦白玉膚。了了恣披析。天漿斟飽滿。仙酒窳芳澤。稍嫌名實浮。少肉乃豐核。主人笑謂我。茲樹茲土特。守之閱數旬。采之靳一鬲。非關苑鳥啗。請效齊蠶食。肉熱我弗愁。中乾誰似腊。物少斯見珍。肯遣六丁掎。我欲懷種之。遷地復何益。庶作嶺南人。日噉顆三百。

平羌渡望鐵索橋

平羌江口浪花惡。我之渡江竹簿掠。從船則危橋則安。指點橋頭板橐橐。優游掉臂同石砢。熙穰摩肩膀。木杓簿夫笑我言。大夸險艱如斯逾架閣。有剛百鍊柔繞指。紛鎖交鉤互蝟螻。一絲孃孃百丈牽。雙杙丁丁兩厓削。枯椿瘦鐵相撐扶。如艇在背脛在脚。版之被鐵纜一重。不橫而從罅歷落。幾人窘步爭捷徑。作隊踉蹌似猿獍。足所未到腰已軟。搖颺風旌了無簿。四顧絕岸先徬徨。下瞰澄潭尤錯愕。前年負載過者多。十條索截七條索。千夫瞪視慘呼洶。白日青天餒鮫鱈。而我聞言起三嘆。夷險信天倍寬綽。古稱州域置繩橋。人說星文應井絡。唐蒙發卒馬卿論。漢代沈黎遂名笮。連峰蔽日陰檀爨。繞郭含烟響膈膊。我儕題柱志未頽。爾輩成梁庀誰託。使節還須瀘水行。廟謨那數靈山拓。嗚呼。安得此索飛度刮耳崖。加頸銀鑑二會縛。

過大小關山

關上復有關。山上復有山。關山陡上更無下。一下百上增孱顏。初如螺旋後蛇蛻。步步紆折腰彎環。粗者爲砂大者石。石礪陰森臥蛟脊。晴天白日轟怒雷。亂洒飛湍打行客。林虛箐密熊虎驕。據險與我爭秋毫。危峰壓人面休仰。颯瀝愁煞陰風搖。野店蒼涼傍荒戍。歇馬店前倚枯樹。山家却指相公嶺。如此關山是平路。

瀘州屢得述菴軍中寄書

定西將軍尺二檄。緊程八百緩五百。陣雲凝雪雪化水。腕底何人飛霹靂。一聲落紙山岳搖。太白出地千丈高。尊酒細傾歌坼地。赫蹏隱隱騰秋毫。初言入釜游魚哭。繼言落雁軍容簇。後言七日犁賊庭。無數糧栖萬竈熟。男兒豈必手斷南越頭。飽看飽聽願亦足。復言講堂古柏傳文翁。諸生誰繼相如誰。五架五間飭材好。落成飲至需春融。軍中學易悟易理。小衲毋怯勝毋喜。書招贊普謀未藏。城築因杆願非侈。三瀘城邊瀘水分。渡瀘人去思前勳。賓寮整暇有如此。將軍辦賊何足云。

石符榻本

廣元縣東百丈關。水中有石大如席。上有文如符。人謂之石符。傳是張道陵所書。佩之能辟邪。孕生男。

扶桑繭紙凍雲墜。似符非符字非字。其橫三尺縱一尋。七劔在腰一槩植。嚴關百丈崖陡懸。崖下江聲響。溯鼻沿江上下溪。勢又貼臥盤陀淨苔翠。夏漲能禁魚潦黏。曉鐘定使烏朝避。中央如鏡天剗工。言是道。

陵手磨記。樵蘇絕跡。漁釣稀。響榻登登。強羅致。高牙大旆。山鬼驚。對仗垂旒。瀆靈衛。縵文糾結。繆篆粗。誦者生箝。捫者畏。堂楣高揭。輝日星。豈分宜男。許留佩。陰陽水火。千劫沈。伯道無兒。命所制。五斗應從。隣郡傳。三丰或自前朝至。青蛇在袖。呵叱來。化入蒼紋。露真氣。羅浮竹葉。猶爾爲。似此瓌奇。古無二。得毋漢相籌筆餘。暗勒仙銘。妙垂示。木牛銅釜。隨燼烟。獨有一卷鎮。最屬呼童。檢點牢記。將勿遣火薰。與日曬。五雷劈裂。黃石飛。且把陰符。枕函祕。

題惺亭制府土番款塞圖

西北曰塞蕃部稠。四衛拉特。枰畫楸。土爾扈特。最荒曼。未奉冠帶。祠春秋。有元子孫。麗不億。外氏策妄。先朝讎。悉率醜類。避崑崙。牧場水草。行相求。劈正斧。沈質孫。敵廬帳。非帳裘。非裘。我皇拓地。越葱嶺。準回種類。盼共球。萬亭障。外怨遣已。渡額濟。勒輕若泓。生身熟身。戶三萬。革履辮髮。詞咿嚙。畏威屋惠。敝關吏。會值秋令。循羶膻。紫絲韁。轡迓天寵。親覩殺虎神。鎗陪宗。乘廟前。禮銅殿。旋騎特許。經邊郵。佩印編旗。校丁衆。頽朔讀法。安田疇。於闊布多。聚屯廠。黃羊紫鼠。馳馬牛。我臣悉臣主。悉主。蒙古族。盡歸覆幬。公時麾節。鎮戎索。頓置扉屨。儲芻餼。遠攜小隊。問疾苦。要使絕域。知懷柔。諸蕃。轟然遶牙帳。進止鞠。臚龜排頭。爾曾某某爾祖。某爾昆弟。某嘗招尤。某山某水。某夷險。館堠食宿。如經由。驚呼誠汗。手加額。公神人也。誠斯投。各以其職。歲來覲。陪臣義敢忘干。振。是年鄙人使西粵。錯迕無異。周南留。象胥譯舌。尠根據。忝視典冊。封

其酋鼎鐘爲述祖德遠。綸綍畏深王言羞。我公圖此紀行役。丹青王會交彌彪。錦江展對愜春色。懷古坐
獻籌邊樓。滴博蓬婆彈丸耳。宵旰幾載勤咨諏。王師埽巢事俄頃。拜釐圭鬯光揚休。封沙拉扣肯郡王舍
撰。楞貝子册文皆欽擬

姜伯約墓

一膽包東夏。崎嶇戰伐名。反旗嘗走敵。斷釀輒收兵。乘隙天心去。逃讒主信傾。空留守關處。宰樹暮雲橫。

木洞得泉之信

峽斷風無定。孤舟下水難。山圍巴郡外。人出楚雲端。猿語傳清怨。魚書戒早寒。分明佩萸節。獨自傍烏蠻。

蒲州

蒲州舊錫中都號。城冠高寒鶴雀樓。到海長河尊一柱。度關太華俛雙旒。帝鄉耕稼居猶近。霸國兵戎死
未休。見說連朝風溜緊。索郎無恙對銷愁。

雨抵榮經

竹霧沈冥石磴遙。棕欄葉暗接芭蕉。楚人聚落空嚴道。漢相威名始孟橋。峰勢極天圍古障。澗聲終夜打
秋潮。來朝走馬關山阻。欲醉芳樽意已消。

登鬱姑臺

鬱姑臺似鬱孤臺。杳渺霜鐘法界開。亂水北吞三峽下。斷峰南擁七星來。荔枝一過霓裳散。桂樹重招鶴
馭哀。為是兩川冠冕地。醉扶藤杖獨徘徊。

初夏寒寄述菴

率地湘紋不上鉤。脫絛時候轉披裘。胡琴帶潤梅迎雨。楚簟含涼麥送秋。玉粒盡關湔水口。鐵衣猶滯雪
山頭。暄寒易序占天意。為鍊精神破貝州。

題璞函少華詩卷感寄述菴耳山璞堂

幾載青林夢故人。一編風雅坐相親。鯨魚絕海茗詩翠。欲繡平原趙勝身。

永安宮

康熙二十九年。夔中許嗣印。因址築亭。在府學明倫堂後。

垂創三分國。存亡六尺孤。赤符謀復漢。黃鉞忿窺吳。持敵師偏劔。還軍路不紆。蠶叢懸夢寐。魚浦息艱劬。
象祕星躔犯。宮深玉几扶。儲君宏後勅。元老亟先趨。治命彌留最。忠言繼死俱。螭靈號地坼。鵠血濺春徂。
一自歸喪儼。重尋別殿蕪。翠華颺跡竄。珠幃蘚痕鋪。逝水長東逕。開門遠北俘。聽笳牆隱雉。過櫂闕朝烏。
中道空王業。羣雄祇伯圖。結亭存體槩。立學改形模。下輦魂應戀。分香意孰誅。向來伊霍侶。主德為交孚。

黃初四年三月。月犯天心星。四月先主殂。

施朝幹

字鐵如。儀徵人。乾隆二十八年進士。官至宗人府府丞。有正聲集。

蒲褐山房詩話。鐵如詩樸質清真。不尙才藻。生澀刻峭。得之孟東野。梅聖俞爲多。居官如其詩。往往進寸退尺。如黃楊之厄閏。雖居邗上。不屑與嵯客往還。故其窮日甚。在京師。敗車一輛。老屋數椽。俸不足。益以稱貸。而破氊敝席。寒菹冷炙。夫婦相得怡然。終不屑與熱官來往。稍遷京卿。督湖北學政。而制襄間濱池。告警恒惴惴不自保。蔓瘁而亡。無後。其門人伊太守湯安刻其詩于橋李。

呈王蘭泉先生

雙闕集華轂。宏達羅諸儒。夫子江海客。出入承明廬。制告宣九天。禮樂垂八區。斯文無盛衰。大義通古初。疇昔西戎敍。月竈偃螯弧。載筆獨紀實。於鑠尊皇輿。退食罕人事。烏雀翔室隅。默坐不知暮。邈然對琴書。黃鵠覽九州。抗音流蒼旻。神馬稱龍媒。萬里踰崑崙。負異固由性。養精方保真。側聞大雅宗。與世本殊倫。至寶藏澹漠。元氣涵心神。悠悠終古間。浮榮非我身。妙道瞻在茲。展轉曷能陳。

少居衡茅下。慨思古人風。耕釣事偶然。潛見心自同。塵網未可屏。青門逐燕鴻。巨麗觀郭郭。陶詠忘夏冬。荃蕙出幽谷。芳意難爲通。一朝見攀折。雨露滋丰容。聲名戒速成。將進圖其終。景光豈不惜。我生守至公。攬衣出西門。遐矚天象開。朔風吹古雲。蕭蕭落我懷。堅冰橫大野。凍木垂陰厓。寒鳥怨無巢。晨夜鳴徘徊。覽物發長喟。撫志欣所依。厚德永銜戢。自勗千春期。

湄菴示某僧

白石開樵徑。青衫訪化城。鳥爭幽處宿。泉入定中鳴。落日梅花冷。歸雲竹影平。慈航如可渡。蕭灑學無生。

山中

山中月初出。獨坐彈孤琴。落葉滿前谿。始知寒色深。仰視雙翠鳥。絨情託好音。夜半風雨來。蕭蕭愁我心。

過峨嵋院

流水不可住。孤雲行未還。峨嵋院中月。已照江南山。理自獨遊悟。心隨清夜閒。他時結茅屋。相對一開顏。

夏夜松閒待月和蔡芷衫

四壁靜如此。青空凝睇長。月明漸欲出。松色生微涼。鶴下得幽意。風清聞暗香。金陵未歸客。坐久露霑裳。

東關早發

雉堞鬱崔嵬。孤征一棹開。春星兼鳥落。山雨接潮來。土瘠憂人事。年饑出吏才。生涯猶旅食。慙愧隴頭梅。

哭景雲客

名人龍江都人

夢君驚不語。死別舊征衣。落月到今夜。慈親猶望歸。幽州懷雨雪。梁苑失芳菲。三十來登第。空傷朝露晞。

舟中觀景雲客遺詩景又家杭州卒於衛輝

天涯行李望如何。一卷遺文涕泗多。放鶴林逋歸慘澹。入梁司馬病蹉跎。中原秋色悲嵩嶽。孤劍寒雲落

大河。酒價長安平日事。登艫風雨助哀歌。

文信國祠

江抱真州水一方。宋家丞相尙祠堂。孤城警急留三日。大業艱難望二王。燕市南冠殘月落。吳山白雁故宮荒。可憐刺史謂李公庭芝。精靈在。泉下相逢各斷腸。

寄懷張春帆

湯花飛盡白沙洲。夾水蒼山兩岸流。忽憶故人從此去。西風吹月下江樓。

羅有高

字臺山。瑞金人。乾隆三十年舉人。有尊聞居士集。

蒲褐山房詩話。臺山少習技勇。治兵家言。弱冠後。外服儒風。內宗梵行。於釋教服膺罄山語錄。兼通天台賢首諸家。尤以淨土為歸宿。于儒者之教。宗明道象山。而聖經主孔。賈正義。小學主說文。皆能參稽義訓。句櫛而字比之。與長洲彭進士紹升。吳縣汪文學縉。益都李明府文藻。交善。方外則揚州高旻寺僧照月也。年四十六卒。生平不多作詩。如書東林五君子手帖。亦奇崛可喜。

題彭允初所藏東林五君子手帖

我友彭季子。學志兩東林。天花六時供。忠孝觀厥深。偶見五君書。感甚梁父吟。曰楊曰繆魏。兩周皆國琛。明運屬昏黃。狐鼠弄霾霧。九州鉗網彌。妖氛毒矣淫。唯時儒林賢。舍命爭天心。獨見五君書。我已頭岑岑。肅觀景文書。雷霆鬱掀擊。旱魃屯天膏。電繞驚蛇縮。蕭涼念佛人。渺志青蓮峯。忠介官京師。日課佛名一千。見燼餘錄。嗒嗚發怪咤。義聲沸愚賤。諸彪心已亡。施罵意何腆。肉身受泥犁。正念能不轉。公子仁且武。血疏麗朝睨。惜哉不尋觀。海嶠青霞緬。

應山椒山傳。移宮氣挺挺。二十四臯疏。姦膽落其鯁。同心魏與左。揚激忠憤炳。誰託左公書。割去聽無瑩。江陰暨吳江。誦說懷孤耿。心畫飄殘雲。字外餘清勁。商飈撼屋梁。展對塵慮屏。頑懦無我如。佗詩永深省。

張埏

字商言。吳縣人。乾隆三十年舉人。官內閣中書。有西征熱河南歸諸集。

蒲褐山房詩話。商言才情橫厲。硬語獨盤。後乃學於山谷。后山。沿於文長。中郎。打油。釘絞之習。時露行墨間。然如新豐云。百家雞犬。英雄宅。萬歲粉榆。故舊情。夜宴云。花露半晴。題却扇。人扶殘醉。唱迴波。亦殊工麗。而生平與翁覃溪。趙雲松。孔蕙谷。諸君友善。故攷證金石及書畫題跋。頗為詳贍。可喜。

石嶺子

幽徑隨意取。山屋無正態。古戍吹螺殼。大荒滑龜背。多泉不貴井。荒坡尙有菜。風林土實啓。雲衣水口對。勗哉養汝儉。瘠土古人愛。

古北口

地盡中原山。天挂秦時月。喜峯連居庸。夾此青硨磲。一騎容關門。千秋幾戰伐。沙清走野兕。日落剩飛鷓。乃見長城下。僅臥白頭卒。近來關內民。關外來耕墾。冥冥古樓堞。荒荒無羅訐。真笑前人忙。龍蛇膠齟齬。

次新安縣

縣城孤迥作重關。天許青山四面看。紅柿人家沙路淨。白楊風色澗聲寒。馬留破驛其成束。人上荒臺月

半丸一宿匆匆便將去。料無遺累到豬肝。

和寒食弔鸚鵡冢詩

仙家羽化玉棺存。贏得詩人到墓門。三月白楊留小碣。一匳紅豆奠芳魂。有生浩浩歸情劫。終古茫茫付淚痕。女伴踏青聞太息。落花堆裏共黃昏。

次三道梁同述菴通政對月并題其詩卷後

看月山梁山翠無。月中相對話榮枯。十年慈母雙行淚。萬里歸裝八陣圖。名士縱橫能仗劍。詩篇彊硬亦彎弧。慰忠祠記蒼茫在。又為知交一歎吁。
成都建慰忠祠。蓋祀亡友趙璞菴。程香岩諸君者。述菴撰碑記。

萬鍾傑

字汝興。昆明人。貢生。歷官福建按察使。加布政使銜。

荊州

大地起胚渾。岷山萬馬奔。瀟茫通夏口。磅礴竦荆門。江汛桃花水。雲垂橘柚村。鬱葱佳氣好。南國紀屏藩。

黃牛峽有懷錢南園太史

人世能經幾白頭。輕帆今又下黃牛。猿聲啼過三湘雨。楓葉吹殘大別秋。信有文章光上國。那堪風月坐南樓。十年同作天涯客。猶是空江不繫舟。

施南三十二韻

邊郡烏蠻近。巖疆白地平。秋風生畫角。落日照層城。湛露三朝重。殊方百度明。星躔次東井。地勢控南荆。椎魯風猶古。顛蒙政自成。一朝驅貔貙。兩載繫鯢鯨。樂土羣爭附。青山衆可耕。衢尊思帝力。蔀屋愛官清。俗化螳螂臂。風訓鼠雀爭。鐘鏞思往哲。胞與待蒼生。仗節尊圭組。專城重甲兵。剛柔因地利。寬猛協人情。刺史甘棠舍。將軍細柳營。農歌歡臘雪。社酒醉春晴。有客來憑軾。修途事請纓。南山觀豹變。北海擊鵬程。浪跡風塵闊。飄蓬歲月驚。春雲生馬首。暮雨聽燈檠。去國逢霜雪。生涯仗弟兄。乘槎還泛泛。出谷更嚶嚶。作貢傳東箭。徵書寶白珩。懷人隔秋水。紉珮束香蘅。雁到歸期遠。花飛別緒縈。窻虛窺蓓蕾。庭寂走狸鼯。愁入千絲裏。身憐一葉輕。山僧留雪茗。野客餽黃精。流水隨槎意。空階聽鶴鳴。斯民真古處。吾道自安貞。刷羽期高舉。傾觥戒易盈。文章欣際會。簡冊說功名。豎子謀溫飽。男兒志邁征。中心似葵藿。不改向陽傾。

奎林

字直方。富察氏。滿洲正黃旗人。以恩澤封公。由侍衛官至伊犁總統將軍。

蒲褐山房詩話。君以椒房戚。晚弱冠侍直乾清。其時諸父兄弟。勳階烜赫。而君甘澹泊。習勤苦。處之蔑如。二十餘年。四方征討之役。無不身行。間終歿於西藏之江卡。囊篋之暇。喜讀史傳。嘗閱元史。予問之。其中愛慕者誰。曰。耶律文正。吾不敢期。最慕者王保保耳。其寄托如此。周行萬里。所遇封疆大吏。唾涕視之。與予在滇。蜀軍營數年。最爲相契。及乙巳春。使伊犁時。道出西安。雷官齋劇談痛飲。呼小伶度曲。臨別書一絕而去。其餘間有所作。悉燬其稿。親兄明瑞號筠亭。風流儒雅。亦能爲近體詩。以雲貴總督征緬甸。歿于途次。詩亦無存。

示李伶

倦客看春尙有情。嫩紅柔綠眼仍驚。
風流地主緣何事。不折楊枝贈遠行。





湖海詩傳卷三十

張四科

字喆士。臨潼人。貢生。寓居揚州。官候補員外郎。有寶閒集。

食筍

綠陰謝豹嘯。鱗鱗驚晚筍。添竹知已遲。饑口詎能忍。小試傍林鮮。指動豈無睨。曉牙冰片鳴。堆按錦擇隕。食肉本無相。加餐還自哂。要知澹故佳。寧忘美爲疾。多生餘此債。聊免刀砧憫。累君異豬肝。損人非雁腎。蕨配恨不同。鹽腊香易泯。何如清泉淪。甘苦味皆允。放筍對此君。高興殊未盡。清風滿詩腸。陶泓爲徐引。

喜全謝山至因憶樊榭堇浦薏田諸游好

我友天下士。半居山水鄉。偶聚若萍梗。一別愁津梁。四明有狂客。早歲辭巖廊。幾年阻音塵。隔絕如參商。今夕復攜手。中林共壺觴。廣除澹炎景。南風清樾香。旣欣文字飲。更歌風雨章。遙憐二三子。浙西恣相羊。安能聯袂來。使我調飢忘。

邵文莊公温硯

五金皆山英。萬物勞匠智。要以濟時需。尠克佐文事。於明邵文莊。獲睹硯爐製。流傳三百年。請爲說其器。

外周而中空。方整若巾笥。其上紫石嵌。其下朱火熾。腹裏貯清泉。傍竅納虛吹。春向筆端回。煖入墨花膩。冰雪頓無權。揮灑每如意。二泉本大儒。詞翰亦精緻。譔銘鐫其旁。蠶尾五十字。方其歸養時。遂畢著書志。砥行益精純。力學辨真偽。峩峩點易臺。高名共嵬歸。里人安桂坡。多幸見接待。竊欲煖公寒。役作類鳧燧。慨此自公遺。敢作玩物視。我有嗜古朋。愛之左右置。呵凍索題詩。炊火請一試。

蟾蜍水滴

誰鑄此蟾蜍。彭亨隱痲瘡。爬沙不入月。貯此涓滴水。研磨墨瀋香。摩挲土花紫。長置硯山旁。相對憶顛米。

銅鼓歌

精銅巧鑄尺半高。腹列面夷腰微凹。雲雷百匝花紋交。非鐸非錫非征饒。是曰銅鼓出谿峒。伐之鏗鏘如鳴磬。形完毋煩鞞人鞞。聲巨詎必桐魚敲。漢家丞相平不毛。天人擒縱一手操。當時作此厭醜虜。或云入貢從猗猗。丞相宿諳五勝法。要使金伏炎精熇。應畱此物鎮南土。與銅柱并銘勳勞。五溪蠻夷最重此。得之能易千蹄牢。納鼓釵長獠女叩。醉舞胡旋歌哇咬。蘆笙合奏峒神樂。用祈豐歲齊肥壤。百年以來蠻運絕。流轉遠上越客舫。買歸高齋佐清玩。懸以畫簾貫以絛。手持雙杖不敢下。安得拊擊同陶匏。免使古物竟受雷門嘲。

題紙牕竹屋圖

披圖得佳趣。竹屋夜寒凝。門外數峯雪。燈前一研冰。有人清似鶴。此味澹于僧。好是殘年況。翛然我亦曾。

兩明軒坐月得寒字

汪棣

字華懷。號碧溪。儀徵人。貢生。官刑部員外郎。有持雅對琴等集。

蒲褐山房詩話。華懷居廣陵。好文史。嘗槩漁洋唐詩神韻集行世。然寥寥數十首。未必為真本也。甲戌冬。予過廣陵。華懷具小艇邀賓谷松滋諸君。陪予遊平山堂。酒次備論生平諸作。予曰。江梅春信早。村店酒旗偏。此君五言。壓卷句也。座客皆以為允。

有懷

落木挂圓景。皓彩揚高城。前除夜逾靜。殘雪林外明。澄懷屏塵慮。仰睇有餘清。故人渺何及。臨堦空復情。

彈指閣月下

精舍夕欲涼。前除忽已暝。客從林下來。襟上有清影。徙倚孤閣外。亭空足煙景。露白光已寒。修廊夜方永。

忽聆一聲鐘。皓月在松頂。

水竹居偶成

微雨過簷端。草色上堦綠。圓塘水乍生。冷然坐幽築。軒開敞四筵。雜英弄晴旭。流眄檻前灣。春意藏深隩。

斷岸略約通。繞徑篔簹足。鯨魚樂環流。小鳥入空谷。樹覆短籬旁。亭結平臯曲。鄰人問字來。社酒持巾漉。欲暝天迷離。遠火出叢木。別有心神清。石上支頤宿。

護圃聽琴朱稼翁吳梅里陳授衣凌春藻王琴德趙升之曹來殷嚴冬友同作時王趙曹歸吳下

嚴歸白門

庭除花氣香。雨過徑苔滑。偶此集吟侶。琴聲散清樾。奕奕鏡中顏。星星簪際髮。開襟論風謠。挾藻自超忽。離歌何爲來。茲夕會有月。遙念江天明。乘潮棹謳發。

木瀆遊初園贈吳拙庵暨令子竹嶼

迢遞橫塘路。棲幽愛獨尋。林亭環曲沼。昏旦變鳴禽。點點遙岑秀。濛濛極浦陰。數椽能選勝。扃戶是清心。

早春赴姑孰

征途不知倦。殘夜促嚴程。山曉霜初白。江空雁有聲。夾堤疎落葉。匹馬向秋城。謝尚今何在。淒然客感生。

鄭炎

原名渠。字清源。秀水人。諸生有雪杖山人集。

夜泊垂虹

周流七十二峯前。胸次虛靈水國仙。無復點塵侵淡月。僅餘清露洗遙天。殘城鼓斷門猶啓。獨樹烏啼客

未眠。我比機雲差解事。不煩輔嗣夜談元。

次陳曲齋集谷隱山房茶話韻

雨霽攜筇過白蓮。一聲清磬了塵緣。苦吟茶味高於酒。默坐花香冷似禪。心靜不嫌幡影動。談深無礙月華偏。山房竟作圖書府。方外追隨二十年。

讀書

遯野歸來長杜門。頗於往昔日相親。貧無熱客撓清興。閒共乾魚結古鄰。金石有聲傳戶外。蓬蒿自分老湖濱。會心深處天機見。數點梅花滿院春。

燈下

草草勞心逼歲除。莎庭人靜四更餘。消磨白髮三千丈。手剔銀釭讀異書。

齋中玩菊

不待敲門問主翁。夕陽窗外有深叢。黃花漸被霜侵白。野鶴含愁怨曉風。

陳鴻賓

字用儀。鴻寶弟。錢塘人。諸生。

陶然亭雅集賦呈述庵先生

秋晴喜嘉招。眺覽意彌適。一逕入葭菼。墅水漾空碧。有亭翼然起。獨向城隅闕。宛遊江湖閒。扁舟傍沙磧。西山忽當面。爽氣欲迎客。變幻雲霞生。葱鬱蒼翠積。憑欄肆遐睇。紛若成畫格。九衢車馬喧。塵土苦役役。而我物外遊。羈懷得暫釋。維公金閨彥。亦具泉石癖。一尊常共攜。流連更日夕。漠漠昏烟合。遲遲歸騎策。不省尺五天。峒嶽香界隔。

己亥臘日爲述庵廷尉畫三泖漁莊圖并題

卜築長耽物外幽。漁兄漁弟共汀洲。遮門楊柳一林暗。照眼芙蓉九朶秋。張志和應愛青笠。陸天隨合老扁舟。分明不似官人樣。着個紅衣稱得不。

題邱太守學敏古樹

冬青樹失故宮隈。人代茫茫付劫灰。獨喜君家枝幹別。似經新甫陟徂徠。東臯宅裏輪囷樹。肯逐朱門愛賞移。留與諸孫遺蔭遠。蒼然常見歲寒枝。

楊懷棟

字星標。海鹽人。諸生。

題三泖漁莊圖卽送德甫先生歸里

小築江村路。溪流滑笏平。林稀山寺見。烟鎖釣船橫。雲水留詩社。蓴鱸伴酒鐙。故鄉風物好。迢遞計歸程。

幸沐河汾澤。何當起別情。征衣臨驛路。小艇到柴荆。隔水鳴榔遠。穿林短笛清。知應惜留滯。獨坐對寒檠。

朱維魚
字牧人。海鹽人。監生。有眉洲詩鈔。

野望

偶經北原上。卻向南村歸。一雁下秋色。數峯明夕暉。泉流不礙逕。草露欲侵衣。未得還家計。臨風億鱖肥。

聽人話征伊犁事

擒王直欲盡流沙。兔走烏飛日月賒。瀚海天低雲作浪。春山樹少雪爲花。一軍茶火分回部。回有紅白二種。自爲部落。萬里蒲稍入漢家。絕域烽烟生亦死。漸忘清淚落悲笳。

潼關

虎視龍興踞上游。洞開四扇俯神州。西來翠疊三峯色。東去河兼八水流。赤帝偏能降軹道。青嬴底事出延秋。唐陵漢闕俱黃土。獨贖秦時月照愁。

金式珪

字夔齋。青浦人。諸生。有鳳栖山房稿。

冷泉亭

峯勢如飛來。寺門落幽境。風起千波寒。日涵萬籟靜。低頭照清水。渺渺蓬壺影。

自廣陵歸後寄朱丈春橋

澄湖照初陽。身在烟波裏。行行金閶亭。倏忽晉陵水。山市載酒行。漁歌隔船起。相思攜手處。延佇不能已。

宋維藩

字瑞屏。烏程人。貢生。有溟游遄歸等集。

章江舟中卽目

江雨來無時。飛空點晴綠。春雲壓我舟。彈指隔涼燠。蒲帆乍引滿。微颺散輕縠。人家岸東偏。幽樹出深屋。舊桃方着花。垂柳春風足。老翁田間來。帶雨策歸犢。稚子候柴扉。蓑衣挂深竹。我家水雲鄉。耕漁本初服。何爲事遠遊。舟車紛水陸。辭家及初春。江梅發寒粟。一驚社燕飛。始覺日月速。春光九十日。到眼櫻筍熟。空懷北堂人。送此千里目。

清溪洞 平彝縣西三里

策馬沿回溪。徑轉得山麓。森然敞雲關。危亭出修竹。洞穴闢何年。靈奇拓山腹。日月雙轉輪。光遠不敢燭。

石髓寒漸凝。狀作雲濤蹙。天吳及螭虺。一一聽蹲伏。時還揚其鬚。噴薄出寒玉。清溪十里長。尾洩常不足。

山下有斜容天一線。寬受車百轂。賴此佛力鎮。靈區去恐速。洞中多掬泉煮新茗。古碣摩挲讀。碑刻甚多不知

塵勞身何緣換心目。去去幾回頭。林風滿巾服。

渡洞庭湖

天雞喔喔啼前川。榜人決起驚扣舷。南風吹帆健于鶻。朝霧欲塞無由緣。晨起大霧風來霧散雲解駁。輕帆獵獵凌蒼烟。東西南北浩淼不可辨。但見天宇四蓋垂無邊。日華睽睽射不得。一一碎作青紅鮮。空明一氣莽迴盪。浪影直撼浮浮天。不知洲渚更何處。惟有風檣萬點跼水如飛鳶。而我輕舟獨容與。蒲帆安穩高聳吟詩肩。君山岩嶂洲外小。孤城樓櫓雲中懸。舟子相呼各致語。日正午亭當空圓。百八十里頃刻耳。要是神力人奚權。君不見舟中之人髮半白。讀書說劍今廿年。青衫破盡不得換。曳裾歲走公卿前。平生舉足與世迕。失計復落溟雲顛。歸甘藜藿爲念母。此意豈謂天公憐。浮江涉漢路正遠。願守忠信輕濤淵。醉神共許飽神德。檣頭得食飛鴉還。呼童取酒酌罷詩亦就。日影西下正透篷窻妍。

小孤山

我昔曾讀歐公歸田錄。亦見東坡長江絕島篇。大孤小孤山色常在目。清夢每落神女祠東偏。我家海東而山在江介。江海相距道遠還逾千。幽燕楚粵水陸走十載。餘此絕境未到心猶牽。今年行蹤決欲補舊憾。浮江有意計定天南邊。江山萬里一旦落我手。兩孤縹緲忽已青浮舷。先從湖口俯出大孤背。蒼翠欲滴已若凌飛仙。今朝小孤山色復到眼。雲根峭削獨湧中流天。初如圭璋清質矗瑤碧。漸如髻髮鬢影高

連鬢百盤逕細勢作螺轉壳。兩厓影峙分若入。勝肩東西南北各各絕。比附羣山如蟻無計來。夤緣山頭草木不到塵世種。瑤花琪樹自向春風妍。蓬瀛仙島或恐便浮去。帝遣神女作鎮威權專。洪濤到此有力不敢逞。俯受約束但作洄波漩。三江兩湖雄勢始一殺。池廬皖壽萬古安瀾全。是時江豚吹風夜鼓浪。輕舟阻險一住三日連。舟人過此攬金望空拜。余亦篷底默禱修齋虔。惜哉飈流駛激不得泊。攀羅躡磴事尙留他年。此行青山采石次第過。梅根浦口水出齊雲巔。山光綿邈一一落帆席。安得所到耳目窮鏤研。抽毫伸紙急爲寫勝概。愧無好語可向高厓鐫。詩成倏忽帆脚看已轉。桅樓斜影不盡青娟娟。

述庵先生垂示滇中詩集卽次見贈詩韻題于卷後

不破萬卷行萬里。古不許以能詩稱。杜李韓蘇亦如此。筆端時有烟霞騰。先生讀書十行下。五車百笥偕寢興。餘事作詩供游藝。古光鬱出青嶒峻。蓬池閬苑置身早。鈞韶響遏浮雲凝。別裁僞體振羣雅。如掃霧障開榛莽。南荒萬古吟不到。炎山色死寒於冰。鞞刀帕首縱一往。絕景天爲騷壇增。是時緬人肆螳臂。上公玉帳輝環纒。醜徒腥血滿油幕。并於牛炙殷肴膾。先生磨盾草檄罷。冰詞透洗黃茆蒸。遂窮黑水極南海。自禹跡後人無能。蔽江流秭碎賊膽。伏莽不敢高陵升。旋輸降款納燧象。迺振勁旅迴雲鵬。牛腰束詩歸示客。筆鋒可斷千矛矜。尸林劒樹讀者悸。虎頭燕頰真堪憑。賤子昔者走人海。偶攄吟詠淆淄澠。先生贈言恢華縉。南來急遞勞緘滕。獎許雖過意鄭重。酌知十載心兢兢。滇遊復悔交臂失。厚睠終不忘愚懵。

薄植何緣動青眼。晴雲疊嶺披層層。所嗟濩落魚投罾。研田墨稼成荒塍。卽今更踏綠槐影。倦無行卷輸
籛騰。朝來把詩賴鼓勇。和歌終憾力不勝。側聞越睽策驥足。再馳徼外還呼鷹。行間詩在肯示我。并付小
史抄溪藤。

松歸山寺

松歸山翠裏。初地壓坡陁。一徑入林小。綠雲侵座多。水聲清晚磬。人語隔烟蘿。暫息勞筋在。塵緣媿我何。

大通驛

平沙遠水漲初生。楊柳烟梢綠尙輕。十里春陰江漠漠。杏花開後近清明。

玉山

初日光寒乍透櫺。晚風吹袂正泠泠。白雲忽擁山腰路。遮過長松一半青。
山城春色轉垂楊。竹板肩輿石路長。知是近南芳信早。晴風二月菜花香。

初得衡酒

倒瓶衡酒釀於乳。出網刀魚白似銀。料得碧瀾堂下路。有人把盞話行塵。

題畫

新綠全遮老樹腔。蘋花開過板橋椿。雨聲直到溪南屋。聽盡瀟瀟不掩窗。

板橋驛

茸帽深衣客路遙。朔風吹午醉全消。四山殘雪疎林晚。細馬斜陽過板橋。

蔣業鼎

字升枚。長洲人。諸生。

蒲褐山房詩話。升枚風神俊雅。竟州牧。父盤。與同縣朱桂泉。人稱雙璧。弱冠操觚。專心吟咏。有所作。往往推敲。至忘寢食。先是祖樹存。州牧。皆以風雅名家。居桃花塢東。有倚梧巢。西疇閣。交翠堂。蘇齋。諸勝。統名繡谷。康熙己卯。尤西堂侍講。年八十二。樹存約為送春之會。烏目山人王石谷寫長卷以記之。時沈文愨公年二十七耳。至乾隆己卯。文愨八十七。升枚佐其父。復為前會。名流至者二十餘人。作圖者為林屋山人王存懌。人尤以為佳話。又吳中名妓張憶娘。為顯俠君。惠半農兩公所眷。樹存作簪花圖。日久漫漶。升枚加以裝潢。并屬座客題詞。其好事如此。年未三十而歿。

聞蘭泉歸信

蒼涼千里道。歲晏滯歸舟。白雁低寒影。黃河急暮流。夢回孤店路。心繞故鄉樓。悵望天涯遠。何時慰別愁。行止本何定。高情憶舊朋。琴尊坐遙夜。雨雪話寒鐘。忽忽風塵隔。迢迢涕淚增。懸知三柳畔。猿鶴怨難勝。

送人之澄江

東風芳草路。南浦木蘭艤。遠樹低青嶂。孤城枕碧江。梵鐘烟際寺。漁火雨中杠。獨對遙天暮。相思倒玉缸。

寒夜

寒風發清響。木葉忽紛飛。微月澹樵逕。疎烟生竹扉。隔林深犬吠。遠寺夜僧歸。閑步尋幽興。相於擬息機。

九日懷蘭泉濟南

離居千里思依依。木落亭臯景物非。舊雨憐君還作客。重陽對酒正思歸。傷心節序黃花發。極目雲山白雁飛。卻憶鵲華秋色好。憑高吟眺送斜暉。

奉送蘭泉先生歸里

蓴鱸歸思滿吳淞。渺渺江雲隔幾重。畫舫柳垂春鬪酒。香林梅發曉攜筇。暮潮雨歇過三泖。明月烟深到五茸。何日更來尋舊約。寒山同聽夕陽鐘。

朱漢倬

字凌霄。元和人。諸生。

山中訪友不值

爲訪烟霞侶。崇岡際曉過。涼飈一夜急。落葉四山多。藥逕封苔蘚。柴門掩薜蘿。支筇空悵望。何處獨行歌。

別桐溪故居

移來家具上輕槎。欲去無言獨感嗟。園竹誰燒他日筍。砌梅還發向時花。柴門留掩臨春水。蘿逕回看隔暮霞。爲謝鄰翁休眷戀。重過正擬問桑麻。

九日病起喜沙斗初張策時吳企晉同吉人叔過訪

遠煩勝侶問棲遲。正是蕭齋病起時。九日黃花欣共對。三秋紅樹久相思。聊斟醞醖酬佳節。欲插茱萸感鬢絲。何事歡逢偏悵惘。年來憔悴乏新詩。

春郊偶步

裊腰細草碧淒迷。乘興閒遊獨杖藜。風暖平原春牧犢。雨晴墟落晝鳴雞。千絲楊柳痕猶嫩。一路桃花放欲齊。最是前溪新漲好。酒帘低映板橋西。

朱澤生

字時霖。吳縣人。監生。

送張策時東歸

空江梅雨過。孤客上扁舟。蘋葉溪邊寺。榴花水際樓。新知懷鮑謝。清詠憶應劉。後夜橫塘月。誰同載酒游。

寒夜懷蔣升枚

金波穆穆破黃昏。滿院青苔獨掩門。遙憶桃花塢畔路。寒鐘夜火最銷魂。熏鑪畫卷自蕭閑。咫尺江城斷往還。何日西疇深閣裏。明燈涼雨話巴山。

朱莅恭

字肅徵。號桂泉。長洲人。有雅材堂初稿。

蒲褐山房詩話。桂泉爲紫岑之子。適庭之弟。與從兄時霖。皆弱冠能詩。居桐溪浜。其前爲疎雨樓。後爲蘋花水閣。又吳企晉沙斗初。張崑南皆居西郭。相去數百步。而子與鳳嗜策時。損之來殷升枚。過從來往。故詩酒之盛。著于吳下。每有所作。桂泉泚筆和之。衆皆嘉賞。以爲春樹珠苞。仙花玉蕊也。後予輩入都。勝游難再。及戊戌南還。樓閣易主。舊雨亦多物故。循覽遺詩。不勝聞笛山陽之感。

早春過遂初園

園林新雨過。微風度叢竹。振衣登高臺。遠山互回複。空翠滴諸峯。烟嵐近茆屋。庭前早梅舒。池上閑鷗浴。楊柳初垂絲。掩映春波綠。遙聞鶴唳起。縹緲出松谷。數聲漁笛來。殘陽挂喬木。

吳企晉澤均。招同沙斗初。張崑南。王祖錫。王存慤。張策時。蔣升枚。暨曹來殷。王蘭泉。集璜川書屋。春盡多微陰。幽居感離索。故人有雅懷。招邀共杯酌。已愜盍簪情。復聆清言樂。裴裒展圖畫。詞章時問作。稍見暮雲開。眷此孤花落。微風散芳襟。涼露滴叢薄。初月亦舒光。依依照簾箔。寂寞理琴書。蕭閑論邱壑。相期櫂扁舟。素心庶有託。

訪張策時家兄凌霄寒山留宿有作

一徑杳無人。攜樽對松酌。寒泉塔下流。殘葉林間落。人靜四山秋。露下聞烟鶴。坐久遠鐘鳴。金波上簾箔。涼飈稍復生。清詠詩間作。雅尙寄琴書。元言愛邱壑。天末懷良朋。何由共芳約。謂臯南斗初。

流螢篇

碧虛屏邊晚涼起。點點流螢照紅蕊。帶雨時飛深院中。隨風忽落長門裏。長門深院總淒涼。綠柳千絲拂

畫牆青輝隱隱明金井。微影依依度玉塘。玉塘金井月朦朧。更和微露下梧桐。燈暗羅窗來繡幌。香銷寶鼎撲雕櫳。雕櫳繡幌人初靜。疎星幾處依苔徑。繞竹還因團扇移。穿花時傍羅衣映。穿花繞竹乍淒迷。紅闌六曲捲簾低。未央殿裏舞初罷。長信宮中鳥欲棲。鳥棲舞罷不勝愁。柳下何人倚畫樓。碧漢迢迢橫玉宇。金風颯颯冷香篝。更想空閨少婦情。斷腸關山萬里營。蟋蟀牀前秋漸晚。鴛鴦幔內夢難成。閣外沈沈落月早。樓頭歷歷殘更杳。回望餘光墜曉烟。年年歲歲愁多少。

龍湫宴坐圖爲王穀原比部題

浙東山水首雁宕。鑿天絕壁森崆峒。傾崖崩岸露奇狀。老樹礫砢撐空腔。朝嵐夕靄互虧蔽。中有飛瀑聲琤琮。或如層雲洒密雪。或如急瀨奔秋瀧。或如殷雷擊巨峽。或如疾雨衝哀淙。或如千官響珮玦。或如萬騎交矛鏜。或如漚絲慌練帛。或如引索懸尋橦。舉頭已見目掉眩。入耳更覺神增懣。咄哉造物劇好事。作爲此弄驚駭恣。我聞諾矩羅尊者。曾結紺宇凌崆峒。法雲時覆貝葉卷。香雨恆繞蓮華幢。迦陵翻飛刷毛羽。蒼葡萄娜婀開珠椿。千秋絕境罕人到。坐使澗道生蘭芷。王君本是烟霞客。談詩學佛真無雙。尋幽不惜桑屐蠟。歷險邛俟籃輿扛。棕鞵布韞足濟勝。杖策一徑沿危矸。荒榛羃屨竄枝鹿。叢竹蕭瑟鳴驚虯。道逢野樵氣象古。時遇老衲容顏龐。趣塗縹緲清梵響。入寺訇礧晨鐘撞。壁間僧衣挂白氈。座上佛火明銅釘。四門迴向方未已。傾聽驟覺聞砰聾。忘歸亭上一凌緬。始信絕景雄南邦。山源地脈不可測。跳珠濺玉長

澹澹石梁廬阜身未到。對此已使心神降。獨憐勝地久寂寞。誰人過訪聞音聲。但當拂衣永棲託。杉皮屋
子開桐窗。夜汲寒泉淨瓶盃。曉引危溜滋耕耒。閑從尊宿共敷坐。棲隱豈羨襄陽龐。生平頗有物外賞。秋
水息景言非囀。華嚴天闕有夙好。忍令歲月同奔馳。謝公遊興倘可繼。擬趁晴日浮蘭艫。披圖題句三歎
息。夢魂飛渡橫陽江。

寄趙損之上海

吳城秋盡雲陰陰。寒霜欲下青楓林。天邊哀雁自孤唳。堦下亂蛩方苦吟。美人一別烟波深。側身東望長
霑襟。芙蓉零落空遲暮。誰寄瑤華達遠音。

西郊雪霽

出郭攜筇杖。遠山生晚霞。夕陽樵客路。殘雪野人家。籬落喧寒犬。雲林聚宿鴉。清遊娛歲暮。更泛釣魚槎。

題吳企晉秋江歸興圖

斷靄浮江渚。孤帆趁暮晴。潮連楊子渡。樹隔皖公城。猿鶴秋山思。蓴鱸故國情。靈巖松菊在。吟眺足平生。

送吉人家叔之維揚

唱徹驪歌起暮颺。送君愁見柳如絲。旗亭酒罷潮生候。水驛帆開月上時。瓜步江空楓葉盡。廣陵秋老雁
聲遲。題襟舊侶知無恙。好賭雙鬢畫壁詞。

蟬

池塘寂靜晚生涼。忽聽餘音度短牆。南陌無人嘶暮雨。西風有恨送斜陽。琴絲猶抱齊宮怨。鬢影空留楚客傷。惆悵秋深霜露下。寒燈遙夜伴啼螿。

萍

楊花散落碧波隈。逐浪隨流共溯洄。千點青浮魚欲上。一池綠漲鷺初來。濛濛幾向烟中長。漠漠時看雨後開。爲問行蹤何處伴。水邊荇藻岸邊苔。

山塘雜咏

芳堤早度落梅風。鬪酒人來繫玉驄。燈市闌珊花市近。小樓疎雨杏初紅。水閣山窻入望遙。銀塘新漲試蘭橈。青旗小店重重樹。六曲紅闌接畫橋。玉蘭花發度清明。閑上吳船聽曉鶯。寫得春游新曲在。與誰約伴合吹笙。花案淒涼事已非。輕塵短夢淚霑衣。茶蘼風裏春蕪綠。一路紅襟掠地飛。王孫芳草滿迴溪。油壁香車到未齊。一桁水精簾半捲。宮黃淺額鬢雲低。傷春惜別最消魂。白苧吳衫浥酒痕。陌上花開人散後。殘紅滿徑掩重門。

王鳴韶

字夔律。號鶴溪。嘉定人。新陽縣諸生。有鶴谿臚稿。

蒲褐山房詩話。鶴溪為鳳階光祿之弟。光祿移寓吳趨。主盟壇坫。少年簸弄硯削者。爭走其門。而鶴溪屏迹練祁。閉門兩版。端拜維誦。獨抱遺經。蘇文忠公開文定。淳古澹泊。不求人知者。似也。殫精散體文。亦極得嘉定四先生矩矱。

題述庵先生三泖漁莊圖

遠山漏夕陽。幽泚涵碧水。數株不了樹。中隱茅亭子。地靜不逢人。葉脫飄紅紫。漁舟何處來。隱約滄浪似。

和孔鶴甄中秋宴集

露華清絕正中旬。朋舊過從駐畫輪。北海筵開邀月魄。小山花放起香塵。詩成漢上題襟集。酒近江南麴米春。勝事相逢更難得。坐間俱是素心人。

水村

春水灘頭鳧鴨眠。牽絲弱柳拂蒼烟。遙岑一抹清如洗。知是江南二月天。枳籬隱隱有人家。竹外疎枝未着花。覓得魚鱗黃篋舫。蕩開一帶荻萸芽。

諸廷槐

字殿掄。嘉定人。貢生。有嘯雪齋吟稿。

贈別林協君

丈夫不得志。別離易作惡。與君結綢繆。年甫逾總角。出處同鄉縣。嬉戲舞象勺。才稱士龍奇。齒是公明弱。詎知行路難。但識盍簪樂。子爲獨角麟。予豈凌秋鶚。不久轉瞬間。謂可翔寥廓。逸足偶被羈。俊翼還遭縛。一朝落仇網。奇禍偶然博。號彼駸駸龍。吠此狺狺狢。身幾落囹圄。魂或飛鼎鑊。何人思下石。已分填溝壑。跳身從東西。竊父走疆索。夜行墮坑塹。早宿棲叢籬。乞食命暫延。贖金人未贖。舉世無蘇雙。誰爲解囊橐。始知貨殖傳。遷也有爲作。仰首呼蒼天。淚下如珠落。省釋自明年。姓名始顯托。是時賤子身。不才同屈蠖。方罷友朋悲。旋遘死亡數。紙錢時時燒。麻衣歲歲著。三喪葬未曾。有生不死若。衰門乏期功。終凶到鼠雀。憂至能傷人。興來時躡屨。浪遊江湖間。居然成落魄。吳山旣迢遙。越山亦岵嶸。間從王烈遊。愛就陶潛酌。有時碎胡琴。那顧傍人愕。以茲自消遣。庶用慰落莫。側聞林先生。高寄城東郭。邴原聊躬耕。孫復仍開學。庶同介之推。奉母謝好爵。不羨龐德公。挈妻行採藥。形影一室中。圖史紛參錯。彈琴詠先王。六經皆註腳。食古咀神明。銜華鄙糟粕。發爲詩古文。洪鐘異竽籥。外間噉名客。不足資一噉。同心二三子。鄙人幸未卻。君無絕交書。予果遠游諾。築室練水湄。塊然守寂寞。惠然君如何。幸不鄙菲薄。寓園聊下帷。空齋遂司驛。獨憐小兒子。不足煩雕削。顧惟大雅材。傾心勝葵藿。況此同懷子。因君復羅絡。酬贈雜詩篇。議論少柄鑿。往往露肺肝。時時見諧謔。歇後笑鄭棨。護前思沈約。君時出一言。如以篔刮膜。奈何勝事衰。一別等飛籜。王郎叔華滇黔歸。已復走京洛。汪子細青數不偶。又入蓮花幕。回憶爾汝語。依稀夢猶昨。名士本無多。奈此相

思各。今君復分手。明歲兩飄泊。別時千言煩。意趣何綽綽。不念臭如蘭。翻然去似鶴。同心而離居。惴惴懼隕穫。相期保令名。毋爲任消鑠。

陶春館印譜歌爲汪大綉青作

六書久蕪小學廢。眞行草隸徒紛紛。相斯史籀不可作。金剪玉筯誰窮論。莽新變制及文字。秦章漢印如絲棼。陽冰轉注得天授。指斥叔重苦未醇。楚金兄弟掩羣雅。別裁僞體眞斷斷。宣和天子盛文物。敦卣鬲甗彝舟尊。款識亦足徵蚪篆。流傳不辨僞與眞。惜哉收羅富章印。著譜垂世初無聞。宋元諸人逞妍媚。王顏姜晁同等倫。天水王孫最後出。妙處獨溯周兼秦。同時好手有吾衍。垂金屈玉何紛綸。風流未沫及明代。絕藝獨數三橋文。歸蘇朱王各樹幟。檀園一老世共尊。本朝名家不可數。鶴田雲美雙嶙峋。其餘程沈并徐許。各各造詣咸空羣。年來好事頗中絕。金石著錄無其人。知君嗜好與俗異。鷗波海岳不足云。明窻淨几森羅列。銅斑玉血光璘璘。建饒之盜青田石。碑礪琥珀雙烏銀。其鈕橐瓦及亭索。辟邪獅子悉綜甄。周官璽節漢斗檢。大篆小篆形模分。千年土花蝕不盡。波磔鈎畫微帶皴。字奇形古猝未辨。以指劃肚空吟呻。印以硃砂紙用璽。不令過眼同烟雲。傳之奕世永寶惜。明誠永叔同千春。

汪 昭

初名景龍。字綉青。嘉定人。貢生。有陶春館吟稿。

蒲褐山房詩話。綉青少有詩名。在練川十二子之列。壯年從今大學士王公。燕于浙江學幕。予在陝西相從者三載。通金石。能八分。如臨潼張子祠堂記。及修長武縣學記。皆其所書。又選宋詩略。最爲精當。晚年窮經義。有齊魯韓三家詩義證。大戴禮註。今藏于家。尙未能鏤板以行。

渡圓泖

晨光散菰蘆。虛舟漾寒淥。九峯浮彎環。三泖疊輕縠。微風翛然來。明漪恣遐矚。芳杜淨可搴。渚禽時相逐。沿轉益清爽。空濛洗煩縟。孤懷發元感。一理滄江曲。迴思塵網中。形神祇踳跼。

劉生鐵簫行

鐵笛老仙不可見。鐵簫今見劉占亭。黝然深墨太古色。非關幽隱藏奧屏。夔襄般匠法原準。稜節宛截簞箕形。長餘二尺徑以寸。鏤鏤孔竇如明星。絳唇微齧半珪月。其下穿洞堪垂綫。鴻爐冶鍊黑金液。鎮以太乙搏模型。獨惜良工解擲擲。昆刀曾未鐫遺銘。諦審勿敢定時代。諒閱唐宋延千齡。不然摩挲鏽蝕處。兩掌何不霑微腥。重光赤奮若十月。朔日庚午纔舒冥。桐疎蕉萎風漸緊。霜華點點飄簷甍。試從笳中發天籟。蘇囉吡噲聲瓏玲。大氣貫注詎防裂。劃然沸帽輶雷霆。手容必恭頭容直。聯絲絡繹神清寧。孔雀白鶴疑下舞。寐者驚覺醉者醒。銀箏鐵撥那足數。銅琶鐵板齊爲停。紙莖玉石製亦雅。遜此鑛鐵追九靈。君畜寶琴雷氏斲。石絃碧絃尹與邢。平安小舫足鑑古。二友相對紅窻櫺。慚余有琴典已久。吹簫市上徒伶仃。劉生爾才如青萍。會當奏響登王廷。奚爲落落拓浮吳。舲翩翩襍被來西冷。夜深口吻吮宮徵。剛健流利寒

燈青自寫長歌押強韻。詞源挽壑輸滄溟。劉生劉生爾細聽。爲爾鑪錫磋新硯。鐵篴爲龍鐵簫鳳。飛騰五采雲霄翎。

秋夜林協君諸殿掄范凌蒼吳右稹錢學園王幼輿毛又萇枉集草堂分得秋字

明月滿南樓。高寒攬翠裘。論文多舊雨。把酒恰深秋。霜落丹楓冷。天空碧漢流。相將看突兀。吾道問滄洲。

秦淮泛月

涼露娟娟漲暮潮。芙蓉花老暗香消。蘭橈徐蕩秦淮水。秋月秋風送六朝。點點遙山影黛螺。樓臺近水月明多。青簾白舫垂楊外。猶按南朝玉樹歌。沈沈香霧浸窻紗。畫檻朱闌古渡斜。一片清溪嗚咽水。寒烟誰問故侯家。

林大中

字協君。嘉定人。諸生。有金庭山房稿。

蒲褐山房詩話。協君自負不羈。究心風雅。尋與某縣令不協。遂以他事累之。收捕甚急。協君不得已。竄至我鄉。邵秀才玘留之。經年。藏於複壁。久之。令以左遷去。幸而得免。然協君自此意興蕭索。詩才亦減矣。

烈士行

老驥羞伏櫪。烈士志難已。有聲錚錚唾壺缺。奮袖低昂坐中起。東方千騎居上頭。五馬歸來朱顏喜。秦箏

趙瑟翻新聲。絳唇玉貌歌喉清。蓬萊宮闕隔雲漢。對面不聞鸞鳳鳴。惜哉李廣愛士卒。數奇不侯空遠征。穿城蹋鞠棄梁肉。驃騎居然垂大名。卽今鄒枚多佳士。雪月梁園爭獻技。握中鉛刀快一割。自炫自媒良所恥。吳趨三月楊花新。楊花茫茫愁殺人。不如沽酒市中醉。追逐嵇阮忘主賓。亦欲相於竹林下。卻恐王戎非隱淪。余將去結成連鄰。彈琴東海烟春波。

同俞萬準范紫庭施冠三程茂來嚴序賢跋堂遊馬鞍山拜宋處士劉龍洲先生墓下

西鹿山前落照遲。回思風雨渡江時。空陳草莽孤臣疏。誰建中原大將旗。同甫功名應自許。放翁心事亦堪悲。一尊敬爲先生酌。共剔蒼苔讀舊碑。

張允武

字僖若。嘉定人。諸生。有海樵詩鈔。

蒲褐山房詩話。僖若詩才清俊。亦工駢體。居嘉定望仙橋。閉門謝客。同里數人外。無所往還。故其詩罕有知者。

古劍

空齋夜氣騰星躔。龍光飛上滄浪天。主人中藏太古鐵。瓜皮玉色寒蒼烟。模糊光喋犀兕血。青白氣竭蛟龍纏。純鈎湛盧不可見。月黑山深風雨旋。摩挲鐔鏗揚其華。淬若芙蓉出片片。千年赤堇裂霜脂。天精下瞰走妖螭。雷公砰訇身擊橐。天地亦爲相扶持。流水文鈺珠衽脊。指揮萬里雲沙白。風胡老死茨山涸。神

物升沈自今昔。簡衣手拂起高歌。嗚呼劍乎奈如何。曷不飛去平津路。蜿蜒百丈蟠洪波。曷不騰化闔閭。墓虎魁白日蹲岩阿。或爲繞指充褻佩。或幻香丸警細碎。十年不試徒爾爲。千里飛鳴氣猶在。風塵瀕洞豺狼驕。江湖偃蹇魚龍高。千金自向匣中老。置之不異儕鉛刀。我取華陰片土拭。千秋寂莫誰歐薛。莫輕憔悴馮公彈。頗快談諧莊叟說。魚紋剗缺世事平。精靈壯士雄心鳴。風雪聲寒海氣惡。空堂夜夜神鬼驚。劍乎劍乎慎自愛。爾勿菰蘆吐光怪。

拜先參政墓

青江江水日潺湲。華表欹斜石獸蹲。三世恩波封樹老。百年兵火斷碑存。爭傳仗義收中使。守盱江時曾以法繩中璫之議加橋稅者。終許陳情動至尊。明神宗末。屢蔬乞歸。終養。敬守一編明志在。著明志稿十二卷。異時具傳待龍門。

朱璿

字元圃。太倉人。貢生。有崇雅堂詩稿。

蒲褐山房詩話。元圃筆墨生涯。依人作活。見予於關中。出詩相示。蓋往來燕趙秦晉間所作。其先得詩法於許子遜沈敬亭二先生。故不作唐以後語。

虹梯關

平生愛探奇。曉出平順郭。村迴路忽峻。策馬上巖巖。一步一猙獰。俯視恐腳錯。轉輾達紅梯。剗削更險惡。拔萃列劍戟。撐空悻猿鶴。徑仄石四鬩。巨靈不能拓。一梯雲中標。兩梯天外削。千梯更萬梯。歷盡氣已弱。

自有天地來。此境誰探索。往聞青羊寇。當路恣剽掠。維關實雄壯。盤踞爲邱壑。潞澤鮮寧居。并門亦震愕。自非夏貴溪。誰能此清廓。勒銘以垂戒。後世宜鑒度。設險維王公。禍患慮間作。迄今際盛世。草野安耕鑿。無擾卽經猷。鎮靜乃良藥。寄言守土臣。安民禦不若。

抵家三首

出門三四年。及歸轉憂憊。沿途話平安。自慰實恍惚。入門見虛位。幼弟駭已卒。未及問棺殮。先自心膽裂。昔我爲飢驅。餅壘計實拙。奉母得母歡。賴汝慰我出。豈知一分手。竟作千載別。長號恐母傷。掩淚獨幽咽。登堂啟阿母。阿母驚欲奔。見兒捧兒面。欲泣且復吞。不悲弟長逝。反幸兒尙存。兒生亦何益。浪跡辭故村。三年太行山。一載春明門。菽水艱復缺。浪說供雞豚。反使門戶計。累母操持難。兒罪實種種。親心益諄諄。貧賤歸亦喜。久別知酸辛。傾囊沽斗酒。且將別緒陳。話長及亡弟。相對傷離魂。

中夜急叩門。開門晤諸弟。姪輩亦復來。知我歸故里。移燭認舊顏。各各大歡喜。相持候起居。惜我風塵裏。問我行路難。思親慣流涕。問我廣結交。奔競實所恥。秉性故迂拙。夤緣少絕技。問我囊橐中。一卷詩而已。天寒路逼仄。千里慚負米。問我歸何爲。所願潔滌滄。待兔且守株。焉得計生理。我謂諸弟姪。君子貞素履。

玉峰潘玉川以曹素功墨見遺作長歌答之

古來墨官誰最工。處晦獨擅燕山東。以文章顯專雄封。庭寬庭珪相承宗。下及兩谷名則同。近世獨稱曹

素功想當斲髓精陶鎔。真宰泣訴陰精通。黑夜遍踏黃山峰。斫斷十丈雲邊松。金火木水子母融。陰房日色慘不紅。絕壁掩靄凝烟濃。歸來玉杵三萬春。捕麋煮角當嚴冬。元霜鬱鬱浮天空。以一勺水試磨礪。龍香上達層霄穹。圭方璧圓信手籠。一時價市張金重。我生也晚不遇公。焉得玉玦方玲瓏。乘興一潑光熊熊。玉山佳人翰墨翁。愛我筆陣橫且縱。特惠一餅如黃琮。神珠的的貫其中。鱗爪刻露雙赤龍。犀文玉質蒼精銅。開緘急試當曲櫳。碧花騰躍金芙蓉。落紙但覺烟濛濛。嗟我平生愧雕蟲。句無天邊掛長弓。文陣邨得中權攻。得此整甲筆陣圖云。整甲墨也。助我筆上鋒。呼吸恍惚精神充。揮洒頓若飲澗虹。便當疾掃素絹圖。豈風不然圖作五岳真形容。不然寫作賈董鴻文鴻。光采照耀明光宮。傳之萬世垂無窮。

雪夜柬在衡宋瑞文瀾諸同人

諸子今何似。愁人夜不眠。病貧當歉歲。生計各殘年。燈黯風吹壁。鴉歸雪滿天。飛騰吾故興。吟斷地爐邊。

秦淮秋泛

酒酣重上木蘭橈。指點垂楊第幾橋。十里烟花浮夜月。半江燈火黯秋潮。多情最是盧家燕。感舊曾聽商女簫。一種消沈付行客。白雲何處問漁樵。

上黨懷古

八諫山頭夕照黃。長平秋色暮蒼蒼。謀多轉售千金間。勢去從占六國亡。星散碧燐依腐草。風嚴白骨走

邊霜新安廿萬同坑盡贏得秦人號虎狼

忠論堂堂斥董賢請登孔武與彭宣建平事勢危如卵司隸平生直似弦兩奏定應拚九死一官端許歷

三傳祇今行步工驄馬猶自歌聲徹道邊

柔盛東歸已合謀永垂分霸自相仇燒糧逕欲趨臺壁頓甲聲言下澤州纔出壺關枝葉盡便逢蘭汗子

孫休叩囊雖老猶稱智卻道中宮誤晉侯慕容垂不聽段后云爾欲使我為晉獻公乎終立寶滅于蘭汗

夾寨城邊感慨過三垂岡下舊橫戈錦囊負矢心元烈白鎧臨兵義更多生子當如李亞子優人忽愛敬

新磨匆匆末路真無謂魂魄猶應戀舞歌

蕭瑟風塵五代秋明宗愛塔誤英謀招來捺鉢三千騎淪入邊沙十六州空自忘恩通黠虜誰知負義更

封侯晉重貴擊契丹下敕榜曰專發大軍往平黠虜後降契丹封負義侯阿孫饒有橫磨劍不洗稱兒稱父羞

許兆桂

字香巖雲夢人貢生有夢雲樓詩鈔

次黃梅縣

知與家山近鄉音漸可通水仍前度綠花比昔年紅小艇春江外故人雲夢中到家堪計日恰趁棟花風

黃陵廟在黃陵山二妃葬處漢劉表建廟

南望蒼梧路渺然。黃陵宮殿草芊芊。湘流不盡春風怨。斑竹深藏暮雨烟。瑤瑟朱絃長寂寞。明璫翠羽自
嬋娟。紛紛帝子靈旗影。落日愁予北渚邊。

陳蘭莊珪以詩見贈次韻奉答

秋波短檝楚江來。晚市沽春一舉杯。人集金庭能愛客。山尋玉筍爲憐才。香霏黃菊成高會。影對青燈出
雅裁。交錯觥籌紛坐起。蒼顏早見醉翁頽。

琵琶亭感舊

江岸依依楊柳枝。黃蘆苦竹不勝悲。昔年游處渾如夢。況說青衫下淚時。

張夢喈

字鳳于。號玉壘。江南華亭人。貢生。有塔射園詩鈔。

蒲褐山房詩話。玉壘爲文敏公從弟。家門鼎盛。絕無進取之志。所居塔射園。係許臬使纘曾舊墅。因
近西林寺。浮圖故名。岩石參差。池水環其下。有晚榮柿。葉山房諸勝。玉壘掩關高枕。種竹澆花。讀書
樂道之餘。工于筮法。爾來易道荒蕪。吳中士大夫無通
于大衍者。今詰嗣晦堂傳之。亦好古者所當問業也。

班婕妤怨

愁絕窺簾月。驚來拂席風。歌聲傳別殿。秋色掩深宮。漏永殘燈外。情緘團扇中。回思辭輦日。恩寵有誰同。

自題塔射園

晚榮山房

晚來山更佳。斜陽入榮木。落落歲寒姿。蒼蒼媚幽獨。

遜亭

明月滿空山。迷濛香霧遠。思古咏梅人。亭閒坐忘返。

拜石軒

石丈形何癯。當軒聳而立。愧我非米顛。對之不敢揖。

塔影

珠輪裊微瀾。金碧層層現。向夜佛燈明。千花湧波面。

張夢鰲

字巨來。青浦人。梁子諸生。有乃吾廬稿。

憇指松菴東見性上人

閒居慘不樂。小舫尋精藍。九峰門列五。神鼉踞其南。上人字見性。皓月臨空潭。佛法信無多。芒屨遍須參。榻來喜禁足。一室屬珠龕。青蔬間白飯。咀嚼和烟嵐。躬耕三十畝。澤澤草載芟。顆粒出辛苦。味比醍醐甘。侍者今三人。少壯俱丁男。鐘魚雜耒耜。古佛開歡顏。維余幼多病。幽性便空巖。塵緣苦未了。無生話彌慚。

安得從師遊。梵菟親瞿曇。仍持居士律。卯飲憑朝酣。

雨後

雨過虛堂枕簟清。微風謾謾豆棚生。雲開忽逗斜陽影。高樹驚蟬又一聲。

王芳

字悅亭。江南華亭人。諸生。有存樸齋詩鈔。

夕佳樓

高樓坐超忽。面面皆青山。夕陽明一角。遠在空濛間。倚醉看孤鳥。隨雲去復還。

寄懷葉芳宣即用留別韻

憶返申江櫂。秋風又一時。寒江潮欲上。草閣雨如絲。采菊懷前度。開尊負後期。知君吟賞處。縹緲暮雲垂。

曹錫輔

字菽衣。上海人。諸生。給事中一士子。

寄子京二叔用李太白送友韻

迢遙萬里路。鄉國幾人行。忽憶經年別。無端浩嘆生。秋風巴子國。落日漢王城。念我應回首。吳雲一望平。

寄葉松亭明府

白雁渺天末。朔風吹客襟。每思高臥者。共此歲寒心。只采柴桑菊。曾鳴單父琴。日邊無一字。長悅嶺雲深。

張登晨

字鳴谷。上海人。諸生。有幼霞初稿。繡堂遺詩。

山塘雜詩

短簿祠前鶯亂啼。真娘墓上草萋萋。玉簫吹徹人何許。小擘蠻牋裏淚題。
晴絲罥絮納芳檐。初日微紅映綺奩。一剪香風吹宿夢。賣花聲起捲珠簾。
木蘭小舫擬輕鳧。雙槳凌波有小姑。醉向碧桃枝下過。滿身月影倩花扶。

邵炎

字珉高。號玉藻。青浦人。諸生。

和友人作

仙桂雙株畫閣陰。招邀曲宴意難禁。酒香月下開缸面。淚泫風前見蠟心。紫陌車回人緩緩。綠牕琴罷夜
愔愔。行雲行雨原俱夢。莫向牆東抱錦衾。

題石鐘山夜游圖

誰將遺跡問州鳩。石壁空嵌日夜浮。想見風高波浪響。一輪霜月萬峰秋。

陸文啓

字宇東。婁縣人。諸生。有琴谿詩鈔。

遊五松園

園林孰古今。興廢滋感慨。若非詰匠功。焉能互千載。吳中師子林。相傳自宋代。樹石世希有。游歷驚險怪。度地無五畝。奇峰具萬態。變幻狻猊狀。猙獰鬪雄邁。玲瓏九竅通。老米應下拜。一徑洞口開。躡足懼險隘。行行轉曠朗。忽忽迷所在。展轉往復回。迤邐靡有屆。同遊各取路。倏忽面相對。分明笑語通。咫尺分疆界。小憩聽松亭。名亭松風振清籟。斑駁古龍鱗。五株競偃蓋。靈根迸石罅。儼向黃山貸。得勢共昂霄。憑空儼結隊。目煢不暇接。足力甚矣憊。入山深又深。不離卷石外。始知造化工。終非人力逮。臺榭幾滄桑。林巒永不壞。千古倪迂圖。流傳入大內。今皇蒞東吳。徵圖降羽旆。峯壑舊規模。招提新藻績。我今躡屐來。欣然逐朋輩。見所未曾見。素心聊一快。扞詞略記勝。姑了筆墨債。妙境難具陳。安得茲遊再。

諸葛銅章歌

蕪湖人諸葛永年。名祚。能鑄銅章。煉銅煉鋼。皆自爲之。精其業已三世。外人莫之傳也。曷哉沈丈客蕪湖。識其人。命作三方。鑄余姓氏名號爲贈。作歌以紀之。

响嶼石鼓文渺茫。六書精義留符章。赤銅鑄出私印小。炎劉制度逾珪璋。千百年來磨滅盡。花乳石刻爭

輝煌阿誰嗜古能邁古。諸葛永年獨擅場。永年煉銅如煉石。溫爐密室搜精良。形模大小既就範。鐵筆出匣齊鋒鋌。秦碣漢碑供驅使。籀史秦相窮偏旁。興到偶然欣一試。蛟螭盤屈生光芒。鑄成雙印傳海內。見者驚歎心徬徨。鎔金削玉本閒事。凌躡古製難形相。永年三世神此技。祕竅止以傳諸郎。公卿購求不輕與。絕藝敢用金帛償。我從勗哉沈夫子。千里馳送勞承筐。入手把玩歎奇絕。撫摩再四喜欲狂。一心感激還自忖。區區姓氏何由彰。生平無分隨鐘鼎。那見城南燭火光。宋相朱勝非微時夜見城南火光燭地掘之得朱勝非私印銅章

陸文蔚

字藹卿。婁縣人。諸生。

讀嵇叔夜養生論感而賦之

嵇生龍鳳姿。遐情軼天半。有心避世羅。寄書絕仕宦。藥從山中採。竈乘柳下鍛。絲竹妙寄懷。琴尊足留戀。豎論論養生。引年良有願。豈知无妄災。未克先幾見。耿雉罹于罟。冥鴻遭飛彈。服餌縱有效。羅織安能遁。性潔乃禍媒。才高招物怨。千秋爲銜哀。如聞廣陵散。

哭碧螺周夫子

回首春風十載依。茅堂猶是枕漁磯。凋零前輩晨星少。慘澹諸生舊雨非。柳下風高誰定謚。蓮溪學在愧傳衣。惟將梅雨連天水。灑作淋漓淚滿幃。

何王模

字鐵山。青浦人。諸生。有萍香詩鈔。

過珠溪憶王述庵

三泖漁莊外。秋風動白蘋。著書人別久。問字客來頻。入洛馳名早。登樓作賦新。君恩方湛渥。谷水漫垂綸。

秋感集唐

曲闌愁絕每長憑。似證禪心入大乘。世事茫茫難自料。浮生擾擾竟何能。芙蓉葉上三更月。蘆荻花中一點燈。秋後見飛千里雁。流年無奈得人憎。

唐彦謙 張祐 韋應物 鄭谷
李昌符 白居易 劉方平 羅隱

春日晚坐

微風園竹搖。小雨階苔溼。開簾放燕歸。先有花飛入。

金鴻書

字寶函。青浦人。諸生。有清省堂詩稿。

夜宿玉清道院聞磬

涼露滴清秋。東軒月華上。志士樂幽棲。靈源自開朗。旋聞清磬度。隔竹一聲響。道以神理超。心緣孤寂賞。

顧視丹邱人。風姿覺秀爽。示我玉牒文。發我紫霞想。萬籟忽寂然。應知道機長。

新秋夜坐有懷

涼風蕩夕陰。輕烟忽消散。離離絳霄側。冉冉明星爛。美人在高樓。盈盈隔河漢。仰視不能卽。徘徊捲虛幔。道路日以遙。恩情日以斷。欲報雙明璫。愧乏青玉案。惆悵不成章。臨風起三嘆。

望亭

水驛通南北。江程列市廛。人來黃葉渡。亭紀赤烏年。行色秋風外。鄉心落日邊。浩歌胥口曲。竟夕送歸船。

朝天宮

丹梯雲氣接虛明。路入朝天儼碧城。劍佩聲移琳閣迴。爐烟香散石臺清。仙人花下翻金籙。羽客壇前奏玉笙。何日紫宮傳闕記。便從此地學長生。

有感

秦淮歸棹悵風烟。又是淒清乍冷天。樂府歌殘將進酒。霓裳夢斷小遊仙。明河有影飛秋雁。流水無聲響夜絃。苦念平江憔悴客。空勞日費大官錢。

寄王述庵方伯時將赴滇

滇蜀軍營壁壘齊。建牙吹角夜郎西。承恩方朔辭金馬。奉使王褒祀碧雞。水溢瀾滄春漲闊。雲連銅柱海

雲低征蠻舊日勳名在常使天南靖鼓聲

朱位行

字因在青浦人貢生

登御塔

竹筏乘潮去中流增影分遙汀涼浸月古刹暗藏雲嘯咏追仙令屠赤木任青時與諸名士泛舟三柳樓遲羨隱君有楊鐵崖

王陳棟

字象隆青浦人諸生

積雨初霽偕友人閒步即事

高閣依山岫晴雲遠若浮蟬聲林外噪蛙吹雨中收蕭散池塘路微茫烟樹秋同攜謝傅屐肯為晚鐘留

王陳梁

字次辰青浦人諸生

蘭亭集吟

為遇山林勝相於述禊修虛亭欣列坐曲水快清遊人與蘭同靜情隨竹盡幽騁懷殊未倦觴詠聽湍流

當春因寄興。人在惠風天。盛會當今日。清言猶昔年。臨文攬古迹。和詠集時賢。俯仰無悲慨。興懷每暢然。



湖海詩傳卷三十一

汪孟錫

字康古。秀水人。乾隆三十一年進士。官至吏部主事。有厚石齋集。

蒲褐山房詩話。康古曾祖晉賢先生。讀書好。友。建。樓。以。貯。圖。史。有。華。及。堂。以。延。賓。各。故。子。孫。皆。好。學。能。文。而。康。古。與。都。御。史。金。公。德。瑛。親。戚。得。其。指。教。者。多。又。與。萬。孝。廉。光。泰。王。西。曹。又。曾。錢。少。宗。伯。載。相。劇。切。大。抵。叢。書。神。說。考。核。精。詳。翹。然。自。異。於。衆。與。其。弟。仲。鈞。咸。以。詩。名。江。浙。仲。鈞。有。桐。石。草。堂。集。橫。空。排。奩。取。徑。略。與。康。古。同。因。先。卒。未。及。與。交。故。不。錄。康。古。又。通。內。典。乾。隆。癸。未。上。欲。刪。正。續。藏。經。諸。城。劉。文。正。公。屬。予。與。康。古。同。任。之。考。訂。去。取。俱。稱。上。旨。兼。精。術。數。自。謂。壽。命。不。過。五。旬。屆。時。而。卒。子。如。藻。如。洋。皆。從。予。問。業。如。藻。字。念。孫。乾。隆。乙。未。進。士。由。翰。林。官。至。德。州。糧。儲。道。無。詩。如。洋。詳。見。後。於。

題紹興十八年同年小錄

輓近後器識。文藝翻所專。文藝亦孟浪。十或八九然。徽公大君子。人爵修以天。題名拜黃甲。法慧寺看駢

肩。主文緊邊。知周。鰲。克。副。明。詔。宣。錄。前。有。十。七。年。偶。然。同。出。身。徽。公。第。五。甲。鵠。立。誰。與。賢。馳。驟。東。漢。軌。君。

言一何孱。臣從田閒來。祈君三代前。于時期集所。主管九人焉。主。管。題。名。小。錄。何。騰。何。欽。承。劉。安。世。程。千。里。田。興。宗。葉。謙。亨。柴。衛。韓。彥。直。張。宗。元。

意謂循故事。竟附青雲傳。竊聞貢舉議。四科遞分年。人才係風俗。私憂頗拳拳。如公其人與。鄒魯曠周旋。

千年羣玉鄉。公。本。貫。建。州。建。陽。縣。羣。玉。鄉。未覺風流湮。顧瞻數倫等。路絕無由緣。太息山陰人。獨居豪傑先。狀。元。王。山。佐。

陰縣人

題寶祐四年登科錄

廬陵有年少。兆夢騰紫雲。哀然集英殿。袍笏雄壓羣。當時俎豆想。榮豈稽古云。肝膽果鐵石。倡率勤王軍。殺身成仁義。用識文山文。遂及謝與陸。謝枋得陸秀夫俱是科進士綱常力肩分。理皇殿季宋。得賢曩未聞。我讀萬言

策。諒哉臣對君。不寧考官王應麟。賀特擢心殊慙。六百一人中。疇謝名利熏。九十六科後。自開寶八年始有省元狀元之別。至

是凡九十六科獨守忠愛勤。門謝紀已未。第二二年己未始策死知所欣。云何同枝樹。壁也憐蕕薰。壁亦是科進士給錢倍

昔典。舊有小錄錢是年以支用不敷。再給降一千七百貫文。治賦窺餘縑。本貫下有治賦字樣。往往綴細碎。益顯名芳芬。請作千佛禮。佐以梅

檀焚。

幻居葦觀華嚴墨海。華嚴經八十行願品一

中峰國師餘精靈。法雲下護華嚴經。食肉漱口此來視。紛綸抽帙緇流驚。法領所得法業譯。大方廣佛昭

千齡。道琳青鎮寶閣僧。豈有受持意。走乞五載莊嚴成。人八十二第三十六身。身八十。兩人合寫。斬新筆墨光流晶。云何

寶閣不能有。百年兵火歸禾興。名卿士夫不可悉。高僧善女都留名。逃名或不署姓氏。聲聞之外尤芳馨。

是人所書字畫一。如雨蕭散沙勻平。又如衆生壽者相。證性名自殊模形。傳聞華亭寫其一。巧偷不復留

禪局。補書之人信好事。所惜完善非前明。籤題一一辨草篆。寒山使筆能飛騰。莫誇金澱顏色異。何讓葉

紙收藏精。諸人寫經多妄語。有無功德疑相爭。經言非寓亦非實。此中妙諦高無層。不見有經何況字。任人饒舌翻縱橫。東郭學人勉事佛。廬居手繙書素綾。元忠萬字寫為父。我亦為母資往生。孫元忠為父寫華嚴經累萬字坡公跋其後。老僧作樓妥安置。善因勝果今方并。行須廣乞四大部。盡寫付汝充箱籙。

响嘯碑搨本二十韻

大禹敷文命。神謨繼有繆。九州荆漢畫。五嶽祝融攀。洛洞災方澹。蒸黎食既艱。刊碑先繆篆。授簡達夷蠻。詰屈成科斗。離披出草菅。象形愚目駭。叶韻聖經刪。青赤誰能見。丹鉛或未爛。歌賡咨益佐。吁咈訓苗頑。管說云亭禪。韓驚涕淚潛。天神呵護久。道士勒摹慳。鏡水流如故。滇雲割以還。蹄迹尋舊迹。苔蘚剝餘斑。宛委書同祕。黃能血惜殷。經如圖怪物。鼎卽鑄神姦。泗濱支祈鎖。螭頭太室顏。霧迷愁掩靄。字泐辨迴環。搨勝囊符佩。裝輪閱市鏹。範陳通物始。圭錫重人間。未許陽冰學。寧齊史籀頒。遙思聲教訖。萬古仰隨山。雪後聯句用昌黎雨中寄孟刑部幾道聯句韻

冬春乍遷嬾。里巷紛謁拜。萬光勞君着屐尋。助我割灰話。汪孟垂冰遞長簷。積玉隘空界。光稍稍初日暎。旋旋晚風噫。孟搖松白奮攣。落桂青破械。光餓犬聲欲沈。凍雀意自怪。孟氣和奪候慘。情密忘禮殺。光謂言久周旋。其奈遠行邁。孟將北上。時崎嶇首燕路。惆悵背江介。光把盞酒未魔。掃壁詩且疥。孟德荷金錫斐。志愧騏驥快。光鬚髮及未斑。羽翮肯受鍛。孟獨往思輓推。羣處切誥誡。光方當飲醇醪。庶令起沉瘵。孟

陽施動雲雷。潛化被草芥。光泰歲華與俱新。造物固不億。孟虛心開苑枯。大氣鼓成壤。光泰如火觀昭融。如川

沂。澎湃孟異色雜丹齡。衆聲合任昧。光泰古情醇乎醇。外論喝復喝。孟撫時力堪努。載重績恐敗。光泰京洛遲

再遊。蓬海讓先屆。孟牧無三百羊。釣想五十牯。光泰良壁文騰縑。利劍光溢蒯。孟山人衣結鶉。都女髮卷蠶。

光泰翱翔狃天門。兢業守聖戒。孟深情積繾綣。至味領咀噉。光泰相將壯其猷。大勝錫我玠。孟別憐冒塵土。歸

約。翦葱薤。光泰時哉貞吉升。行矣君子夫。孟

朱炎

字桐川。號笠亭。海鹽人。乾隆三十一年進士。官阜平知縣。有楓江瀛洲湖樓諸集。

蒲褐山房詩話笠亭一行作吏而著述之念未嘗一日忘好古多聞撰陶說六卷又抄明人詩十四卷餘皆未經剞劂其詩五言如秋先桐葉下涼在雨簾多山平依檻立水曲抱城流鐘晚沈荒寺潮平斷野紅七言如烟開遠岫雙鬢曉花濛晴波一鏡春遠水白蘋明月渡隔溪紅袖夕陽樓高閣夕陽殘醉後板橋流水獨吟時菰城水驛迴孤棹茆屋人烟又一村葉落似將鄉思墜螢飛偏共客心流置之宋元人集中亦為佳作

登山至茆菴小憩

海天本寥廓。連山蔽光景。遐心到層巔。力怯氣偏猛。纖徑出松梢。微茫若懸綆。突兀忽趁人。欹石壓我頂。曳杖足先踣。驚魂目難逞。仰干苦偈仄。回盼忽修整。山阿結僧廬。簷戶負崇嶺。其旁紛坡陀。其下快清迥。亂山望的的原因橫町町。俯瞰籬落間。春茶傍石井。呼僧汲山泉。小住試新茗。落花共鳥墮。歸雲上衣冷。

坐聽鐘磬音。團蒲發深省。

下山憩嶺半坐石壁下

性愜不知疲。歸途更延趣。石骨忽開張。流連未能去。削若斧開鑿。怪似獸蹲踞。漬雨細點苔。崩雲亂倚樹。離立面向背。支柱體交互。殊形紛羅列。詭態變已屢。更復踐仄徑。騎危目遙注。坐久日蔽虧。心遠鳥軒翥。樵歌下清風。遊子澹忘慮。彼美山水姿。茲遊悵岐路。謂軒謂磊會當望東南。蒼茫指煙霧。

至韜光觀金蓮池登絕頂望遠

攀林出叢篠。耳目忽露爽。傳聞長慶僧。卓錫得方丈。寒泉滴金蓮。已足滌凡想。爲誦謫仙詩。懷古轉神往。取徑越巖嶸。憑高闢壇壝。大海遠不波。羣山共俯仰。下矚吳越區。歷歷紋數掌。空煙蕩溟濛。虛室迴疎朗。丹竈翳榛蕪。石筍立林莽。安得招僮倅。飄飄去塵鞅。

下山紅葉夾路支竹穿林至玉泉觀魚

登陟興未闌。白日欲西去。山光半明滅。斑駁見紅樹。竟欲回陽春。豈必歎遲暮。徑迂延賞多。足倦支筇助。餘情眷漣漪。縈紆愜幽趣。望望未入門。流泉已交注。側步睇微波。潑刺翻紅素。裴徊坐軒楹。翠色襲衣履。晚景怡人心。吟情起行路。歸來逸思橫。雲林屢回顧。

讀表忠觀碑歌

表忠之觀錢王祠。趙公奏疏蘇公碑。匪私於錢忠以勸。筆力透紙蟠蛟螭。至今往蹟半零落。賴此激發行。人悲吾來碑下剡。蘇讀俯仰形勝增嗟唏。金陵錢塘兩都會。東南財賦稱不訾。真人乘運宰天下。南唐逆命遭創夷。忠懿去國等傳舍。歸土不必勞王師。錢塘遺民數十萬。湖山依舊紛遊嬉。玉帛子女久相保。康王南渡猶堪支。勒勳應得鑄鐘鼎。此碑良足千秋垂。廬陵作史論十國。胡乃於此多微辭。吁嗟八姓代五易。中原塗炭無窮期。黥髡盜販乘間起。四方豪傑分邊陲。閩陞荆蹙蜀漢險。紛紜蟻子爭雄雌。堂堂勳爵出吳越。擊郢功始乾符時。破劉誅董樹奇績。功成受賞王爵宜。歸鄉慷慨歌民俗。牛斗無孛人無欺。勤修職貢可安堵。何愛象犀水貝璣。剽剝豈不犯衆怒。保俶奚爲民思之。可知忠孝世所守。元氣能入人肝脾。爾時九國皆僭亂。以較吳越似者誰。熙寧往事忽千載。龍山回首觀已隳。歸然此祠又誰作。靈風颯爽懷鬢眉。荒碑風雨幾秋徙。日銷月鑠還扶持。感歎今昔淚雙墮。摩挲不惜手生胝。

對月待友人不至

松際月初上。山中人未歸。鐘聲何處起。煙樹望中微。瘦影移筇竹。寒光照客衣。此時可乘興。未得掩雙扉。

西湖雜詩

樓外湖光一鏡如。憑闌隔柳看叉魚。山廚亭午炊煙直。正是銀刀出水初。楊公隄畔水田圍。烏柏陰中布穀飛。若得一犁兼一犢。箇儂於此澹忘歸。

九里松陰山徑開。琮瑋溜玉樹邊來。聽泉一路過三竺。又值雲林放梵回。采茶歌絕采蓮歌。扇月衣風瑟瑟波。試罷旗槍閒倚檻。夜來香在水亭多。

金兆燕

字鐘越。號棕亭。全椒人。乾隆三十一年進士。官國子監博士。有棕亭詩鈔。

蒲褐山房詩話。棕亭遊黃山諸作。奇崛可喜。常過吳門。訪余不值。寄詩云。山塘碧漲水初肥。柳下停舟一歎扉。臥榻不離裁竹徑。行窩祇傍釣魚磯。半簾疎雨客何處。滿地落花春欲歸。莫歎維摩頻示疾。天涯人亦減腰圍。又工院本。在揚州作旗亭畫壁記。盧雅雨運使刻之。生平不耐靜坐。愛跳躍。多言笑。故時人目爲喜鵲。

文殊院

登山不問途。容足便舉趾。雲肆垂仙毳。霞窟疊幻綺。滑捫蛟室腥。險攀雀巢庫。企空隔仙凡。移步判生死。從僕勉後隨。導僧屢前俟。穿透天一線。漸覩海千里。蹒跚入小菴。枯衲方隱几。炷竈蒸白蔬。石鼎煮赤米。休足得展目。杉根頻徙倚。奇石擲元熊。怪松鬪蒼兕。佳境知漸入。未敢言觀止。不待曉鐘鳴。牀頭覓棕履。

慈光寺

雲裏來鐘聲。不知寺何處。但見狢猿羣。紛紛入竹去。深澗架獨木。俛仰絕所據。路轉境乍闕。紺宇互騫翥。峭壁作繚垣。陰森舛昏曙。遙筧十餘里。清泉不假濾。古佛參四面。塵緣滌萬慮。秋旻月正高。山氣寒相助。日晞獨蒙絺。夜闌謀擁絮。詰朝更探奇。濟勝具當豫。藤杖選枯根。芒鞋剔殘淤。燈下強老僧。由郵細條疏。

鍊丹臺

我生困塵濁。偃蹇蟪蛄窟。欲乞餐霞方。那無入星骨。履險捩微軀。探異陟碑兀。筇杖荷芝簦。不敢畏顛蹶。軒皇乘龍後。僊境多荒忽。崑然鍊丹臺。萬古高嶠嶧。鼎銚偃空山。龍虎氣未歇。孰調文武火。嬰姪燄騰勃。山腰百步梯。一步一艱危。後肩續前踵。上履躡下髮。銜尾似渴鼠。帖腹若飢蝮。踞膝憩崇岡。齋心通冥謁。白雲爾飛來。吾將排金闕。

舟過樵李

枉渚由拳北。寒雲上杳冥。酒傾銀鑿落。歌愛玉瓏玲。磨劍千年石。落帆何處亭。鴛鴦湖畔月。今夜照孤舲。

寄懷吳岑華先生

西風木落萬山秋。倦客懷人獨倚樓。月到古牆聞蟋蟀。夢回空館聽鷓鴣。定知舊徑懷羊仲。誰向新豐識馬周。江水冬春如皎鏡。何時搖艇一來遊。貝葉金經小閣中。知君權實悟皆空。香爐鵲尾安髻几。文竹魚須冷畫蘂。自放形骸友麋鹿。閒看得失鬧鷄蟲。三塗八難消除盡。底事還留綺語工。

秋日過歙西鄭氏書樓偕吳二猷芍小步近山同訪吳大松原歸飲月下三十韻

千峯曙色曉蒼蒼。極目西風客思長。藻井蕭晨辭燕婢。綺塍豐歲咒鴉娘。偶經古鎮知巖邑。爲訪幽齋過

野塘小閣高懸徐孺榻。寒流斜抱鄭公鄉。疎籬六枳開花徑。曲岸雙扉轉畫廊。旖旎青帘沽酒市。弼環絳帳讀書堂。高名自昔原齊富。奇字如今只問揚。上足人皆夢秋駕。垂髫女亦誦靈光。垣衣雨後侵琴薦。壁帶塵中冷劍囊。璃匣米山鳩細溜。牙籤鄴架鼈牢裝。一編別集名乾牋。幾闕新詞號弁陽。露澣薔薇纔擷秀。霞明楓櫺更尋芳。橋橫略約明紋縠。鐘吼蒲牢出寶坊。擁展乾沙枯湖澀。胷衣弱蔓古藤僵。鶴巢晚隱深林赤。鹿柴晴堆落葉黃。雲遏歌臺鳴響玉。苔封恨冢弔幽香。百弓地復開佳境。半刺綾旋謁阿荒。戶對奇松青倚蓋。堂迎修竹綠排槍。櫺頭船小牕前過。洗手花粗砌畔昂。鐵榦丁丁聞啄木。金鈴楚楚見治牆。翠屏如畫橫高巘。緗裘連雲壓古牀。據案書癡應似竇。揮毫草聖詎輸張。山分點允真堪羨。津躍機雲不可常。險磴迴尋朝徑仄。虛簾早見夜燈煌。論文座上冥心會。射覆筵前蓄意藏。紅燭刻時詩虎捷。白波卷處酒龍狂。何須倚檻悲王粲。且自欵巾問葛疆。蛩語驚心喧四壁。虬壺瀝耳報三商。國香忽入林蘭隊。經袖真趨帶草旁。雙眼矚矚濃醉後。一輪寒月滿樓霜。

謝垣

字東君。嘉善人。乾隆三十一年進士。官刑部主事。有壺領山房前後詩集。

蒲褐山房詩話。東君家住楓溪。是水雲深處。性情蕭曠。雅尚清幽。能畫尤善琴。跡涉軟紅。志同物外。與其弟崑城少宰。比屋而居。一則丹轂盈門。一則青苔滿院。披其帷其人斯在。識者有殷韓之別焉。詩近韓冬郎。錄其佳者以見一斑。

秋夜

成飲難耽寐。易吟易得愁。月明窗誤曙。霜冷被知秋。紅葉吳僧寺。黃花楚客舟。幾時幽賞遂。慚愧海邊鷗。

七夕前一日

初鳴蟋蟀早秋涼。團扇還憐夜未央。解恨欲傾千日酒。招歡聊爇五雲香。柳因腰瘦難舒眼。藕爲心虛易斷腸。聞道來宵牛女會。起看銀漢露霑裳。

嘉禾寓中聞秋蟲

何處瓜畦絡緯聲。虛堂欹枕正三更。旅人本少思鄉夢。都被秋蟲暗織成。

沈世煒

字吉甫。號南雷。仁和人。廷芳子。乾隆三十一年進士。官至禮部郎中。有澹俱齋詩集。

再過郎岱恭朗軒司馬招飲夢魚亭卽席率賦

薇省相親憶昔年。重教兩度續前緣。茅亭小築依苔徑。山雨初來響石泉。萬里征塵銅鼓外。一尊鄉思鏡湖邊。多君念舊情彌切。欲別重留意悵然。

孫志祖

字詒穀。仁和人。乾隆三十一年進士。官至監察御史。有頤谷吟稿。

蒲褐山房詩話。誥毅性情瀟灑。清修自好。由西曹而擢監垣。即以病歸湖上。中年後留心經籍。作家語。疏證六卷。蓋王肅假此以難鄭君。詒毅條分縷晰。解其癥結。有功于鄭學者甚大。其外如文選理學。權輿補一卷。攷異四卷。李注補正四卷。刻於桐鄉。顧氏讀畫樓叢書中。皆見詳核。子同元能傳家學。

寄懷詠駿弟客湖南

別緒思無端。難忘送行日。風颺知袂寒。雨灑庫篷密。男兒羨壯遊。輕裝遽遠出。我歸夜已闌。秉燭恍有失。卻憶對牀時。聲聲聽蕭瑟。長安名利場。迫我離親側。獻策笑別庭。讀書慚面壁。落托意何如。倏然歸故室。渡江得家書。字細紙纔一。誰知脊令飛。翻作鴻雁別。過廣陵。知昆園兄已至粵東。念我出游初。年纔十六七。壬申進京時。余年十六。汝今年略似。頗亦愛詩筆。洞庭亘綿緲。騷人代著述。橘柚垂秋深。烟波澹木末。嗟子行役者。彈指光陰疾。為詠三陟章。安能久鬱鬱。

落葉

秋霜一夜衆林萎。葉落成堆未掃時。流水年華人易感。辭柯消息鳥先知。小園竹徑風聲寂。遠樹柴門日影移。莫道婆婆生意盡。憑闌點筆好題詩。

彭禮

榜姓吳。字行之。鎮洋人。乾隆三十一年進士。官寧武知縣。有北窻吟藁。

宿榔梅菴

片玉樓頭拄杖輕。襟情瀟洒俗塵清。直將海氣疑雲氣。祇有泉聲雜雨聲。清磬遠傳齋醮肅。翠嵐遙接篆煙平。雕甍卸砌仙階近。閒繞朱欄獨自行。

次韻陳玉臺侍御京邸見贈之作

一從捧檄出京華。獨向三邊坐吏衙。無復春明敦舊雨。厭看秋塞溷寒沙。漫勞雛鳳新章好。

來詩尾句云。喜聽清聲在

雲路。丹山雛鳳啄桐花。蓋爲次男兆神作也。最憶元龍逸興賒。但得郵籤時遠遞。絕勝隴上寄梅花。

行縣至黃松洞

碧峯陡立勢巖岈。仄徑崎嶇屐齒艱。深澗有果容易沁。洞門無路孰爲攀。沙盤鵬翮遙遙認。樹作龍鱗面面環。一事差羸樂天叟。不須偷出事遊山。

齊雲山天門

境入仙源勢屈蟠。碧雲深處任登攀。神靈不阻修真路。閭闔先開第一關。

香爐峯

絕磴高陵碧澗空。孤撐石鼎篆雲濃。人間香火應嫌褻。縹緲憑虛峙一峯。

徐以坤

字含章。號穀菴。德清人。乾隆三十三年舉人。官國子監博士。四庫館書成。議叙以主事用。

蒲褐山房詩話。穀菴爲觀察以泰之弟。好學能詩。與錢澤石查藥師友善。所作亦如之。而中年病痿。不能出庭戶。雖入京師爲校勘官。盤桓一室。四面皆護以重幃。日中往往燒燭檢書。好延賓客。予常入其臥內。又使其子受業。且命之歸浙。江獻賦。明年子暴卒。穀菴病已劇。遂請假歸。未幾亦歿。詩文俱軼。

九日

怕說題餼節。愁多病日侵。帶圍看又減。藥裏嬾重尋。寥廓悲秋氣。粗豪伏櫪吟。茱萸休細把。逆旅任光陰。

戲爲絕句

蕪城春雨柳穆穆。司理年時酒榼擔。明月二分橋廿四。好春天付與江南。秀州一老腹便便。博物研經取次專。詩史一朝公論在。獨嗤蒙叟愛松圓。

陸敬

字默齋。吳縣人。乾隆三十三年舉人。官內閣中書。

普門焰口行

老僧登壇作胡語。普度十方霑法雨。林深月黑風颼颼。恍惚靈來嘯儔侶。空中陣陣飢鳶呼。臺上梵唄聲模糊。願將調御慈悲力。先使人間少餓夫。

獨遊武林雨中至舊館

荷笠重尋勝。茲遊信不羣。人如曾識燕。山有未歸雲。隔岸雙峯隱。衝烟一艇分。臨風懷舊侶。話雨燕鑪薰。

陳初哲

字在初。號永齋。元和人。乾隆三十四年殿試第一人及第。官至荆宜施道。

張桐村屬題垂釣圖

穿林坐石面晴湖。分得閑身六逸圖。掉首好從巢父去。一竿東海拂珊瑚。
斜風細雨入吟毫。漁父詞成托興高。我欲煙波最深處。也投香餌釣連鰲。

陳嗣龍

字春淑。平湖人。乾隆三十四年殿試第三人及第。今官副都御史。

遂平館舍和褚筠心前輩韻

幾日看紅葉。重來蔭綠天。霜華憑點綴。樹影得清圓。讀畫雲生壁。敲詩硯滴泉。僕人貪偃臥。那解愛便妍。
旅迹原泥爪。翛然客思增。林深遲夜漏。風細颭秋燈。小憩何嫌久。迴闌取次憑。皇華期報命。信宿敢云能。

任大椿

字幼植。一字芝田。興化人。乾隆三十四年進士。官至監察御史。

蒲褐山房詩話。幼植少以詞賦知名。所擬古樂府劇。為錢文端公所賞。既而覃精經術。尤熟於爾雅。說文廣雅諸書。嘗撰呂忱字林攷逸八卷。又刻釋繪九經三傳沿革例諸書。同時有沈君振基。亦通六書。官宗人府主事。不攜妻孥。寄居僧寺。敝車一輛。儼以入署。歸則杜門謝客。忍飢誦經。清苦之況。人所不堪。時論高之。與予交善。因無詩可錄。附見於此。

惟泰元

峩峩壽宮。聿祀太元。神光下流。紫烟氤氳。太元胚胎。遑探其垠。軋坤之軸。闢乾之門。二五騰逐。掣於天根。潢漢之委。下交崑崙。岳瀆異脈。乃一其原。天喬鱗羽。肖於不言。炎邱燭龍。南且北昏。人性習合。如居一垣。杳不可測。其道至尊。爰薦清醑。奠以璵璠。龍文金景。鼎爨是敦。冥羊神臬。列陳帝閭。靈來裔裔。龍旌載翻。綏皇景福。總齊四藩。

天門開

天門開。光煜爚。流紫壇。輝日壑。仰帝閭。橫斗杓。珠熒黃。相璀璨。皇駟騫騰。格澤回薄。歷次十二。畢會其絡。拂鈎陳。九旂翻。游極下。闢端門。圓靈躍乎金穴。羲曜起於天根。火齊爲堦。玉砌垣。中有銀潢。貫其藩。乘雲輶。駕鸞輶。裔裔誷誷。往若疑。神光滂蔚。臚所知。如歷中垣。卽靈威。金薄華蟲。擢鈴綏。丹書綠字。天語奇。用褒姬德。錫乾儀。聿撫九有。萬億期。

赤蛟

赤蛟綏。青芝蓋。夜未央。炳蕭艾。神欲來。零露沛。風爲軒。雲爲旆。萬祇位。肅瑤堂。雲母屏。明月璫。錯珠網。爛生光。列干羽。夾絲簧。麟以脂。龍以膾。席火齊。管文具。鬱金合。氣氤氳。精奕奕。來無門。九蘊燎。金支翻。祝致詞。神惠之。

朱鷺

朱鷺矯以翼。來翔廟廷。赤星斑斑。角彩騰精。延頸而起。思太清。不思都宮闕。室洞洞冥冥。犧象雲雷羅縷。宣幽靈登歌。兩兩各抗纛與旌。紫綃霞駸。金支參橫。七音粥粥。經緯生。不依軒墀。遑遐征。朱鷺矯以翼。將游倉浪之天。摩華星。潢漢十二樓。但見鈎陳熠爚。爲藩屏。殺翮下墜。引足上騰。欲薄中黃。決眚一鳴。天門呀然。翩何不來下。天子聖哲。靡不率庭。靈雀之集。難強名。羞何炳炳。揚朱明。雲罕以罹。繼以縈。獻閭闔。炳赤瓊。億萬世。歌由庚。

烟雨樓

漾舟及平湖。竹樹引佳興。渚近棹漸遲。沙平纜初定。拂衣緣木杪。躡屐臨丹磴。疎雨寺門來。春寒在羅逕。松房僧語稀。餘情入清磬。移時促歸帆。雲水易成暝。近郭煙穗斜。穀穀寒鴉應。

徐秋涓邀留王雨亭先生松下清齋話別卽景贈懷一首

躡屐渡溪橋。弭柁及村渚。墟中寒色來。窅然入幽戶。君指平流餘。小閣促延佇。上堂款主人。云客曲江浦。款我具羹糜。君意何縷縷。話別難爲情。不願竟其緒。下階散清襟。風泉乍迴互。柏竹色無多。厥性此中取。燭剪夜窗明。妙契一相語。

至了義寺

過塢指疎林。到寺停雙楫。風吹烟穗斜。入戶氣蕭屑。境僻罕來蹤。日落見殘雪。隔竹聞歸僧。相遇無言說。發秣陵

餘事畢羈況。早行猶及餐。放船歸思減。久客別人難。去雁宜平水。微霜生薄寒。不知昏靄裏。已過幾峯巒。延陵道中

又乘白舫向天涯。路入延陵極望賒。盡日吟情連鴈鷺。一秋風色在蒹葭。閑梳短髮清霜見。忽脫征帆落日斜。尚有鄉園數弓地。種麻殊羨野人家。

舟次吳閶懷薛香聞

闔閭城近蓼花疎。幾曲橋通水竹居。作客每隨歸雁後。停橈正及晚餐餘。人行紅樹村中雨。潮落青山郭外魚。咫尺尙緘天末怨。秋船漂泊一裁書。

宿瓜洲

小歇扁舟柳外罾。松谿渺渺出疎燈。三更月落瓜洲渡。行盡青山見秣陵。

陳朗

字秦暉。平湖人。乾隆三十四年進士。官至撫州知府。有青柯館詩集。

蒲褐山房詩話。秦暉以乾隆己卯浙江鄉試領解。癸未會試。卷在予房。西書文典雅肅。括薦時總裁。皆謂可元。而秦文恭公以論有小誤。擢之。既揭曉。始知其名。悔已無及矣。蓋己卯浙江主試。卽公子。

秦鈞編修也。後以己丑成進士。改刑曹。兼長案牘。劉文正公筦部。深相倚重。而君性沉默。且嗜酒。不善于同事。至上官相待亦疎。久之循例出為太守。非其志也。年近五十而卒。嘗有句云。塵緣良已了。幻相此何論。又云。養生託莊老。齊物任彭殤。則其於去來間。故已視如露電。

石帆山用謝康樂遊赤石進帆海韻

到海地形盡。山勢殊未歇。突兀見石帆。遠與波出沒。孤頂凌四垠。遠鳥渺一髮。轟轟背濤翻。鱗鱗颶風發。陰火燃秋霖。陽冰結炎月。時見樵牧人。挂席來百越。嵌空絕壁下。想像白龍闕。盤渦激雲根。落日意超忽。回首長墻山。丁丁樵斧伐。

題蘭泉先生三泖漁莊圖四首

聞道漁莊好。高居三泖間。門前滬瀆水。屋角細林山。塔影中流直。鷗思別浦閒。京華清夢遠。畫裏認柴關。雲水連天闊。烟羅隔岸遙。夜潮移滬葉。晴日養魚苗。草偃鷓鴣舍。花藏略約橋。此中多樂事。可以酌霜匏。處處山臨水。家家耕復漁。人披青襪襖。船掛綠脍疎。返照宜修網。澄潭好射魚。春申浦畔路。絕勝五湖居。三江古澤國。風物最宜人。名貴朱衣鮒。松江有朱衣鮒。見陸魯望詩註。羹傳紫線蕪。鄉園饒野思。毫素見清真。欲挂帆竿去。相隨理釣綸。

楚江返棹

雨止月未上。蕭蕭楓葉丹。柁聲放溜急。帆影入雲寒。村酒難成醉。旅愁耐可寬。扣舷何處客。漁火在前灘。

紅襟新燕已誦誦。陌上天桃開兩三。買得越溪絲半幅。唾絨寫出小江南。

伊朝棟

字□□。號雲林。寧化人。乾隆三十四年進士。官至光祿寺卿。有武彝山人詩集。

讀史

走利世如鶩。君子貴潔己。結駟雖英賢。桑樞亦志士。歲時缺伏臘。醴金謝閭里。貧士加孤雲。無依亦自喜。何勞太史公。而今爲慚恥。

秦令紛牛毛。無救嬴氏亡。漢網漏吞舟。約法止三章。文景持寬大。本好老與黃。清淨民寧一。曠蕩仁風翔。建元元朔來。酷吏嚴風霜。騶虞已失職。蒼鷹斯擅長。法律持事君。豈能致虞唐。首鼠與轅駒。結舌氣不揚。卓哉汲長孺。伉厲排張湯。

西京兩太傅。千春令人傷。賈生天下才。絳灌指爲狂。雖蒙宣室召。再黜乃進梁。董公經術醇。漢儒誰頡頏。一出傅江都。終老事驕王。英俊沈外僚。轆軻淚霑裳。顧彼寒泉井。心惻徒徬徨。志士苦獨清。貪夫苦多欲。鄭相戒焚身。宋卿善辭玉。下田分寢邱。孫叔願已足。鮒也誠何心。帶輒徵穆叔。谿壑豈易滿。其亡如轉燭。渴不飲盜泉。熱不息惡木。玉壺貯片心。濁泥詎能辱。

秋日登永定縣北樓三首

信美非吾土。登樓感易生。寒烟通遠渚。落葉滿孤城。淒緊潘生興。遲迴庾信情。羈人元有淚。不為聽猿聲。
 何限依人意。登臨一惘然。偶尋黃葉寺。已近白榆天。屐齒浮雲上。鄉心夕照前。楓林霜滿眼。坐想寄吳綿。
 已負黃花約。西風觸忤深。猶違元亮井。祇攬仲宣襟。鼓角寒城壯。川原暮景沈。欲回仍小立。蒼茫去獨長吟。

潘奕雋

字守愚。號榕皋。吳縣人。乾隆三十四年進士。官戶部主事。有三松堂集。

蒲褐山房詩話。榕皋家門鼎盛。科第聯綿。通籍後。即膺館職。兼奉皇華。而連辭簪黻。歸臥山林。鄉閭重以黑頭。士類藉其青眼。琴樽翫履。望影趨風。僉以為洛社之耆英。玉山之佳會也。年甫六十。卜勝地于綠畝。山林泉窾。奇生壑附之。其標格尤不減司空表聖矣。詩溫厚和平。而清遠閒放之致。自在餘句。五言如青帘烟外舫。紅樹畫中山。風將殘磬遠。鳥與暮雲歸。潤聲疑過雨。嵐影欲沈烟。涼波沈鳥影。高樹落蟬聲。花影移吟几。湖光上客衣。七年如移來。密竹篩蟾影。種得甘蕉送雨聲。舊遊殘夢尋無緒。同輩晨星看漸希。秋士風情宜對菊。老年世味賸銜杯。新置屏幃青園座。舊種簷蕉綠上衣。香浮古鼎。閒臨帖。花倚晴窗。伴校書。過雨紅蓮纔破。萼衝烟白鷺。自分行。古寺烟消。梅放萼。小橋水暖。柳抽芽。簾前巒翠。疑排闥。檻外湖光欲上樓。皆令人攬擷無盡。

壬戌二月廿八日同曹恂愚李補樵遊寧邦鵲酌鳴珠泉逾中茅峯憩茅篷遂遊拈花寺上竹竿

嶺歸宿上真觀

遊山獲同志。飯罷攜枯籐。仄徑尋舊題。捫蘿憶吾曾。庚戌秋日同芝巖祇林面修竹。院靜疑無僧。溯昔遺

榮人於此避弋矰。隨行老兵去。逸事今誰徵。相傳宋韓蘄王隱此山山腰探泉脈。峭壁青峻嶒。鳴珠手可掬。石磴三

人憑。一酌百慮釋。再酌塵心澀。

寧邦茅峯左。茅篷茅峯右。峯隴開寺門。諸峯獻羣秀。我來當仲春。晴翠落襟袖。寺僧八十餘。以靜獲老壽。

飢掘山筍燒。渴汲山泉漱。為言靜中味。可會不可授。嗟哉塵世客。自愛實自寇。吾亦未離塵。將衰悟計謬。

鍾吾本僧廬。今為羽士宅。拈花占山麓。依然古香積。門前澗水清。門內峯巒碧。庭陰喬柯列。下有舊行蹟。

僧雛供伊蒲。一飽聊岸幘。齒增雪盈顛。歲逝駒過隙。回思十二年。汨汨竟何獲。默愧耽幽人。長年憩泉石。

余不到山十二年矣。

斜陽忽西下。林外嵐光沈。拄策尋歸途。竹竿路嶽崙。徑轉睇雲間。遙傳笙磬音。層波太湖白。重岫靈巖陰。

意適興有餘。茲游愜素心。道契性不隔。味澹情彌深。蕭蕭松風中。孤燈照幽襟。題詩待補圖。並以諧玉琴。

補樵善畫其侶能琴故云。

立崖司馬於戊戌歲假歸吳門寫行看子題曰天遠歸雲繼之任楚中旋有輪臺之行逮丁未歲

歸里而是圖已失令弟賓嶠購之市中立崖重裝屬題

蔣侯持圖索我題。滃滃白雲起尺幅。云是良工為寫真。驚心光景奔輪速。憶昔人歸畫錦堂。扶簷碧樹新

於沐。逸興蕭疎寄暇晨。英姿颯爽流遐矚。溪藤散彩頰添毫。棐几湘簾幽賞足。紅塵滾滾歲堂堂。過眼雲

烟寧省錄。飄零流轉幾經春。收戾何人祕深櫝。阿連購贈意良厚。紙色淨如手未觸。當時寫圖亦偶耳。誰料先幾若預卜。天遠曾穿塞北烟。雲歸仍戀吳山麓。敕勒川邊秋草黃。晴川閣下江波綠。船唇馬脊夢模糊。蒼狗白衣紛滿目。人生行止或使尼。得喪悲愉互倚伏。君今七十正康強。白日看雲臥繡谷。晴窗故物重摩挲。何異楚月與鄭鹿。題詩作記憶前塵。失馬塞翁真是福。因君我亦念行藏。輪蹄半世空馳逐。老矣身同退院僧。童焉心似新生犢。閒雲一片許相依。二老風流庶可續。試問爲霖天畔飛。何如含雨巖前宿。

洽園石筍歌爲范芝巖作

洽園佳日吾頻過。高下犖确窮烟蘿。園中奇石森成列。形其堂密岡厂阿。今來方亭復小憩。亭北忽轟雙髻螺。籬根新筍初解籜。訝此甲坼青嵯峨。主人爲言此石古。人世閱劫如觀河。宮詹勿齋雅尙愛林壑。太守雲投老遺簪綯。當時名園寄清暇。先後石畔來婆娑。風前坐品幾嘆賞。月下醉倚頻摩挲。百年人事轉頭換。兩番興廢真刹那。奇章不作米顛老。委此異質僵烟莎。園丁竈養豈知惜。荒榛枯蔓紛成窠。昨朝移致爲拂拭。故知有美難埋磨。剗沙剔蘚位置妥。瘦骨漱水寒生波。含風清韻鏗可扣。溜雨翠色圓成渦。高齋新霽卷簾坐。紀事灑墨揮長歌。惟君好異天所與。用助歡宴供吟哦。菱溪傑作憶六一。雪浪遺事追東坡。不須對石更增慨。觴客且倒金叵羅。

兕觥歸趙歌

爲常熟趙者
庭明府作

素衣角帶陳嘉猷。相公未肯歸荊州。懦夫屏息舌入喉。剛腸詎以腹劍柔。墮肉如掌氣益遒。直爲一代綱常憂。當時同袍祖道周。共飲止許吳編修。文羊一角黜而鯨。忠臣口澤垂千秋。凶終世或文穆尤。亡親今爲江陵羞。一觥流轉珍天球。汝陽卓行齊中牟。慨念杯棬涕泗流。不憚辛苦間關求。精誠所格夙願酬。顏藏翁介良有由。是曰天相寧人謀。覃溪樂府可以謳。衡齋高義古罕儔。用告家廟揚前休。子孫永保世澤留。足以激厲末俗偷。可憐相公相業優。不少圭瓚秬鬯。貢媚況復羅琳瑯。是觥區區何足侔。一朝勢盡舉室幽。殷家大珠誰復收。

消暑八咏和袁簡齋錄四

辭客

閒門無剝啄。息影謝塵緣。梧院暑方午。竹窻涼自眠。屏看山過雨。琴聽石流泉。此味何人領。難邀世外仙。

補竹

疎影覆方池。移來竹數枝。清風環枕簟。綠意上鬚眉。鳥語客初去。日斜人未知。碧鮮良可賦。吟嘯坐忘疲。

曝書

三伏乘朝爽。閒庭散舊編。如遊千載上。與結半生緣。讀喜年非耄。題驚歲又遷。呼兒勤檢點。家世只青氈。

滌硯

拂拭晨窗硯。提攜更濯波。誰能如汝壽。未免受人磨。舊冢堆十管。新泉試一螺。書成聊自賞。不擬換羣鷗。

桃花隴唐六如先生祠墓歲久頽廢陶山明府重為修葺賦詩四章余未和也辛酉八月上澣二

日偶然獨遊小憩桃花仙館得詩如數即次原韻

綈袍瓦罐話前塵。交遊零落綈袍冷風雪欺凌。老星荒阡喜就新。一事廢興真有數。此生行止豈由人。壺

觴不散幽憂疾。花月能娛放浪身。試向東風酌杯酒。天桃何似昔時春。

折除官祿是才名。咫尺滄浪帶水清。兩地風流同不朽。百年恩怨最難平。人間何物都元敬。海內知音祝

允明。濁酒滿瓶花滿眼。未妨絃索送浮生。

地下何須歎數奇。憐才曠世有心知。放懷早悟如如旨。感遇曾賡悵悵詞。余昔年有弔先生墓用先生悵悵詞韻詩一首聽說深

亭營廢冢。欣看彩筆賁新祠。他時盛事傳吳會。燕寢清香憶左司。

仙館依然傍佛燈。閒將往事問殘僧。三生幸接枌榆社。半偈來參大小乘。茗啜晴窗傾法乳。碑珍遺墨拓

溪藤。祠屋桃花菴歌先生自書古宕秀逸非近人所可幾及從揚碑者購一本歸。何當十笏分餘地。長此齋居養絳陵。

題管韞山詩後

夜永燈寒一卷陳。唾壺敲缺氣嶙峋。客言是集能千古。我為同袍惜此人。論事獨敦風義古。詠懷兼愛性情真。觀臺絕筆餘忠悃。太息陽城志未申。

壽述菴前輩八十

杖朝恩許主鷗盟。洛社優悠詠太平。三殿履聲諸老憶。五湖帆影一身輕。松高澗露枝添翠。鶴老橫烟韻

轉清。莫道漁莊穩臥久。東山念總繫蒼生。公居柳湖之濱嘗寫三柳漁莊圖以見志

潞水蘭橈放早春。緩程猶記荷溫綸。收將捧日擎天手。來作眠雲跋石人。蒲褐公山房名拈毫餘結習。聞思公

精舍屬宴坐悟前因。連篇近誦山塘詠。老筆摩空覺有神。今年四月公遊山塘作

回首觚稜歲月深。銅墀清切漏聲沈。建牙四表壺冰朗。籌筆中年鬢雪侵。人信匡時須實學。公言執法但

虛心。堂開佚老身還健。投絃能忘報國忱。

出處依稀似樂天。人間今見地行仙。詩吟海燕原無競。用張曲江燕詩事夢晒黃梁亦可憐。謂已未正月初旬事未許官階

妨著述。最難鐘鼎又林泉。諸生誰奏南飛曲。待譜新詞付管絃。公少工樂府近又有續詞綜之選門下士得指授者皆有玉田白石遺韻故云

吳壽昌

字泰交。山陰人。乾隆三十四年進士。官至左中允。

蒲褐山房詩話中允蕭閑真澹早遂初衣而學有本源工於佐證為貴州學政作時藝以繩多士穿經貫史一時拈出衆以為得未曾有也詩自虛白齋館課存稿外見者蓋寥寥

題墨錄

吾友古聞人。好古富詞翰。長安復僦居。城東張高館。訪之榻無塵。圖史堆几案。須叟陳錦匣。未啟手先盟。

中藏舊隄麋。歷歷不可亂。形模仿圭璧。款識雜銘讚。幽香與古光。拂拭難爲判。旣觀復用嘲。君癖劇好鍛。胡不圖博古。鼎彝森愛玩。不則譜書畫。宣和蹟重按。抑或錄金石。庶用資購貫。正史訂旣訛。舊文續未散。寶此膠烟姿。歲久易漫漶。廷珪永已矣。此物無長算。邵羅迄方程。孰稱諸家冠。著錄若流播。質亡名誰惋。矧迺置不用。什襲加防扞。不如之五都。一丸買新爨。持以狎丹鉛。塗改復點竄。有用貴珠璣。無用賤薪炭。君笑繼揶揄。謂余徒相難。同一嗜古癖。奚爲分畔岸。寓意不留意。昔賢有明斷。所聚雖我好。不假千金換。枯以百十二。持贈居大半。以彼膠漆交。獲茲雲煙看。居遊聊與偕。摩挲出璀璨。卽墨侯毋封。子墨客多慢。行將吾齋坐。心清參鼻觀。豈學米家船。揭牌忘汁漫。咸君懷曠達。愧余言河漢。五陵事裘馬。孤賞冀誰贊。幸無豪奪人。完歸復何憚。

龔敬身

字屺懷。號匏伯。仁和人。乾隆三十四年進士。官至楚雄知府。

三間房道上書所見

木殘柳色尙依依。中有人家住翠微。一架匏瓜寒未摘。兒童對客掩柴扉。

程沅

字芷南。丹徒人。乾隆三十四年進士。官汾州府同知。有春颿近體詩鈔。

曉發瓜步

明發瓜洲渡。蒼茫曙景分。沙痕收楚雨。樹色寫吳雲。魚翠當窗拂。龍腥逆浪聞。中冷如可汲。趁欲解微醺。

杪秋江隄晚步

荻浦花如雪。楓根繫釣船。涼生漁侶夢。秋占水鄉天。遠岫月初上。近村人未眠。沙頭重留戀。鷗鳥若為緣。

秣陵返棹

商飈迴楚岸。曙色冷吳天。落葉無邊樹。歸帆何處船。離亭秋望斷。孤驛暮愁連。極目疎林外。風鶻破暝烟。

王 瓚

字崑霞。鎮洋人。乾隆三十四年進士。官吏部郎中。有晚香書屋詩稿。

蒲褐山房詩話。崑霞為烟客曾孫。被服雅素。紫羅囊。玉麈尾。不媿烏衣之目。兼承家法。工於畫理。所作詩雖未深造。亦復澄澹可觀。

饑民謠

大淫雨。百草肥。五穀死。饑民悲。形容枯槁。面目黧。不如富家狗與雞。凶年猶得食糠粃。枵腹仰天天不知。父不顧子。夫不顧妻。我欲採取羊鬚萬斛珠。歸來療我饑民饑。

絳中兒

趙孤兒。袴中置兒不啼。兒亦異。夫人抱兒徒下淚。以是藐諸孤。誰能出死地。公孫杵臼與程嬰。宛轉迺能

全大義。平生不忘趙先君子。爲其難我爲易。一時幻出兩孤兒。杵臼取兒走先避。程嬰謬告諸將軍。諸將橫奪孤兒驚。杵臼旣見殺。孤兒亦遭屯。國人聞之皆哭。杵臼嘗程嬰。孤兒死。諸將喜。千金賞。程嬰恥。真孤兒。反在矣。孤後成人。嬰亦死。始信立孤爲難耳。匿孤教孤。終立孤。如此兩人。世上無。諸將盡是懦丈夫。豈桑餓人安在乎。君不見宣孟忠貞位正卿。桃園之難愧穆嬴。

破山寺

幽棲心轉曠。策杖啟禪扃。飛瀑添龍澗。流雲悟雀瓶。竹穿蠟屐冷。山見酒人青。天許分僧樂。層軒幾日停。

秋杪過南園呈竹娛族祖

楓徑霜初落。松關日乍曛。伊人在秋水。詩思渺江雲。高閣鳥聲集。寒潭樹影分。臨軒思繡雪。清磬隔林聞。

戚蓼生

字念切。德清人。乾隆三十四年進士。官至福建按察使。有竺湖春墅詩鈔。

馬底驛

淒絕黔安地。經行得未聞。語音三戶別。晴雨一山分。陡壁騰樵婦。荒墟坐戍軍。還看溪澗畔。虎迹映斜曛。

于鰲圖

字伯鱗。號滄來。漢軍鑲紅旗人。乾隆三十五年舉人。今官蘇州府知府。有南來集。

秋夜高郵舟行

千里暗如墨。檝催趁夜行。燈隨星共遠。風與水爭聲。舵轉坐常側。帆懸魂屢驚。秋深憐病骨。豈敢惜浮生。

斗山口望徐州

蕭騷風拂鬢。指顧見徐州。劉項無餘土。張蘇是故侯。悲生雲外雁。寒起水中秋。烟霧迷城市。疑看蜃吐樓。

瓦房工次早行

旅次眠難穩。晨雞催客行。森森綠岸樹。落落遠村更。淡月全無影。寒流自有聲。征車衝曉霧。野浦亂鴉鳴。

印照

字匯淙。嘉定人。乾隆三十五年舉人。有菽園詩稿。

夜坐懷朱東發

夜涼不成寐。延佇倚岩戶。忽聞遠寺鐘。已歇西堂雨。幽幌暖餘香。疎星耿涼宇。美人遊不還。簷鈴空自語。

南宋宮詞

內人奏鼓合涼州。綵練拋來七寶毬。殿下諸王呼萬歲。至尊盤馬過龍樓。芳池九曲水瀼洄。日午龍舟打槳來。報道芙蓉須臥看。銷金羅幕一時開。高髻團衫別樣妍。謝恩總立閣門前。紅羅帕子新承賜。小印金龍押四邊。

東風桃李競春暉。女伴彈棋捲繡幃。忽聽金鈴簷外響。飛奴遙帶夕陽歸。

巖翼

字懋棠。嘉定人。乾隆三十五年舉人。有鴻音集。

灘江

山勢從黔落。江流入楚分。摩天開一綫。繞壁走千軍。白晝渾疑雨。青巖不斷雲。依稀三峽裏。處處嘯猿聞。極天同鳥道。此路即羊腸。戰壘餘金索。武侯南征。從石壁貫索以進。懸崖綴木房。絕壁上有老屋數椽。寒烟晨尚燒。老樹臘初霜。風景蠻方異。勞勞歎阻長。

安南道中

一鞭隨早爽。秋意滿空山。雨歇蟲聲裏。雲生馬足間。稻涼花盡白。柏老葉初斑。蕭瑟蠻方景。勞勞客未還。

送燕

海北天南消息稀。秋來別我尚依依。漫尋昔日花前路。須記明年竹裏扉。此地幾人開白社。舊家何處覓烏衣。懸知不負華胥約。好趁西風緩緩歸。

水西途次

秋淨蠻天萬髻羅。一鞭趁曉走嵯峨。雲連蜀道羊腸迴。木落黔山虎跡多。帶露雜花涼自放。下溪活水淺

無波時豐便覺登場早處處磨鎌待割禾。

湖海詩傳 卷三十一



八五五





湖海詩傳卷三十二

程晉芳

初名廷鑽。字魚門。號菽園。歙縣人。乾隆二十七年召試。賜內閣中書。三十六年成進士。官吏部主事。以校勘四庫全書。改編修。有菽園全集。

蒲陽山房詩話。魚門業傳。鹽筴家。本素封。而覃研典籍。虛懷求益。少問經義於從叔廷祚。學古文於劉海峯大魁。又與商寶意。袁子才。唱和。故博聞宏覽。而才情豐蔚。詩文並擅。其勝然。游宦三十餘年。家益落。無以自給。為乞米計。至關中。病暑而歿。喪歸。秋帆撫軍留其著作。存於終南仙館。凡十餘年。而畢氏籍沒。其書遂不可考。惟聞春秋經義。尚存於門人謝編修振定所。然亦未付雕鐫。

夜夢袁簡齋是日簡齋書至因作詩寄之

昨夜夢尋君。迢迢渡江水。官舍月微明。握手花陰裏。各言長相思。餘論及文體。覺來雞未鳴。殘燈弄餘蕊。是日君使來。果得書一紙。乃知精神合。魂魄已潛擬。之子抱天懷。咳唾落珠璣。作吏非所難。苦滯百寮底。况是絳霄人。何堪久塵滓。讀書結初願。有田誓歸矣。而我孑然身。百憂浩所委。惟君憐我深。義與殷顏比。別易見面稀。得書時復喜。大江多風濤。舟楫慎所使。啾啾百鳥羣。乘春競人耳。孤禽獨不鳴。高樹永棲止。感物思遠人。觀時悟生理。庶幾各自愛。黽勉固終始。

山行

秋山多白雲。峰勢與雲變。巖岫淡冥濛。礪壑互隱現。有如皴染家。濃淡着素絹。俄驚山無根。雲氣平抹斷。縈紆雲作態。峰路逐雲轉。須臾長風來。雲淨山悉見。偉哉造化功。頃刻千狀換。慰此行旅艱。極目信忘倦。

愛貓詩爲王梅泚作

烏圓雖柔馴。所志惟搏擊。區區常畜耳。何用重憐惜。吾友梅泚翁。好之遂成癖。種勿辨珍奇。毛勿取錦織。裹鹽向僧換。貫索從市得。豈惟賚魚乙。亦且分肉食。桃笙聽晏眠。花影撲狼籍。懷袖一撫摩。俯首笑啞啞。我前爲致詞。子亦太癡劇。右軍愛籠鶯。神契在筆畫。支公賞神駿。所嗜乃逸格。彼皆有寓意。而豈盡沉溺。今子胡好爲。玩物作無益。寧伸唐宮寃。恐附義府魄。朝聞瓦盆翻。夕訝鄰雞磔。護短而憑愚。奚不速自克。支頤初不答。徐徐乃爲釋。人生各有好。彼此勿互易。禮經載八蜡。農事渠有力。珠光一圓轉。線以子午測。紗帷傍張搏。穿柳聘魯直。稱曰玉狻猊。被以金鎖勒。誰張雪姑榜。孰向臨安索。楚金七十事。事事典以則。昌黎美相乳。用以表仁澤。吾生本貧賤。萬里一書策。破帽不改新。破衣不加飾。夫豈盡攫鼠。而有護防責。吾但取其名。徐乃課功績。飢惟盡一簞。功足蕩四壁。時時看洗面。淪茗待佳客。亦復錫嘉名。應聲如僕役。錦堂擢瑜春。我但敗氈席。雲圖抵數金。我以百錢覓。余方媿負若。何乃動譏斥。况余久羈滯。寒坐冰雪宅。獨酌一壺春。左右伴岑寂。宵分共臥起。氣暖若裘褐。旣非衛侯鶴。乘軒喪厥國。又異葉公龍。瞥見心膽惕。黃耳鬱高墳。事不厭奇特。予方噴子迂。慎勿誚我惑。我聞輒拊掌。所論良亦得。豈惟謝子過。且使余悅懌。

客游多歲月。此輩宜物色。贈子毛穎雙。畀我銜蟬隻。

讀商司馬寶意詩題後

潞河南下流波澹。水驛山村倦臨覽。閑把君詩枕上看。冷吟驚破魚龍膽。霏烟拂霧紛變態。淘汰工夫出夷憺。泠泠清響脉通池。往往初甘味回攬。珍廚鹽豉豈異味。要在夔人善和糝。就中妙境難舉似。醜鵠微香發新菌。堂堂旗鼓列雄師。韓魏依然自視欲。憶從南園握君手。若樹亭亭鋪碧毯。揮毫落紙君自擅。分騎揚鑣吾豈敢。金臺夕寺共追尋。九陌新秋轡同攬。歸驂淮水葉蕭騷。去棹巴江雲黯黮。竹王山鬼互將迎。夔鳥蠻花增怨懣。大江春早重登艫。澎湃奔濤驚習坎。集中有驚濤四律匆匆燕市一相逢。草草杯盤論坎顛。卅年銅綬滯青衫。如此儒冠困丹槩。卽看車馬尙雞棲。那得功名追燕頤。徒勞琢句腎肝瘦。或恐搜奇天地慘。江鄉隨處有蓴鱸。箬笠差宜傲珩紉。秫田二頃待同耕。願與先生披錦暉。懷人掩卷暮愁生。淅淅涼風吹薺莢。

日月合璧硯歌

端溪下崑久著名。就中最美稱水坑。良工琢石如琢玉。沐日浴月揚其英。太空無雲蕩晴旭。下有海水涵金精。兩儀合度儼合璧。五緯列宿韜光晶。邊髯錦囊貯此硯。吳頭楚尾都隨行。多年珍好落吾手。信有天意非人爭。蒼蒼者烏踰者兔。轉丸歲月無停征。磨人墨汁磨墨硯。使我終老勤耘耕。斧形風字載常譜。此

硯一出逾瑤瑛。質溫密栗縵紋理。表靈發異矜廉清。曾聞龍鱗賜天府。明良作輔承嘉榮。放翁軍帳坐草檄。撫時泐硯心太平。今我清時一葦布。寶此異物將安營。刻鏤風露笑通悅。攜持場屋羞僉儔。逝將移贈天祿史。表忠燭佞司權衡。卽今隨身徧南北。山經地志閒商評。眼中何從起翳障。胸次願得長光明。詩成閣筆一笑粲。夕陽纔下金波橫。

侯夷門題畫詩十二首。余於李芋圃太史齋壁見之。嘆諷良久。瀕行芋圃以侯詩書扇見遺。作詩志之。

侯生使筆如奔驥。掣電崩雲千里逝。錦韁繡鞅不勞施。峻阪層崖豈防墜。發狂使氣氣益雄。埋頭渴飲千觥空。自矜奇節類遠祖。抱關擊柝將無同。昔年共我游春墅。名士座中多楚楚。放紙寧嫌十丈長。搖筆如風目如炬。就中金玉兼泥沙。旁觀竊笈爭譏譁。要其才氣萬人敵。畢生不遇堪咨嗟。殘秋獨上南朝塔。大風搖山黑雲匝。忽然狂笑忽號咷。滾滾江流響相雜。重來淮水颺輕舟。五月尙着青羊裘。題詩哭奠水南老。鬼語荒忽悲呶嘍。江干作尉怪疾起。一夕酖醢廁中死。清流若輩濁流投。造物憐才竟如此。壁間題畫十二詩。我來京邸偶見之。文從字順尙難解。要當配食樊宗師。翰林李君書法好。每道匆匆不暇草。仰家扇子寫侯詩。送我遠返江南道。斜行密構皆通神。羲耶獻耶恐亂真。豈惟鄭重別余意。君與侯生亦故人。涼風十月迎馬首。把玩循環不離手。流傳他日到何人。名墨遺詩俱不朽。

和泝江伯父彈指閣老樹爲風雨所拔用少陵柟樹韻

婆娑老樹佛閣前。疎枝蠹葉不計年。曉映明河挂珠斗。夜承墜露棲幽蟬。涼秋七月風雨至。大塊吹噓紛怒氣。拔地還疑鬼神力。掃空已斷雲烟意。憶昔游人爭賞愛。青青密蔭圓如蓋。空餘古砌淨流塵。無復清飈送高籟。老僧禪懷少荆棘。小劫無爲感中臆。欲識根株生滅緣。舉頭華月澄秋色。

韓幹神駿圖

兀如山立如風旋。力躡電影馳其前。高巔雙壁夾兩觀。長鳴思騁仰視天。非花非駁非連錢。沃雪遍體銀絲纏。奚官脫帽衣袒偏。志不在馬耽清泉。怒塵一洗毛鬣鮮。耀日不復煩鞍韉。涉水水底蒸雲烟。蹄間錯落流珠濺。道人注目意靜便。相賞逸格通高禪。奚官鞞鷹捉老拳。攬身擇肉思秋田。矯矯元度跂脚眠。桐花下墜清露妍。奇姿絕態咫尺傳。筆無瑕痕墨彩圓。目以韓幹然不然。先生曹霸差齊肩。肉不露骨骨益堅。一藝所到參幽元。殘縑寸斷神則全。渥洼精氣連星躔。支公不作誰爲憐。駕轅服阜紛闐闐。千金市此勿舍旃。丹青未必留空筌。

仇實父漢宮春曉圖

澄霞舒卷天半紅。流鶯細囀晴煙中。韶春先到樂游苑。金鋪玉砌光融融。翠微五柞連馭娑。千門盡啟葳蕤鎖。寶鏡當樓理曉雲。玉鈿盃髻簪嬌朶。掃花宮婢雲垂衣。驚起蛺蝶成團飛。柳絲低躡不能舞。九華殿

裏東風微。惟有昭陽春最艷。珠壁金釭燈灑灑。紫燕休尋別殿巢。文鴛競向迴塘占。何處離宮抱怨深。夢迴隱隱聽車音。青陽不道凌朝轉。皓月還看到曉沉。十洲作畫工雕繪。此卷傳神信爲最。似經新露長芳苔。如有柔風動羅帶。君不見露寢離宮歲歲新。承恩並輦古無倫。一朝帳殿生秋草。三十六宮誰是春。行人曾過驪山下。野土青紅沒鴛瓦。蕭森古木嘯愁鴟。落日寒聲起平野。繁華如此空摧殘。不如長向圖中看。

父庚觚

蓐收積氣凝堅剛。銅英布濩草木黃。何年採鍊鑄法物。破觚爲圓稱有商。商人敬鬼惡不祥。制器立象殊精良。雷紋震疊百物懼。饗饗森列羣邪藏。尊彝罍觶爵觴。因時備用各有常。觚戒德孤寓深意。如置監史立兩旁。數千百載韜古光。何人掘取歸縑囊。想當埋瘞向深土。重苔野火增青蒼。輕雲油油覆煌煌。相對肅穆嚴冠裳。父庚之銘義何取。篆法直逼誦與蒼。十干作名厥旨彰。亦如祖丙父乙難追詳。或云字跡肖垂穎。無乃祈穀供蒸嘗。勾吳於越米價昂。斗錢四百嗟奇荒。上天殷念恤黔赤。五風十雨肥秋秧。禾頭斑斑麥吐芒。庚金成寶司西方。宜舉此觚蒼天祝。灌實鬱鬯羞馨香。職思其居寶稼穡。母使沉湎譏太康。

太白罇

紫窰片瓦敵拱壁。何況世遠誇唐磁。揭來傳觀形製古。龍文坡碎銜雙螭。云是太白狂飲之酒器。其說杳

渺難深稽。質純釉細。色澤厚。當是宋人摹倣之所爲。堂堂謫仙人。矯矯翔鸞姿。紫宮青府不稱意。偶來人世窮兒嬉。長安道上馳八姨。楊花撩亂天迷離。心知禍亂口不語。胸中磊塊澆千卮。金龜賀監解。玉硯妃子持。將軍脫鞵不足顧。彩毫落紙驚淋漓。江南蜀道頻流移。子規叫血猿猱悲。糟邱麴壘氣彌壯。春江吸盡青琉璃。團團牛渚月。湛湛謝公池。手撫力士鎗。笑把桑落枝。飄然騎鯨忽歸去。天風吹髮涼絲絲。金門歲星不可見。但見柳旁三點颺。酒旗殘杯剩勺到處有。後人傳寶如瓊琦。此罇遺製特奇古。想見醉倒冠巾欹。嗟我兩長無一得。不能豪飲兼吟詩。銅瓶在手汲新水。插花植卉爲清怡。沉香亭畔牡丹少。一枝隨分新胭脂。

景陽鐘歌

靈谷寺裏有古鐘。赤苔斑駁翠蘚濃。傳是景陽宮中之法物。多年零落塵埃封。其製稍狹高二尺。旋蟲繞獸盤蛟龍。中銜白玉徑寸許。雷紋雨篆紛重重。小鳴大鳴叩輒應。金飈颯颯搖寒松。周官鳧氏掌鐘簴。裁度律呂維和籬。兩鑾九乳有定製。懸之明堂列辟靡。元音一振統萬里。左五右五連笙備。偏安江左氣象迫。古樂盡變崇纖穠。了無典則布軌物。但此鄭衛矜昌丰。流音怪底應商律。運祚短促無春容。此鐘遞嬗多年代。旁崱在懸終不壞。五更聲動閭闔開。金珂玉劍來朝會。夜臘方傳虎踞關。曉妝又赴雞鳴埭。蒼蒼城闕起寒煙。一轉繁華歸法界。六時振響蒼流泉。古月婆娑話成敗。君不見潛壤銅鐘似殷雷。鯨魚十二

今何在。

題劉別駕若庵江上觀潮圖

生平竊慕祖士雅。渡江擊楫何瀟灑。英風更羨吳越王。射潮潮避鐵弩強。丈夫壯志苟如此。會須吸盡西江水。卽看江上觀潮圖。蛟螭彈壓膽氣粗。居然萬里匯尺幅。茫茫千頃銀濤鋪。是日鱗雲紛鬣鬣。驪龍率舞魚作隊。轟掣雷霆戰騎馳。動搖山嶽天光碎。黃牛峽口白馬灘。險處急速成奔湍。逶迤千里乃一放。元氣浩浩驚奇觀。金支翠旗光閃爍。隱隱層波湧樓閣。使君胸次比江寬。壯游宦海無拘縛。笛聲吹裂山根石。兩岸蘆花如雪積。潮平天淨月輪寒。飛起羣鷗破空碧。

苗刀歌次商司馬寶意韻

三苗遺種誇雄豪。花裾赤脛尻有毛。生兒斂鐵爲積屋。十年浴鐵成苗刀。青絲細絡綠皮裹。寒光一髮收銀濤。晶瑩不受土薄蝕。拂拭但用人脂膏。千錢覬覦奮格鬪。刳腸抉面休輕遭。卅年前經大搜勦。委棄兵械深林逃。使君何從得此物。恐防鬼伯中宵號。寒窗把玩出素匣。愁雲感感風騷騷。方今四極盡康阜。媿羌疏勒無兵鏖。貝多奇樹釀酒醴。驂騑內廐栽葡萄。獼獼擊鼓日歌舞。忘念不敢萌分毫。羅田小寇實土著。何乃蟻聚忘撫旬。紛紛狐黨盡擒縛。奸酋竄匿同驚獠。願持此刀急逐賊。剗之千段如誅蒿。功成納鞘誓不用。鹵器百勝宜終嵌。長謠怒髮忽倒豎。酒人吾欲從荆高。

題元人所畫雙鷺圖寄商司馬寶意

有苑者蒲折者荷。澄溪澹澹靜不波。翻翻白鳥食茄下。野性那復憂虞羅。一翹隻足仰其頸。一飛向空斜。帶整綠蘋風起似驚秋。紅蓼花深宜照影。由來愛潔毛骨殊。雪絲蓋頂圓沙鋪。誰能貌取最真態。春鋤上下如相呼。畫家恐是錢舜舉。我欲問鷺鷥不語。浪高憶爾破遙天。雨急憐伊避寒渚。有客思歸放白鷗。幾回對畫起愁顏。槎松葉暗霜魚小。爭得江湖趁汝閑。

宋徽宗所畫龍翔池鷓鴣圖

我行骨董肆。瞥見古畫軸。筆姿墨彩愜飛動。搖蕩心魂眩雙目。諦觀乃是鷓鴣圖。宣和小印鈐紅硃。瘦金書體數百字。拂紙鬢黷雲煙鋪。緬昔酣嬉忘國步。江南花石催無數。青陰閣傍碧琅玕。雪浪金隄栽玉樹。龍翔池上風日春。采蘭祓禊逢佳展。瓊林宴上出此作。奎章鳳藻驚羣臣。彩襟錦臆垂霞縷。顧影相矜如刷羽。直從禁地寫江湖。一片橫塘澹煙雨。紇千山雀飛聯翩。如斯絕技天不憐。才藻南唐後主敵。兵戈西晉永嘉年。五國城西沙拂面。帛書空憶南來雁。荒村古驛月痕斜。詞筆蕭疎詠孤燕。故國蒼茫落照殘。春深誰更倚紅欄。無情水鳥爭飛去。風滿清池碧草寒。

遊太學觀石鼓

纖雲淨掃澄高穹。旭日正射東膠東。虎門書庫縱觀眺。蒼碑丹碣何穹窿。兩廡忽訝光熊熊。左五右五蟠

紳虹叩之其響非逢逢。厥形肖鼓名從同。籀法變換刪禽蟲。口不能讀心差通。鹿鹿速速秀者弓。鸞車既好矢則彤。左司妙句開鴻濛。文考有作垂艷宮。韓蘇繼起筆力雄。云此實頌中興功。竹書汲冢試折衷。載紀未及奚鑿空。廣川跋語據盲左。岐陽簡狩修師戎。時遙莫辨初與終。考古曷若勤尊崇。三疑妄說真夢夢。先秦宇文紛亂訂。赤烏跋兔猶朦朧。六經聚訟如蟻叢。法物怪底遭羣攻。元人南伐何匆匆。巨石作礮紅衣紅。此物先已來燕中。金鑲玉勒辭疏權。草萊拂拭光氣融。壁水半壁環冲澗。滄波匯海嶽有嵩。縮瑟萬象歸牢籠。穆書原鼎同馮隆。誰其述者臯與蒙。煌煌四百六十字。紫凰威鳳爭飛翀。偏旁漸失數不充。剝蝕豈必關磨礪。孰云汝壽碩且豐。投梭歲月方無窮。南劍木刻珍珠玕。安得琢石臨摹工。至寶零落吾所恫。念之不覺心忡忡。且求遺拓裝書筒。墨香披拂來松風。

題梅妃吹笛圖

朦朧樹色簾衣揭。一片沉沉宮禁月。誰寫江妃壓笛圖。綴景傳神總清越。嶺南妙選入深宮。玉笛閑吹號最工。檻外春晴方鬪草。筵前舞罷更驚鴻。無端釵合承新約。黃金買賦知難托。眉際潛傷桂葉凋。笛中暗訴梅花落。團扇非秋早棄捐。明珠和淚譜商絃。亞牆花靜人偷曲。惟把霓裳碎拍傳。芝焚蕙棄無須歎。鼙鼓漁陽起天半。蜀道青驛爲阿誰。此身幸不關危亂。從古君恩易重輕。樓東才豈讓華清。西風妬煞垂楊碧。還向朝元作雨聲。

王莽貨布歌

成都火井黯不然。昭陽禍水方乘權。巨君睚眦目睨鼎。刻意摹古欺愚賢。周公孺子飾假面。金滕洛誥增外篇。六官改竄不足道。貨泉變自居攝年。十品頒行別次第。卯金之號旋舍旃。契刀大布類叢雜。訟簿擾擾愁株連。黃牛白腹理當復。填耳莫禁民謠傳。鯁魚臭尙播千載。漸臺死不直一錢。當時著作悉無取。貝貨所製殊精研。昔聞伏羲搏九棘。燧人農皇相後先。曰刀曰幣別子母。爲輪爲郭分方圓。呂姜佐王管子。霸但取民用流如泉。嗟莽何能識此意。刻舟求劍徒拘牽。要其規矩必古法。小篆如薤如針懸。秦碑漢石有摩泐。銅質堅勁其神全。委宛成文庶堪媿。黍銖定樂彌相宣。豈如鹿皮雜金幣。大異鸞眼浮青漣。食因咽廢古所誠。舊制況復非彼專。鄱陽莽錢入僞品。通山溲海紛糾纏。別書刀布信卓識。雖不適用毋輕捐。夷甫不言信高致。王昕取一奚過愆。宜男可徵勿深考。囊中伴我倉斯箋。

家顯書姪餞席聽祝道士彈水仙操

貝宮無烟濤氣白。老仙長住鮫人宅。天邊攬月置懷中。笑向龍堂輕一擲。冰絲播弄饒水聲。寥寥秋闌夜字清。遺宮剩徵到人世。異韻未許參凡情。道人神姿腴不寢。爲我揮弦佐匏飲。存齋太史適共聽。跂脚西窗手交枕。是時綠桂吹古香。高雲飄墮雁起翔。浮音切響振岑寂。指頭湧出波茫茫。阿咸心閑得琴意。解帶松間對月醉。夜闌更請奏歸風。我欲臨江鼓征柂。

送舍弟述先之廣陵

河橋一攜手。碧柳未成絲。春水方生夜。孤帆獨去時。岸荒人語少。雨急雁飛遲。亦識前期近。其如愴別離。

甓社舟中

澤國蒼茫裏。雲帆一葉過。亭荒秋樹少。湖闊夕陽多。漁舫有時集。勞人何處歌。依依淮浦月。相送耿金波。

旅寓遣懷三首

去住渾疑有夙因。重判衣袂浣緇塵。柘枝偶作當場舞。雞骨慵占野廟神。淡淡鶯花憐故國。疎疎風雨度蕭晨。故應難展穿楊手。老作清時擊壤民。

世情鹵莽競錐刀。得失雞蟲祇自豪。殘篋誰憐白團扇。新聲終愛鬱輪袍。波深滄海龍吟細。天抹閑雲雁陳高。積障破除書卷在。一枝籬菊送香醪。

瀟瀟初雨撲雕簾。睡起憎騰興未收。南國夢餘花信晚。西城居近井泉甜。不慚齒壯名難就。長是愁深病亦兼。何事故鄉消息斷。辭家兩見換新蟾。

將赴京兆試同人相餞晚甘園留別

綠暗郊原草色齊。荒涼曉曲唱黃雞。藏名漫擬隨龍尾。學道何曾悟馬蹄。良友情懷春水闊。旅人襟抱夕陽低。也知骨相無多福。未必鈞天聽易迷。

落花

陌上休譔緩緩歸。風光九十已全非。山鷲過處紅成陣。海燕來時綠作圍。迸蕊尙縈青玉案。餘香還惹碧羅衣。曲屏一夜尋芳夢。猶逐殘英續斷飛。月露千枝影半簾。幾番風信雨簾纖。不隨暖絮縈珠網。更帶晴絲拂鏡奩。靜墜膽瓶燈地暗。閒飄曲榭水紋添。忘情不信維摩詰。一片孤芳手自拈。幾回欲折轉生憐。誰料飄零曲檻前。水佩風襟消綺夢。酒旗歌板惜塵緣。愁生水北三更雨。恨滿江南二月天。無限芳華買難住。紫榆空散沈郎錢。一夜天風掃絳崑。飄零從此限塵凡。點妝冷豔依眉黛。漬粉新春落枕函。廢圃荒煙無蝶採。空宮斜日有鷲銜。關心最是春機女。織取繁紅上碧衫。

阿膠聯句

濟流達阿城。程晉屢起屢迴瀆。高環井布輪。沈初下汲瓶挈竹。清迅登茶經。梁夢善鍊煮稽藥籙。彼哉長耳公。芳藪之小山。麓風聲引蹄躡。初雲氣覆黝黠。鳴應子午交。夢善色取壬癸獨。陰崖露草咀。晉芳寒徑雪花蹴。三年置閒散。初一日摧令僕。土人製膠飼驢以北皮存毛不附。善支解尾猶禿。火紅文武添。晉芳泉綠淺深掬。重燈耐細煎。初響雨雜微撼。滓融暑刻淹。夢善紋皺分寸縮。照面漆髮几。晉芳著手脂炙殼。牽連乃臙黏。初悅

澤遂膏沐。凝為堅固體。善夢割類方正肉。厥包附土貢。芳晉其用佐金肅。劑和宜朮苓。初價值過龜鹿。媚寧佩
 姪娥。善夢濁待止河濱。客來偶停橈。芳晉市聚看列屋。粉書板雙扉。初青曳帘半幅。檢囊罄輕齋。善夢裹紙聽平
 鬻。瑣碎繙湯頭。芳晉鄭重藏錄目。酒杯化醇醲。初夜睡益甜熟。真偽勿具論。善夢歸去遺姻族。芳晉

官扇聯句

明上海陸文裕公嘉靖中以祭酒直經筵嘗拜宮扇之賜裔孫錫熊官京師暇日出示其友程
 晉芳汪孟錫趙文哲阮葵生董潮吳省欽爰共聯句

秋光敞雕楹。芳晉晨爽拭珍簟。娛賓折簡招。孟錫述祖在笥檢。扇裁蜀府新。文哲製陋漢宮儉。勝朝中葉承。葵生其
 廟太阿刻。深居厲刑賞。潮旅進雜忠調。一俊占鳳鳴。省欽九達筮鴻漸。南曹巨璫毆。錫熊脩劉瑾。明史本傳授編
主事瑾東觀羣雅媿。朶殿經樞隙。芳晉條銜御毫點。公南巡日錄御筆親署侍屬車塵清。孟錫飲天酒露霽。迎
誅復宜節蘭辰佳。文哲倬直松閣罨。賚衣白紵輕。葵生解糶紅絲綱。是物本貢珍。潮異數非竊忝。函頒香案臣。省欽帕捧
 閣門閣。爛然朱霞滂。錫熊渚若素波閃。花樸蟬翼翻。芳晉海圖龍甲閃。段竹截鷺肪。孟錫圓釘貼蟹曆。紙劈蟹纒
文維。銀塗泥滌激。佩宜錦囊盛。葵生世廟賜張孚敬等。給藉綵索繪。又五日賜李時夏言等綵索攜歸
哲袖翻翻。潮傳示目覩覩。樓添槐雨涼。省欽在宣武門內。屏引梧颯颯。公有雲錦石揮疑仙骨珊。錫熊障少
 俗氛玷。三沐兼三薰。芳晉一重或一掩。迴翔瑣闥榮。孟錫蹉跌延津貶。本傳以講章為閣臣所改奏大柄久不

持文疎節詎終慊。懷中月團圓。葵天上日荏苒。春祠晉嶺花。潮夜艇江湄笑。握隨筇杖倚。欽省疊映越羅斂。

本傳自同知擢山西提學副使改浙使巢痕玉署空。錫篋淚金蓮染。黃扉誰畫接。芳青詞競宵禱。履絢羽鳧

躑孟冠葉香螺壓。紫禁輿並扶。文丹壺藥獨夾。捋虎腰領糜。葵嚇鷓臭腐噉。望虛棘與槐。潮興託菱共芡。

抽身等棄捐。欽炙手避威燄。吉金行橐垂。錫廉石歸舟斲。申浦折芰紉。芳袁壘團茆居。願豐課田園。孟錫

集有願豐堂漫書一卷後樂窮谿厂。後樂公園名在春申浦東谷水圖斫鱸。文葺城賦載獫。蔬筍安枯禪。葵杉檜絕驚壓。臨池妙

素縑。潮數典富鉛槧。風流被未沫。欽省恩款話斯。懔出入變寒暄。錫卷舒信夷險。貽厥傳魯弓。芳昭茲守周

琰。文孫勤服膺。孟冷客慰飢噉。披襟當北窗。文視景薄西崦。把翫神睥胎。葵評泊口喁噉。規隘七寶織。潮

彩奪五明罽。森森鸞尾捎。欽省趨趨雀翎翹。便面刈觚圓。錫聚頭學裙襖。什襲閱百年。芳陸離驚一睽。畫零

蜨兩翮。孟墜失魚雙眨。袂看蹙繡韜。文懶拓剪紗揜。祛濁敢拂蠅。葵通靈或駭鼯。展防寒具污。潮揚奉清

芬奄。家集網叢殘。省國史補遺鈞。恍坐春風春。錫熊公有羣瞻儼山儼。芳

食蟹聯句

水錯饒羹材。程晉廚珍試饌法。堆盤解象占。趙文就坐旅情洽。販集丁沽腥。山陽阮葵買問亥市插。飽露

腹中腴。海鹽董迎霜骨外砧。跪交銀戟撐。吳省螯舉玉鈎夾。凸如背負筐。曹仁森若胷貫鉀。急縛氣尙雄。

陸錫橫行徑已狹。濡濡沫互噴。芳宛宛目交眨。飼宜土膏肥。文漉用井華潔。族徒葦籃傾。葵命併糠火爨。

泣釜鼎娥憐潮登筵觥使扱省薑芽小紅攢省橙縷新綠掐省酸醃一勾釀仁苦醞百分呷錫笑爾中腸無熊供

吾左手扶猛夫詫突睛芳公子嗤駢脅文尖團臍互覘文磊落殼先搗生褪蓑雪膚鬆葵披鈿金鑿欲錫千齡珀

凝脂潮六州鐵鑄甲省纍纍鬣足叉省薄薄蠟房映省瑩白瓊液滋仁頰黃玳膏浥錫肌充美自含錫腦滿香齊

嗜批卻爪梳爬芳觸芒齒咋齧文攪疑戰拇罵文齧擬甘唇狎生渠魁咸拔尤葵么膺亦承乏潮隨浮霑襟裾潮

支解謝箸筴省細咀耐更番省大嚼誚半霎省積骼高峻嶒仁餘肪膩接喋錫賤桃花楚賊錫陋藻苗越蚰錫倦僕

涎欲流芳饕朋口猶吐文菽乳滌惺忪文菊鈴搓鞞鞞文清盟陳綵巾葵雅譚捉蒲筵錫候乘夜月虧潮興逐秋

風颭醉容何傥傥省鄉語競評評省荻漲遠踰淮仁蕪波清到雪錫答簪迎溜懸錫籟箔椽泥插錫江空八月寒錫

芳港暝一燈焮省橘洲煙溟濛文菱渡水潞滄省郭索依牛涔葵沿緣上魚罨錫奔明集渚汀潮負固藏厓厓錫鉗

蘆走蹒跚省執穗行超越省智輸虬泉穿仁形寄蟬穴灰錫乘潮或歸溟錫過雨爭聚插錫管屨來徐徐芳葉船

去泛泛省罾撈帶草蝦文簪動驚花鴨省種堪按譜搜生味待加餐噍錫瑣碎鸚嘴織潮輪困虎斑窳錫長卿文獨

豪省彭越力寧怯省紛紛遭拘擒仁帖帖被檢桺生枚非一千須錫輩喜十六恰錫趁墟沙尾喧芳論價擔頭壓錫

詩換蘇何饑文酒浮畢所押省送似走白衣生招邀脫烏帽錫生拆宜鹽投潮熟蒸忌湯煤錫榼釘蔗霜黏省罌

裝椒雨腌封糟窳墻陰仁和醬暴簷吸錫真應常侍除錫幸少監州憎芳烹異葵公訛錫議思鍾子誦錫偶參琴

心圓文每悟茶眼貽生歸夢懸筆簞葵客懷滯筮笈錫舊蹟印鴻泥潮流光熟羊胛錫蓼塘畫展屏錫笠澤書緝錫

匣給鮮徵食單。虎忍俊妨淨業。少坐俟吟安。熊錫星芒動簾押。芳

邵晉涵

字與同。號二雲。餘姚人。乾隆三十六年會試第一。官至侍講學士。

蒲褐山房詩話。二雲學問。經緯史。包孕富有。而不以詩賦見長。在史館最久。數十年來。名卿列傳。多出其手。據實直書。未嘗有所依阿。瞻徇也。所著爾雅正義。先已刊行。又有孟子述義。韓詩內傳考。穀梁正義諸書。未成。皆藏稿於家。子秉華將彙而錄之。以惠來者。世人但誇其小學。蓋方隅之見爾。

秋夜作

英英西山雲。霏霏被高樹。明月無餘暉。飛來落何處。江草日蕭疎。江花澹容與。想見羽衣人。乘月披雲去。即目媚芳華。孤懷感羈旅。雲中君不來。風鈴夜深語。

題阿少司空奉使探河源圖

昔從石室校圖錄。紀遠得見河源書。偉歟盛治闢壘竈。于闐葱嶺成通涂。尋源特命世臣往。覈實還奏承帝俞。勒成巨編貯秘閣。流傳芳蹟存遺圖。連峰接天勢匝匝。盤陀一徑通幽嶇。巒迴谷轉地平衍。突見泉脉交融輸。垂杓宛轉排列宿。堆盤錯落噴靈珠。元人誤會鄂端尾。傳訛互証潘與朱。豈識上源更冲演。里餘三百黃英鋪。迤西巨石鞏摩谿。若戴斗極開辰樞。懸崖黃赤本鴻致。天紳百幅空中舒。粲瑩散作鏐盪影。傾沃疑有神漿儲。真源見處雲日期。山靈預使會嵐祛。乃知天池懸北極。真抵瀛渤成歸墟。豁疑千載

經目驗。豈非精意能感乎。古人睹記限方域。構虛設象終拘墟。流沙西海岫連屬。廣輪孰與分川衢。潛流出地注鹽澤。扶風義弗龍門殊。元公辨言述釋水。高源峻湊崑崙虛。渾泡穿地互汨漱。千七百一川所渠。簡語弗詳待申闡。影附誰信溝猶儒。披圖萬里在咫尺。攬轡如見神敷愉。閩風縹馬古有志。遊仙或在清虛都。

落葉

斷腸橋畔此重經。又見風林捲落星。斷梗隨風人易別。薄寒吹袂酒初醒。餘霞江路兼山路。暮雨長亭更短亭。憶昔攀條勞望眼。征衫可似舊時青。

周厚轅

字駕堂。湖口人。乾隆三十六年進士。官監察御史。有蜀游草。

入峽

入峽入下峽。三峽自此始。萬山自西來。東嚮同一軌。蜿蜒折復曲。澗窄僅尺咫。巔若地割據。趾若樹連理。爭勝各變怪。畧不一峰似。或立圭與璧。或爲虵與豕。或者施施來。或竟耽耽視。入定若枯僧。明妝儕女子。睥睨蹶復張。格鬪傾還倚。青蓮不上船。黃石又呼履。柱迴伏波銅。壁換臨淮壘。初日麗觚稜。積雪益塔尾。舞馬忽升牀。牽牛乍臨水。登場選千佛。揭鉢走百鬼。金鵝十二屏。錦障石家里。厥狀難具陳。所見畧如此。

開闢豈其然。鏗鑿誰所使。竟挾岷江來。約束不得駛。旁激却積鐵。倒齧觸利齒。所以一葦杭。動費千夫指。尙有惡灘多。前途問行止。

註易洞有山谷書鉤深堂三字勒于石

絕磴陟秋風。一嘯羣木動。山腰復右折。石腹裂中空。剜苔索古鐫。鉤深尙有堂。點易此其洞。陰凝紹聖元。冰堅天地凍。端禮碑未書。泚水颿先送。崇政去已遠。織網密無縫。一舸泛黔涪。四境樂旃幘。海外幾歸人。朝端鮮鳴鳳。致此岩竇棲。勢比邱山重。剝餘碩果甘。否極羣賢痛。象占箕子貞。翼擬周公夢。居安序自清。樂玩辭堪用。如何洛蜀爭。亦效鄒魯閔。二賢尹焯譙定幸趨嚮。四座間賓從。涪翁兩字書。范守千秋頌。檻外朱碧流。遂作潢汙供。此邦藉沐浴。繼學得真統。繫我遠遊人。落帆一飛狂。仰止問津梁。山禽隔林哢。

過黃州用東坡先生定惠院月夜偶出韻

舟子解舟天未明。我尙蒙頭似中夜。小僮呼起看黃州。披衣已過東城下。城中竹樓遲客登。城外春醅向人瀉。連江麥浪正掀翻。數塢桃花尙低亞。好山仍如馬上看。美景漫向風前借。東坡遺躅復在茲。南樓一去真長謝。從今水月少客知。但有雲山繞官舍。我來未覓道士漿。渴甚頻思大官蔗。放膽將令北海空。打頭偏爲西風怕。不慚賡韻博嘲嗤。癖以好官由笑罵。

歸州夜泊

石裏沙爲岸。山腰樹作城。人家紛下上。鳥道幾縱橫。不雨雲常住。無風水自鳴。怒灘千古恨。蹉跌爲寒盟。

雲陽縣

已到雲陽縣。舟居戒早寒。人家三面水。秋雨一痕灘。利用餘湯井。清風問橘官。栖霞如可托。高處共吟壇。

嘉定晚泊

斜照落烏尤。山城俯碧流。花明煙外市。燈散雨中樓。古道平羌界。高齋萬景收。萬景樓 宋築何年方響洞。佳句

爲勾留。見涪翁詩

留別吳少甫學使即用其見贈詩韻

從君買就玉壺春。欲盡沙頭酒數巡。好倚風琴聯舊雨。憑教夜話接清晨。收來蘆荻洲前月。照出關山笛裏人。別袂不嫌聞折柳。梅花時節賞花新。

魯仕驥

字九臯。號絜非。江西新城人。乾隆三十六年進士。官夏縣知縣。有山木居士集。

蒲褐山房詩話。絜非學本儒先。躬行實踐。不爲聲韻之學。獨留意於古文。少師朱君仕琇。由劉海峯大魁。而溯靈臯方氏。以上至曾王。登科十年。始謁選得山西夏縣。蓋司馬文正公之鄉。絜非益自喜。將求所以無愧于文正者。今大司馬宗室長君麟。方爲巡撫。稔君學行。時諸州縣請買補。常平倉穀。以收餘利。絜非謂穀價方貴。豈可病民。請即停止。長君驚異。舉以風示通省。欲薦于朝。未幾病卒。子

二長肇光貢生先歿次嗣光舉人亦能古文嘉慶己未會試歿於京師兄弟皆爲彭尚書元瑞曾運使燠所愛重然諸孫皆幼而絜非文刻者半未刻者半恐無人爲之哀集也

秋夜客懷

人生遠離苦。最苦秋夜闌。況我孱弱息。終年背鄉關。悠悠日復日。會當何時還。時至氣候變。得毋衣裳單。衣單固足念。所期日加餐。皓月照庭隅。徙倚生感嘆。寒蟬號高樹。蟋蟀吟羅幃。此時涼風起。蕭蕭入深閨。君子遠行役。悠悠我心思。容華不足念。但感久別離。舟行願無波。車行願無泥。驅車望鄉邑。歲晏當來歸。庭前紫荆樹。豔麗正着花。如何風雨至。摧殘相交加。枝葉半顛顛。葆養此根穿。人生骨肉情。視此足嘆嗟。亡者既已矣。在者客天涯。及時莫遠游。丈夫當懷家。

由幽棲寺溪行登棲靈峰

杖策指高峰。巘岿逼層嶺。傍嶺途可紆。選勝屐復整。逶迤沿溪流。徘徊俯密靚。綠草嫩如抽。幽花爛吐炯。漸入見古寺。煙光接青冥。遂穿林木叢。仰測巖巒頂。鳥徑辨微茫。雲竇託溟泮。緬然得殊觀。遐哉闢異境。耳目既昭朗。心期轉清迥。眷言宅斯宇。得往良爲幸。

徐長發

字玉厓。婁縣人。乾隆三十六年進士。官建昌道。有經稼堂魚通諸集。

田園雜詩

野水接茅屋。鷗鳥常相親。蕭蕭蘆荻浦。依依見停雲。商風日夕至。薄寒初中人。田家刈晚秣。午雞鳴煙村。歲稔多裕色。逍遙及佳辰。近局有好懷。酌酒召比隣。願得長有年。覩此風俗淳。

夜叩永濟寺

畢景淡遙山。疎鐘起林樾。烟深巘路迷。露下螢光濕。石房犬吠幽。竹院梵音歇。佛火一龕明。僧雛倚空鉢。賴茲清淨緣。一契無生訣。遙夜啟禪關。杪權散涼月。

村夕懷薛肇文

浦口亂晚煙。華月在林際。竹樹生清陰。蘋花散香氣。涼露淨琴絃。微風襲衣袂。感念同心人。中宵悵無寐。

春暮述庵招飲蒲褐山房時余將欲南還

黃金臺上雲千疊。黃金臺下花如雪。我來三月薊門遊。好景江南坐成別。西清王公大雅倫。相邀共醉長安春。長安春景條已暮。西山朝爽常留人。湯泉脩楔歸來晚。玉河楊柳烟光遠。作詩潑墨擬蘭亭。如雲名士供游衍。吁嗟良會洵有期。紛紛飛絮霑人衣。飄颻却羨雲中翼。潦倒寧慚泥曳龜。劉琨墓外鳴雞早。劉蕡祠畔青青草。脩竹吾廬照眼明。底須鹿鹿紅塵道。

杪秋過張策時齋

黃葉閒門路。溪迴一徑幽。寒林下飛鳥。冷蘂發牽牛。寂寞元亭酒。飄零白社遊。著書應自得。端不爲窮愁。

夜宿瓜步

斜月仙人掌。蕭然佇客舟。葦花明夜步。漁火隱寒流。秋序逢搖落。鄉心感滯留。賦詩臺畔酒。一夕思悠悠。

九日霸臺讌集

霸水風寒白雁秋。竭來爲客此淹留。終年許下陳蕃榻。九日重登庾亮樓。酒對燕山秋塞遠。霜清遼海暮雲收。驚心佳節違鄉國。落日高臺起暮愁。

將出都門寄故鄉同好

紅塵障面已三年。翹首江關一惘然。擊筑漫沾燕市酒。負書還買潞河船。聊從鴻爪看陳跡。莫向牛蹄問去緣。瑁筵前春事晚。東風無那落花顛。

述庵方伯從滇南移節江西書來詢及入蜀後所著並述黃星槎所撰尙書釋義已成歆然爲賦

四絕

點蒼山色送行旌。早見匡廬五老迎。天與白蘇遊賞地。感懷蓮社不勝情。
湖海談詩有總持。未遺北宋與南施。劔門關路知相憶。垂老偏從蜀道馳。
黃山歸後興翛然。河鯉齊姜笑並捐。賸有當年建安筆。白頭還注伏生篇。

江湖老伴幾凋傷。悵望潯陽與泌陽。寄語青山遠相待。好從三泖問漁莊。

錢 豐

字東注。號南園。昆明人。乾隆三十六年進士。官至通政司副使。

蒲褐山房詩話。南園居臺諫。慷慨敢言。無所梗避。嘗劾山東巡撫貪暴不法。救審得實。正其誅。眉稜聳峭。同事畏之。其實中懷樂善。見如不及。清談終日。必以世事為心。君督湖南學政。予從雲南入都。道出辰州。時方扇門試士。予僅貽一刺。候之。而君遣人固請少留。比日暮試畢。即至予寓中。蟬聯絮語。燭見跋乃去。其飲人以和如此。君歿後。索其詩。不得。雲南門人袁子文。揆以所選滇南詩。略見示。故抄錄數首於此。

長風三首

涼風動湖水。黃鶴起飄飄。立秋已昨日。歲序逝莫要。我家百廿指。難終賴漁樵。計更出門去。病久筋骸凋。默臥念京師。長路愁迢遙。尚欣人不忘。所志非金貂。細月光隱隱。照我敝牀席。瘦妻中夜歎。十載久為客。未育一男女。聊與慰晨夕。更知幾何歲。復得同安宅。昔日兩鬢髮。今一已見白。從此盟匣中。何堪照顏色。明日具晨飯。盎已無粒米。堂上倘復知。分責逮諸弟。弟壯各能力。茹茶甘如薺。時命有利鈍。此意久所體。遠行堪代耕。私情復何啟。獨有涓涓淚。霑曾濡若洗。

宜都李明府石首王明府與荔村于役荊州。共為荊州詩。予時在公安。依韻寄之。

夔門東下接荊州。不盡濤聲日夜流。野次天分鶉尾閣。門高山磔虎牙秋。雄都峙楚規南幸。重鎮窺吳號上游。請向昇平論形勝。江花睡穩一沙鷗。

渺渺龍山放眼回。層城高倚夕陽開。空聞乘艦浮江去。誰信更衣駕櫓來。沙際忽添巫峽雨。烟中遙認楚宮臺。清時四境無豺虎。王粲登樓不用哀。

沙頭燈去路還東。絕岸南緣息壤通。乘醉來尋一柱觀。披襟全受九江風。龍鼉出沒蒼濤迴。烏鵲翻飛夕照空。莫倚能詩漫惆悵。老人星在野雲中。

天涯仕宦誼同敦。江漢風流古所論。清賞有時連畫舸。雄談竟夕倒芳樽。文章怕入孫郎帳。聲價終歸卞氏門。此夕公安城裏月。藥鎗孤枕對黃昏。

洪朴

字伯初。號素人。歙縣人。乾隆三十六年進士。官廣平知府。

蒲褐山房詩話。伯初美秀而文。溫其如玉。少與弟桐梧先後登進士。曾有三珠之譽。同鄉戴編修震金殿撰榜皆通經。伯初從之問業。故以員外郎督學湖北。飭童生能背誦五經者入學。諸生能背誦左傳周禮儀禮者補廩生。楚士翕然從之。後由郎中出為廣平守。將發屬令之虧空。衆人驚異。而伯初亦憂疑抑鬱。久之歿于任所。

送別述庵前輩後復得來書有感

誰料終成萬里行。折殘疎柳倍傷情。風饗雪虐人將去。母老家貧子未生。難燭憶曾同鶴禁。銜杯何處話

鷗盟書來只合藏懷袖。欲待重開涕淚傾。

伊湯安

字小尹。□□□氏。滿洲正白旗人。乾隆三十六年舉人。今官貴州督糧道。

春日遊焦山

鐵甕浮青嶂。遐觀萬象涵。圖曾傳海嶠。英咭喇貢使繪圖以歸秀獨甲江南。蘭若僧談雅。春山鳥興酣。耽游歸已暮。

纖月照清潭。

游南明山

競說南明景。公餘結伴游。荷香僧院靜。泉響石梁幽。古洞誇仙跡。虛亭豁遠眸。高情慙白傅。勝地幾勾留。

初冬雨霽郊行感賦

閒曹無事任游行。且喜連朝雨乍晴。破寺經年僧亦少。江城十月草還生。驚心節候同駒隙。到眼音書滯雁程。山色六朝看未足。臨風彳亍獨含情。

彭淑

字秋潭。長陽人。乾隆三十六年舉人。官吉水知縣。有蟾芝集。

雨後

雨餘爽氣生。夕陽照林薄。野泉奔別澗。晴虹下幽壑。已看庭草滋。更惜岩花落。延佇空搔首。春情自漠漠。
空館對雪懷故園。因憶城南諸友。

小圃積瑤華。霽雪澄清夕。清光射岩扉。寒色帶松石。飢鳥啄枯樹。凍犬臥簷隙。挑燈動微吟。幽意忽不適。
迢遞射堂村。蕭條楊子宅。南村數枝花。板橋幾兩屐。歲暮關河深。歸夢阻疇昔。一聞蕭寺鐘。更懷城南客。

晚泊九江九月四日去秋泊船亦即此時

寒碧一江橫。餘霞向晚晴。秋深元亮里。潮落灌嬰城。暗浪搖燈影。迴風帶雁聲。蘆花溢浦岸。棖觸去年情。
上饒道中

樹杪見晨光。烏鴉啼一行。桐陰山路淨。稻氣水風涼。縹緲看雲岫。徘徊渡石梁。村沽仍釀白。勸飲是吳娘。
送徐玉田寶麟署南安郡丞

太息天涯日暮雲。故人落落少知聞。相思舊雨非今雨。惆悵逢君是送君。也恐青衫愁司入馬。誰將蠻語問參軍。好烹一掬芙蓉水。消受梅花到夕曛。

東軒題壁

露下木樨香滿庭。秋堂燈影夜深青。微寒又作瀟瀟雨。聽到梧桐酒忽醒。

黃州憶章門諸子

大江春水拍天流。萬頃波中一葉舟。南浦故人相憶否。斜風細雨過黃州。

汪端光

字劒潭。江都人。乾隆三十六年舉人。官廣西府同知。有沙江晚霞才退諸集。

畫溪訪龔克一

十里畫溪水。茶香動野烟。好山尋舊侶。孤艇入新年。不負春前約。來當雨後天。鶯花猶未足。無事日高眠。

今夜

今夜篷窗宿。鄉心醉欲迷。殘燈猶叫雁。疎雨忽聞鷄。舊扇花應染。新裙草漸齊。嘉辰誰更在。不解翠眉低。

次玉才韻

江南柳色不同看。莫遣吟腰更倚闌。小雨無情天脉脉。春燈如水夜漫漫。知愁每覺貪眠易。愛瘦應憐強飯難。底事天寒勞翠袖。苦將脩竹問平安。

湖海詩傳卷三十三

鄒炳泰

字仲文。號曉屏。無錫人。乾隆三十七年進士。今官倉場侍郎。有午風堂集。

蒲褐山房詩話。曉屏清真廉介。素以名節自持。山東江西兩任學政。非特苞苴屏絕。即偶有承筐。亦必卻也。詩喜明七子。而風格實在青邱。漁洋閒清妙之致。溢於楮墨。五言如疎梧不藏月。深竹解迎秋。晚風漁火小。細雨估船稀。歸僧松影外。清磬竹聲中。林藏兩厓合。樓出一峰高。細雨高城雁。秋聲古戍笳。潮聲到關盡。帆影上城來。人歸穀雨後。門掩竹風初。東嶺猶藏雪。南湖已送潮。七言如山鐘過澗。初知寺。江月升舟欲上潮。長廊不作秋。佛明燈夜。高館秋槐聽雨時。霜後園林如我瘦。溪前門巷幾家新。山迴晴郭猶含霧。風定寒蘆不作秋。破屋自聽蕉葉雨。平橋同試藕花風。石磴茶香清暑後。書牕梧韻晚涼餘。近郭花明秋浦月。過橋鴻落蘄門霜。極浦帆檣浮郡郭。秋山風雨到城樓。病餘不受三春色。雨後初逢六月花。花皆如列子。御風冷然而善。又撰午風堂叢談。名公佳話。詞林典實。多摭其中。足為史學之助。

惠山石門精舍

松風入巖隙。響在空山曲。攀崖歷幽洞。翛然出塵俗。水簾挂絕壁。百尺注山足。石門古苔封。精舍依林麓。人去春巖幽。芳草空自綠。登茲離垢地。鳴禽亦忘欲。

泛舟滸溪橋取道碧山莊至忍草堂同若洲阿巢葑齋諸子

尋山雨益佳。挂席下溪水。沿隄凡幾曲。人家紅蓼裏。安知滸溪口。山色澹如此。杖策碧山莊。登山從茲始。

芳塍屢沿緣。石磴更迤邐。歸雲巖寺積。流澗平林駛。落日草庵上。一半孤煙起。入門鳥語寂。坐久鐘聲止。愧無信宿緣。輕舟已東徙。

晚次梅心驛

日午過南溪。言尋伯時墓。道上無行人。惆悵空山路。南望衆山好。接鬣自迴互。龍眠與鹿起。倏忽各奔注。松杉自凝遠。丹楓隱復露。溪聲多在樹。屈曲意所赴。三旬觸風埃。到此忽如寤。望遠境屢移。歷近窈難泝。夕雨忽又至。楓香在深霧。竹房聊小憩。前途莫迴顧。

家小山宗伯畫竹

吾鄉畫手多吳裝。高逸舊數倪與王。兩公畫山亦畫竹。後有繼起推廷璋。中間作者亦草草。譬之江湖有行潦。近來耆壽兼畫禪。吾宗獨推二知老。昔年望重春官卿。晚入九老圖耆英。退朝無事工寫生。春花秋樹隨意成。好與苦竹森秋莖。墨花亂捲了無意。真氣結束中分明。頗疑秋雨深夜至。珠露欲落寒無聲。長歌短詠舊時作。愷郎小印朱紋錯。收入行囊什襲珍。時時猶聽風生籟。別來忽已五載餘。西亭佳會難如昨。賸與雲林舊畫圖。一時供奉招風閣。

周燦仿趙承旨鵲華秋色圖

一峯上剡何年立。天半華柎露初濕。鵲山近附半烏頭。相向晴空作秋色。濟南名山此當戶。松雪雲囊急

收入右丞北苑筆底兼神物由來供秘笈。周生見畫不見山。淡著青黃靳墨汁。磐石華泉暮雪封。翠屏灤口朝烟戢。我時過此不得上。自笑郵車太急急。單椒秀澤語益信。妙盡山容畫難及。我無仙骨換元丹。扁鵲遺經枉傳襲。歸向橋邊四照樓。垂楊時放山光集。還思重訪曾晁蹟。歷山堂畔北渚隰。甘受齊人說好事。一證詩人舊結習。

廣陵舟中送馮道州西遊

黃鳥啼高樹。離人悵遠行。問予將北渡。憐爾獨西征。細柳春山驛。寒烟別浦城。新愁江上水。一送布帆輕。

寄吳秋岳

十里邦江水。流從九曲橋。知君谷口住。時見廣陵潮。客館吟紅藥。春帆奏玉簫。宵深竹西路。清月正迢迢。

新城旅館

春陰不作雨。昨夜又西風。花落鳥聲寂。山寒人影空。客書頻自檢。鄉夢幾時通。莫惜流光駛。當階芍藥紅。

訪顧子邨居

小雨過溪上。秋齋晚最宜。相逢寒露節。來誦故人詩。樹密藏鳩婦。洲寒宿鴈兒。卜鄰吾有意。清味野翁知。

蓬萊閣觀海

丹崖傑閣鬱岩巖。放眼高秋積霧消。滄海一泓真可泛。神仙終古不堪招。估帆風定春通舶。列島天清午

送潮闌外朝霞飛不盡。仙遊重見赤城標。

大風渡九江望庾樓作

使程初喜駐江干。路入雄疆倚檻看。十月濤聲溢浦合。大江風色庾樓寒。賓僚後約空舒嘯。山郭新圖記勝觀。明日匡廬真在望。雨檐蕭瑟夜將闌。

送人之淮安

長淮渺渺起秋波。板閘沙堤取次過。日暮劉伶臺上望。故人曾住十年多。

毛上臬

字羅照。號宿亭。鎮洋人。乾隆三十七年進士。官戶部主事。有思補堂詩集。

蒲褐山房詩話。羅照弱冠好詩。與同邑王瑜陸元邁結詩社。出入唐宋。才情橫厲。又工畫。初效原祁。繼與王宸臨摹宋元名蹟。縱橫變化。獨自成家。在中書時。諸城劉文正公謂之曰。一卷青山送一年。非君佳句耶。其名重公卿間如此。

刪竹

草堂數竿竹。託根始田畛。分攜栽我庭。位置擇深穩。加泥復灌泉。珍護風霜隕。積厚乃敷榮。歲歲茁新筍。嬋娟散新碧。蒼翠聳尋引。子孫不知代。干霄集鸞隼。秋落悲梧桐。朝榮笑木槿。何如對此君。猗猗日悃悃。出門今歸來。忽歎生理盡。叢箭竄階屺。橫篠礙戶楯。既掩文石秀。益露古牆蠢。扶持莫自立。恣縱終見損。

未免施斧斤。鬱鬱感憂慙。種植頗艱難。棄置良弗忍。此竹亦猶人。願人學務本。

從義扶乞草書歌

風雨颯沓波濤驅。斗室恍與龍蛇居。回頭忽悟屋漏壁。長矛利劍光鋸舒。宏農二妙天下無。三杯癩史神仙徒。筆堆如山那可至。要使萬卷充膏腴。多君三昧擅家學。肘後傾倒青泥壺。怒龍倔強兔飛走。枯松叫鶴波驚魚。杜陵評書貴瘦硬。此論往往嘲髯蘇。楂枒臃腫各天性。何薄饑鷹誇墨豬。方圓在眼法在手。筆勢欲落先躊躇。興酣揮灑數百紙。狂呼跳躍縱橫如。今人不識顏柳面。干祿乞米何爲乎。少小喜學元祐脚。依樣那得成葫蘆。白州刺史來蜀都。肌理細膩脂凝膚。請君一掃筆陣圖。勿云未暇匆匆書。

夏苗行

古氓出兵兵歸氓。今氓爲氓兵爲兵。古蒐獮狩大閱精。今以苗治無妨耕。茜涇教場廣于城。一井可以屯千營。中央瓦屋高建瓴。迺是演武將軍廳。虞人萊田沙草青。百步一表牽長緹。質明赤日懸銅鉦。風翻帥纛黃金鈴。觀者如海如山陵。兵制防海數議增。詔寬餉額充千丁。此時教場列陣明。縣鄙鄉野各以名。馬步鎗戢分四停。整兜貫頂紅驥纓。銀鎧金闌爛眼睛。大書日月風雷霆。我刀我淬戈我矟。青犀之弧白鷗翎。誰其遮者洞爾膺。士氣旣飽馬氣騰。炎鼓肆虐滾火輶。官堤偵騎飛流星。將軍臥起解宿醒。正啖牛脯饗羊羹。須臾鏡角動地鳴。狼豕沸穴猿落檜。撐天火繖黑隼旌。師旅卒兩伍長迎。將軍騎馬馬不勝。以人

作馬肩輿行。直入堂上擁毳毼。中軍狗陳先斬牲。不用命者如此令。鼓人伐鼓聲鼕鼕。隊隊伍伍雄彪彌。上軍下軍天地亨。左軍右軍牝牡承。前軍後軍鵝鶴形。八闕六花環四層。震離定位陰陽靈。人入馬出馬絕鞫。馬入人出人超驟。或擊其首其尾應。或犄其角其脛撐。穹廬菱含軋霄嶂。忽登天姥聞吹笙。是名大陣威材成。小陣刺擊虎格凌。膈膈膊膊鏗鏗錚。失手人鬼呼吸爭。使我慄股陰山冰。撩交復起拳脚并。銅獅鐵豹相排擊。爾欲我撲我爾傾。拔山不動均輸贏。轟然合圍殺氣蒸。大礮小礮雷豁軋。大弩小弩星貫棚。而鉞而鑕而蠻籐。四五百步飛蒼鷹。塵埃漠漠雲晶晶。青天白日黃冥冥。帳前撼谷射老麋。幕下攪海擒騎鯨。將軍曰止執律興。六軍不聞人馬聲。我聞飲飛百萬利用征。晉壘楚壁無堅扃。又聞神威龍武衛。玉京鴉兒雁子多縱橫。卽今桓桓貔虎英。以此衆戰孰敢撓。蠢茲木邦作不庭。滇池萬里烽烟驚。臣桂臣衰臣相恆。帝曰帥師惟汝貞。天戈所指機槍清。不日銅柱標新銘。三軍脫甲歌太平。億萬千歲金甌寧。爾輩可以休戈稜。將軍曰我承天子之命弗敢輕。明日再演狼山營。

榆河曉發

可憐榆塞月。夜半出柴門。寒入黃蘆戍。秋殘紅葉村。密林防虎械。野火散羊屯。此去憑誰問。蕭蕭慘客魂。

涿州

雨雪罨孤村。樓桑近北門。一堤沙路軟。雙塔樹陰昏。忽下吳人淚。難招蜀帝魂。朔風驚刺骨。還戀敝裘溫。

宣化府三首

形勝居庸控上都。黃沙一片夕陽孤。金城鎮處封疆重。玉輦巡時草木蘇。雪後見花春寂寞。雲邊認鴈月
模糊。懷來萬里車書集。不作丁年出塞圖。
迢遞香河接阪泉。天弓曾此發雕弦。龍門曉月猶存代。狐嶺秋峯直到燕。雨過葡萄隨店賣。日長雞犬上
牆眠。烏桓景物猶堪誌。銀箭銅爐送舊年。
險驛雄關僕馬難。臨風頻灑涕洟瀾。天圍部落秋原迴。人過營臺曉色寒。堡樹獵餘收捺鉢。寒田春早熟
牢丸。龍庭亦是桑麻地。只有征夫不忍看。

荆軻城

變徵歌殘白草枯。紫荊關外月模糊。真令豎子埋屠狗。終遣西周聚憚狐。賓客尙看揮涕淚。將軍空自費
頭顱。卽今易水蕭蕭起。不見當年督亢圖。

飯笠畊先生齋得餐字

草堂粗糲共朝餐。書卷綸竿四壁寒。往事久拋同馬蹟。故人那肯累豬肝。閒挑冰雪青蔬圃。笑整溪山紫
籜冠。高臥醉鄉還自署。梅花亭長橘洲官。

新燕寄王卓潛

歸來何處又匆匆。巷口江頭旅夢同。萬里掠將寒食雨。一番吹過杏花風。家家玉壘香泥碧。夜夜雕梁燭影紅。莫倚辛勤好長住。傍人門戶總成空。

登甘陵城樓

旌旆飛揚雉堞平。高樓臨眺不勝情。潮聲夜轉盧龍塞。樹色遙分夾馬營。人渡三關稀見鳥。春歸五月始聞鶯。如何董相談經處。惟有蕭蕭禾黍生。

許兆椿

字秋巖。雲夢人。乾隆三十七年進士。今官江蘇糧儲道。有秋水閣詩鈔。

蒲褐山房詩話。秋巖與弟石泉兆棠先後入詞館。咸以才名。而石泉早卒。秋巖轉御史。降刑部郎。由知府而至監司。躋躋仕途者幾三十年。嘗與予案事高郵。及長沙。應山。衛輝。諸處。同羈旅者年餘。于思飄然。議論明達。工詩善書。尤精於吏牘。下筆千言。無不迎刃而解。蓋非獨以吟味見長也。與其鄉余元亭同知彭秋潭。明府文名鼎峙。予過雲夢。造其廬。老屋數椽。蓬蒿掩戶。竊以為元次山漢溪之云。

題吳明府 雲衣 癸未進士 江西人 石門山圖冊子

荆山揚鏗爭摩天。欲斷不斷浮蒼烟。千盤萬疊石門出。峭巖一坼流奔泉。橫橋直架洞底壑。漱瓊鳴玉聲濺濺。溪風吹翠濕欲滴。老樹挂壁根空懸。梯山鑿石盤鳥道。古藤百尺愁攀援。茅檐一二負嶂立。夜半駕鶴來飛仙。如何造物不自惜。更於絕壁窮雕鐫。懸青萬仞門呀然。一步一使心迴旋。如鴉蝙蝠撲人面。似

乳石髓滑不堅。天風掃斷塵埃蹟。杳杳時有閒雲眠。使君青眼了不負。亂山堆裏居三年。拂衣一旦擲官去。綠陰處處啼春鶯。祇留山色在圖畫。未妨羞澀囊無錢。驅車京洛塵滾滾。興劇一放黃州船。雪堂月好快把酒。時客羅太守旭莊所江天萬里清而妍。此時披圖發長嘯。石門之山落眼前。要留面目對山色。豈可飢餒供人憐。我歌未已君忽笑。此語未足聞時賢。置圖一鼓瀟湘絃。衆山響答空中傳。

曉渡吉林江

渡口人初聚。波心鷺不驚。塞天風有色。江浦月流聲。截岸山屏壯。衝煙桂楫輕。大哉觀水德。千里總澄清。

舟中酬召村

衰柳依依漢水潯。危檣南下氣蕭森。人來絕塞三秋過。事到中年百慮深。薄祿虛霑悲子職。長途久滯繫親心。寥天旅鴈何多事。又送嗷嗷入夜音。

漢江舟中和召村

五湖泛宅計猶賒。擊楫今登漢上槎。世味漸諳知老大。鄉園欲近問桑麻。隔村樹杪馳帆影。逼水堤根動浪花。無限心情同着眼。可憐倚棹聽慈鴉。

過萬小莊與同人小集

幔卷高軒夏日長。圍棋作畫任徜徉。風驅殘暑剛新霽。人戀窮交況異鄉。事到中年多感慨。語因小醉恕

荒唐劇憐子敬琴聲寂。冷落當前鬪酒場。小莊與石泉弟交至篤。石泉下世。今年許矣。故感及之。

灤陽雜咏

塞上雲多易作秋。垂楊何處起邊愁。羣山碧重烟初合。魄月明生火已流。小立森寒添半臂。大言論事愧長頭。無端搔首驚清聽。不斷飛鴻叫遠洲。

占得鳩巢十笏寬。入門草草卸征鞍。袍痕濕帶潮河雨。日色明流太乙壇。山截龍沙天保障。地尊斗極夜高寒。朝來封事知多少。恐對漣漪賦素餐。

羽書三捷奏甘泉。萬里行師總萬全。雨箐旗飛山奪險。雪林碣磳石摧堅。風雷直破蠻人膽。日月原臨化外天。髀肉未消空策馬。據鞍何處着先鞭。時方廓爾喀用兵。

上元日至山海關即事口號

使星幾度出營州。佳節真教賦壯游。記得前年長白下。雪花如掌作中秋。王子秋奉使奉天。再使黑龍江。中秋大雪。重陽又雪。
春月初圓第一宵。別離草草路迢迢。還家夢是今朝好。明日關城隔更遙。

李堯棟

字松雲。山陰人。乾隆三十七年進士。今官延平知府。有寫十三經室詩鈔。

仙霞嶺

亂竹刺天高。松聲萬壑濤。千盤出雲表。百里見秋毫。北望無飛鴈。南維割斷鼇。蠻烟深隔處。天爲限神皋。

山家

田亞綠雲梯。叢叢板屋齊。春聲溪近遠。日色嶺東西。墟古人烟少。岐多樵徑迷。征夫行不得。愁聽鷓鴣啼。

吳俊

字曇繡。號蠡濤。吳縣人。乾隆三十七年進士。官山東布政使。有榮性堂集。

蒲褐山房詩話。蠡濤與弟少甫。同以畫省望。郎稱詩京雜。又與馬玉圃。培李滄雲。葵詩場酒座。無不同之。而蠡濤取徑幽深。精心獨造。非但不捨人間餘唾。亦不必盡合古人矩矱也。從軍以後。崎嶇烽火。所見益奇。筆足以發難顯之情。即少甫亦多不逮。

徂徠山下

一往入楓柏。不知谿路深。林開見巖壑。窈窕徂徠陰。雨足黍苗長。綫溜懸遙岑。落日一照耀。石髮抽瑤簪。上王在何處。上王村名梁父無人吟。三兩見牧豎。百十飛水禽。喬松不可見。蒼霧秋沉沉。

再遊千像寺就僧飯

山門故依然。斷紐懸危鐘。寺僧如猿獠。跳躍捧我筇。親切竹裏路。狎熟林梢峯。經唄講堂歇。水磨齋廚春。碗葉嫩勝翦。椒芽芬可供。疆疆鵲覓粒。宰宰鼯窺墉。師談往日虎。我恍鉢底龍。落日且辭去。花霧堆重重。

藤縣用東坡先生藤州江下夜起對月贈邵道士韻

潭溪水如刀。飲之淬心肝。藤州城似斗。細路蛇蚓盤。我憐黃頭兒。赤脚踏急湍。前尻壓後脛。窘坎不暇看。而我倚篷坐。西風送朝寒。耳目暫閑曠。意與棲鷺安。摩挲雙鶴研。清露瓜瓢溲。新作二端石。研搗以自隨。是中出新句。墨灑江漲漫。道士不可見。林禽弄幽彈。緬懷儋耳客。扁舟下空灘。

百色

山髡水復頽。草木遭蒸烹。火雲卓朱蓋。罩此斗大城。我行冒溽暑。載驟心怵怵。足熱解鞋系。頭汗憎冠纓。或言此火宅。硫磺灼溝阬。一雨山骨沐。熏毒流縱橫。飲之損人壽。淳之膩不清。連檣艤市舶。貨薄錢則輕。厥利入僑籍。土著不得爭。日日兵馬過。數數賦役并。老翁走蹙蹙。弱丁啼愴愴。衙吏虓虎闕。里甲勞魴鱗。節氣過芒種。礪确方犁耕。十牛九將子。且哺而且行。過時歎不穫。何以贍我生。覩之心慘怛。不能已徂征。堂堂大司馬。兩手握萬兵。雷霆淬精銳。耳目開聰明。要當蔡州襲。勿作楚幕偵。滅此遂朝食。卷旆敲金鉦。壺簞實漿食。千里毗黎迎。

題春明廣文畫竹

一竿受風娟欲語。一竿撐空拔儕侶。一竿橫逸露半身。下有緝嬰尙戴土。廣文胸中十萬竿。三竿乍向醉後吐。以其落筆想其餘。鸞鳳鞭笞伏膺腑。長安酷暑鎖渴羌。清風萬錢何處賈。濕雲漏雨騰蒸飖。木榻驅蠅坐沸釜。翻身向壁變清涼。稍覺湘妃步秋雨。可憐內熱損精神。一幅琅玕那堪煮。

濟南秋思

商意入林薄。蕭晨鷓鴣鳴。山連牟子國。水遶晏嬰城。雨洗碧天淨。草涼池館明。長安一回首。愁絕鴈南征。
眷眷追前約。舊秋頗多文酒之會。怱怱俯逝波。姓名秋社熟。詞賦驛亭多。密雨侵蘿薜。西風颭芰荷。修鱗三十六。不寄一書何。

晚秋池上

俛仰小池上。西風驚客心。不須感搖落。長自愛秋陰。梧竹倚娟妙。水雲相淺深。禽魚知我樂。舉步卽華林。

清化驛

翠嵐堆白屋。綠幔捲青岡。無雨楫欄戰。微風蘭杜香。騷情憶公子。幽館恐斜陽。明日崔婆酒。停驂試一嘗。

羅舊驛館

行看嵐翠潑人衣。坐覺溪光冷入幃。境美最貪茶後睡。身輕差熟夢中歸。山銜楚雨黔雲起。鳥掠湖煙嶺樹飛。一曲芷江清徹底。美人不見思依依。

老鷹巖

蒼鷹摩翅入雲中。鑿壁誰將爪距礮。戍卒拾薪尋虎蹟。山人削枳縛牛宮。故知狐兔無藏窟。祇覺鷓鴣在下風。側起一岡猿臂拓。拏人先遣眩西東。

與玉圃比部夜坐

南院啼螿北院箏。商音淒霧不分明。二更秋自銀蟾吐。小語涼從冰簟生。才子性靈盟楚畹。仙人樓閣寄瑤京。莫言一樹無情碧。會寫風聲更雨聲。

奉檄赴西粵軍營留別寅僚和莊胥園廉訪送行原韻

萬里特柯一羽翰。鍍衣試着路人看。書生敢謂平蠻易。幕府深虞轉餉難。祖席舞花剛爛漫。征帆拂樹得輕安。故人四韻珍朋錫。為遲秋風載戢干。

李 棨

字滄雲。長洲人。乾隆三十七年進士。官順天府府丞。

憩雨花菴

侵晨入野寺。小憩試烹茶。竹露半窗靜。松風一徑斜。新詩題古壁。佳話寄僧家。先是管松崖龔荻浦我亦

南行客。蒼然兩鬢華。吳太史原詩有白髮未還家句故云。

登黃鶴樓

仙人騎鶴去。何日復飛來。獨有清秋月。長留漢水隈。城臨高岸起。樓倚暮烟開。詩思凌虛發。何須玉笛催。

秋日遊毛氏園林

隨時尋適意。埜色澹秋顏。竹木何蕭瑟。湖山自往還。松濤石上落。花露月中殷。儘得林泉趣。西風葉已斑。

題曝書圖

憩石消殘暑。空庭好曝書。松風一逕入。竹露半窗虛。墨古留冰繭。香清走蠹魚。晚來乘月讀。涼意滿衿裾。

鐵保

字治亭。東鄂氏。滿洲正黃旗人。乾隆三十七年進士。今官山東巡撫。

蒲褐山房詩話。治亭少入詞垣。借其弟閩峰並以詩名。而治亭尤工書法。北人論書者。以劉相國石庵翁鴻臚覃溪及君為鼎足。嘗選集國初以來滿洲人詩。為熙朝雅頌。其一百二十卷。以子向在我幕。與章嘉文成公多倡和之作。從子處錄而補之。蓋百餘年來名人傑作。搜採無遺。尤足為盛朝掌故也。乾隆庚戌高宗純皇帝東巡。子與閩峯扈蹕。屬車豹尾間。恒相酬贈。惜其詩已佚。無從蒐輯。附識于此。

遊醉翁亭

滁山萬笏青。選勝得幽邃。中有歐陽亭。翼然臥空翠。枯梅挺異姿。云昔公手植。老榦標千年。餘蘖發新致。四維匝修竹。天影不到地。瀟瀟君子風。林壑自生媚。亭南疏釀泉。百尺漱清泌。曲折雲確穿。噴簸崖骨墜。亭中何所有。屢禳富碑記。屹立坡翁書。斑駁露神異。遙遙六一翁。樂歲勤撫字。醉飽滁人同。酣歌豈遊戲。我來醉翁亭。不識醉翁意。咄哉羣吏醒。何如此翁醉。

荏平

路人重邱境。肩輿扣縣門。地延孟子館。人近魯連村。樸俗衣冠陋。荒城鳥雀繁。礪礪成賸蹟。古月澹黃昏。

宿花莊

晚就花莊宿。花莊花已淒。田車欹短壁。水特臥荒畦。日夕桔槔靜。秋深擺極齊。孤吟村漏息。土屋坐然藜。

滁州道中

萬壑壞滁郡。肩輿入翠屏。烟蘿沈大野。玉筍插蒼冥。晚稻沿溪熟。秋雲帶雨青。風高懷六一。渺矣醉翁亭。

雨中過鄒縣望嶧山作

嶧陽千仞鬱崔嵬。雨濯芙蓉面面開。碑碣字消秦帝後。風雲氣擁岱宗來。山川地有參天勢。鄒魯人多曠世才。我欲登高停使節。隔溪空翠濕龍媒。

登攝山最高峰

危峯削巖外。瘦削芙蓉入渺冥。龍虎氣蒸鍾阜白。金焦影蘸海門青。時平莫問山多隱。僧老方知藥有靈。欲訪江郎舊亭館。碧雲紅樹幾飄零。

卽事

白雲瞻望淚洶瀾。嚼蘗肝腸強自寬。愁裏逢春驚老至。中年生女作兒看。宗圖欲譜成家乘。祀典仍虛媿禮官。更有佳城營未得。數椽擬構闢荒寒。

贈友

緇塵浣盡素衣輕。抱影空齋擁百城。僕愛詩依蕭穎士。客逃名喜蔣元卿。三餐自爨長腰米。百罰頻澆折脚鎗。老矣青壇真故物。雄飛雌伏各忘情。

落拓名場未有涯。周妻何肉累頻加。喜從白傅分鱗爪。肯向元暉藉齒牙。湖海氣高身獨臥。溪山興遠夢無家。顧郎自是難衣食。白屋青燈鬢已華。

春夜

北斗崢嶸鑑薄帷。讀書聲緊漏聲遲。烏啼偃月初暝後。鼠竄枯燈欲燼時。壯志漸隨春夜老。苦吟未許硯冰知。放翁詩卷音難嗣。後五百年狂者誰。時讀放翁後五百年無此狂詩。

滕縣謁文公祠

齊楚縱橫鼎屢遷。彈丸百里祚孤延。不須更問維新術。已共成周八百年。

馬緯雲

字依墀。海鹽人。乾隆三十九年舉人。有白沃山房詩卷。

蒲褐山房詩話。依墀為墨麟先生之孫。綽有才情。工於綺麗。予修西湖志于湖上。就莊依墀與趙晉齋魏朱映濤文藻沈嵩門景熊汪秋白大經王秋陸復項金門塘皆與纂修之列。而依墀所輯人物志尤詳。予旋奉旨以直隸按察使起用。書未及成。藏於鹽署。後佚。

妙智寺用韋蘇州義演法師西齋詩韻

引杖步郊屨。杳杳聞清磬。古寺修竹深。幽禽悅真性。入門藹以綠。草積無人徑。澹然去來緣。秋山起遙暝。

長歌呈桑水部院長

先生稽古經術崇。手扶大雅陶愚蒙。餘山勞先生麟書絕業繼濂洛。英靈肯許常人鍾。茹韓吐蘇大手筆。過都

歷塊如風驟。金庭石室不肯住。富貴於我浮雲同。長空倏忽搖天風。偶乘雲氣騎飛龍。黃雪亂灑千長松。

泉聲兩耳鳴琤淙。芒鞋竹杖自來去。遍踏五岳青芙蓉。自從歸隱聖湖曲。空堂夜讀聲摩空。賤子寂寞海

濱上。夙昧經義徒雕蟲。竭來飄泊淪楚澤。書皮高閣塵黔容。昔年親故半未覲。論交三世今識公。公開寶

帳集都講。煦拂四壁春融融。五金在冶仙火鎔。斧剗片削加磨礪。吾儕豈甘自暴棄。熙恬竟日隨嬰童。人

生不朽有大業。欣戚豈在塞與通。上自皇墳下稗乘。披尋一一羅心胸。無味之味貴獨得。力田寧計豐年

逢。少年歲月況強盛。旭日炫采緣升東。微軀七尺著何處。苦無大藥仙疲癯。高齋思附鸞鶴翼。薄采終棄

蓀蘭叢。太息古學坐蕪蔓。語欲出口傷瘖聾。洗荒滌穢竟莫覲。浮聲掠影徒相攻。安得虎觀諸儒作。掃除

宿霧摩青銅。行愁坐歎苦未遂。先生白首猶趨雄。烟林拔起雲當中。膏雨到處繁花紅。笑指枯枝枝盡綠。

春華無使隨秋蓬。

五人墓

奄黨噓殘燄。成仁竟殺身。屠沾能此舉。冠蓋竟何人。毅魄荆榛聚。豐碑最屬新。要離遺塚近。俠烈共嶙峋。

同汪柏巖淮射亭河昆季過南屏訪心舟上人直雨留宿山舫

杖策萬峯頂。寺門山雨涼。竹深烟磬寂。花落石床香。白社棲心晚。青山笑客忙。十年今信宿。得飯贊公房。

予客楚中。吳竹堂進士為予亟稱心舟。及今識面。已十年矣。

歲暮雜感

大江南去古揚州。修禊紅橋攬勝遊。盧公雅雨轉運揚州時曾修禊紅橋轉眼豪華成代謝。當時羈屐擅風流。不堪痛哭羊

曇路。何處重逢郭泰舟。更是丁零關塞遠。朔風吹雪海西頭。盧公令嗣蘊齋觀察時奉命出塞

匆匆書劍枉飄零。曾泛扁舟到鶴廳。黃鵠山高看判牘。桃花洞曠憶談經。移來香草騷人賦。欲吊湘江帝

子靈。小阮近聞多著述。爭看摛藻耀天庭。懷吳明府古心先生香草居稿吳宰長沙時著

夜坐有感

迢遞孤懷怨暮砧。裊裊風露上衣襟。空堂清簟隨秋冷。小閣殘燈入夜深。落葉有情終戀樹。幽花無處不

關心。支離倚枕慚多感。攬涕何能寄好音。

董詔

字馭臣。安康人。乾隆三十九年舉人。

蒲褐山房詩話興安界聯楚蜀地入萬山枝鹿之風幾同禁味孝廉無待而興獨能覃研經史絕不為俗學所拘洵豪傑之士也生平貞介自持不趨公府自吳太守六鰲鄧大尹夢琴兩君外其餘貴人招之不往作詩頗宗杜陵句奇語重而驅使故實足以副之正非稗販點竄者可比近日鳴狐篝火逼近興安而久聞隱君子名戒不入境故得自安耕讀閭井晏然

題禹穴

大禹藏會稽厥生在石紐遷史太白書兩地耀先後嶓冢導東流曾聞棲寄偶竭來訪遺蹤扁舟出洵口直下百里閒巉巖如新剖峭遮天躡窄浪激坤軸吼微茫石徑懸剝然開戶牖縱橫十笏地乃憩錫圭后四壁青琅玕疑鑄文蝌蚪欲譯忘家句剝泐惜已久回思西來流夾岸連岡阜中開坦迤地百僅一二有霖雨泛波濤渺焉成淵湫不知未治時何處窮澤藪美哉德遠矣到今賜實受摩挲營窟蹟緬懷決排手春秋薦蘋蘩社臘潔尊卣西蜀與東粵蔚為三不朽恨無謫仙筆擘窠鑿巖首出穴慨焉顧浩浩滄浪走

甲口鎮

望外楚山碧巖疆一水收圖經傳甲口地勢入秦頭兩戒雄南服千年壯上游欲詢庸濮蹟錫穴暮雲稠

秦瀛

字凌滄號小峴無錫人乾隆三十九年舉人四十一年召試賜內閣中書官湖南按察使有小峴山

人集

蒲褐山房詩話錫山秦氏素以事功經術見稱至對岩學士始擅詞章有蒼峴山人集故凌滄以小峴名集又雒生給事兄弟所著泉南山人存藁頗能接蹟柴桑以及襄陽摩詰君為給事再從孫五

言今古體具得其傳至七言古詩兼宗范陸具體而微蓋其家學所未曾有也。在武陵數年益以文章山水自任招邀賢俊屢爲詩酒之會刻前哲遺書又修望湖樓於湖上以供東坡修龍井寺旁隙地建祠以祀少游而詩文日益進然性情蕭澹雖勤於吏治而素無宦情遷湖南按察使不及一載以病乞歸東南人士猶冀其復出也。

循黃公澗至忍草菴二首

緣巖涉寒澗。蒼蒼翠微遠。偶因孤興發。高林屢迴轉。虛景重湖深。連陰衆峰變。松間乳泉細。竹裏餘風善。幽鳥時一鳴。不知山深淺。茅茨蔭長松。一龕鄰石壁。欲問楞嚴字。中有趺跏客。清機滿空虛。幽篁弄寒碧。夙懷清淨退。淹留便終夕。空山少來者。惟見麝麇蹟。

遊管社山莊

石出寒流清。幽篁映虛館。微風叢際來。空翠忽凌亂。乳竇泉脉動。峭壁烟華散。坐深潭影移。境轉山色換。息機渺漢陰。歸舟復三歎。

中秋起坐望月

夢覺山窗明。下塔整衣帶。石泉散清影。涼月森松檜。衆響一已寂。澄心與之會。獨無邨中琴。何人賞絃外。秋夜報恩道院與青谿別

街鼓逼嚴城。竹院鐘魚靜。了了潭上月。照見石髮冷。夜寒人未棲。露下鶴先警。溪橋一分手。落葉迷歸影。

山家

芒屨踏寒雲。路徑翠微裏。秋林橫短杓。人家映清泚。炊烟殊寂寥。山翁出門矣。日暮鶴歸巢。高風落松子。

翁舟

離鴻下秋水。谿色相與暮。泛泛何所之。浮生本無住。一棹入烟叢。笠上松陵雨。

渡江有懷

江雲漠漠生。遙指西津渡。故人昨夜別。何處還相遇。打槳入寒潮。月上蕪城樹。

呈寶東皋先生二首

微言既以絕。六經尙訓詁。卓哉毛鄭徒。於世實初祖。後儒聚訟繁。立民多齟齬。夫子起東海。學術靡不舉。精微穿奧窔。洞達闢牖戶。私智匪所矜。卮言固無取。下以詔來茲。上以宗鄒魯。媿彼捫籥流。其識等矇瞽。雕蟲本小伎。章句良足愧。然而尼父言。文迺載道器。六經既云亡。飢馱及五季。孟縣實起衰。選言庶精粹。吾師辨流派。大小入睹記。少步翰墨場。力拔班馬幟。絢爛歸淡泊。文至道亦至。不材殿門墻。負劍驚辟咷。祭川必先河。登堂務嚼齧。卓然羣倫倡。斯文賴不墜。

勗緝武

操觚學文字。漸熟漸老成。術業苟弗專。厥藝胡由精。治文如攻玉。磨琢神迺瑩。治文如冶金。淘汰生光晶。

羣言入鑪錘。六籍儲菁英。斯詣貴深造。匪曰旦夕程。汝今務帖括。筆力頗縱橫。惟苦所涉淺。腕底疵類呈。沙礫混精鏐。砒砒雜素瓊。勉旃更力學。日邁月斯征。技果進乎道。豈獨取世榮。

勗細文

汝齡今十五。未解習文史。須知志學年。年已非穉齒。奈何更不學。悠悠負長晷。先王重四民。四民莫先士。詎惟弋高科。將以通萬理。人生天地間。無如讀書美。慎勿生厭苦。咀之味愈旨。吾家數百年。弓冶只此是。我貧無所貽。貽汝一經耳。過時而不學。後悔不可止。斯事不若人。當引爲己恥。力學如力農。耕耨自茲始。

寄述庵先生

雲棲古蘭若。江上鬱崇嶺。森然穿窳窳。墮地碧雲冷。公本住世人。來宿招提境。此時寒山空。禪燈一龕靜。知公萬想滅。獨禮金粟影。心與潭泉清。道契巖月問。我今嬰世務。塵慮安得屏。緬懷繕性者。聞鐘發深省。

五人墓

茄花滿地紅。委鬼當頭坐。趙媯王聖何披猖。鈞黨東林逮楊左。緹騎四出來吳門。吳門白晝風霾昏。大聲東廠索人急。銀鐺鐵鎖聲。逐喧五人踉蹌趨大府。號呼欲救周吏部。張拳奮臂雷電掣。緹騎紛紛竄如鼠。借問大府誰。義兒毛巡撫。飛章告變誅五人。延頸從容甘鎖斧。嗚呼五人市僧徒。一旦赴義同捐軀。死隨吏部化厲鬼。披髮上訴鋤閹奴。纍纍高塚武邱路。歲歲棠梨酒一盃。君不見碧雲寺。舊是衣冠葬閹處。墓

碑百尺委荒榛。惡鴟空叫斜陽樹。

髯仙行吊劉丈思茗

吾鄉劉思茗先生。老而不遇。以詩聞於時。丙申秋。余之官京師。與先生別。既晤兵曹王西園表兄。知先生於是冬病歿。兵曹作髯仙行哭之。先生固髯也。余素識先生。情何能已。

伯鸞溪上烏啼樹。風月湖山問誰主。蔓草空悲白社人。衰楊徒泣青山雨。憶從束髮識髯仙。飄飄意興凌秋煙。看花幾着阮浮屐。載酒頻呼范蠡船。中間落魄安可說。郢門夜雪金臺月。章句從教老布衣。功名只看添華髮。浩然歸去百不憂。掀髯一笑同浮漚。問字侯芭推著述。閉門蔣誼擅風流。自昔騷壇數才調。二劉伯仲誇雙妙。劉震修先生兄弟嘗與先宮諭唱和碧山吟社。蘭成況似庾肩吾。子敬寧輸王逸少。先生父於根先生長於詩。近來老輩頗凋零。蕩船不作雙扉扇。華蕩船先生於先生為中表亦工詩去年病歿。空餘破卷留殘蠹。已悟浮生比斷萍。那堪歲晚京華住。凶耗傳來重歎逝。可憐吟斷鮑家詩。化作黃壚數行淚。

朗齋以水仙倡和圖冊索詩輒題長句

君本江南客。最憶江南花。衙齋手種得幾本。雪霜翦翦含春葩。幽香一盞浸春水。寒壓冰魂呼不起。夜深化作白雲飛。飛入琴心七絃裏。七絃泠泠清復清。月中仙佩來瑤京。何人貌得蕭騷致。長與詩客聯芳盟。我為看花情脉脉。家住江南歸未得。一枝合薦水仙王。西神峯下寒泉碧。

爲錢秋濤太守題出塞圖

高秋大漠邊草枯。波羅地名九曲蒼鴛呼。響麕竄谷虎交徑。涼颼獵獵飄黃蘆。憶昨扈蹕出古塞。與君結隊同馳驅。塞山莽莽塞雲黑。朶顏一角秋模糊。橫鞭遙指畫眉嶺。山石礚确還縈紆。斜日欲落忽照眼。楓葉亂綴紅珊瑚。河流泱泱不敢渡。我方竚立空踟蹰。看君策騎意殊壯。吟肩高聳掀髯鬚。健兒袴褶躡馬後。手射獐血彎雕胡。下馬招余恣拍飲。燈明列帳傾醍醐。君今去作八閩守。甄越南歷無諸郛。蘆門杯溪互環暎。島嶼百怪森瞳矐。時平海國樂耕織。黃堂靜鎮民歡愉。僧繇妙墨虎頭筆。爲君更寫褰帷圖。

晉磚和謝蘇潭方伯

方伯廡舍得古甄。永平二字分明鐫。皖江湖君度爲考定。謂是晉惠之記年。牝雞司晨鐘簾壞。金鋪兆禍紛戈鋌。銅駝夜泣委榛莽。雒陽宮闕犁爲田。典午距今歷千劫。金石銷泐希流傳。茲甄塲埴出誰手。迺不變滅隨雲烟。苔紋斑爛土花繡。剜剔一字不刊。甄厚二寸長以倍。光氣煜煜蛟螭纏。得一未已且得八。羅列直擬羲爻全。主人舊是八甄客。玉堂視草稱神僊。揮毫作歌頃刻就。妙翰親灑鴉青箋。晝長高齋出示我。蛾眉隱隱明蓬巒。銅缸積水墮紅雨。花架十丈薔薇嫣。近人好事侈媿雅。翁學士外孫星與錢堉未央上林卯金製。瓦當無數傳長安。其間贗鼎頗雜出。博會往往勞言銓。主人嗜古得真古。千秋五鳳同寶旃。他時採入武林志。更煩洪适成新篇。

訪徐石漁于沙邨精舍

興至輒相訪，百年耆舊存。
鬚眉看用里，橡栗老羌邨。
微雪鴉爭樹，斜陽客到門。
盤餐期信宿，晤對戀清樽。
智海禪院夜坐

三月祇園住，蕭然遺世情。
夜深松露滴，夢與佛香清。
隔院聞鈴語，空塔來鶴鳴。
維摩有真諦，擾擾媿吾生。
十三山

絕壁插空冥，邊門未了青。
千尋蟠北戒，一氣落東溟。
松杏看培塿，辰韓作枕屏。
何年此開鑿，吾欲問圖經。
碧雲寺

入寺鬚眉綠，曉雲衣上生。
天浮雙塔迴，石與亂泉爭。
雨後藥苗長，林邊山鳥鳴。
言尋翠微去，前路有鐘聲。
獨山門

在太湖口

門束太湖水，危湍獨一拳。
山曾經禹鑿，石不受秦鞭。
日落龜鼉渚，秋高鴈鷺天。
日窮三萬頃，好放洞庭船。
送陳桂堂守辰州二首

頻年同省闈，相送楚江西。
關砦連三戶，雲煙入五谿。
觀風雜夷獠，行部徧畊犁。
公暇攤書坐，官齋聞竹雞。
君去逢衡鴈，三湘木落時。
秋風武侯壘，夜雨竹郎祠。
夢逐辰江遠，書探西洞奇。
故人思曼在，傳語寄相思。

金陵懷古

神異曾傳伐荻洲。金陵王氣未全休。樗蒲草澤英雄在。瓜豆中原割據秋。太息北人思飲馬。可憐南國唱符鳩。白門又報收袁粲。付與遺民怨石頭。

壽陽白馬近臺城。選佛齋壇懺不成。龍瀆西來傳舊語。犀軍北顧散空營。七官無術能匡難。五月何人爲解兵。不獨江南悲庾信。茂陵腸斷沈初明。

由崑山至青浦舟行墟落間卽事

秋色東南正渺然。一帆疑葉下吳田。柴門流水微通逕。細雨斜風不滿船。晚飯眞宜舵樓底。清樽重憶草堂前。玉山回首匆匆過。遙指茸城又夕烟。

余宦遊六年故鄉交舊零落殆半感念存歿因繫以詩

少日交游共賤貧。草堂燈火話悲辛。招魂地下多新鬼。薄宦天邊少故人。白社秋風沙上切。黃壚夜雨夢中塵。他年絮酒西郊路。隣篴蕭蕭涕淚頻。

中關行帳觀返照和鮑雅堂韻

層疊岡巒擁一關。晚霞低冑夕陽斑。雅翎黃掠晴原樹。螺髻青迷大漠山。地抹昏烟千帳外。天橫秋色亂巖間。西來更指興安嶺。古蹟蒼茫是朶顏。

重九日廣寧道中作

塞上孤城倚大荒。搖鞭無語對斜陽。十年田里蕪三逕。九日邊關少一觴。晚晚年華看菊蕊。別離兄弟檢萸囊。白雲攔斷登高眼。不許愁人更望鄉。

北鎮廟

巨鎮嵯峨倚碧虛。青蒼一抹走徐無。虞封圭幣尊荒域。遼塞山川扼上都。畫壁風雲羣后會。空堂日月萬靈趨。東丹遺蹟今誰問。寂寂松杉鳥自呼。

津門秋感

薊北霜寒上敝裘。瓦門關外客登樓。中年親串多華髮。此日山河又暮秋。葉落雍奴笳吹動。雲迷碣石鴈聲愁。飛揚跋扈平生志。鑿空終當萬里游。平沙獨立感蒼茫。濁浪滄沓落日黃。鄉里未能乘下澤。侏儒久已笑東方。竭來燕趙悲歌地。欲問邯鄲挾瑟倡。馬客幽州最無賴。壚頭日日醉千場。

西風蕭瑟角飛城。北望長安秋氣清。俠少短衣誇射虎。通侯小隊試彈箏。依劉有客悲王粲。諭蜀何人似馬卿。辛苦西南諸將帥。荷戈今日尙論兵。

時四川未平

黃金突兀暮雲封。郭隗於今未易逢。塞上寒烟橫獨鹿。天邊秋色隱盤龍。鯨魚吸浪生鱗甲。海鳥迴風怯鼓鐘。江上季鷹無恙在。五湖歸去擬相從。

吳蘭庭

字胥石歸安人乾隆三十七年舉人有南雪草堂詩集

蒲褐山房詩話胥石為吳編修大受高第弟子少以文名吳越壯遊燕趙多著深清健之作年六十餘流寓京師與仁和吳君麗璜長元齊名時號二吳胥石有五代史纂誤補四卷長元有宸垣志略十六卷胥石在京師嘗寓馮編修集梧家既南歸又寓秦臬使瀛署中詩四卷句如亂泉橫短狹荒墅綴疎花柳痕妝閣翠花氣酒船香晴烟融碧樹小雨漲紅潮春旗絲雨潤水市曉風腥多場風引雉荷浦雨遺鷗星光寒墮水樹影遠隨人錫籥寒食節絲雨杏花天鶯花成昔夢烟月歎浮生梅扶老態猶含萼草釀柔情未破荻山色當門朝旭麗松聲滿院夕陰寒被酒並尋盤馬地乞花同泛釣魚船愁鬢欲星還作客長途無日不登高皆耐人諷詠

柏井驛

天風吹縹緲。徑挾山百折。我行秋方中。寒氣已凜冽。兀兀有虛警。短夢作復輟。初日出東方。人馬同欣悅。不辭登陟勞。屢見土風別。山要互疎烟。居人乃窟室。戴履俱后土。一竇洩天日。蟄蟲壞其戶。動物宜羸物。古民既陶復。隙地亦甌脫。聚族得棲止。此言生且活。樸野無物累。愧我身世拙。回首彌忡忡。窮途畏顛蹶。

韓信嶺

一逕走峻坂。崖壁若環衛。行行漸幽默。如入永巷內。日御歷線天。見午不見未。亂山鈔木石。蠢蠢唯積塊。堆阜忽俯瞰。突兀壓我背。脉疎質已離。若然恐其墜。勢險比巖墻。疾驅思縱轡。却怪繞馬首。抗行斷復綴。保無或偶然。適與甌機會。頗聞漢韓侯。奮蹟致高位。一蹶中危法。乃為兒女賣。詎伊非英豪。良由昧進退。

卽今弔荒塚。行客發深慨。凜凜抱微軀。羈孤彌自貴。

園樹

園樹陰初匝。池荷香不收。薄涼先在水。疎雨忽疑秋。入世方桃梗。依人只蒯緱。可堪牢落意。獨對小庭幽。

村家

清景銷煩暑。披尋午睡餘。柳風驅犢健。槐雨聽蟬疎。矮屋門雙扇。平橋水一渠。村家塵事少。便擬卜鄰居。

蒹葭

渺渺愁心結。淒淒極目同。江湖勞遠夢。身世怯秋風。危榭波平檻。孤舟雪打篷。蹉跎余有恨。相對此衰叢。

過文石山房有感牧園先生

安昌絃管最風流。池館荒涼幾度秋。豈有虎賁憐北海。空餘馬策勸西州。他年國士誰青眼。此日書生已白頭。瓠落自慙知遇厚。一尊重與酌松楸。

趙希璜

字渭川。惠州人。乾隆三十九年舉人。官安陽知縣。有四百三十二峯草堂詩鈔。

彩雲軒晚眺

雨色圍春住。龍孫解籜肥。當軒崖仄立。搏石水斜飛。嫩綠生新草。殘紅送落暉。山家饒樂事。花外掩柴扉。

自題羅浮烟雨圖

不忘穉川約。尋春跨蹇行。山頭霽烟雨。天氣乍陰晴。遠樹森森立。流鶯恰恰鳴。敲詩露癡態。人盡笑狂生。

鴈

紅葉滿滄江。寥天鴈一雙。秋澄黃苻月。夢醒碧蘿窗。古渡片帆落。疎鐘何處撞。蟲聲還泣露。悵絕對殘釭。

留別馮魚山太史

那堪潦倒老京華。魂繞羅浮處士家。炊熟黃精山月上。霞衣縹緲踏梅花。

玉堂金馬位君身。我逐浮名失我真。拋卻山中好風景。青山早已笑詩人。

高文照

字潤中。武康人。乾隆三十九年舉人。早卒。有闡清山房詩錄。

蒲褐山房詩話。潤中以選拔來京。應試。適予隨侍木闌。未與相晤。留詩而去。及從塞垣歸。潤中則已下第南還。久之。中式。寓于滿洲某公家。教其子弟。予時在蜀中。及遣病將革。謂其門人曰。我雖不得受業于王公。而刻我詩集。必求其序。及丙申。予返京師。其門人具述前言。深為感嘆。因作序貽之。又二十餘年。聞其集已刻於茗溪。以予文冠其端。然亦未見刊本。姑就曩所綴者錄之。至其詩風發泉湧。言之高下。皆宜。佳者固不盡於此。

能仁寺看梅

雲消烟岫青。雨止風潭碧。侵晨步祇園。鳴鐘花外隔。精廬掩修篁。小磴通雙屐。討春憩白堂。方丈世界一

時白林深雜鳥哢。逕古斷人迹。想際月朧明。清影上瑤席。開士情未忘。淪茗款吟客。顧此無垢體。得遊衆香國。晞髮雙樹間。裴裒竟芳夕。一笑還破禪。落英紛點額。

泊舟西冷橋步入棲霞嶺

青山久招要。幽討阻孤往。枯筇勝侶俱。登岸頓心爽。初塗稍坦夷。仄徑漸塘嶰。榛荒目屢顧。峯陡面恆仰。扶欄足小駐。遠近景羅掌。湖光蕩日圓。雙眸豁虛朗。雲來苔磴濕。泉吐松根響。暢此塵外蹤。遽作天際想。翦茅定何年。佇辦芒鞋雨。

秋日放舟玉湖尋上下釣魚山

水落積氣空。澄烟乃如練。整棹出寒城。孤光互湖甸。林迴微徑折。天霽層峯見。一洲蘆雪晴。衆塢楓霞變。澄波吟擊楫。風水忽相濺。捨舟躡斷磯。巘嶸聳遙眇。亭亭車蓋陰。瀾瀾浮玉面。橫岡遂逶迤。密樹入葱蒨。雲歸渚疑沒。日落山逾絢。孤松倘可巢。吾將垂釣綫。

客夜獨酌二首

新月皎河漢。涼飈襲輕襟。故園在茲夕。竹柏團階陰。辭家遠行邁。愀然遊子心。霜籬多萎條。風樹無安禽。時物亦已換。惆悵雙魚沉。天涯一樽酒。此時相酌斟。夜坐覺秋永。殘雨入蕭散。獨飲醒意多。寒來不能斷。隣鐘聲漸動。壁燄燒微短。白露滿簾衣。幽人在虛館。

打冰詞

飛來一丈天山雪。截斷長河堅入骨。要與冰巨角兩雄。連檣椎破魚龍窟。細冰戢戢凝復開。大冰突兀如山來。峻嶒一望不見底。三老長年如死灰。船頭日暮亂篙舉。倒射船牕作飛雨。前船不動後船聚。今夜仍須冰裏住。

開笛

東堂微雨歇。涼月上空林。高枕憺無寐。蒼龍何處吟。商飈驚暗至。河漢欲西沉。記得雙江郭。扁舟此夜心。

紅豆

南國相思樹。盈盈傍岸紅。收當經細雨。歌想按春風。玉合開頻數。上聲珊瑚碎略同。可能遙寄與。骰子意玲瓏。

晚歸丁家山下

片月當杯出。蒼山擁棹歸。蓮塘孤鷺暝。柳陌斷蟬稀。入浦歌聲杳。迎風酒力微。水仙祠下路。一磬扣禪扉。

贈葉秀才正始詩

此邦耆舊彫零後。未斷心香見此人。邱壑棲遲身竟老。文章流別世誰論。許渾風月編丁卯。周密叢殘志癸辛。家世石林應好在。幾時同作碧山鄰。石林築室卞山。自號石林居士。

嵇公祠

嵇公諱永仁。無錫人。范忠貞公幕僚。同日殉節。

弓刀一跨便從軍。草檄才高入幕賓。豈謂黑頭公輔器。翻成碧血侍中身。臧洪赴死原同日。許遠圖勳合並倫。咫尺靈旗風雨集。年年廟食配張巡。

移家三首

屈子何煩賦卜居。井泉近處即吾廬。突黔不暇虛安竈。家具偏多為載書。投刺了無新賀客。遺榮猶有舊懸車。門前一段鷗波漲。領得頭銜是老漁。

吟囊畫篋蠹橫陳。幾日安排覺斬新。明月仍來耘老閣。青松又結趙家鄰。余新居與松雪齋對借他美蔭尊須設。移得名花屋不貧。移栽大牡丹花二株雞犬寂寥奴婢少。免教圖畫笑詩人。

當年辛苦話誅茆。余屢卜居禾中不果計拙依然誰作巢。差喜比鄰懷蟋蟀。肯嫌在戶詠蠨蛸。蓬蒿點綴宜開徑。猿鳥稀疎坐近郊。夢裏金陀坊畔路。寄聲林水漫相招。

寄遠

瑤琴愁撫十三徽。彈到思歸淚滿衣。賴是天南霜雪少。相思不用理寒機。

泊潯溪寄沈五

欵帆小雨易黃昏。風色蕭蕭獨夜邨。可道離愁是溪水。舊痕才退又新痕。

陪薛太史暨嚴大秋霞泛舟南湖登烟雨樓二十韻

兩槳伊啞破曉烟。四圍渟碧浸遙天。蜃嘘樓閣空濛裏。螺畫峯巒杳渺邊。不雨不晴常澹沲。非風非水互淪漣。狂遊自約登瀛侶。二客還隨羽化僊。境眩菰叢遮眼密。情多菱角刺衣穿。黃消霧柳雙眉皺。綠約風萍一鏡圓。瞥過輕鴛騰藻繡。驚心法象現重蓮。桂花落後門空鎖。柿葉垂時墨尙鮮。鴈齒排橋彎似月。龍頭裝屋小於船。灑來僊榜榮三接。賦就花陰記八甄。壁間敬觀御製詩與撫臣莊有恭聯句絕島豈宜人問渡。閒波應許鷺分眠。層層曲榭鋪吟席。往往清宵鬪管絃。蓮唱半飄僧枕上。漁燈都到酒樽前。湖誇西子徒爲爾。宅泛鷗夸不偶然。舊事戒提千載恨。新聞好紀五朝編。考烟雨樓記知樓址始自五代得同汾蟹松鱸興。重述嘉禾瑞藕年。痛飲歡勞鐺折脚。叢殘話溯地由拳。一灣水繞前生夢。三過蹤留此日賢。秋老潭蓉紅欲滴。歸遲沙月白堪憐。移家準擬從公住。只少千金圩上田。

溫恭

字荔坡。福建永定人。乾隆三十九年舉人。今官青浦知縣。有蜀行偶草。

過彭澤縣

落日嶺頭樹。秋風江上城。斷崖連埤垸。孤嶼倒空明。幸出三巴險。誰憐萬里行。今朝下彭澤。懷古愧高情。

五頂關

懸巖峭壁水潺潺。路入寧羌五頂關。直北雲堆秦塞樹。依南猿嘯益州山。石經血濺餘兵氣。雨帶風涼滌客顏。休問此行緣底事。驟綱十萬餉戎間。

宿硤石驛次壁間韻

宦游遑惜鬢毛斑。轉餉來過硤石間。今日逢人問巴蜀。何時飛度劍門關。

吳錫麒

字聖徵。號穀人。錢唐人。乾隆四十年進士。官祭酒。有有正味齋集。

蒲褐山房詩話。浙中詩派。自竹垞初白兩先生後。二十餘年。大宗太鴻起而振之。及兩公殂。謝嗣音者少。司成以雲蒸霞蔚之文。合雪淨冰清之作。馳聲藝苑。獨出冠時。既工駢體。尤善倚聲。而詩才超越。直繼朱查。杭厲之後。宜中外望之。指為景慶也。情殷護背。乞假南還。雖未即安於閒適。而世已以白晁兩太傅相期。生性溪山。流連詩酒。青簾畫舫。綠箬紅衫。游筇所造。無不承蓋扶輪。掃門納履。

空柏渡遇雪

孤帆若無依。飄飄就寒浦。豈有行役勞。及茲感淒苦。冥合林氣肅。凍結石稜古。積陰如趁人。慘異變亭午。疎聲表初雪。繁響雜飛雨。叢蘆易蕭條。豐篠極掀舞。來檣雲際辨。去鳥煙外數。棲止難預謀。捷徑爾何取。牽蘿懷美人。會見茅茨補。

桐廬道中寒雪初晴月色皎潔

扁舟屢沿轉。不厭風水聽。矧茲雪霽佳。片月林外醒。寒姿結窈窕。幽壑穿瓏玲。雲歸微素合。波往虛光停。明明帆弄葉。晶晶開屏。身在衆山中。不知山色青。巖端發清磬。潭底搖疎星。桐君爾何人。寂寞仙扉扃。攜鋤采藥去。歸來已千齡。幽夢永今夕。雞唱天冥冥。

泛舟出東新關至皋亭看梅

春風吹艣聲。搖曳在烟際。溯游從迴波。謀野獲新霽。柳條綠已舒。草脚青不細。微微贖松雪。稍稍出山髻。前村暝逾深。遠樹明復翳。徐聞鐘磬招。願結瓶鉢契。人來僧語熟。月大寺門閉。三匝繞花身。讚以妙香偈。

黃土梁

斜日照行客。一鞭歸鐙敲。陂陀望若平。寒雲注虛坳。石骨陷其裏。周以積土包。荒荒恍真虎。慘慘橫瘦蛟。登頓亦已疲。豁然見衡茅。年豐畢婚嫁。少婦方垂髻。晴檐理針線。念將新歲交。感我勞者唱。詎免居者嘲。

夜觀烏龍山野燒

松門月黑風亂旋。山影下覩窗西偏。非星而星山之巔。幾點初若流螢然。升之樹杪紅燈懸。俄而不見峰側穿。倏又見之電掣圓。一峰突湧亭亭蓮。前峰後峰跗萼連。其下一珠龍抱眠。烏龍不烏光蜿蜒。赤龍銜銜欲上天。是何草木當赭鞭。百蟲將軍卑爾權。爾生爾殺爾自尊。象以齒焚蘭膏煎。蕉夢不醒秋墳邊。哀哉牧火遺荒阡。禍并玉石成灰煙。我惜山黛蛾眉妍。使彼濯濯誠何愆。有酒欲撰術不仙。安得倒挽山下

泉女丁婦壬驅爾駟遊山明日衣同褰。

師子林歌

雄雷震空六甲驅。空青塞戶陰模糊。卷毛談舌形狀殊。逃盡虎豹豺狼羆。諦視細細蒼苔鋪。伏而不動非石乎。陡回驚悸生歡娛。洞天咫尺開仙都。中不百畝蛇綫紆。五里十里盤崎嶇。前之升者獠附塗。以踵摩頂仰可呼。忽然索之又亡逋。白日在空午欲晡。翻身跳入壺公壺。四壁翠灑松雨麤。松生石隙老更腴。不階尺土元氣扶。松耶石耶德不孤。石以松古青逼膚。松以石怪垂龍胡。天風來往調笙竽。滿身雲氣留斯須。出門輿馬喧九衢。胸中了了邱壑俱。吁嗟乎。胸中了了邱壑俱。千秋畫本思倪迂。

題翁覃溪前輩方綱所藏唐泰山摩崖銘拓本

昔聞泰山封禪七十有二代。千八百處勒石紛周遭。浮雲倏忽幻蒼狗。遺蹟荒遠難爬搔。祖龍紀德無德紀。直以沒字欺兒曹。開元天子履乾位。海內殷富忘飢嗷。登封擇吉臨渤海。圓壇五丈陳旌旄。金雞唱日百靈集。天門咫尺升焄蒿。爲民祈福本盛德。煌煌玉冊何須韜。禮成鸞鶴亦翔舞。清響細憂仙人璈。羣臣稽首帝有喜。永垂洪烈齊唐陶。大書深刻一千字。力挽巨海迴波濤。卽如銘詞典重亦似出燕許。不然如椽大筆誰能操。謂將從此愆後患。文云將多於前功而愆彼後患豈意先笑終號咷。飛霜殿上豬龍逃。延秋門外鳴弓刀。太平不告兵屢告。燎柴火換烽煙高。青驪遠去劍南道。無復御馬登神皋。秦松漢柏亦何有。回首泰山萬

里空嶢嶮。我昨渡河來。望遠心魂勞。未臨日觀觀。突兀每指雲。闕思翔翺。側聞此碑椎。拓洵不易。梯空上似懸。藤猱玉堂仙人何年得此本。販來美錦誇蒲萄。高凡三丈闊一丈。背負那不煩靈鼈。縱觀何異篋刮目。八分妙理窮秋毫。平生懷古感興廢。雲烟過眼增怵怵。東鷄西鰈亦何取。銘功表德徒稱褒。中興之頌摩崖早。靈武君王又柘袍。

辛丑十月移居蒲褐山房卽趙天羽給諫寄園故址

我本識字耕田夫。一椽家住錢塘湖。自從釋褐注朝籍。破屋久向長安租。一年官俸抵不得。打門那免人追呼。中庭更無草木映。如人面目先焦枯。昨晨過客爲我說。有屋乃在城西隅。寄園名字耳所熟。況復價減千青蚨。天寒手指凍欲裂。移家連日忙妻孥。莫謂先生家具無。有酒在甕書在廚。蹇驢一頭車一輛。從以赤脚長鬚奴。入門老樹相顧笑。此間去往皆酸儒。趙家給諫老著述。墨痕四壁常沾汙。當時談空說有虎。滿窗落葉啼飢鳥。後來名士尤作達。於此但結文字娛。村夫子相誰不識。今朝又入移居圖。墻陰手剔故人迹。尙剩健句追歐蘇。壁間有王蘭泉鴻臚移居詩石刻先生自喜道不孤。檢書插架酒注壺。飲酣一吸盡江海。歌罷萬籟調笙竽。人生大抵如寄耳。能寄所寄惟吾徒。欲從莊叟論齊物。誰信柳子非真愚。來春坐待花樹發。繁枝壓屋清陰鋪。開簾無事日把卷。何必更憶秋江鱸。

移居以來同人多以詩酒相招醉後成篇仍用前韻

三家村住非村夫。

往時王蘭泉副憲暨翁覃溪諸桐嶼兩前輩比鄰居此同人有三家村之目。

詩人豪氣吞江湖。滿城風雨自吟咏。閉門不怕

人催租。十年舊事等雲散。求友但有禽聲呼。我移家來已歲暮。蒲萄一架虬藤枯。林閒殘雪未融釋。瘦日初上東南隅。請隣尙少藟後酒。迎富那得飛來蚨。何如西湖處士宅。梅可作妻鶴可孥。先生自笑長物無。炊烟不起塵滿廚。東家西家邀我飲。紛紛折簡來奚奴。酒酣耳熱不得意。高談座上驚庸儒。玉缸惜少翠袖捧。醉墨不顧青襟汗。自東徂西歸路遠。每聽城上三更烏。捫心清夜無愧怍。能令衾枕生歡娛。明朝僵臥亦何害。一幅自寫袁安圖。陽春有脚無不到。蟄蟲何日能昭蘇。旁人莫謂意太孤。萬事已如冰在壺。旁人莫謂宦太冷。一官已任風吹竽。詩壇一席置狂客。燕市五載稱酒徒。得廬吾自愛所愛。避熱誰信愚非愚。平生舊業相料理。短榻尙有青氈鋪。菜根齧得滋味足。何必頓頓思尊鱸。

西湖夜泛

水展琉璃箔。人乘書畫船。蟲聲千葉雨。月氣一湖煙。壞塔黃妃剩。清詩白傅傳。勾留逢此夕。半在藕花邊。

庚寅春再赴嚴江同舍弟錫麟舟中作

聽風兼聽水。三度上江船。遠樹霽寒雪。一帆明夕煙。人耽高隱地。山媚早春天。正擁羊裘坐。嵐光墜我前。好句忽飛到。與吟惟子山。江山如昨夢。兄弟此扁舟。野水爭灘上。閒雲爲竹留。他年翦燈話。毋忘富春遊。

尋春

蓬蓬渾不遠。盎盎竟難名。酒熟花初發。天晴草亂生。何來南浦恨。不盡夕陽情。破得青山笑。流鶯又一聲。

吳淞道中

重到吳淞路。清霜十月中。蟹消諸籩火。蘆捲萬梢風。泖色天如接。山眉畫最工。夕陽容易落。微剩柏林紅。

讀放翁集

鐵馬金戈夢不成。熏爐茗椀寄餘情。蘇黃以外無其匹。梁益之間老此生。擊賊未忘垂釣日。臨終如唱渡河聲。長吟直與精靈接。千億梅花坐月明。

初雪

爬沙一曲譜簾櫳。密灑斜飛態不同。對我青山蒙絮帽。待人粉本畫漁篷。濁醪已長前村價。黃葉纔空昨夜風。報與老農應色喜。鴉娘門外咒年豐。

春草

東風吹得燒痕蘇。陌上青青半有無。十日雨晴熏蛺蝶。一江水暖長蘼蕪。淒迷如夢如煙裏。曉晚飛花飛絮俱。多少鷓鴣啼處客。年年腸斷洞庭湖。高接林巒低水濱。風光一片屬芳辰。但尋門巷渾無路。豈爲天涯減卻春。塞北至今青塚在。江南相望綠波新。萋萋送別先愁我。不獨江淹是恨人。

湖上看雨

青鞵纔得下柴臺。忽響南山一道雷。雙白鳥邊催陣起。萬荷葉上聽秋來。涼生漁艇誰吹笛。醉向湖光莫放杯。眼底菰蒲蕭瑟易。水龍吟激暮天哀。

題黃仲則遺詩後

謫仙樓上謫仙詩。如此才華可惜之。廿載風花龍出骨。萬言珠玉豹留皮。美人黃土今生歇。才子閒情若箇知。想見一燈秋雨裏。通眉長爪苦吟時。

虎邱三首

虎氣消沉鶴市荒。東風容易客迴腸。貞娘墓上年年柳。畫了春愁畫夕陽。水閣家家風幔開。畫闌曲折粉塘迴。冶香輕似落花過。快櫓瞥如飛燕來。看紅看白數花枝。傳唱朱翁樂府詞。一半櫻桃一半笋。送春天氣不多時。竹垞翁虎邱葉兒樂府。一半兒櫻桃一半兒笋。

范來宗

字翰尊。號芝巖。吳縣人。乾隆四十年進士。官編修。有治園詩鈔。

拈花寺早起

山居夢初迴。晨曦未到嶺。天地發清機。但覺衣裳冷。草濡蟲亂鳴。松高鶴爭警。倚立巖石間。游目聊一騁。

山外正酣眠。何人發深省。

白雲泉和潘榕皋農部韻

昔日同尋勝。今來獨品泉。鳥聲閒似客。山意靜於禪。檻外留斜照。鑪中有剩烟。未憂腰腳弱。更結上層緣。

法螺

登陟憑筇杖。迴旋似結螺。修廊緣磴轉。嵐氣染衣多。別自開丹嶂。天然引綠蘿。願言頻過此。安樂有行窩。

唯亭小泊

一峯船尾送。歸路晚蒼茫。風雪殘年短。江湖獨夜長。雲寬全借水。市小半連鄉。此地宜魚稻。年豐樂未央。

顧宗泰

字景嶽。號星橋。元和人。乾隆四十年進士。官高州府知府。有月滿樓詩集。

魚臺舟中

荻花無數夕陽邊。景物依稀入楚天。白板橋通沽酒市。綠楊村聚賣魚船。水環棠邑民風古。驛傍河梁客思懸。有河梁譯此夕看山認齊魯。鄉園望斷轉淒然。

登雞鳴山

蒼涼俯瞰建康城。碧磴盤空到眼明。平楚殘霞開夕照。後湖秋雨入新晴。聞雞埭古荒烟合。射雉場空芳

草平景色最增羈客感。千年陵谷動關情。

司馬相如

琴心一曲感慙懃。酤酒還憐犢鼻褌。底事白頭悲怨切。誰人更與賦長門。

松陵道中

數聲欸乃下輕艫。飛動波心鷺幾雙。正是水牕高睡足。一天幽夢落楓江。

曹錫齡

字受之。號定軒。汾陽人。乾隆四十年進士。官監察御史。送述庵先生予告南歸。

帝佐資碩德。應運公為輔。中外久敷歷。名臣勳業樹。清風歌穆如。今復見吉甫。昨歲古稀過。致仕例援古。

杖國杖鄉身。逍遙遊化宇。況復江南濱。疏傅喜接武。謂辛楣先生。獨惜典型去。鴻飛思遵渚。花朝醉陶然。流光

春風舞。一闋驪歌成。寸心離緒吐。

李廷敬

字寧圃。滄州人。乾隆四十年進士。今官松太兵備道。有平遠山房集。

會昌登陸喜晴

江練澄朝霏。林花耀旭景。平沙晴愈潤。烟草相與永。歸雲赴遠岫。餘瀑喧近嶺。村途紆稻畦。山徑抱樹廩。

俗殊意難測。禽變心自警。扁舟三日醉。幽夢乍一醒。安得摩詰筆。繪此獠獍境。

將至嘉應維舟野泊却寄問波

麓斷山重起。潮迴水欲窮。溪雲深貯月。石瀨險生風。別緒思楊柳。音書隔雁鴻。今宵米家舫。應泊鳳台東。

韶州雜詩

一曲清江匯。遙趨峽萬重。孤城如島嶼。二水會魚龍。北嶺迴秋雁。南華隱暮鐘。三瀧非險阻。從古入堯封。

湘江亭外柳。綰盡古今愁。暮雨吳娘曲。春風越客舟。斗迴天北極。人去海東頭。斜日關河暮。殘鴉噪戍樓。

除夕對酒

易醉屠蘇酒。難爲爛漫歌。南溟厭蛟蜃。西楚尙干戈。遲暮朋儕少。窮愁歲事多。孤城對烽火。今夕意如何。

汐落東溟近。城高北斗臨。感時兄弟淚。設醴友朋心。洲橘何須種。瓶梅不待尋。已驚霜滿鬢。歲月苦相侵。

潞河舟行

黃葉聲繁雨脚斜。輕舟宛轉避汀沙。河流曲似穿珠蟻。節序忙於赴壑蛇。去住關情秋燕子。榮枯相倚野

藤花。一痕漸透斜陽好。欲染閒雲作絳霞。

過汪研齋司馬秦淮小寓留飲兼示舊作

暇日相尋一舉樽。風光人比浣花村。羣山過雨青排闥。春水如苔綠到門。我拂垂楊驚聚散。君吟芳草自

朝昏奚囊滿貯驚人句。寄託深時不易論。

嚴福

字景仁。號愛亭。吳縣人。乾隆四十年會試第一。官至編修。

池上和韻

柳岸秋催老。蘭汀曉送香。雲沈菰米暗。雪散葦花涼。鏡水遊同勝。欵湖興共長。徘徊未能去。隔浦野煙蒼。
乍歷三秋候。頻來一水鄉。魚遊渾可數。鷗狎久相忘。小徑留寒草。流波蕩夕陽。陂塘清似畫。染就有微霜。

題消夏圖

勝地堪延賞。遙連太液波。輕風荷氣遠。斜照柳陰多。書畫船難擬。蓬壺景未過。寄情良有在。不必擁笙歌。

送汪雲壑修撰視學雲南

九重寵命擁華旂。地紀烏蠻自漢年。三策天人爭說董。中朝文物久敷滇。談經方見追前哲。時述庵先生把酒其如對別筵。為想輶車吟眺處。昆明山色晚蒼然。

秋霜

瑟瑟金風到野塘。板橋人迹漸蒼涼。痕兼淡月千村白。寒入遙峯幾樹黃。侵曉何曾留竹瓦。連宵已覺逼繩牀。年來雙鬢頻經點。怕聽秋聲夜滿廊。

潑火雨

賜火傳來滿鳳城。旋看細雨過前榮。葦燒破竈難禁濕。柳起新烟暗覺輕。三月風光烘欲動。五侯門巷滴無聲。卻因朱騎塵飛後。倍愛天街景色清。

宋思仁

字汝和。長洲人。諸生。官至山東糧儲道。有有方詩鈔。

羊城懷古

兼弱秦功尙。開疆漢計勞。地分三楚遠。嶺限百蠻高。長憶梅銷節。終傳楊僕豪。興亡青史在。懷古首重搔。

屈原故宅

茫茫湘水漾空虛。昔日靈均此卜居。秦地可曾亡六里。楚臣徒自放三閭。汀洲香草情難盡。岸浦丹楓怨未除。萬古旅魂招不得。長沙風景又何如。

琵琶亭

雲山疊疊水悠悠。獨倚孤亭正暮秋。一曲清歌千載恨。兩行客淚四絃愁。煙花蹤蹟傳前事。詩酒風流紀舊遊。今日我來江上望。尙餘哀怨滿寒流。

水晶樓

綠窗碧瓦露初流。下有梧桐幾樹秋。萬頃湖光清似鏡。不知明月在高樓。

陳繩祖

字緝橋。祁陽人。監生。官至廣東糧儲道。有茗溪游草。

蒲褐山房詩話。緝橋為文肅公大受次子。世家華廬。輒以盛滿為虞。及其兄開府楚中。即析產別居。且謝病歸。寓蘇州之水仙庵左。然後卒。為所累。奉母南還。抑鬱以卒。宋梯雲越序其詩。謂往來吳越。問愛吳興山水清遠。詩筒酒盞。徜徉白蘋。紅蓼間。自冬徂春。筇屐所至。輒成歌詠。

錢山澆

纔過碧落湖。卻入錢山澆。錢山松雪殘。稍稍青可望。狹路窮溪源。臨流忽開曠。午日泮輕澌。吳檣壓高浪。曖曖遠人村。隱隱樵舟唱。羣峯莽迴合。寒氣森相向。似聞沙禽喧。稍見漁艇漾。水國富蒲蓮。居民避春漲。余生楚澤濱。茲游頗清暢。倘住下菰城。餘年差可養。

方等禪林去法華山里許為汪氏家庵

言過萬松谷。初入楊梅塢。修竹隱疎花。清泉帶芝圃。略徇橫深溪。雞鳴辨山午。絕境不逢人。衣上時霑雨。

明霞墓

小褐明霞葬此山。魂歸猶自淚潺湲。澄湖月落開妝鏡。修竹風微隱珮環。慧業難消天意妬。風情寧待老來刪。春林自灑啼鶻血。陽斷游人日往還。

王啓焜

字東白。號秋汀。嘉善人。監生。官至四川鹽茶道。

水竹居集飲次玉厓韻二首

池館新開集勝流。罩檐濃綠午陰幽。鷗盟似雨聯今舊。萍漬隨風感去留。醉倚鶯花三月榭。夢迴蝦菜五湖舟。俄聽隔水笙歌細。籠霧和香一片浮。

雪山西望曉疑烟。一曲春波花壓船。甕啜村醪頻削管。蜀中田家多造甕。以水灌甕中。插竹管吸飲之。盤餐園筍不論錢。詩情斟酌多餘味。官事消磨少雜緣。最憶比隣還步履。余別館在屋北。每攜樽酒話燈前。



湖海詩傳卷三十四

黃景仁

字仲則。武進人。諸生有兩當軒蔗梢諸集。

蒲褐山房詩話。仲則風神玉立。世比叔寶。年未弱冠。所撰小賦新詩。已有烟月揚州之譽。既而彈劍依人。歷游楚越。又從竹君學。使于皖桐。及回京。從予受業。務為閱覽博聞之學。故所過名山水。探奇歷險。才力皆足以發之。激昂排慕。不主故常。信其所至。正如淚流鮫客。悉化明珠。米擲麻姑。俱成丹粒。既屢試不遇。乃充四庫全書館。謄錄議叙。當得主簿。未及選。復游秦晉。歿于蒲州。運使沈君既堂。及余與畢秋帆交。賻之。而時洪雅存亮吉。又往經紀其喪。始得歸于武進。生平所作。未有成編。余遣人赴蒲。錄其集。以歸。最為完善。循環吟調。不啻哀猿之叫月。獨雁之啼霜也。傳本參差。世雖有愛而梓之者。然去取失宜。今詳加決擇。存全本於書塾中。以待後之篤嗜者之論定。

登千佛岩遇雨

木落千山秋。天空一江碧。賈勇登巉巖。決眚瞰危壁。獵獵虎嘯林。陰陰龍起澤。膚寸足下雲。倏已際天白。急雨翻盆來。疾雷起肘腋。同游三兩人。相望失咫尺。飄然冷風過。烟霧漸消逝。雨脚移而東。長虹逗林隙。山翠溼淋漓。苔空見白石。快哉今日觀。橫寫百憂積。山川美登眺。嗟余在行役。陟高暖親廬。犯險乖子職。歸當置濁醪。孤酌奠驚魄。

舟發西安至東岩夜泊

清晨發西安。四野動雞唱。人烟起橘柚。村落隱相向。川景明朝暉。宿霧自消蕩。萬壑霜風乾。清江寂無漲。一一過巉岩。入江更多狀。出沒窮雕瓠。盤回互倔強。舟行苦相持。帆勢忽阻喪。所喜泉石清。終日娛騁望。短晷欵西馳。蒼岩更孤傍。隱穩遠峰出。稍稍明月上。遙指常山程。終宵一惆悵。

雨中遊桃莊看飛泉卽東坡題聽泉亭處

搜石乃得泉。泉流更洗石。石淨淨天青。泉飛化虹白。山中連日雨。深塢絕行跡。誰知穿雲來。乃有問泉客。左右聞泐聲。尋源固不隔。懸崖忽當面。飄沫時濺額。俯掇星迸潭。仰怖雷破壁。一與洞壑緣。分支已千百。稍戛旋翻銀。微渟頓澄碧。大海及汗潦。安知後所適。保茲在山心。莫忘初境窄。逝矣眉山翁。誰歟證心獲。

雪夜至亳州

信帆溯清渦。歲晚水源閉。適好將舍舟。風雪塞天地。襆被輕易肩。書篋愛難棄。絮帽不暖頭。迎面玉龍戲。夜色歛郊垆。一白了無際。虛光紛四來。極眺快心意。如乘剡溪船。興發忘所自。如襲蔡州軍。銜枚走精騎。一髮見南譙。界天明睥睨。此邦古都會。人物挺殊異。當塗斯沛豐。三分推吉利。文采擅一門。雄威振當世。霸圖荒已陳。英風渺焉逝。鬱我懷古心。香醪就市貫。殷勤愧館人。幾訶去關吏。解裝然溼薪。孤吟聊擁鼻。急雪一打窗。空宵客魂悸。

觀潮行

客有不樂游廣陵。臥看八月秋濤興。偉哉造物此巨觀。海水直挾心飛騰。溟溟萬萬夙未駕。對此茫茫八
埏隘。才見銀山動地來。已將赤岸浮天外。碎岩礎岳萬穴號。雌哇雄吟六節搖。豈其乾坤共呼吸。乃與晦
朔爲盈消。殷天怒爲排山入。轉眼西追日輪及。一信將無渤海空。再來或恐鴻濛溼。唱歌踏浪輸吳儂。曾
將何物齎海童。答言三千水犀弩。至今猶敢撻其鋒。我說此語等兒戲。員也英靈實南避。只合回頭撼越
山。那因抉目仇吳地。吳顛越蹶曾幾時。前胥後種誰見知。潮生潮落自終古。我欲停杯一問之。

後觀潮行

海風捲盡江頭葉。沙岸千人萬人立。怪底山川忽變容。又報天邊海潮入。鷗飛艇亂行雲停。江亦作勢如
相迎。鷺毛一白尙天際。傾耳已是風霆聲。江流不合幾回折。欲折濤頭如折鐵。一折平添百丈飛。浩浩長
空卷晴雪。星馳電激望已遙。江塘十里隨低高。此時萬戶同屏息。想見窗櫺齊動搖。潮頭障天天亦莫。蒼
茫卻望潮來處。前陣纔平羅刹磯。後來又沒西興樹。獨客吊影行自愁。大地與身同一浮。乘槎未許到星
闕。採藥何年傍祖洲。賦罷觀濤長太息。我尙輸潮歸卽得。回首重城鼓角哀。半空純作魚龍色。

晚泊九江尋琵琶亭故址

晨發黃州郭。夕宿潯陽渡。沙平岸闊不見人。瞥過千重萬重樹。潯陽渡口風蕭蕭。江州城外魚龍驕。匡廬
作雲半紅黑。倒吸白浪如山高。是時日落葭菼暗。盆浦瑟瑟生寒濤。一舟衝浪去杳杳。獨雁帶雨來迢迢。

角聲振木木葉脫。秋聲漸高秋思發。無言攬袖起徬徨。卻倚蘭橈望天末。吳頭楚尾烟冥冥。獨立百感來無情。江風吹面酒亦醒。擗笛吼作狂龍聲。短衣踉蹌步沙瀨。草間尋得琵琶亭。崩堤毀岸人跡絕。狐狸跳嘯鼃鼃鳴。昔聞樂天此間夜送客。琵琶聲停江浸月。擬向江山作主人。卻因商婦悲遷謫。我亦天涯有淚人。對此茫茫慘無澤。吁嗟乎淚亦不必落。愁亦不必愁。君不見茫茫九派東向流。千古萬古無時休。我家乃在東海頭。西風滿意吹數日。一笑可上吳淞舟。蒹鱸蝦菜萬事足。安用江湖歎敝裘。

竹君先生偕宴太白樓醉中作歌

紅霞一片海上來。照我樓上華筵開。傾觴綠酒忽復盡。樓中謫仙安在哉。謫仙之樓樓百尺。筇河夫子文章伯。風流髣髴樓中人。千一百年來此客。是日江上同雲開。天門淡掃雙蛾眉。江從慈母磯邊轉。潮到黃牛亭下回。青山對面客起舞。彼此青蓮一抔土。若論七尺歸蓬蒿。此樓作客山是主。若論醉月來江濱。此樓作主山是賓。長星動搖苦無色。未必常作人間魂。身後蒼涼盡如此。俯仰悲歌亦徒爾。杯底空餘今古愁。眼前忽盡東南美。高會題詩最上頭。姓名未死重山邱。請將詩卷擲江水。定不與江東向流。

虞忠肅祠

氈帳如雲甲光黑。飲馬完顏至江北。六州連棄兩淮墟。半壁江南死灰色。雍公倉卒來犒師。零星三五殘兵隨。勤王一呼草間集。督軍不來來亦遲。萬八千人同一泣。卓然大陣如山立。海陵走死賊臣誅。順昌以

來無此捷。降旗斫倒十丈長。六飛安穩迴建康。此時長驅有八可。以笏畫地言琅琅。不可與言言不必。冑復中原豈今日。五路烽烟百戰平。三巴門戶崇朝失。卽今青史尙餘悲。卽今戰處留荒祠。寒蘆半沒楊林口。白浪猶衝采石磯。江淮制置亦人傑。下流觀望何無策。再造居然賴此人。不是儒生敢輕敵。肅爽鬚眉一代雄。誰令遺骨老蠶叢。招魂縱有歸來日。應在吳山第一峰。

黃山松歌

黟山三十有六峯。峯峯石骨峯峯松。有時松石不可辨。一理交化千年中。丹砂琥珀共胎孕。亭亭上結朱霞封。人言松相遜石相。卽以松論何能窮。沐日浴月暈蒼翠。苔色散點周秦銅。窈峭上偃雨君蓋。糾結下固靈虯宮。鱗張鬣縮爪入肉。萬劫避過雷火攻。昔觀圖畫訝未見。到眼更覺描無功。懸崖嵌峒不知數。芊芊縱縱皆鬼工。及至觸手膏溢節。極瘦駁處春華同。清泉洗根瀉滌泱。瑤草分潤生蒙茸。翻疑石相奇太過。相助爲理論始公。青牛伏甍不可得。幾輩對此顏如童。明當遍覓茯苓去。短鋤碎劖千芙蓉。

歸燕曲

玉露零塔葉飄井。巢燕差池去無影。別路三千紫塞長。秋風一夜烏衣冷。可憐欲別更徘徊。莫氣繁華眼倦開。易主樓臺常似夢。依人心事總如灰。珠簾十二斜陽下。淒涼幾閱流紅卸。昔日拋花散綺筵。此時掠草辭歌榭。海國回頭霧百重。可應魂戀舊房櫳。玉京臂冷紅絲斷。神女釵歸錦合空。亦有江南未歸客。年

年社日曾相識。故家子弟半飄零。蘆花滿地頭俱白。朱雀航邊伴侶稀。鬱金堂上故巢非。拋殘一樣新團扇。辛苦三春舊舞衣。感恩幾輩同關盼。忽待明年更相見。一任泥拋落月梁。那堪門掩無人院。伯勞東去雁南來。百遍相呼誓不回。天空自有低飛處。不是同心莫浪猜。

聞愛督從河南歸

不飲忽忽傾千觴。朝聞故人還故鄉。夢魂飛渡京口樹。覺來海月烟茫茫。七年南北頻回首。別後狂名滿人口。結客都從燕市多。愛才肯落平原後。昨夜聽雞函谷來。衣裳紫氣猶餘否。洛陽縣裏花愁風。銅駝陌頭荆棘叢。知君懷古意鬱勃。乃使黃河一線盤君胸。緱山唳夜鶴。少室聞清鐘。下視唐陵漢寢。竟何物。嗚呼此游真足驕吳儂。我行瓠落無所惜。歲歲年年去鄉國。所愧平生拜母交。阿蒙碌碌常如昔。北海空勞薦禰書。仲宣未是依劉客。太白樓頭不見君。謝公宅畔苦離羣。欲邀紅燭三更話。除借青山一片雲。我輩相望各蒼老。萬事期君致身早。不然痛飲酣青春。坐擁列鼎兼重茵。哀絲激肉烏懷抱。堂前醉倒三千賓。出門大笑忽萬里。莫使醯雞笑殺人。

花津

一燈低昂向船久。萬兀千搖至津口。船頭正與沙堤平。拂面穆穆水楊柳。風前魚鼓已報更。岸上人家尙沽酒。客來小飲飲卽醺。三兩依依話村叟。歸塗忽散草上螢。顧影防驚竹間狗。時清喜無盜賊警。波平未

是蛟龍藪。江湖自我野興長。鷗鳥於人宿緣厚。沈吟露下那得眠。獨倚篷窗數星斗。

退潭舟夜雷雨

山僧夜半敲石火。照見古壁騰龍蛇。岩風忽刮一燈滅。驚起百鳥鳴嘔啞。千林萬竅浩呼洶。俄頃急雨翻銀車。嶺頭墨色接天色。白處雨腳垂如麻。我舟忽爾移斷岸。噲呖水石聲交加。舟人繫纜爭性命。千丈一落分毫差。懸崖怪樹電光裏。龍顛虎倒猶盤拏。誰知暴雨不終夕。打篷漸歇箏琵琶。前山已復掛銀漢。隔岸尙見飛灘沙。當窗絕壁不能上。薄雲來往明於紗。草頭點點散螢火。水上閣閣鳴青蛙。新涼美滿雖快意。但破好夢方還家。

蘭泉先生齋頭消寒夜集觀鄜湛若天風吹夜泉硯作歌

銘八分書。下小行楷。鐫鄜湛若三字。并明福洞主小印。

門鑰吸魚漏停箭。通政高齋夜張讌。燭輝沈沈酒氣濃。半酣示客端溪研。潤結雲腴細裊絲。紫蒸玉暈光凝片。有銘有印了不疑。明福洞主之所遺。我公得此走萬里。從征十載軍中攜。雷礮電燹奪不去。蠻烟惡溪沐浴之。開滕發匣起光怪。傳觀四座羣嗟咨。研乎酌汝樽中酒。似汝遭逢信希有。昔伴西山義士家。今歸東觀名儒手。當時海雪稱畸人。棄家亡命走鬼門。摩挲銅柱度藤峽。經過桂管窺五屯。藍胡侯槃雄四姓。花面蠻姬更驍勁。天女天魔舞隊奇。阿夷阿等歌妝靚。鄜生翩翩書記才。陸離瑰詭相輝映。是日猺獞屢跳梁。生入虎穴覘覆藏。記成赤雅將有用。研乎辛苦曾同嘗。一身終殉家國難。片石空留姓氏香。何如

我公佐熙代。嵩嶽森稜見風概。天子命佐征南軍。讀書長歎貔貅隊。馳檄纔清驃國烽。回軍又撤旄牛寨。詩就常分豹略餘。書成總出山經外。想當草疏還飛文。軍聲如雷寂不聞。精瑩研石不盈尺。墨瀋洒遍天南雲。歸來論功爵不次。研乎與汝同策勛。公之英名動明主。四海傾心屬公輔。會看一片墨池陰。不日化作蒼生雨。我生萬事嗟蹉跎。廿年人墨交相磨。書生報國徒誑語。我不如研何其多。傳聞同時有綠綺。身後售歸錦衣子。卽今把玩知誰人。何年劍合延津水。惜哉見研不見琴。購得我欲傾千金。持將獻公操一曲。颯颯天風泉夜音。

蘭泉先生招集蒲褐山房觀劉貫道蘭亭禊飲圖作歌

卷尾書至元六年春中山劉貫道畫

永和觴咏誰能繼。蒲褐山房夜高會。裙屐都饒晉代風。風流本屬王家事。酒酣燭樹光模糊。潑眼見此蘭亭圖。悠然坐我此亭上。和風清氣來吹噓。橫綃七尺何不有。中山劉郎寫生手。名士爭摹馬渡餘。苦心爲落龍眠後。李伯時亦有禊飲圖見畫譜亭陰背山面流水。亭中主客竟誰是。倚欄一老觀鷺羣。渺然欲逢情所欣。吾知此是王右軍。一人偏右岸巾幘。若爲蒼生動顏色。不絲不竹情不歡。此是東山謝安石。一人據案坐上風。若欲自命爲文雄。仿佛應是孫興公。當年作詩復作序。似在慘淡經營中。其餘醉醒行坐亂無次。一一皆具點睛勢。或吟或飲或笑噓。不一雷同各生氣。最後一客依修篁。擁虎皮坐神激揚。脫非謝散騎。合是袁龍驤。四十二人盡豪翰。何必皆詩皆有傳。士女空誇洛水游。旌旗卻笑華林宴。古來文讌此獨尊。亦憑此

畫方傳神。後來貫道圖裕陵。隆準日角龍爲真。真龍貌得猶易易。能貌此者嗟何人。我聞伯駒先時亦有作。吾家文獻歎錯愕。謂其纖毫微密極盡神。試較龍眠定何若。那得三圖風雨倏合併。各出精靈鬪強弱。不須望古窮幽探。筵前名士皆東南。我公文章經濟赫爲盛時出。不似典午末造無益惟空談。後來好事作真蹟。莫畫當年畫今夕。

圈虎行

都門歲首除百伎。魚龍怪獸罕不備。何物市上游手兒。役使山君作兒戲。初昇虎圈來廣場。傾城觀者如堵牆。四圍立柵牽虎出。毛拳耳戢氣不揚。先撩虎鬚虎猶帖。以楛卓地虎人立。人呼虎吼聲如雷。牙爪叢中奮身入。虎口呀開大如斗。人轉從容探以手。更脫頭顱抵虎口。以頭飼虎虎不受。虎舌舐人如舐穀。忽按虎脊叱使行。虎便逡巡繞闌走。翻身踞地蹴凍塵。渾身抖開花錦茵。盤回舞勢學胡旋。去似張虎威實媚人。少焉仰臥若佯死。投之以肉霍然起。觀者一笑爭醖錢。人旣得錢虎搖尾。仍驅入圈負以趨。此間樂亦忘山居。依人虎任人。頤使伴虎人皆虎。唾餘我觀此狀氣消沮。嗟爾斑奴亦何苦。不能決藩爾不智。不能破檻爾不武。此曹一生衣食汝。彼豈有力如中黃。復似梁鴛能喜怒。汝得殘餐究奚補。俚鬼羞顏亦更主。舊山同伴倘相逢。笑爾行藏不如鼠。

題翁覃溪所藏宋槧施注蘇詩原本

即宋商邱所藏本後歸查初白

注蘇之難如注杜。誰識良工最心苦。永嘉本已芻狗陳。商邱刻擬景星觀。終愁綴葺或失真。遺辭浪說由儀補。崑崙星宿溯洪源。紫鳳天吳工雜組。廢書神游嘉泰年。漕司善本落何所。誰知好物如龍騰。六合翺翔擇其主。巍然靈光歸寶蘇。齋名初白菴中此先貯。率更楷法久更新。施顧同時一機杼。詩外有史史可增。何必蟲魚鬪箋詁。絕識博學兼歷年。能事無慙劍南序。更從缺簡追混茫。益歎今傳多錯迕。古人所有不盡有。補之以臆毋乃魯。查田謾說能訂譌。但存其舊不猶愈。功臣玉局自有真。益友吳興究奚取。興來竟欲家置編。化千萬億光氣吐。不令此籍遭泥蟠。一爲詩生洗腸腐。公如有意付木工。乞附姓氏公其許。

湘江夜泊

三十六灣水。行人喚奈何。楚天和夢遠。湘月照愁多。霜意侵芳若。風聲到女蘿。烟中有漁父。隱隱扣舷歌。

初九夜

拉雜雨聲收。迢遙入夜愁。送涼孤月皎。得氣早蟲秋。簟冷無人院。箏殘何處樓。紅牆高尺五。盼斷玉繩流。

移家來京師

豈是逢時料。偏從陸海居。田園更主後。兒女累人初。四海謀生拙。千秋作計疎。暫時聯骨肉。邸舍結親廬。貧是吾家物。其如客裏何。單門餘我在。萬事讓人多。心跡嗟霜梗。生涯辦雨蓑。五湖三畝志。經得幾蹉跎。

都門秋思

四年書劍滯燕京。更值秋來百感并。臺上何人延郭隗。市中無處訪荆卿。雲浮萬里傷心色。風送千秋變徵聲。我自欲歌歌不得。好尋騶卒話生平。

五劇車聲隱若雷。北邙誰見塚千堆。夕陽勸客登樓去。山色將秋遶郭來。寒甚更無修竹倚。愁多思買白楊栽。全家都在風聲裏。九月衣裳未剪裁。

送嵇立亭歸梁溪

只送人歸自不歸。都門柳色故依依。春寒未免欺駝褐。野性行當逐鹿菲。見鹽鐵論去路江湖隨地闊。到時櫻笋入筵肥。爲君更誦還山樂。第二泉邊一浣衣。

武昌雜詩

上游形勢百蠻分。黯慘蠻天易夕曛。西上荆門山一綫。南來衡嶺雁千羣。郢中有客皆詞賦。楚國何峯不雨雲。誰信曲高真和寡。至今延露總難聞。

由來作鎮未堪都。花草吳宮又廢墟。江漢欲浮天地外。山川渾老戰爭餘。舳艫銜尾心空壯。鐵鎖沈沙計早疎。我喜時清久延眺。未因貪食武昌魚。夾岸雙城陡翠微。登臨誰與共清暉。更無老子連牀話。敢望仙人跨鶴飛。嶺上鳳凰歸未得。月中烏鵲去何依。漢陰咫尺愁相望。何日勞生此息機。

魯日帆檣取次開。扁舟常繫鵠磯隈。三春無樹非垂柳。五月不風猶落梅。樓上休誇崔顥句。天涯誰識禰衡才。可憐夙負黃童譽。漂泊翻成異地哀。

春日客感

只有鄉心落雁前。更無佳興慰華年。人間別是消魂事。客裏春非望送天。久病花辰常聽雨。獨行草路自生烟。耳邊隱隱清江漲。多少歸人下水船。

金陵別邵大仲游

三千餘里五年遙。兩地同為斷梗飄。縱有逢迎皆氣盡。不當離別亦魂消。經過燕市仍吳市。相送臯橋又板橋。愁絕馱鈴催去急。白門烟柳晚蕭蕭。

程夢湘

字荆南。丹徒人。貢生。官清泉知縣。有松寥山館詩鈔。

蒲褐山房詩話。松寥集。資清以化。乘氣以罪。如瑤臺瓊島間。被仙霞而飲甘露。所謂水仙數萼。冰梅半樹。未足喻其芳潔也。蕭真幽澹。直匹王章。後試令湖南。盡覽瀟湘山水之勝。寓書于予。以此自誇。然未嘗見其篇什。中年殂謝。不竟其才。世之欲洗俗塵而錫宿垢者。五言古詩。必染指於此。

西沆夜行

日夕湖水清。蒼茫月明裏。水清不受月。月出見湖底。遙山隱鱗鱗。微波空瀾瀾。星星漁火生。杳杳擊音起。

開簾向空綠。一碧見千里。空明溯流光。沿緣擷蘭芷。盈盈渺難卽。臨風懷彼美。

雙溪納涼

徙倚臨前溪。坐此嘉樹林。蟬聲在高柳。晚風送餘音。菱荷靜如拭。幽香散冲襟。乍看涼雨歇。復喜歸雲陰。濯濯溪上月。泠泠手中琴。一彈復一吟。悠然清我心。

張公洞

曲蹠下幽蹬。山形如釜覆。霹靂弄奇險。明晦判前後。老僧向予言。終年失昏晝。深黑莫敢窺。涓涓滴垂溜。仙鼠不避人。撲撲近衣袖。眞靈匪云遙。轉睫或可覩。行行路忽阻。仰見天光透。振衣陟崇嶺。決背俯平岫。山魃獻諛媚。雲物羅綺繡。薄暮難少留。荒寒嘯羣狖。顧我心跡清。何時脫塵垢。僊乎丙子翁。于茲葆貞壽。殘月下柁樓。鳴榔破幽寐。露稀天益澄。水遠星初墜。遲明啓篷牕。峭寒襲衣被。時有微風來。菰蘆響清吹。水花不知名。輕盈送香氣。渺矣孤客懷。于焉發遐思。

西溪水宿

歸次雲陽

朝發香草湖。曠然豁胸次。秋雨澄鮮新。晨光蕩溶滌。稍見遠山橫。空波落寒翠。沙禽流好音。岸花適閒意。迢遙建陵口。宛轉香林寺。一往烟水深。爽焉脫塵累。羨彼鷗鳥情。飄飄何所繫。

夜宿雲林曉步冷泉亭上

深夕憇南磻。龕燈照清宿。無風松自響。未聽先滅燭。中有太古音。泠泠漱鳴玉。乍疑吹笙竽。漸似拂琴筑。不知雨是水。半偈皈玉局。靜極轉無寐。侵晨步幽谷。來登泉上亭。新涼滿風竹。石色含古陰。苔坂上衣綠。泉心無熱惱。冷趣自能足。悟彼寂中喧。衆響愈幽獨。因知石上泉。清機時往復。泉石本無聲。會此偶相觸。何須辨無無。初陽散林麓。

晚入海嶽菴中訪友人閒話

圓景頽西江。循途下山麓。歸鳥破暝色。閒雲翳叢綠。言訪素心人。經聲出深竹。禪扉晚不關。一徑入祠屋。相遇無煩言。清吟坐空谷。人寂香愈清。談深茗初熟。攜琴憺忘還。新月挂高木。

促席

促席坐寥寂。素絲琴未張。高齋客久去。滿院松花香。徑僻喧山鳥。人閒遲夕陽。稍看巖壑暝。衣袂早生涼。

曉起大雪

茅檐明夜色。晏起擁爐吟。遶屋寒流靜。開門雪正深。微茫辨籬落。蒼翠失雲岑。趁欲沽邨酒。前溪不可尋。

惠山

迢迢十八澗。路轉復幽通。坐倚泉邊石。時來松下風。攜琴修竹裏。躡屐亂雲中。欲就愚公隱。心期或許同。

南樓對月

孤鴻聲可數。黃葉落無多。復此南樓月。離思渺若何。烟開溧陽樹。山接貢湖波。明發歸帆遠。乘風好放歌。

優曇庵看梅

不復似人境。好風來自東。花明鳥影外。香滿磬聲中。徑入春籬短。窗開雪澗空。只愁迷去所。隔水訊樵僮。

晚步甘露港看桃花

春雨過幽塢。芳林明晚霞。閒臨清溪水。隱見碧桃花。欲問仙源路。還來就釣槎。何當入深處。一訪隱淪家。

春日幽居

臥聞春雨歇。清曉啓南軒。掃石苔花潤。開門溪鳥喧。因之尋寂樂。有得遂忘言。自足幽人趣。何須離垢園。

春晚雨餘池上獨酌

雲薄不成雨。夕陽開又晴。園林極幽瑟。池館悉空明。酌酒穠花發。懷人春草生。登樓起遐思。棖觸謝公情。

立秋日偶作

西堂不受暑。況復晚風清。一葉落無意。悄然秋思生。蘿陰歇微雨。荷沼作新晴。爲問淮南樹。招人若有情。

晚過方丈訪松亭德上不值

巖棲十笏徑幽通。定板初敲訪畫公。碧磴松吟猿梵冷。香廚花掃鶴糧空。行旃定識投雲外。詩卷何因出

械中，閒卻烟窗雙塵柄。片時清話未能同。

廣陵客舍食魷魚有感

潑刺銀刀出水鮮。客盤樽酒對堪憐。試燈風裏初登網。少別春江又一年。

送萬少滄之吳門兼懷吳門諸子

風絮飄零一愴神。傷心端不為殘春。昨宵病酒今朝雨。況復懷人更送人。

蘇加玉

字維晉。號餐霞。太倉人。諸生。有蓼蟲吟稿。

蒲褐山房詩話。維晉才情雄傑。骨力開張。少時猶及見沈子大。顧玉停諸先生。備聞緒論。而又以杜韓蘇三家為宗。同里汪衡玉少司空。視學安徽。江右河南所至必偕以同行。性極好游。凡遇名山故蹟。必登臨吟嘯而去。故集中所作。極為卓越。歸而貧益甚。年逾六十。猶作童子師。以自給。余嘗過所居。繩樞圭竇。穎首而入。見其敗甍破席。吟咏自如。雖饕殮不繼。弗顧也。

三月五日自九江赴饒州。阻風大孤山。次日進艇至青山。風橫浪逆。瀕於危者數矣。幸而獲免。詩

以誌感

九派何湯湯。彭蠡漫浩浩。江湖互吐吞。日夜勢春擣。放舟潯陽郭。帆指饒州道。春氣遠空濛。指點鞞山曉。須臾颶風來。雨暗失江表。篙師亟停橈。繫纜依別島。一夜苦雷碾。明發仍嫋嫋。藏舟獲苟全。速進禍迺兆。開頭汎中流。箭激快輕矯。共嗤勇退非。利涉取機巧。誰知風更狂。捩舵欵傾倒。倚舷顏色灰。咄咄呼三老。

險夷信由命。順逆人所造。得勢請莫矜。入坎悔當早。波瀾何地無。達者洞深窅。獨憐我窮途。投足真艸艸。漂泊誤依人。忠信愧夙禱。出險神或哀。前途正未了。何當返蓬廬。藜藿得一飽。驚定拭淚痕。默默問蒼昊。

十八日發硃砂菴過天門至老人峯歷巢雲洞上小心坡渡斷凡橋抵蓬萊島穿一線天遂登文

殊院

寺後萬峯擁。峯峯插天勁。回睇已蹈空。前瞻翻陷窞。升高固有基。陟麓豈云竟。乍轉披蒙茸。屢折入幽負。削壁劍倒懸。叢岫筍互迸。沙崩激洄湍。石亂肆橫互。險艱非一途。攀緣絕孤磴。童僕駭徬徨。朋儕策濟勝。中道肯迴車。一鼓不待更。抱崖十指牢。垂岩一足賸。屈膝摹過腹。縮項低觸脛。詎止蠶叢剖。直與鴻濛競。天門手可捫。老人笑相迎。前行路復紆。遞歷景逾靚。鑿洞白雲巢。裂石蒼松孕。瞥過小心坡。罡風吹夢醒。安危慎走趨。吉凶歸定命。絕壑斷凡縱。危橋續懸絙。混沌失全天。蓬萊徒真境。叶縹緲。文殊臺。烟靄破鐘磬。聳身入靜藍。足駐喘未定。却忘登頓疲。共詫奇詭併。不從歷劫苦。誰能造仙聖。

初春偕友人游大梁上方寺遂出郭登吹臺

昨日苦風沙。今朝豁澄霽。夙約聊可踐。晴郊喜並轡。河水渙流澌。堤柳折芳意。稍違闐闐喧。宛造華嚴界。幽思款禪關。清香滌茗器。翹首企浮圖。積鐵插雲際。神禦河伯逃。力制馮夷避。至今枝撐危。尙駭波濤漬。蒼茫梁宋跡。歷劫獨未墜。上方寺有鐵塔。輕河患。古跡皆湮。鐵塔獨存。又聞古吹臺。郊外緬遺吹。枚馬今飄零。高李昔酣醉。芒

碣雲久荒。滄桑遞興廢。一慟呼梁王。日落黃河外。悄予罷登臨。歸騎衝烟靄。吊古意未休。清秋冀來再。

孟津渡河

夜宿河陽城。朝發孟津渡。旭日澹朦朧。風沙莽回互。舍策臨沔潯。登艫肆遐顧。西自崑崙來。三門束砥柱。東走豁平原。浩漾實始豫。茲地尙滌游。下流更奔注。禹跡嘆久湮。遷徙代已屢。聖世恤民艱。堤帶發府庫。大吏擁符節。百僚競馳騖。安瀾今有慶。宣房安足慕。中流俯魚龍。兩岸列烟樹。南北歷連遭。山川氣吞吐。擬撰河清頌。豈獨遠遊賦。

曉發洛陽次函谷關

聞雞舞劉琨。驅馬背洛邑。洪濤蕩曦霞。曠景布原隰。西馳越數里。岡壠驟叵叵。崖欹輪側旋。峯倒石欲壓。白晝星沈沈。黃沙風獵獵。四游篋笥鉗。中鑕劍戟插。睥睨界雲懸。仄徑梯空躡。云是函谷關。終古撐危堞。又云楊僕移。漢武始創立。嶠陵華岳通。柏谷桃林接。熊耳搯其肱。地肺貫其脅。時平走星輶。世變屯組甲。堅壁一夫怒。環攻萬騎怯。在德豈在險。自焚悔不戢。虎視羣雄吞。鹿逐劉項入。誰知百二封。莫敵三章法。魏晉迄隋唐。戎馬血紛躒。幾見敗劉聰。仍聞斷李密。叶四海今一家。夜戶且不闔。戎壘桑麻叢。山砦牛羊解。徒此撫重關。慷慨吊前劫。未棄終軍繻。漫効步兵泣。龍鱗拭寶刀。摧鋒韜玉匣。

書魏叔子大鐵椎傳後

鐵椎一擊天欲掀。重五十斤柄摺環。壯士揮之如弄丸。十盪十決人馬奔。出沒隱見疑鬼神。風馳電掣星斗昏。決戰夜半賊若雲。摧枯拉朽安足論。髑髏僵立敗馬蹲。壁上觀者驚心魂。歛忽大叫馳騰輪。但見百里揚埃塵。豪健枉數宋將軍。壯士如此真不羣。嗚呼壯士真不羣。胡不盪滅秦寇掃楚氛。

十九日登文殊臺看前海諸峯放歌

夜宿文殊院。曉上文殊臺。文殊何年此跌坐。須彌芥子納九垓。普門行者感靈夢。誅茅願力何雄哉。左獅右象互蹲踞。玉屏背枕相差排。前面陽崖數十丈。佛座突兀依中台。攝衣拾級眼界闊。但見千峯萬峯掀舞空中來。硃砂日映絢紺碧。桃花爛漫天邊開。八卦森羅列。老人似嬰孩。層巒峭壁不足數。一一礪底抽根荦。指點昨日所來路。蛇穴鳥道交縈回。仰睇天都最奇崛。青蒼一氣連斗魁。渾元運化萬萬古。天地未闢此峯精氣先胚胎。六鰲不能戴。劫火不敢災。五岳爭雄失卻一大物。逃入黃海羣峯崩角誰能儕。獨有蓮花不肯下。一莖萬朶凌虛栽。蓮蒂蓮柎苗秀色。千年不謝長滋培。猶恐勢孤力未敵。旁擁蓮蕊高崔嵬。歷歷出沒雲濤堆。罡風吹掃轉瞬盡。又覩軒轅羽駕乘雲迴。高臺壯觀有如此。憑凌大叫舒胸懷。半生落魄世齟齬。撫髀日夜嗟摧頽。功名富貴有定命。深山窮谷無容媒。浮邱容成日攜手。庶幾陶寫中心哀。君不見文殊院中老僧如死灰。獨占絕頂居蓬萊。文殊院止有一僧。貌似三四十歲人。而問其年。但云五十年。不下此臺矣。不誦經。止朝夕誦算法九九數百遍。以爲功課。冬夏不易衣。每日一食。慈光寺僧給之。有時不繼。或五六日不食。見客但稱爾汝。無世法。與之財物不辭不謝。慈光寺僧來取去。

九龍潭瀑布歌

一龍奮爪攫烟霧。一龍弄珠互吞吐。復有一龍掉尾游。尾拖十丈藏其頭。其餘六龍各驚繞。鱗鬣開張勢天矯。咄哉九龍非真龍。迺是瀑布懸晴空。奔流穿雲抉石走。石破凸凹屈作九。鬱怒欲洩氣更豪。轟雷聒耳陰風號。萬峯雨注澗水匯。鴻洞一霎翻雲海。只今久渴無飛泉。泥蟠寒谷龍穩眠。欲布甘霖滿寰宇。會待風雲上九天。

苦熱行鄭州作

吾聞豫州天下中。陰陽和會徵時雍。胡爲自春徂夏苦赤旱。但有烈日無清風。六月溽暑愁蘊隆。炎帝赫怒驅祝融。圓蒼爲爐地爲炭。實以萬物鎔作銅。渴龍鼓鬣騰煙空。火珠迸射六合紅。烏鳶張口牛馬喘。草木焦卷千山童。可憐客子如投籠。官衙湫隘難爲容。唇乾口燥汗被體。晝立夜坐心沖沖。況復卷帙紛填充。黃茅白葦何厖茸。手操栗尾罷搖扇。神昏意倦迷雙瞳。渺然天半二室峯。峯前漢柏涼陰濃。玉女窗中貯冰雪。逍遙谷底鳴琤琮。近在百里行可從。曷不追暑扶吟筇。不爾黃河萬里驚濤洶。盪滌煩酷開心胸。濯纓濯足兩清絕。直欲穩臥蛟龍宮。吾家吳江東復東。五湖三泖環瀛通。鷺鷥宅藏楊柳渚。芙蓉屋繞菰蒲叢。中有赤腳漁翁。櫂頭艇子遮短篷。往來烟波唱款乃。三伏那怕炎威攻。別來此景久未逢。風塵襍穢悲途窮。安得金鱗掃虐燄。清涼玉宇懸高穹。

陶靖節舊里

淵明非隱士。解帶竟歸田。乞食得無拙。躬耕聊自全。壺傾仍獨酌。琴在不張弦。故里今猶識。桃源何處邊。

文信國祠

舟覆崖山後。中原恢復難。自甘流碧血。果肯戴黃冠。諸葛心存漢。留侯志報韓。空山儼祠宇。松柏颯陰寒。

春盡日雨中過藍橋夜泊石港

暮雨渡藍橋。征途去轉遙。雲兼愁思積。春與客懷消。白鶴歸來晚。青絲日夜凋。停帆石港宿。仙夢憶吹簫。

蔚村先生移居

五岳神遊路未通。依然蹤跡落寰中。襟懷欲拓千間廈。嘯傲仍無一畝宮。差擬江湖隨泛宅。縱非羈旅亦飄蓬。何年果得頑潭住。倚棹春風放釣筒。

先生慕陳確菴頑潭舊隱故別號蔚村

桐廬

桐廬風景人清妍。一葉凌虛坐渺然。山色倒涵明鏡裏。江流遠瀉白雲邊。松杉滴翠宵藏雨。鳧鴨衝波曉破烟。欲訪仙靈棲隱處。結茆常得伴林泉。

晚泊黃泥坂次陸所亭韻

風柵蘭橈繫晚汀。空江細雨共冥冥。林間鳥去村烟白。浦外漁歸岸火青。客緒如絲吹易亂。春陰似夢喚

難醒誰將古調翻流水。驚起魚龍夜半聽。

秋夜尋岑山星巖寺

雨歇殘陽滅遠岑。暗中搖櫓度雙林。水分島嶼灘聲緩。寺隱藤蘿石逕深。法界鐙明塵夢覺。空山秋半夜寒侵。到來西體禪牀穩。臥聽清宵響梵音。

宋州

南北江山一郡分。歸德蔽江淮而通關陝為南北要衝襟喉保障鎮雄軍。朱梁為宣武軍後唐改曰歸德軍孟豬遠撼黃河浪。芒碭深屯赤

帝雲。張許至今為厲鬼。郡有雙廟羅袁異代起妖氛。羅汝才袁時中與李自成為明末流寇黍離磨滅滄桑跡。畫角城樓夜不聞。

南陽

南陽氣象尚氤氳。發迹英雄漢代聞。高密建功能再造。武鄉遺憾竟三分。洧川壁壘迷荒戍。新野旌旗卷暮雲。成敗興亡誰可料。霸才王佐各超羣。

琵琶亭

琵琶亭外水連天。落日帆檣佑客船。不待秋風波浪急。潺湲夜夜入哀絃。獨客停橈喚奈何。晴空渺渺湧春波。天涯淪落相逢少。未覺當年墮淚多。

殷如梅

字果園。元和人。諸生有綠滿山房存稿。

蒲褐山房詩話。果園安貧樂道。苦節自貞。乾隆庚子春。予扈蹕至吳閫。借沙斗初步屨往訪之。曲港一灣。衡門兩版。在橫橋疎柳間。簾瓢屢空。嘯歌不輟。蓋錢穀居節一流人也。句如梵唱微微。知寺遠。松陰黯黯。覺山深。好句有時堪入畫。閑情無日不提壺。蛙聲四起。夜深逾靜。月影半沉。星倍明。身賤底須深處。隱才疎。敢放醉時歌。東風綠到門前柳。小雨香生砌下蘭。深深窶受黃梅雨。小小驢煎紫筍茶。雨中花鳥都無賴。病後詩文儘放低。茶烟不共晨炊斷。梅雨能令午夢涼。將添菊枕。因花老。欲卸松棚。為葉乾。半畝瓜壺秋色早。一庭梧竹雨聲多。亭名放雀橫烟靄。洞憶呼猿挂薜蘿。林臥真堪忘歲月。樓居應不媿神仙。置之石湖居士集。堯峰詩鈔中。孰能軒輊。

晚步寄張丈岡

悠悠溯秋水。獨步空塘晚。蟬聲不厭多。山色偏宜遠。借問素心人。何時共消遣。

宿清淨菴

淒然不成寐。獨夜多虛警。雨檜雜風篁。聲喧轉幽靜。隔牕梵唄歇。知是僧初定。

晨別石佛寺

空山多清響。夢覺悵幽獨。起看朝日升。露光泫衆綠。羣芳襲人衣。孤雲娛我目。樵唱聽還失。隱隱在深谷。

靜對澄潭坐。閒持道書讀。此境惜暫遊。何時得再宿。飯訖辭林僧。回首隔川陸。

蔡將軍歌名人龍

峩峩均房山。迢迢大藤峽。猺獠據其中。走險猿猱捷。將軍父子真英雄。曾討南粵征西戎。忽然奉命來勦

賊直前孰敢撓其鋒。林箐何深路何惡。此時勇氣十倍作。蛇矛天矯人羣蠻。白袍血濺紅斑斑。援師不至將星殞。戰馬悲鳴人力盡。力盡下拜謝至尊。曰臣某某死國恩。烟塵黯澹風慘冽。銜鬚拔劍當轅門。紛紛漆齒爭馳突。馬革猶存尸竟失。長君痛憤激諸軍。殺氣呼聲遏陣雲。背負如生元帥首。盤空一鵲殲鴉羣。淨掃妖氛看倏忽。直是陰魂護殘卒。吁嗟死綏自古多。轉敗爲功得幾何。至今嗚咽潯江水。遙和陳安隴上歌。

題山家壁

茅舍此山邊。寥寥八九椽。炊烟籠竹樹。人語帶風泉。耕鑿非逃世。棲遲不記年。卜居如有意。幾許買鄰錢。

韓蘄王碑

峻嶒片石硯山旁。忠武勛名日月光。尙憶使船如使馬。獨憐擒賊未擒王。幾年驢背英雄老。千古龜趺歲月長。共道中興功第一。行人瞻仰奠椒漿。

宿中白雲

布衾紙帳夜初寒。禪室幽閑夢亦安。不聽松風牀下響。那知身在白雲端。

朱士廉

字孟容。號醉竹。休寧人。昂之子。監生。著有捶琴閣詩集。

晚過寒山復返支硎

疎林霏夕靄。古寺滴寒泉。笏立疑無路。峯迴別有天。野茶花點雪。密竹翠含煙。欲借招提宿。飄然意若仙。

朱履長

字仲恆。休寧人。士廉弟。監生。

送吉人從祖歸桐鄉

日落旗亭晚。扁舟獨問津。小樓今夜雨。撰杖與誰親。遙憶鴛湖路。微波長綠蘋。甌山歸臥後。悵望寄修鱗。

過中峯登水明樓

閑尋松下逕。更上水明樓。空翠諸峯滴。寒泉衆壑流。風生叢竹響。雨霽白雲收。擬託東林社。常從慧遠游。

韓是升

字東生。吳縣人。諸生。有聽鐘樓詩稿。

插秧

夏至風雨時。秧針秀如翦。村農力作勤。插蒔足皆跣。溝塍晝短長。泥淖測深淺。行分翠剡齊。莖比青莎軟。開軒面平疇。倚杖看遙巘。愧彼田中人。筋力各黽勉。但期禾黍熟。簞笠傲軒冕。

張貞女詩

女未廟見死歸葬女氏黨。明文載禮經。未嫁豈容往。夫死而守貞。例不旌門榜。張女秉志堅。許字姓恥兩。聞喪絕水漿。飲泣意悽惘。阿父諒女心。改節勢難彊。衰經歸陳門。篝燈事績紡。蹟同古逸民。遭變伏榛莽。緣章縫賤。再作出山想。操勵清霜嚴。懷澄皓月朗。君綱與夫綱。道在不可枉。當其矢志初。焉計破格獎。一心貫始終。大義炳天壤。

張公洞

出門不逢人。撥草始得徑。洞從地底入。其口小如磬。黝黑無陽光。秉炬僅能暎。摳衣行彳亍。積雨苦泥濘。蹉跌筇難支。登降足交病。童奴捷如猿。扶掖倚爲命。中間忽豁朗。驚魂坐稍定。鹽堆與米堆。仙牀及仙甌。領略豈能遍。奇自太古孕。垂垂石鐘乳。融結類晶瑩。石燕時飛翔。翩躚羽毛淨。欲尋庚桑公。遺跡渺難證。記傳多支離。傳會詎足證。盤旋見天日。奮迅出深窅。回顧百丈塔。凜凜汗流鬢。細認磨崖書。福地到生慶。

洞口古篆張公洞。天福地六字。

齊河旅次逢姜度香少司寇使旋

使節遙從雉水還。相逢一笑客途間。故交屈指如君少。過客何人似我閒。此去全家依粵海。幾時重晤上燕山。回瞻北極星辰朗。梁月時疑照舊顏。

徐麟趾

字春書秀水人監生有荔村詩鈔

蒲褐山房詩話春書本籍駕湖移居印上於盧雅雨運使稱詩弟子是以江浙名流類多傾蓋金冬心農題其像云一卷詩比瓊瑤鸞牋手人不如酒有鎗幌有書識是誰南路徐王穀原又曾贈以詩云十年小別東瓜堰一夕相逢皂莢橋大抵詞人慣羈旅未緣明月戀吹簫幾卷新詩黯淡吟天涯畢竟有知音中年偏與飢寒會典去衣裘又典琴聞道白沙江口住近攜家具夢揚州腰纏一笑原烏有鶴背高寒獨耐秋葉落淮南旅夢殘可知門戶故家難不如歸汎南湖月占得鷗沙把釣竿

歸真州草堂作

望裏柴門近西風一櫂歸夕陽在樵徑落葉下漁磯山水清無恙鷗鳧靜不飛家人權置酒為說蟹初肥

蘭泉歸青浦別後卻寄

東風吹雨夜揚舲篷背瀟瀟可耐聽海市蜃烟孤嶼白江村漁火一燈青長帆駕浪愁歸緩短榻懷人怕夢醒想見彩衣歡拜母團圓春酒話家庭

寄都門友人

屏跡幽耽水竹居枕邊無夢到華胥十年久絕彈冠想萬里頻傳卻聘書月夕論文多弟子花時載酒半樵漁凌煙事業推公輩戀我青蓑老荷鋤

紅橋春望

誰遣韶光滿目前東風吹草綠生煙大堤楊柳環城郭小市鶯花接墓田載酒豈無王司入李傷春只有

杜樊川勾留最是紅橋月。一夢揚州十二年。

懷人詩

韓水人來訊起居。幅巾藜杖健如初。閉門不覺窮愁老。白髮青燈夜著書。程午橋

相逢禪榻話蹉跎。水繪園邊側帽過。一自江湖空浪跡。梅門風雨別來多。姜皋原

去年曾到官梅閣。四壁吟看沈約詩。病後知君圍帶減。一番風雪鬢成絲。沈沃田

蕭涼孤館對枯僧。君獨能來興頗勝。吟落峨眉橋畔月。水南歸去夜分鐙。李晴川

春風嘗過羅含宅。看寫梅花當早餐。別夢不知江水闊。一庭明月話秋寒。羅兩峰

金夢麟

字仁趾。全椒人。諸生。有洗墨軒詩。

過上谷郡

居庸關外路嵯峨。古戍迢迢倦客過。落日孤城懸上谷。秋風匹馬渡渾河。寒沙匝地村墟少。野火連天戰壘多。伏櫪空懷千里志。壯年歲月苦蹉跎。

登懷安城贈孔明府曜南

女祁城倚最高峯。草白沙黃朔漠空。萬里邊牆寒日外。諸羌部落暮雲中。地分燕趙山河壯。天限華夷保

障雄父老不須權借寇。北門鎖鑰付萊公。

同江賓谷吳猷芎王古村葯根上人鐘越姪游平山堂

蜀岡憑眺楚天開。人盡登高作賦才。萬壑松濤排地起。千重山色過江來。古今勝蹟留詩卷。湖海相逢共酒杯。指點招提猶未遠。更從支許講壇迴。

陸象拱

字杏村。長洲人。監生。有對柏山房集。

蒲城縣烈女馬蘭香墓

曾參養曾皙。顏路泣顏淵。二語係烈女口占。事有不一致。沈吟起長歎。親恩豈不重。節孝難兩全。著我新羅襦。采

絲事事纏。微軀委白練。大義何皎然。涼飈掃蠅蚋。溽暑時未闌。觀者咸太息。異事今流傳。人生等死耳。此死重泰山。忠孝無轉念。稍遠則已遷。慷慨固非易。從容良獨難。讀書勵名教。百行多所愆。讓彼蕙蘭芳。清芬垂簡編。

芬垂簡編。

商於新開路

嶺泉垂百道。山路更參差。翠竹仙娥驛。紅橋綺里祠。猿聲驚旅客。虎徑問樵師。莫歎張儀詐。川原幾變移。

鍾吾驛

已過鍾吾驛。沕河一水環。烟深伍相里。城枕馬陵山。鷗鷺隨波靜。漁樵帶月還。白雲鄉未遠。約略隔重關。

邗溝感興

繡陌曾驅白鼻駒。春風離恨在天涯。矮牆一樹花如笑。記取紅橋第幾家。

湖海詩傳卷三十五

楊芳燦

字蓉裳。金匱人。貢生。今官戶部員外郎。有吟翠軒初稿。

蒲褐山房詩話。蓉裳驚才絕艷。綴玉聯珠。駢體之工。幾于上掩溫邢。下儕盧駱。而詩則取法於工部。玉溪間填詞亦清妍婉麗。兼有夢臆竹山之妙。乃僅以拔萃科選為伏羌縣令。既而逆回構亂。烽火連天。蓉裳嚴守孤城。授子傳餐。獨當豕突。予時在鵝觚。督兵堵禦。草檄飛書。往來問詢。見其意氣自如。嘯歌不輟。知其必能辦賊事。平後久之。乃量授靈州。又偃蹇十餘年。始為農部。雖兼會典館纂修。而終不獲與於承明著作之林。殊為缺事。然聞京師盤敦之盟。必以君為赤幟。蓋光燄固不能掩也。

雨夜喜洪大華峰趙大映川過訪

暮雨黯平林。江雲莽無際。隔牆榆柳葉。策策鳴軒砌。目極南雁飛。心傷北風厲。董生園不窺。仲蔚門常閉。忽聞剝啄聲。喜見故人至。得慰飢渴懷。且略寒溫例。深衷互傾倒。軟語及瑣細。憶昔我與君。相望有年歲。兩函魚雁字。千里金蘭契。牢落賦停雲。飄零嘆秋蒂。今夕是何夕。良朋許聯袂。呼童掃蓬華。促饌供粗糲。堆盤煮蔬筍。沃釜烹鱸鱖。君為盡十觴。我愧無兼味。落落忘形骸。怡怡敘昆弟。酒闌促坐語。商略盡文藝。詞壇日蛙黽。雅道方凌替。努力愛盛年。等身富清製。南溟鵬欲化。碧海鯨當掣。決雲千仞翔。臨風九臯唳。曹劉競豪健。李杜誇雄麗。古人今不作。絕業君其繼。入世葆聲華。立言務根柢。苦辭慎勿忘。前修永為勵。

飢烏啼獨樹。秋旻忽澄霽。岩高初月沉。參橫衆星嘒。嗚嗚哀角喧。黯黯青燈翳。匆匆撤殘檠。悽悽送歸柩。相逢纔破顏。話別重揮涕。去矣莫復陳。川原正迢遞。

寄懷錢三曙川

時曙川由
蕪之陝

鍵戶絕將迎。索居少歡意。念我同心人。飄零各天地。憶昔我與君。旅舍欣把臂。從此數招尋。素心訂神契。我齒少於君。君畜我爲弟。文史相嬉娛。金石互磋礪。秋風暨陽城。清樽夜同醉。爲歡無幾時。旋判江干袂。獻歲春之孟。君作北行計。買馬料衣裝。去應春卿試。團雪苦易散。飄蓬木無蒂。會合不可常。蹤跡倏離異。時時向西笑。望君掇高第。君本磊落才。千緡富文藝。名不忝翹材。官應典中秘。奈何金門賦。屢上遭棄置。九萬始培風。六月忽垂翅。淒涼抱璞心。惻愴廻車淚。長安米價貴。居又大不易。席從幾時煥。駕向何方稅。問訊北歸人。語苦未詳細。昨宵聞剝啄。蓬門來驛使。燕臺三千里。弱弟作齊贅。謂荔裳寄我一札書。道君出幽薊。單車度函谷。意氣頗凌厲。關中昔天府。平臯莽迢遞。巨靈拓高掌。破空出奇勢。秦皇縱博處。箭栝長丈二。鈎梯不可攀。仰望心已悸。八川鼓洪濤。噴欲入清渭。秦嶺瞰九嶷。一氣鬱蒼翠。歷歷漢唐陵。豐碑轟如蝟。月黑松楸深。森寒走妖魅。君行恣憑眺。到處頓征轡。奇境入吟懷。奔溢不可制。揮毫書峭壁。乞火題破寺。脫手皆珠璣。錯落盈篋笥。浮名何足論。此寔千古事。嗟我獨何爲。草間日憔悴。豈不願騰躍。束縛有家累。懷君百感集。纚纚坐揮涕。擲筆復高吟。天風激淒戾。

可給廩

華林園蛙兩部。前者吹。後者鼓。君曰給廩給廩可。蛙言官家不如我。糲一盂。桃數顆。誰給糲。憐君餓。君不聞。牝雞夜叫天。模糊齊趙厲。吻相吞屠。爲公爲私君知乎。

爲果溪先生題友松圖

君不見元禮謾謾如松風。長輿落落如長松。誰其匹者今劉公。骨幹眉宇將毋同。公乎掀髯喜清嘯。愛松之人與松肖。亟呼妙手寫吾照。十丈虬枝倏天矯。調調刁刁江風涼。霜鱗黛甲爭開張。我公據石繙縹緗。唱于唱喁狂非狂。脫帽露頂神洋洋。嘯嘯翁支離叟。一生孤直耐嘲詬。朝華夕秀豈足偶。彼蒼髯者吾老友。廿載摩挲最耐久。一任羣兒笑衰醜。松乎善保歲寒姿。盟以金石永不移。竭來與子相娛嬉。茯苓琥珀背松脂。屑而食之甘如飴。良友所贈公莫辭。公莫辭。令公喜。骨青髓綠世莫比。駐公光景三千年。乘雲去友赤松子。

貼梅扇子歌

扇爲冒姬董小宛所製

九華宮扇裁紈綺。錯翠鉤紅世無比。寧須漢殿織麟毫。不向謝家誇麈尾。活色生香點綴工。折枝梅萼影重重。孤山萬樹花如雪。飛入卿家便面中。奪得仙人掃花帚。收拾冰姿出塵垢。畫圖嬌面試春風。未許徐熙矜妙手。纖指拈來上碧綃。忍令香粉逐春潮。招涼曲院藏羅袖。待月西樓傍翠翹。吳儂小搯紅牙脆。掩

映歌唇逞妍媚。吹到嗚嗚鈿笛聲。恐教顆顆冰花墜。烟魂月魄太分明。入手翩翩蟬翼輕。借問當年誰鬪巧。依稀記得董雙成。雙成家在揚州住。門前便是紅橋路。射雉參軍正妙年。飛梁架就銀河渡。錦幙文牕貯粉兒。明霞爲骨玉爲姿。劇憐妾命如花薄。偏遇霜欺雪壓時。當筵曲唱家山破。高家兵馬闌江過。細雨關山正斷魂。澹妝恐被塵埃浣。歸來魚鑠鑠重門。寒食東風度好春。妝閣新翻方麴樣。一枝爲贈遠遊人。素英狼籍梨雲凍。一去珠宮騎彩鳳。塵世難逢萼綠華。師雄空入羅浮夢。箠頭點點淚花圓。剩墨零紈總可憐。君不見謝娘團扇曲。一般辛苦互流連。

王氏漢官銅印歌

吾鄉王殿撰。爲秦中學使時。部民發冢。因得古銅印數百以歸。今散失殆半矣。余于其孫光齋頭見之。爲作此歌。

北邙山勢何嶄岩。聚斂魂魄歸蒿蕪。墳封馬鬣土脉旺。碑劓蚪篆刀鋒銛。兕皮作槨堅且韌。蜃灰墜壁幽而潛。深林祇有陰胥語。黯隧不見陽輝暹。健兒嘯聚試身手。黑夜竊發揮鉏鎌。石扉雙閉脫扃鑰。鐵鞞碎落無帷帘。碧玲唾壺頰玉盃。雲母臥榻青銅奩。墓前椎碎捧燭爨。懷中盜出滴水蟾。最多纍纍古印檢。取去一一拋榛蕪。可憐棄置賤如土。誰能購取酬以縑。王公遠宦越險阻。王公諱雲錦古物入手窮該兼。奇蹤詭跡搜欲徧。爛銅殘鐵求無厭。俸錢探囊已罄竭。古癖刻骨難鍼砭。裝充翡翠不足羨。車盈薏苡寧傷廉。攜

歸幽齋自摩玩。未許俗客來窺覘。匣將珍瓏暨徽尾。配以罽罽和盃鷺。土花斑剝鸚鵡鏽。血暈拉雜珊瑚
鈴。龜螭壓鈕妙刻畫。蚪蛟蟠字驚觀瞻。嗟余好古生苦晚。韓句對此懷舊情難忼。雙眸注視屢眴轉。寸喙噤
斷空甜澹。官銜缺齧辨蝠扁。篆籀佶屈如疇嶮。中樞權勢山岳重。部曲號令風霜嚴。虎符制閫牘頻押。龍
章降省名同僉。奇物閎世久仍在。餘威炙手今已燂。吁嗟乎山陵半入劫灰黑。玉石莫逃野火炎。世餘此
物未磨泐。天豈有意存微纖。荒原颯瑟伴狐兔。幽巖黯黹叢蛇蚺。精光夜上觸牛斗。靈神默護趨屏黔。爲
幸精英盡洩露。旋恐零落無留淹。著書重訂琳琅譜。蘊奇密銷瓊瑤械。未央宮瓦礫作硯。上林苑竹磨爲
籤。蕭齋得此足三絕。縱有奇物無容添。

錢忠懿王金塗塔瓦歌

貝闕琳宮啟華閼。云是錢王布金地。椒牆剝落帖花檉。龍帳森寒鏤幽魅。訪古人來叩法局。摩挲神物易
漂零。天衣中坼青猊座。劫火延燒白氎經。賸有嵯峨相輪在。土蝕塵埋經幾載。什襲欣看趙壁完。護持不
共梁甌碎。刻畫丹青入細磨。幡幢瓔珞現修羅。徧傳大衆優婆塞。共禮前朝宰塔波。相傳此是宮中物。錢
王舊事人爭說。虎落雄圖十四州。龍天慧業三千佛。良工當日試雕鏤。朱火烏金躍冶流。七級浮圖初鑄
就。人天珍重勝琳球。一朝納土京師去。蒿草蕭條故宮暮。內府圖書秘色窰。流落人間不知數。瓜子南金
賂趙公。十瓶海物尺書封。裹蹠輸去黃華盡。那有餘貲給梵宮。塵寰無路求回向。不如去逐降王長。談禪

早已放屠刀。鏖戰底須排甲仗。麟帶貂袍拜太師。一家湯沐奉恩私。始知北面朝元日。卽是西方證果時。閒來日寫金經誦。此塔依然作清供。翻笑癡兒臥榻旁。等閒不醒維摩夢。斷鐵零金總可憐。劫灰寒燧不重燃。幾行蝌蚪書名字。并識柴家乙卯年。好奇今有平原子。購得奇珍歸趙氏。余友毘陵趙映川購得之。瑣瑣飢蠹蝕碎黃。斑斑古血凝殘紫。洛下銅駝荆棘荒。仙人流淚別咸陽。古今一例難回首。幻影空花悟法王。

與劉三羹堂夜話有感

一春兀兀抱愁坐。面垢冠敝任慵惰。良朋三五隔天涯。對影呻吟苦無那。辟除妄念學枯禪。諷誦金經當清課。書牀不整卷縱橫。硯田久荒塵堀堞。忽聞君自蘭陵來。倒屣相迎積愁破。互看顏色憐枯槁。共話生涯悲輻軻。五言妙手出偏師。三耳雄談驚滿座。忼壯幽州馬客吟。淒涼楚澤騷人些。嗟余少小丁憂患。回首風波苦掀簸。胸襟自昔誇豪宕。骨骼而今變柔懦。子卿痛淚洒牛衣。許靖餘生憑馬磨。險巷槌車悲寂寂。大澤迷途陷左右。饑鷹縫目上新鞵。駑驥垂頭戀殘莖。囊中只剩一錢在。桑下那禁三日餓。舉世言愁亦欲愁。窮年得過權須過。羨君倣儻才無敵。壓軫連箱富奇貨。明珠有價莫輕投。利器新磨寧忍挫。當前人物愛輕狂。長此窮愁哀我瘴。軟語嘈嘈堪達夜。倦僕頻頻又催臥。殘燈照壁鼠窺覷。寒柝敲更卒巡邏。微霜入戶夜氣清。明星墮水寒芒大。布衾如鐵枕手眠。愁夢闌珊不堪作。

鑿金鉦。曳大旆。三月春郊賽神會。東家西家喧小兒。攔街叫跳如狂癡。須臾馬蹄來特特。黃金絡頭珊瑚勒。馬上人持紅錦敕。神從中央來。奪隘聲喧赫。神從門前過。市人不敢坐。緋袍宰地穩稱身。蟠絲孔雀銀麒麟。當輿旌蓋交繽紛。路傍富兒指而笑。昔年曾捨三千緡。相追逐。歡不足。罄金錢。娛土木。君不見寒女衣單不掩身。老農夜守空倉哭。

蓋神廟

匠人來。築臺觀。運甃磨磚二年半。匠人朝不來。太保行相催。廟中夜掣銀鐺鎖。廟令大呼神怒我。觚稜金爵高刺天。一臺築就十萬錢。搥肥牲。喧紙爆。天平明。蓋神廟。明神坐中央。廟令羣趨踰。布商米估爭解囊。解囊來。記誰某。貧人錢落富人手。布五尺。米一斗。入市嗷嗷求速售。一貫蚨錢九十九。富人萬金賤如粟。貧人一錢惜如玉。抽得貧兒手內錢。施向神祠種神福。九級階。十丈廊。裁金嵌碧光熒煌。土馬泥人立階祀。夜聲啾啾衆鬼喜。廣廈萬間有如此。何不移來庇寒士。

珠江曲送徐大景春之廣東

芙蓉湖頭春水流。芙蓉峰畔春雲愁。沙棠雙槳木蘭柁。送君遠向珠江游。珠江曲曲環南國。丁星金翠繁華窟。蠻鄉怪物載龍編。海國方言通象譯。蜃雨魚雲積水東。山川形勢霸圖雄。誰尋葛令丹砂井。莫問劉鋹碧玉官。珊瑚扇子猩紅屐。珠江佳麗人爭說。抹厲花開豔雪香。檳榔子熟晴雲熱。珠江淺瀨漱金沙。素

足珠娘慣浣紗。日煥章魚齊上水。樹深么鳳共銜花。富商巨賈相誇銜。奇珍入手如泥賤。蠟甲堆成亞字欄。鮫絲織就冰紋練。君去珠江南復南。珠官風俗舊曾諳。秋深桂嶺爭鑽蠹。春到花田學種蠟。誰誇羅襪凌波步。葉葉花船粵溪渡。怕被嬋娟一笑留。莫耽香粉三年住。無端送別黯銷魂。把袂臨歧未忍分。我所思兮望明月。君之出矣逐浮雲。渭城三疊殷勤唱。碎曲零歌惹惆悵。磔椀斟來且莫辭。布帆吹去應無恙。十八灘頭走急瀧。計程五月下珠江。倘逢庾嶺歸來使。寄我羅浮繭一雙。

喜汪大容甫中過訪長句贈之

汪生倣儻出世姿。短衣孤劍將安之。江湖流浪苦復苦。人說才奇窮更奇。相逢每恨來何晚。掃室殷勤開酒錢。糝將何點白葵羹。捧出休源赤倉飯。狂來不顧世眼驚。相對拉雜談生平。文人失職有同病。出吻各作寒號聲。君言穉齒飢寒迫。棄擲詩書最堪惜。弱冠方傳作賦才。壯年始奪談經席。五經復興魯叔陵。纍纍著作充箱籟。心開窅窳深莫測。面若刻畫森有稜。奔走風塵飢欲死。撐腸萬卷徒爲耳。肉食難分博士羊。草衣且牧公孫豕。羗余少小趨雕華。斧粢繡帨相矜誇。愛儲奇字未滿腹。慣拈強韻空聲牙。千秋絕業不同傳。君入儒林我文苑。須識夔蚺總可憐。何當蛩蛭聯爲伴。坐談不覺日影移。榜人催上河之麋。卽今一見復奚益。翻令千里勞相思。留君不住我心苦。握手臨歧涕如雨。他時相望越王臺。何日同澆趙州土。布帆無恙臨風颺。秋來應看錢塘潮。潮頭倘有雙赤鯉。盼君寄我英瓊瑤。時容甫將之湖東卽以贈行。

晚春花事盛開因寄懷亦齋三兄荔裳二弟

去年看花人在家。一春風雨空嗟呀。今年花開春色好。看花人又涉長道。從來勝事總多磨。每向東君喚奈何。九十韶華逐塵土。兩三伴侶隔關河。昨日曾過妙香閣。亦齋兄讀書處永晝沉沉下簾幕。蜂聲滿院夕陽斜。一架藤花背人落。歸來孤坐傍闌干。抱影空堂慘不歡。數盡銅籤人未睡。薔薇花底露華寒。醉紅軒駐東皇駕。劉侯酌我來花下。仙娥高捧赤瑛盤。狂客爭持青玉罈。是處看花勝昔年。紫雲樓閣碧霞天。銷除詩債何辭醉。領取春光不費錢。對景真應放懷抱。底事閒愁倍潦倒。白日惟看北嶺雲。清宵不夢西堂草。春來花事逐番新。每對新花憶古人。皂莢橋頭稀酒伴。青揚齋裏剩吟身。錦江水煖寅哥渡。紫陌塵高卯君去。鄉信千行托便風。歧途一別悲零雨。東頭老屋更西頭。猶記年年選勝遊。袖底新詩飛白鳳。筵前妙令鬪潛虬。別離未慣多僂僂。翻悔當時易分手。一語憑將驛使傳。故鄉風物君思否。春事闌珊花信遲。別來何日不相思。櫻桃着子如紅豆。轉眼江南四月時。

爲段大蓉臯題修竹吾廬小照

生綃尺幅濃陰重。萬个篔簹森欲動。膩香罨地黑離離。瘦影緣雲青竦竦。誰坐玲瓏綠玉叢。出塵姿與此君同。過江人物今猶昔。標令居然正始風。跂脚科頭踞盤石。冷翠空濛沁肌骨。嗣宗散髮待涼風。摩詰停琴佇明月。竹葉何須泛碧螺。竹枝不用譜新歌。三椽草閣遺塵事。象外烟霞領取多。露初星晚常相傍。靜

色孤根鎮無恙。射鴨從教截作弓。化龍可許攜爲杖。愧我宮無一畝寬。更無隙地着琅玕。牽蘿補屋空惆悵。翠袖蕭蕭獨自寒。感君過訪荒齋靜。晚歲心期一朝訂。此日從君乞釣竿。他時爲我開花徑。嫩筍新篁好護持。莫教遊客浪題詩。留將百尺青光在。小字行行寫楚辭。

寒夜有懷黃大仲則

景仁

荒林葉脫行人稀。嚴霜碎落寒霏霏。初生月魄不照地。列宿錯落鋪珠璣。鴛鴦東來厲哀響。十十五五排風飛。幽人畏寒不敢出。未到日暮扃柴扉。藜牀危坐擁殘帙。一燈晻曖明書帷。懷君竟夕不成寐。反手據案長歎歎。男兒作健好身手。有淚寧向歧途揮。天涯倘得快心地。絕勝窮巷號寒飢。但愁干謁不稱意。坐受俗物相嘲譏。千金辟士置幕府。此風古有今則微。高秋與君一握手。幽齋軟語情依依。留君信宿不肯住。勁帆健櫓如發機。迅猷忽捲歲華去。層冰滿野高崔巍。茅簷擁絮尙不樂。况復遠道驅驂駢。何時壚下貫美酒。對飲立解愁城圍。相思展轉天欲曙。晨風肅肅歌妃豨。

秋晚

竟日雨霏霏。尋秋客到稀。幽花寒不落。獨鳥夜還飛。石罅泉聲細。峯頭樹影微。誰憐張仲蔚。寂寞掩園扉。

偶成

颺館梧桐樹。先期報早秋。一庭涼雨過。滿地碧雲流。犬吠人爭渡。鴉啼月上樓。誰憐今夜客。又作去年愁。

寓感

倚竹蕭蕭彩袖寒。爲誰憔悴帶圍寬。思如園客縷千丈。淚以鮫人滴滿盤。慵奏新聲調火鳳。頻封密字託青鸞。中庭檢點閒花草。莫種相思種合歡。庭院深深道韞家。白銅鋪映綠牕紗。朝妝嬾試金條脫。夜被空熏玉辟邪。閒展畫叉臨北苑。每尋仙籙憶東華。懺除慧業渾無計。願上瑤臺掃落花。

謁昭烈惠陵

玉壘山川拱帝都。樓桑片土啓雄圖。普天齊奉黃初歷。大統終歸赤伏符。八陣風雲長護蜀。千秋魂魄悔征吳。相臣逝後降車出。難問流離六尺孤。

雨沙

疑是蓬萊清淺時。海塵都向石山吹。半牀鼠躅長留印。一桁鶉衣恐化縑。豈是唱籌煩道濟。未煩障扇避元規。朝來農叟談黃雪。預卜今年麥兩歧。俗云黃雪宜麥。

寒食口九龍山晚歸

買得蜻蛉一葉輕。叩舷歸路不勝情。那堪佳節逡巡去。又背名山宛轉行。新水遠浮菱荇綠。夕陽低傍鷺鷥明。無聊賸有微吟興。遙和漁童款乃聲。

春感

侵晚空林鶻鳴。愁多不耐餞春行。半池水氣蒸雲濕。一角霞輝抱日明。到處揶揄應笑我。此中空洞盡容卿。洛生咏罷支頤坐。一任人嗤老婢聲。

前生結習破書堆。蠹簡零星散麝煤。慧業生天誇謝客。精心奉道笑方回。閒塗故紙酬詩債。細拾殘花當酒材。正欲劇談無客到。東頭老屋盼君來。寄荔裳舍弟

土爾扈特霍碩特哈薩克各蕃部入覲回巢余奉檄護送出境紀事四首

昔持英蕩朝天去。今向鑾坡獻壽回。立仗許登三殿側。賜筵曾設九賓陪。邊沙軟藉鋒車過。塞草肥迎宛馬來。職貢萬方全盛事。平安烽近赫連臺。

屬薦文茵照地光。錦繒稠疊壓歸裝。歡聲直遣騰荒外。珍品從誇出尙方。玉節仍煩中屬國。金符新拜左賢王。聖朝綏遠無窮意。長使邊氓慶樂康。

邈迤郊原列旆旌。城頭鼓角極和平。秋星蓋野穹廬靜。夜火傳更戍堠明。都護彎弓能飲羽。名王上馬慣擒生。自憐文士無長技。也挽絲韁傍塞行。

馬蹄蹀躞響鳴珂。韎韐材官逐隊過。萬里嚴程趨紫塞。三秋高浪渡黃河。郵亭客去喧烏鵲。古道人閒散駱駝。歸義好繙新樂府。白狼槃木入聲歌。

畫船

曲渚魚鱗浪。廻堤雁齒橋。繽紛張錦幔。容與泛蘭橈。羅襪凌波步。瓊烟貼水飄。半篙新漲澗。七里淥塘遙。
網戶垂銀蒜。瑤窻嵌玉珧。簾編湘女竹。扇剪美人蕉。綵絡調歌鳥。珠鈴繫雪貓。扣舷蕙葉岸。解纜藕花潮。
迷迭含芳長。蘅蕪爇火焦。繁華今好在。香粉未全銷。午夜開華宴。辛房出阿嬌。約黃孫壽額。束素小憐腰。
粉鏡千回照。雲梳百遍撩。眉長勻翠黛。髮膩彈珠翹。彩釜猩脣煮。磔杯桂露澆。風微衣麝散。帆轉酒鱗搖。
射覆圍蟲豸。攤錢喝雉梟。怕成泥絮果。休負雨雲宵。促坐心相印。褰帷目屢招。犀筒銀液減。蛤帳守宮消。
催賜纏頭錦。還留繫臂綃。鴛鴦一夢覺。烟水兩迢迢。

初秋寄可齋六兄

靜坐思羈客。離家已四年。瞿塘翻惡浪。劍閣鎖愁烟。鄉味懷鱸膾。蠻風秀木棉。關心驚朔吹。灑淚聽啼鶉。
恨乏凌霄翮。難求縮地仙。峰遮遙目斷。月伴客心懸。見說窮荒外。猶聞羽檄傳。三旬苗逆命。六伐士揮鋌。
魚壘祆氛動。蠶叢殺氣纏。電飛橫海箭。雲擁伏波船。的的宵烽舉。嗚嗚曉角宣。平沙埋折戟。殘寇棄空拳。
火射荒燐滅。風吹古血羶。窺人走罔兩。啄月飽烏鳶。天意誅羣醜。軍威震極邊。獍梟兇自斃。貔虎勇無前。
運策煩諸葛。回師縛右賢。一麾臨的博。七萃壓先零。劍指星芒落。灰占月暈圓。地開金馬郡。功勒碧雞巔。
叩笮當衝要。官曹少靜便。調符過赤甲。轉粟上青天。且敍天倫樂。還期道性全。傍岩園半畝。記曲閣三椽。

取次開琅篔。周遭葺蕙榜。雪回雙鶴舞。霞襯百花妍。作達淵明酒。耽閒子敬瓊。趨庭懷寘橘。事佛坐依蓮。
兄自號蓮 爐炷雙烟麝。甌烹八卦泉。叩署泉名襟懷賴陶寫。愁思莫縈牽。吳樹知秋矣。巴雲望渺然。涼風敲竹
跌侍者 柏。暝露墜蘭荃。古壁琴徽冷。銅荷蠟淚濺。螢飛烟漠漠。人靜漏涓涓。浩淼江湖闊。寒喧節候遷。魚書空往
返。蝶夢屢廻旋。我只懷康樂。君應念惠連。蓬蒿掩荒徑。糠粃伴芸編。騷鬼能爲祟。書淫竟莫痊。淒涼賦窮
鳥。惻愴聽鳴蟬。藥苦知誰共。膏明只自煎。迺遭胡至此。偏仄擬終焉。豈有干時策。空思負郭田。獨行無
負。百足望夔憐。破闕爲佳耳。尋途各勉旃。感秋魂懍懍。望遠涕潺湲。甚處堪投筆。終須早着鞭。角鷹刷毛
羽。霄漢看騰鶩。

東鄒寶松太守三十韻乞臺灣府志

島嶼窮溟外。波濤積水東。領符分虎竹。懸箠繞蛇弓。騶從專城貴。旌旄列郡雄。海疆來杜母。蠻俗仰羊公。
威惠三年遍。謳謠四野同。歸裝辭越嶠。鄉思值秋風。異境超區外。奇觀入眼中。此行凌渤海。直擬鑿洪濛。
蜃市吹嘘幻。魚雲刻畫工。颶風晴颯颯。陰火暝熊熊。水豹翻層浪。花鷹捩遠空。金沙華蚌紫。鉄網女珊瑚。
漢石堆殘錦。秦橋界斷虹。路疑圓嶠近。穴豈沃焦通。夜泊鉛爲碇。晨裝錦作幪。衝波廻鷁舫。搥鼓渡蛟宮。
五柳家猶在。千桑願已豐。閒尋遂初賦。自署樂天翁。寄興琴書酒。關情杞菊松。室餘廉吏橐。人愛使君驄。
許靖鄉評美。王球族望崇。壺冰開皎潔。佩玉夏玲瓏。昨歲虛投刺。今晨幸發蒙。上林賦迺今日發蒙迷途哀病驥。末

技獎雕蟲。賭墅陪安石。開樽謁孔融。有心希剪拂。刻意自磨礪。鯨島侏儻俗。龍編幽怪叢。可能蒙惠贈。便足破盲聾。跋浪乖奇志。蟠泥抱隱衷。從今誇海運。矯翮待飛翀。

澄心堂紙二十四韻

記昔風流主。爭雄翰墨場。新詞何妙麗。小札最精良。巧織光明錦。勻鋪細膩霜。品方蠶繭重。價比衍波昂。進御君王笑。拈籤女史忙。繙來金葉底。擘向綺筵傍。妙墨留仙子。謂耿玉真香經寫法王。紅鈴署鍾隱。後主自號鍾山士。豔曲記娥皇。方麴黃羅面。燒槽紫錦囊。一般供玩賞。終古怨興亡。五夜家山破。千年劫燼颺。灰都作蝴蝶。魂不化鴛鴦。風送迎降表。星飛告急章。聚時勞護惜。散日太蒼黃。故國春江冷。羅衾夜雨涼。纏綿歌半闕。慘澹墨千行。無復迴鸞影。空教齋蠹糧。叢殘歸史館。粗使給文房。歐公五代史用此紙起稿又聖俞詩云聊給粗使供鸞臺淳化銀鈎塌。宣和玉局藏。謠纔聽白雁。識又應紅羊。梅老新詩在。王郎舊志詳。奇珍易零落。尤物幾滄桑。兩軸如相贈。千金可許償。好同龍尾硯。軼事話南唐。

碧紗幮十六韻

紫貝冰紋檻。明螺卍字樞。桃笙涼乍展。網戶靜初扃。暫却蒲葵扇。教移雲母屏。千絲成巧製。十幅可中亭。水玉寒纔凝。秋雲澹欲停。薄翎裝翡翠。輕翅擘蜻蜓。螢暗分光綠。蟾孤逗影青。雙烟縈寶篆。列點數空星。燈穗看來澹。花房摘處馨。倦眸時句線。悄語倍瓏玲。小掛龍皮拂。勻排犀角釘。密防蚊陣入。慢遣蝶魂醒。

白·板·烟·中·舫·紅·羅·水·上·亭·清·疑·通·溟·滓·深·好·護·娉·婷·卻·暑·眠·方·穩·遊·仙·夢·亦·靈·碧·城·十·二·曲·曲·曲·記·曾·經·

寄呈述庵先生

憶·昔·遊·京·輦·青·袍·拜·月·題·蘭·成·初·射·策·德·祖·尙·垂·鱗·氣·象·瞻·嵩·岱·文·章·仰·壁·奎·雅·懷·開·朗·月·豪·氣·吐·長·霓·

入·座·皆·瓊·榮·升·閑·盡·馱·駟·登·龍·爭·御·李·題·鳳·詎·嘲·嵇·謂同門叔華竹 謬·採·蓬·樗·質·容·參·桃·李·蹊·浣·腸·吞·寶·

篆·刮·目·得·金·篋·賦·手·驚·鸚·鵡·詞·鋒·淬·鷓·鴒·橫·經·問·菜·苜·就·席·對·楂·梨·升·斗·原·爲·養·聲·名·敢·厭·低·金·臺·纔·奉·

檄·燕·市·遂·歌·驪·別·淚·緣·纓·落·新·篇·滿·篋·攜·師·恩·逾·鄭·重·吾·道·在·提·撕·客·路·關·河·迴·勞·人·面·目·驚·風·塵·從·漫·

浪·朱·墨·學·勾·稽·虎·尾·危·曾·躡·焦·原·險·屢·躋·一·官·來·絕·徼·六·載·此·卑·栖·旌·節·移·三·輔·絲·綸·下·九·閨·高·秋·雕·鶚·

翻·遠·道·驢·驢·蹄·關·吏·迎·軺·傳·邊·氓·識·組·圭·祥·刑·平·庶·讞·惠·政·慰·羣·黎·畫·戟·黃·圖·右·烏·臺·紫·嶽·西·稍·欣·函·丈·

近·仍·悵·笑·言·睽·昨·歲·遭·兵·燹·儒·生·習·鼓·鼙·狂·塵·奔·猓·揄·賊·浪·沸·鯨·鯢·誓·死·孤·城·在·輕·生·一·劍·提·飛·灰·黯·樓·

堞·猛·火·照·弧·鉀·浹·日·重·圍·解·星·郵·尺·素·齋·一·緘·詞·愴·惻·七·字·韻·清·淒·惡·鳥·巢·旋·墮·妖·狐·穴·盡·犁·感·深·神·恹·

恍·痛·定·涕·流·澌·差·喜·身·無·恙·休·嗟·命·不·齊·宋·人·空·刻·楮·楚·客·尙·吹·壘·蓬·島·風·頻·引·銀·潢·路·轉·迷·往·來·旋·磨·

蟻·進·退·觸·藩·羝·已·分·安·蓬·蘖·何·心·慕·錦·綈·公·言·真·可·憶·鄉·思·浩·無·倪·蓉·渚·尋·漁·舫·龍·峯·灌·藥·畦·菰·蒲·期·射·

鴨·柑·酒·好·聽·鷓·試·問·飄·零·者·何·如·歸·去·兮·故·山·聞·怨·鶴·舊·事·觸·靈·犀·櫻·柳·當·簷·脫·蛩·蟹·繞·砌·啼·思·枯·抽·禿·

管·興·索·拊·空·甌·落·日·回·陂·雁·寒·烟·竄·嶺·巖·鐙·光·秋·淡·淡·林·響·晚·悽·悽·夢·去·星·沉·水·書·來·雲·憶·泥·無·緣·奉·譚·

讎幾度隔喧萋。爨下邀三嘆。車前試一嘶。陸倕知己賦。重疊寫香緹。

伏羌紀事詩一百韻

聖澤敷殊俗。天聲震八紘。花門何醜類。草竊敢縱橫。豐為尋仇啓。妖由搆煽成。逆回田五謀復新教。勾引匪類。修理石峰堡。為聚衆

地鼠牙工發覆。蝸角怒相傾。先是賊匪約於本年五月五日起事。緣方鎮空持重。中權孰使令。養癰憂內

潰。躡尾失先鳴。時賊由海城攻靖遠。轉掠濡滯師將老。驍騰敵果勅。誰當擒罔象。無計制長鯨。祖厲朝呼

渡。時靖遠從逆。賊匪驍船蕭關夜斫營。西安州管被劫。四月十六日事。定西仍聚落。賊首田五斃於狼山。餘黨僅百餘人。

渭北却翻城。賊衆劫通渭之馬營。監蕞爾當陽邑。伏羌古相違一日程。號唇虞是齒。邾柝魯聞聲。中夜荒

雞噉。高巖石鼓鏗。先是伏羌雞。未夜半輒鳴。占云有兵。又重圍占月暈。芒角動星精。縣尉標完節。五月初九日賊

破通渭。縣令王樓潛。逸典史溫模自經死。將軍著烈名。明都統孫參戎奮勇擊賊。山沙蟲師有劫。風鶴信頻驚。陸地機纔發。地

殺機龍蛇起。陸陰符經。蕭牆禍早萌。朝三狙暮四。晝伏鼠宵行。無奈禾生莠。難教石化瓊。搜牢寧有術。鈎距遣誰偵。

伏羌武生馬稱驥。兄弟數人計。約內應。狼卜陰謀泄。犀燃詭狀呈。羣姦方擾擾。數士獨錚錚。義可捐妻子。

包藏外匪城。中居民頗有知其姦者。

情誰顧舅甥。回民馬映龍也。矢心先告密。雪泣自輸誠。嘉爾殊慷慨。緊余不聽瑩。終然邀上賞。可以定輿

評。五月十四日。回民監生馬映龍。白中煒。馬宏元。將馬稱驥等。逆謀首告。伏羌向未設兵。星馳告急。官兵

城出外議。遂息。衆志堅堪恃。兇鋒猝敢櫻。臥熊吞貉子。嗾犬搏狸狴。狡窟憑熏灌。妖酋競抗衡。交衢長

鍛滿狹巷短刀迎。螳臂窮猶奮。蠡眸死尙瞪。駢頭填犴獄。連頸縛徽纆。五月十八日請兵未至而馬稱驥

賊已持械而出當時格殺者馬映驥等四人餘皆先後就縛。內患方消弭。前邨條鬪爭。烽烟騰土埃。賊騎漫山坪。十八日晚即有鄉民

斯坪各邨莊驅脅回民大掠而進。跌足夫攜婦。摩肩弟覓兄。倉皇棄髻鬣。嗚咽哭嫠媪。近郭人流血。環郭火徹明。姚墟餘

瓦礫。謝墅剩榛荆。縣北五里姚謝家莊有武生姚譟或千層沸。行如一足蹶。飛揚氛甚惡。跳盪色何猶。呀

闖夔牆壁。喧豕坼棟莖。陣雲愁鬢鬣。邊日慘光晶。滿谷驅牛馬。連車藉稻秔。爭先誇趨捷。走險據曉崢。賊

圍縣城據天門山札營距城僅一里許。巖邑周防早。微官性命輕。俠腸原耿耿。獨行信硜硜。黑子城三版。青萍水一泓。周苛

惟誓死。傅燮敢求生。羯末才無敵。羊何氣並英。射鵰驚斛律。倚馬笑袁宏。謂戴曉嵐暨家從姪贊山秋岑

贊山登城射賊竟斃一人。勢只伸孤掌。危還藉衆擎。帶刀農佩犢。時召募鄉勇持戟士離鬢。邑諸生魏輔君王表等健

婦俱行汲。羸童亦踐更。奔馳勞僕隸。捍禦賴髡鯨。流人李忠等上城流電飛髻落。狂雷巨礮轟。登陴均受

甲。給廩免呼庚。四日孤墉在。千夫一膽并。徒勞設梁麗。屢見碎衝軻。賊積草盈車伏車下天意為誰怒。民

心笑爾倅。賊連攻圍四晝夜城上矢石如雨斃其如棋爭劫勝。似博殺梟羸。侵曉憑樓堞。遙原見旆旌。烟

塵飛候騎。笳吹到援兵。象主羣陰遜。爻占大道亨。危巢徙梟鶴。舊穴聚狐麀。二十二日李制軍率兵到縣

走秦安由底店仍聚石峰堡。自昔恢王度。由來仗國楨。班資周保傅。勳閥漢公卿。福制軍暨英勇中堂先後率京兵來

玉節威行部。銅符事遠征。指麾皆頗牧。趨走盡韓彭。芟舍嚴刁斗。轅門急鼓鉦。羽書千里應。積粟萬囊盛。

續挾全軍煥。醪投衆士醒。兩甄排稱妮。列騎雜斑駁。貳負強遭梏。防風窘待烹。長圍羅劍槊。險道斷溝坑。

賊困守石峰堡。我兵四面列圍。絕其汲道。羣慝應簫勺。神姦首滿盈。臍膏明似燭。項骨脆於菁。頃骨脆於賊窘急乞降。我兵乘機攻剿賊巢遂破。

詩全。困獸攀籠檻。游魂戀釜鑊。肘附紛磔裂。骸骼亂枝撐。烈烈摧枯枿。炎炎燎聚窟。纍纍俘婦女。婉婉曳

孩嬰。或有逋逃藪。其如置網紉。自知應斧鑕。初不假筭榜。絲中從逆回匪。有自底店竄。回各邨者。獲之輒一訊而服。革面從文豹。遷喬

慕谷鶯。爾曹生有路。今代獄惟平。近奉上諭。良善回民。仍令安業。毋許株累。有向從新教者。許其改歸舊教。寬大羣方悅。明良百度貞。直教空

貫索。奚止掃機槍。歸馬秦川迴。回軍華嶽晴。虎牙宣偉略。龍額錫殊榮。福制軍特晉侯爵。銘擬燕然勒。歌同漢樂

賡。歡聲溢塵市。和氣叶韶箴。溫語傳丹扆。恩綸出玉京。蠲租憐瘠壤。給復慰疲氓。賚溥金兼粟。仁先獨與

惇。高欄蓋焦土。殘醜掩荒塋。奉恩詔。凡被賊焚掠傷害。邨庄均予賑卹。恩極優渥。痛定微軀在。腸迴百感縈。失時幾拾瀋。懲熱慣吹

羹。彈指閻浮劫。當場傀儡棚。青山招遠夢。白水憶前盟。關隴皇威暢。邊陲戰氣清。江鄉三畝宅。何日好歸

耕。

吳 照

字照南。南城人。貢生。官大庾教諭。有聽雨齋集。

蒲褐山房詩話。照南才華清綺。誅蕩不羈。少從張觀察銘來松江。過吳門。得詩法於禮堂光祿。一以唐人為師。及予至江西。照南來執弟子禮。餘人不直掛眼也。通六書。又工畫竹。人以爲金錯刀之比。予江西門人。中有三吳之號。謂雲衣蘭雪及照南也。

辛亥暮春武昌東郊外覽勝

飛英滿漢皋。芳草徧楚甸。佳賞愛餘春。覽物增眷戀。泱泱野田流。啾啾林鳥囀。試泉記卓刀。訪古失臺殿。遂陟洪山巔。縱目盡鄉縣。天遠指長江。雲氣亦屢變。既喜風盪襟。更無塵障面。琳宮與紺宇。偶憩情所便。緇流遁虛無。羽士託修鍊。雖蒙智者嗤。自有愚人羨。晚鐘催夕陽。高興未云倦。藍輿望城闔。靄靄飛甍見。願言續後期。江漢恐遊衍。悵然念旅羈。流光疾如箭。

子雲居士和予春游及惠墨詩即贈一首仍用春游韻

詩名三十年。子雲在海甸。閉精斗室中。掃萬惟一戀。春花媚青陽。嬌弄百禽囀。劃天無纖雲。彈指現宮殿。我求大雅才。汗漫歷州縣。騁轡誰知歸。拘牽了難變。換骨要大丹。不敢飾頭面。疥痔一身在。安得體輕便。冶金棄洪爐。篝火妄烹鍊。寶色俱晦埋。入市誰寫羨。我每讀子詩。洗眼去昏倦。古者吾既知。今時實稀見。詞壇幻魚龍。百戲呈曼衍。敢逞談吐鋒。請問機對箭。

銀槎詩

嘉興銀工朱碧山。槎杯始載南邨叟。元朝學士競獻酬。明三百年缺談藪。北平初記孫公藏。萊陽曾聞宋

氏守。證以歌詩皆壬寅。荔裳詩。背鏤至正壬寅字。攷之江邨乃乙酉。苑西集。杯首有岳壽無疆四字。又刻至正乙酉年。朱李咨嗟

不作雙。朱竹垞詩。可憐雙鯉。今成鱖。漁洋記錄忽成偶。居易錄。退谷荔。裝各藏銀槎一。平生未見銀鑿落。一是二疑難

不作雙。李武曾詩。往時作雙。今不偶。

剖今年九月邗溝上。西溪主人置樽酒。筵前捧出博望侯。乙酉款識鐫諸右。再三疑是高家收。卻少額端題岳壽。定知巧匠製必多。雙觥流傳殊否否。主人笑我太饒舌。倒瀉銀河吞一口。摩挲試認尋源人。長袖飄然垂左手。蒲萄滿酌大西夏。浩蕩乘風獨翹首。所渠千七百一川。臥看輪廻烏兔走。怪爾尋章摘句徒。那識河源接星斗。千里一曲須千卮。何事姓名證誰某。孫宋諸公安在哉。辨論雖多徒覆瓿。與其身後虛名留。不若生前一杯有。此杯此客在維揚。他歲他鄉說癸丑。難從織女問支機。且對黃花爛牕牖。置身我亦入槎中。視崑崙虛如培塿。

天門山

長江流萬古。東下鎖天門。滄海一髮盡。秋陰千里昏。飄零感身世。俯仰信乾坤。搔首平臺上。茫茫誰與論。

天一山晚眺

遠浦樹蒼蒼。千山帶夕陽。晴嵐浮郡郭。烟火隱帆檣。樵唱投村晚。鐘聲出寺長。登臨發清興。仿佛似瀟湘。

孫香泉招同沈春林項直菴沈白華楊緒堂小飲時香泉將歸吳中

小閣開尊煖氣和。酒鱗豔豔欲生波。半酣我亦諳吳語。高會人休學楚歌。十幅蠻箋花樣瘦。沈眷意于歌者有無題詩

首^八三篙春水別懷多。平生未減飛揚氣。容易逢場醉臉酡。

於越訪友人

柴門依約傍江隈。雲樹多情喜再來。秋水船隨湖雁至。故人尊向桂花開。貧專邱壑原奇福。老閱風霜作散材。我欲買山同卜築。青松翠竹許分栽。

閶門偶興

五湖浪跡笑西東。一棹吳門興未窮。十里市聲烟樹外。百分春色酒船中。平橋水暖彎彎月。畫閣晴開面面風。千載姑蘇行樂地。莫將身世感萍蓬。

城北遊春

棲遲兩度金陵客。又見韶光轉歲華。路熟重尋前代寺。天晴補看去年花。平湖馬洗春波綠。廢苑鶯啼細柳斜。今日同游須盡醉。解裘先質酒人家。

贈陳古漁

跼蹐風塵計總非。論交先嬾叩朱扉。頻年白下稱流寓。今日江東識布衣。老眼看花清淚落。名山載筆賞音稀。古漁輯有棲霞山志莫嫌骨相多寒瘦。我輩從來要忍飢。

金陵贈古漁

千里相思喜合并。蕭疎白髮啓柴荆。氣吞湖海襟期闊。老閱炎涼感慨平。歲歉尙能安素食。詩工原不礙狂名。一尊細酌疎窻下。笑指東山月正生。

贈牧野上人

重理琴書客秣陵。舊游剩得幾詩朋。投入自笑非高士。安分居然羨老僧。簷角葉飛渾似雨。霜天月皎不宜燈。與公試話年來事。招隱名山是上乘。

金慰祖

字細武。號蘭岵。嘉定人。貢生。早卒。有綠雨山房吟稿。

蒲褐山房詩話。蘭岵觀察洪銓之孫。詩才繁富。南昌彭司空元瑞視學東南。愛之。七律如飄零弱主。封歸命。憔悴詞臣著辨亡。忠臣終惜袁開府。名士應羞褚彥回。燕子話殘樓外雨。梨花夢斷夜來雲。欲消寒意添龍腦。頗愛微吟凍兔尖。叢祠山火歸鴉噪。斷岬斜陽牧馬嘶。客路吟箋留緜几。故人歸信隔煙汀。諸句為世所稱。而五古清遠。七古排奡。駸駸入古人之室。拔貢赴都。尤為于文襄公所賞。新官遠賦。時論惜之。

虎跑泉

蒼烟滿前山。溪行欲無路。微聞流水喧。遂溯源歸處。孤亭寒竹色。斜光澹春樹。寂歷青嶂重。迢遙翠微露。松花點塵衣。鐘響靜凡慮。平坡巨獸蹤。混漾清泉注。瓢飲叢筠間。禪扉濃綠霧。不見古導師。徐詠坡仙句。

夜登獅峰遂宿留餘山居

暮色蒼然來。殘暉黯前巘。寒碧落我衣。俯視月在澗。獅峰出羣岫。登陟寄遙眄。清燈耿岩扉。孤磬發齋館。晴嵐靜欲無。湖烟翠可卷。投宿空亭幽。啓牖虛光滿。叢筠翳蒙密。長松半凌亂。冉冉疎花香。霏霏夕露泫。

濺澗響寒泉。隔葉吠山犬。旅思既蕭條。晚風益清善。一與勝景值。乍喜塵踪遣。欹枕候曉光。探幽肆游衍。

曉行九溪至理安寺

東嶺睇朝暉。西峯躡殘月。崖束奔細泉。林長聳清樾。沉沉霧氣滋。皖皖禽聲悅。夢入亂山深。花隨曉雲發。遂陟玉鈎橋。因尋涌泉碣。何處聽江聲。停輿叩孤剎。

拜繆文貞公墓

蒼蒼彭越山。渺渺長涇水。云有繆公原。荒阡近村市。嗚呼明季衰。朝廟網維弛。巨璫持太阿。羣奸受頤指。公也本史臣。感憤司載紀。奉使渡瀟湘。發策詢多士。覘其識所存。庶令遇無詭。公典湖廣試發策試士有刺及宦官事鈍璫銜之

激昂忠烈章。宵小魄潛褫。維公斧鉞嚴。點竄引經史。楊忠烈公疏劾忠賢二十四罪公為潤色奏草璫益心憾之平生薄蔡邕。志豈美

官徒。百折且不回。三遷詎為喜。璫以公文望遷諭德巍巍玉泉岡。營壙窮華侈。索記等南園。斷腕不可使。叱咤壽寧

侯。佞黨類有泚。璫營生壙玉泉山令其客以碑文請公不可丰裁凜自持。天地道終否。九關虎豹森。傷哉

王度糝。造為羅織經。肆以鬼蜮技。誣良託苞苴。告密同投匭。慷慨就囹圄。殘酷肆撻捶。璫竄公名于織造李實疏中下鎮撫

司為許顯純斃于獄意欲盡清流。何由達天咫。一網善類空。寧徒六君子。謂楊左袁顯六公覆盆泊得伸。國已傾宗祀。暨陽

僅彈丸。同歸公與李。謂李忠毅公應昇亦江陰人同被禍百世共咨嗟。高風激頑鄙。我來古道旁。維舟採汀芷。再拜淚漣然。

徘徊睇中泚。長松夕靄寒。亂水平橋圯。登壇想東林。春山百餘里。魂氣時往來。乘此虹梁紫。酌酒拂蒼碑。

柁轉啼鳥起。

讀史偶成

貞非柳下惠。寧學魯男子。廉非吳隱之。勿飲貪泉水。為介毋為通。律身慎于始。菜公附朱能。終貶雷陽里。昌黎三上書。亦為識者訾。君子在固窮。何徒豔朱紫。枉尺而直尋。得彼已失此。

岌岌東晉朝。瓜分少完土。江左多英流。琅琊賴羣輔。誰令王茂宏。庸才稱仲父。睚眦死伯仁。流涕亦溪補。

敦也叛逆同。假破東征斧。佳傳惑千秋。誅心等蘇峻祖約。當時第一流。我服溫忠武。

吾觀李贊皇。雄謀足經國。僧儒小有才。駕馭亦稱職。果能泯怨尤。何難靖河北。顧惟門戶私。反覆窮擠抑。

不見廉蘭徒。獨忿相戮力。平勃志安劉。交權資輔翼。如何英達人。乃遜武夫識。

長卿能諫獵。顧上封禪書。子雲守太元。甘為莽大夫。定識苟未足。文彩寧有餘。談諧東方生。侃侃陳六符。

陸戟辟董偃。卓犖雄詞舒。下視嚴與終。渺小竟焉如。

同易圃先生暨蒙泉登虞山劍門峯頂作歌

虞山高蜿蜒。劍門尤峭蒨。十載經過未一登。空說嵐光日千變。虞山峰巒向背陰晴且暮隨時異色雖善畫者不能出肖也曉來舟泊

尚湖濱。山翠蒼蒼壓波面。褰衣一徑上籃輿。吾谷盤紆態婉孌。線路狹與猿猱爭。竹絡頻欬目震眩。祇餘

絕巘掛藤花。每遇橫坡失香殿。折坂行如旋磨蟻。危樵遠類依檣燕。半壑微聞鐘梵清。百廻始有虹橋見。

連崗複磴真宰愁。特擘雙崖立蘇片。森然十丈露嵒呀。疑躍金精飛紫電。崢嶸取象蜀閣門。不知誰貯仙人箭。是時蓬勃天風號。瀑水砮崖玉花濺。崖高束風風不行。倒捲珠簾拂亭院。茫茫下視極梯田。千頃春湖僅匹練。獻花來鶴望依然。形似可求憑野諺。吾谷東爲美女獻花巖。又尙湖盡處有龜。去鶴來形蹟望之逼似。皆土人所居也。却愁烟霧隱長涇。中有佳人舊文讌。于谷居長涇。去曠三十里。望中湖流如帶。尙可辨觀。何時小隱共山林。漫結團蕉置琴硯。迢然長嘯幽谷磨。大地空濛春欲遍。聳身東望海雲黃。銀屋龍堂濤曼羨。高城百雉半依山。萬井樓臺壯哉縣。我生未爲遠道行。西僅金陵南薛澱。今春匝月涉錢江。衣上征塵客游倦。豈知靈境在意外。海色湖光叠隱現。富春老人惜不逢。潑墨憑誰寫東絹。徑欲斗酒登湖橋。狂醉題詩續橫卷。勿令寂寞笑山靈。差勝蕭條隱壠甸。王公才名冠燕臺。談詩望重金閨彥。張侯下筆師鐘繇。往往求書捉葵扇。相於唱和盡可傳。曷不誅茅事著撰。山僧遠致玉蟹泉。亭午供客伊蒲饌。遺聞軼事足諮諏。欲問歸途餘眷戀。他年雲棧訪前游。記取圓坡谷鶯囀。

出插行

醉濁酒。揚清鉦。船頭喜望臨清城。洸汶之泉九十七。盤紆羅帶相交縈。濁流有聲西北瀉。誰挽地脉回東行。靈風飄旗高不捲。漳神祠屋羣鳥鳴。連朝阻插喜放溜。譬如蒼鷹掣鞲翔空冥。登艫長嘯一舒目。蒼然平楚秋原晴。長年爲余言。此途足畏無羈情。君不見會通之浚本漕粟。設官節水權虛盈。千檣萬艘集春

夏。百夫邪許尺寸爭。翻資小吏成利藪。垂綆繫板撓征程。七十二牘孰飛越。不惜客子愁沙汀。君行兩旬秋水闊。縱稍濡滯旋揚舲。人生快意豈有極。涉歷務念心太平。聞言默自警。斯語宜箴銘。捷徑恥投足。遲速隨所經。有牘輒愁孤艇滯。出牘又患關津征。不如衛河桔槔叟。夕陽飲犢歸柴荆。

題述庵先生三泖漁莊圖冊

泖湖百頃流澹澹。涵青漲綠迷釣矸。九峯綿延遞環接。倒影明鏡浮嵐雙。水鄉清嘉絕可樂。春有茶笋秋蘭苙。平陂數椽對孤塔。松毛縛屋蕉遮牕。公昔讀書樂烟渚。豹隱彷彿襄陽龐。一朝射策登上第。龍文百斛健筆扛。千言揮灑工奏賦。朶殿珮玉趨瑋璫。經綸報國展奇績。大兵西征金鼓撻。元戎借箸資贊畫。滇池棘道經崆峒。飛書草檄磨盾鼻。機宜洞合堅礪降。甲兵小范足方駕。曷數唐蒙通冉駹。梯山棧谷悉歸化。荒徼窮壤咸耕耒。古來文人志開濟。豈徒翰墨驚冥憲。師還迎勞加懋獎。賜翎圖像宸恩厪。卿班累沐不次擢。南臺霜簡羣震懍。屬車九九備顧問。扈從誕歷東南邦。帝心簡倚念陳臬。特遣豸服臨西江。洪都千里波浩淼。津頭伐鼓聲逢逢。明刑弼教昔所重。敷歷佇見張牙幢。惟公居榮志恬淡。清夢往往思漁艘。憐才愛士勤汲引。座盈嘉客傾金缸。蓬茅亦復荷培植。洪鐘常許寸莛撞。自公南行悵失倚。人海不啻聞音登。敝廬距泖一衣帶。乘風屢掛芙蓉雙。披圖注目獨神王。菰蒲春雨飛流淙。楓涇朱涇瀉新漲。瞥若急峽喧驚瀧。漁舫葉葉出復沒。亦有菅蒯維柳椿。公昨給假今迎養。暫閑千柄蓮花躡。豫章烟水亦絕勝。滕

王高閣標文杠。綸扉調鼎日。晚聽宣召。從公話游三泖京國挑銀釘。

夢游雁蕩山歌東汪少山丈

我聞雁蕩之峯百有二。精藍十八青螺巔。謝公好游屐未到。層崖半擁兜羅綿。東甌地勢濱滄海。鞭石驅

山仗真宰。龍湫百丈掛珠簾。似與天台爭巋嶷。先公往日曾專城。芙蓉鑿石留題名。丙寅秋先大父有游雁蕩諸詩同吳副使

架亭刻石芙蓉邨下二十餘年已陳迹。憐我選勝徒殷情。浮溪詩翁曠世才。昨朝筇杖東南來。為言絕頂見湖雁。十

谷八洞窮崔嵬。羨翁振衣歷孤迴。未得相從遍靈境。酒闌日暮夢茅龍。月明飛度丹芳嶺。陟嶺氣高寒。天

梯碧巘岈。四十九盤條眼底。互梁橫亘青雲端。蓮花芝草左右迎。玉女天樂鸞鳳聲。蓮花芝草玉女天樂俱峯名羣星

搖搖若可摘。菱筍卓立雙崢嶸。指靈峯之磴巘。凭淨名之軒楹。神龍噴水雷雨急。隨風變幻天瓢傾。羽旗

爛漫展未捲。藥杵時和哀猿鳴。展旗藥杵諸峯俱在東內谷洞天石門呀然啟。雙娥二八銖衣輕。紫簫乍低芝蓋轉。仙

人冉冉來容成。千紆百折攀岩嶽。數椽倚壁三重茅。道逢陳覺筦爾笑。贈我紫蒂細紋桃。事見雁蕩山志斗城縹

緲。甌水迢遙鐘聲間起。松花徐飄極睇滄溟一杯耳。天雞夜半鳴寒潮。萬峯紫翠遞深淺。紅輪騰湧蓬萊

椒。浩歌一曲發遐想。逢逢澗底迴長飈。方控鶴翎更西去。冷然行訪黃巖路。風馬雲車乍有無。驚迴清夢

芸窗曙。紅蕤枕畔雁聲高。不知門外烏啼樹。斤竹澗。白雨潭。此中山水心所諳。青鞋布襪終幽探。期翁他

日徑攜我。合掌峯下尋瞿曇。

送王鶴溪先生之粵有感先大父奉使舊事賦呈

江左風流客。扁舟萬里行。春烟六榕寺。殘月五羊城。崖勒新題句。碑留舊使名。憑誰徵往澤。白髮海南生。

惠山僧寺題壁

山翠入江明。山雲出岫輕。半巖開梵宇。一面對春城。虛牖靈風肅。寒潭孤樹清。烹茶懷舊侶。經歲動吟情。

冬杪得邵荻香書

意氣與君同。年年尺素通。離心縈舊雨。鍛翼感長風。置袖沉吟後。挑燈涕淚中。今宵山閣夢。定逐海雲東。

雨夜獨坐有懷荻香

獨聽風檐雨。瀟瀟竟夜寒。劇憐花事減。因憶客衣單。海色侵華髮。春塵敝素冠。欲乘新漲水。放溜到空灘。

無題

唐集

爭引秦娥下鳳臺。且將團扇共徘徊。杏花滿地堆香雪。蓮朶含風動玉杯。綠綺韻高湘女怨。銀泥衫穩越娃裁。良宵更有多情處。玉漏銅壺且莫催。

也同歡笑也同愁。簾下三重幙一鉤。忽展彩牋書別賦。願爲雙鷺宿中洲。蛟綃霧縠籠香雪。錦纜牙檣起白鷗。日暮酒醒人已遠。鳥啼花落水空流。

吳梅村墓

古槩離立陰佳城。祭酒荒阡落日晴。兩代詩名元好問。畢生心事沈初明。留身豈爲前朝史。紀寇彌傷勝國兵。蔓草寒烟餘悵快。玉京遺壘亦榛荆。

藕香讀書資善寺暇日過訪卽事

貓頭新筍秀林扉。宿雨方蘇梅子肥。紅蕊半殘蜂嬾抱。綠牕斜掩燕交飛。讀書新有珠船獲。論古還看玉麈揮。我欲雲亭頻問字。休噴屐齒破苔衣。

婁東道中有懷臥雲舊游

麥花香裏碧溪灣。藹藹浮雲自往還。古寺綠陰飛鳥外。孤村人語夕陽間。曾題薜墨移春檻。憶醉鳧觴疊石山。陳迹磨牛頻悵快。忘機輸與白鷗閑。

雪中過花田

試罷春山第二泉。又披風帽過江天。石橋珠塔花田路。十里叢梅雪打船。

夜過露筋祠

白蓮花落畫橈遲。湖曲微風拂面吹。三十六陂環玉玦。月華涼浸露筋祠。

漂母祠

一飯艱難託釣絲。英雄舍母更誰知。可憐纔奉千金報。已是弓藏鳥盡時。

泃溝過留侯受書處

報韓亡命泃溝里。大索猶憐秦網疎。燔盡六經誅偶語。野橋又授一編書。

汪中

字容夫。江都人。貢生。

蒲褐山房詩話。容夫多聞。記經史金石。悉心研究。嘗得漢石闕畫。以五千錢從寶應。歸其癖如此。性情兀傲。凌轢時人。故人多短之。中年受業於予。欲自比于王給事。念孫及給事子孝廉。引之。暨劉教諭台拱。索予為文。因舉孫樵李潼司空圖行在三絕。為比。容夫喜劇。作書數百言。以謝家故。貧予與畢。總督沅寓書鹽政。全君德俾掌大觀堂所頒四庫全書。因此所入頗豐。及全君移任杭州。又屬其兼掌四湖賜書。容夫赴杭。同人釀錢飲之。大醉。比曉而卒。生平所著有廣陵通典三十卷。春秋後傳二十卷。述學四卷。又選屈宋以下哀艷之文。為傷心集若干卷。比其歿也。子穉。著作皆不可考。阮閣學元僅獲其述學重梓之。劉教諭欲哀其集。亦不能多得也。詩非所長。從淮海英靈集中鈔得一首。秋墳鬼唱亦徐文長董雨若之比也。

辛卯三月二十一日夜和黃仲則 景仁

叢薄風生窗浙浙。夜火欲盡作青色。病客獨坐毛髮立。鬼適何來太相偪。颯然雨落林鳥啼。空堂曳革行來遲。終夜作索心然疑。天明向壁塊然臥。與汝相守能幾時。

李日華

字憲吉。嘉興人。集子。貢生。有青蓮館集。

蒲褐山房詩話。憲吉為同年。釋芻之子。以拔貢入京師。才華籍甚。館於文襄公邸舍。半載而亡。予悼以詩云。青蓮舊館荒蕪盡。白石新詞感慨多。姓名無復填銀榜。詞賦偏教動玉樓。身非金石原難

料筆有詩書定
可傳爲時所誦

試越中新茶

松風吹竹爐。百彼溪水活。愛茲雙鳳團。厥產乃在越。綠花色可餐。紫筍芽乍茁。封題試一開。其氣已秘鬱。我聞苦茶樹。爾雅紛羅列。仙家垂方書。久服換凡骨。顧渚與武夷。歐蔡盛譜述。豈知種獨殊。方物補越絕。始歎千巖秀。鍾毓何葱鬱。憶昔鬪酒兵。蒲萄正新醲。西施乳最甘。銀盤蕝更滑。一食三百杯。豪氣猶蓬勃。露沉月已微。三更起酒渴。都藍列選具。珍重乍拭拂。貯以春甕深。吹以桂火烈。紅雲壓雪碗。乳花初下咽。如御含風袍。清飈生頰舌。迢迢會稽山。勝境徒恍惚。浣紗江清冷。芳草猶未歇。會當一振衣。烹泉坐林樾。

洞溪二賢詩

明巽隱先生程本立

先人代偉人。立身庶完善。正學崇魯鄒。勁節凜冠冕。誠能格象主。法必本經典。屹立彊固姿。喬岳一盱睥。髻年已成器。美質抱瑚璉。廓然大肆志。章句屏蕪舛。問作塵外游。宿儒共循勉。偶訪環中老。爲賦惜日短。蕭寥金華山。學海百川卷。危緒懸一髮。緣督得連舛。出除親王吏。賈韋同華選。諷諫臣心苦。滇洱膺呵遣。道勝無窮居。異俗豈難返。馬判避車輪。鷄神馴闌圈。峩峩西平公。依倚輯緬甸。摩盾一紙書。羅鬼得蘇喘。點蒼與格孤。濃綠浮新鬢。奏計閭闔趨。文章得遷轉。執簡副中丞。視草筵詞苑。豫章綰銀符。靖難更兵燹。

親藩篡逆成。事不睹編簡。平生學何爲。畢命意施坦。同時方練輩。大義共推闡。芟夷一朝盡。清流空京輦。李詎代桃僵。桂不爲蘭免。嗚呼唯先生。全歸獲所踐。絕學開吾邦。奇節不自顯。一編最後出。雷電護蟲篆。信知派別真。異代得流衍。大雅有傳人。異說毋橫胷。

楊園先生張履祥

大道著孔門。忠孝本學術。猗嗟楊園子。曠世挺昭質。乾坤合屯艱。時議方橫出。甘陵南北部。國亡罪未雪。先生顧之憂。沉痛腸內熱。負笈山陰門。大義見削札。如披炎午文。豫祭文山活。齧指棄諸生。哀衣猶裹血。其時羣盜橫。餘殃及枯骨。未就馬鬣封。已毀鴟鴞室。長號迫中腸。匍匐臥坯穴。可憐終身喪。麻衣表短褐。志業晚愈醇。詩書光未竭。元明超等倫。宋賢庶彷彿。卽登先師堂。亦在狂狷列。嗚呼子少孤。荼苦送日月。氣盛志益銳。雜學亦馳突。孤島思傍徨。欹岸足窳窳。翻然指康莊。測景仗圭臬。廻略大荒來。百派辨芒芴。所以古醇儒。始亦墮禪窟。著書多質言。立志絕迂闊。庸行未易敦。往往懲前失。苦思彌和平。憫世釋憤疾。躬耕隱石戶。食力義所切。旣念鞠子哀。復恐正學絕。豈知溘朝露。連會固莫奪。弱息已摧殘。門徒盡蕩析。誰能叫帝關。石破秋雨裂。細思無含辛。終當配前哲。

題馬令南唐書後爲金秀升先生賦

唐祚終三百。藩鎮劇爭鬪。君亡國未亡。正朔在天祐。朱溫篡唐而諸侯仍稱天祐唐未亡也區區五經兒。草竊等窮獸。史臣

操褒貶。歷數著代授。正統尊亂臣。諸國書僭寇。不聞蘭臺書。作紀稱新后。誰將春秋義。更糾歐陽繆。峩峩江南君。淮甸足庶富。鯉魚飛上天。發跡著勞疚。漢中琅邪王。劉馬延餘胄。唐祀苟血食。世系更焉究。慷慨義士懷。亦足慰思舊。國史具勸戒。一代垂法守。江淮盛衣冠。詎可仍闕漏。馬氏綴舊聞。蝨簡拾鼯鼯。千百存一二。哀然稱良構。展卷三摩挲。丹鉛勘句讀。因思建國初。生民望拯救。中原墜塗炭。時哉良難遘。奈何爭彈丸。籌國廿年後。八閩尋干戈。三楚拾顛覆。迨後失淮南。舉肥轉羸瘦。風流繼六朝。詞藻炳文囿。誰歟老學庵。未易校妍陋。謂陸游後來傳十國。茅蕝此先就。吳志伊先生十國春秋多取證此書轉晒帝汴者。蕪史恐遺臭。

程咸九邀過寄圃分賦

薄靄澄空曲。浮嵐入夏清。劇談聯舊雨。前度聽新鶯。春間同春橋先生過此水檻桐侵帽。山廚筍作羹。夕陽銜半嶺。改席策筇行。

竹牖迎涼至。疎籬傍徑開。晚風生薜荔。夜雨熟楊梅。草已三年綠。人今幾度來。忘形到爾汝。把酒坐蒼苔。蹋臂從君慣。疎狂奈我何。坐來風磴久。衣惹露華多。自有觀濠興。空成扣角歌。秋山叢桂發。載酒擬重過。

黃驛

字嶽領。興化人。貢生。官□□知縣。有雙江倡和集。

聽雁

夢醒夜方半。堂虛燈尙然。幾人添別恨。一水隔長天。餘響度雲外。遙情依日邊。莫愁霜雪逼。春色入殘年。
新綠

又隨佳日蔭高齋。日送林於闕正排。幾處落花尋舊夢。一溪流水問生涯。濃分酒色才浮盞。細染苔痕欲上階。便擬臨風過長夏。午陰游戲綠槐街。

陳樹華

字芳林。號冶泉。元和人。由蔭生官澤州府同知。

蒲褐山房詩話。芳林爲吳中名族。祖父皆以詩名。其少時愛左氏內外傳。叅稽攷訂。至老不衰。所著春秋內外傳攷正五十卷。今存於阮芸臺中丞處。詩非所長。亦爲雅令。

蕪湖雨泊

不悟謀生拙。飄然賦遠游。大江奔濁浪。小邑寄偏陬。落落語青眼。悠悠漸白頭。蕪湖風雨裏。淹泊起鄉愁。

游南池用清江楊恪勤公韻

訪友任城道。南池得暫留。亭幽渾忘暑。樹密已含秋。勝迹垂千載。閒吟起百憂。四明齊李杜。主簿亦名流。

杜工部祠在南城外。上石刻有與任城許主簿游南池詩。太白樓在南城上。樓內塑謫仙賀知章像。

王述庵方伯擢少司寇。忽忽北上。送別之後。獨游蘭北寺。追溯春莫邀同人。讌集祀宋牧仲先生。

像于綿津書屋。用壁間元韻唱和。余未及與。撫景興懷。輒繼作奉寄。

送別趨南浦。尋幽過北蘭。花光明曲徑。鳥影落迴湍。薦藻遺容在。焚香丈室安。風流今視昔。不負好雲巒。紛華非素尚。觴咏集閒亭。照水掀髯白。看山潑眼青。會須憐暮景。應亦感晨星。勝賞輸羣彥。江聲此獨聽。

秋草

秋來無復舊萋萋。漠漠平原入望低。關淡尙憐雙蝶舞。淒清偏恨亂蛩啼。纔零白露朝烟冷。試映青袍暮色迷。何處王孫最惆悵。瀟湘江北洞庭西。

國家圖書館



000007916



籍